

近代中國史料叢刊續編第三十一輯
沈雲龍主編

湘藩案牘鈔存

趙濱彥著

文海出版社有限公司印行

近代中國史料叢刊續編

第三十一輯

目 錄

- 湘藩案牘鈔存……………趙濱彥著
- 湘藩案牘鈔存……………趙濱彥著
- 甌海觀政錄……………黃慶瀾著
- 甌海觀政錄……………黃慶瀾著
- 甌海觀政錄……………黃慶瀾著
- 四川善後會議錄……………葉茂林編
- 謗書……………錢祥保著
- 程氏遺稿四種……………何震彝編
- 吳州四程詩文集……………程嵩齡編
- 城西草堂詩史……………程嵩齡編

湘藩案牘鈔存

詳文一

籌設財政公所分科辦事詳文 附簡章及歲用預算清摺

酌定本司衙門吏書筆資詳文

會議諮議局議決整頓擴充省城倉儲詳文

停支各署局處所節獎詳文

擬請就地籌捐修理常德城工詳文

議覆衡清兩縣文生高子良稟利外取利違禁害烈一案

詳文

議覆萍礦局委員赴湖購米詳文

整頓各屬欠解稅契章程詳文

諮議局議決整頓田房稅契查案不符未便遵刊公布詳

文

湘省學款無著擬請酌加川粵淮鹽口捐詳文

續擬印花稅入手辦法詳文

附辦法六條

請將山東試用道劉德沛二品封職劉德馨革職嚴追詳

文

議覆署東安縣汪令朝宗稟籌辦藝徒學堂酌擬章程詳

文

議覆武岡州附生張鴻翼等請設醫院詳文

酌擬裁撤綠營辦法詳文

附章程

申明定章通飭各署局處無論何項官紳均取具切保煙

結詳文

避議修理常德府城工辦法詳文

核議常德李紳壽熙等就地籌捐修理城工經費辦法詳

文附辦法八條

擬請裁減飛翰水師五營暨選鋒十營舢板巡勇詳文

會議穀米開禁及加收湘省賑糶墊款捐詳文

會議土膏牌照捐仿照蘇粵辦法酌擬細則章程並頒發

關防詳文 附章程細則

湘省學款無着酌加川粵淮鹽口捐既經諮議局議決擬

請仍照原詳辦理詳文

擬請規復衡寶兩岸配銷免收各項詳文

續擬規復衡寶兩岸配銷免收各項按照通岸辦法詳文
遵議湘省穀米弛禁辦法並無與約章不合詳文

會議分撥湖南粵漢鐵路公司鹽米各款無庸逕解仍照
舊章辦理詳文

會議高等實業學堂暫借銅元局及鍊鉛廠爲實習工場
擬請暫緩接收詳文

會議兩湖米捐改辦五口辦法詳文

附條件

會議擬將沅江官田淤荒暨新河兩岸地皮田畝作價抵
還善後局虧欠官錢局款項詳文

遵議安福縣彭令杰墀稟將稅契改歸自治所報繳酌提
捐款一案詳文

會議寶岸淮鹽分局加收牌價情形及六項捐款詳文

另擬辦理供應章程詳文

附章程

議覆全裁綠營發給餉票遵批辦理詳文


議覆常德府譚守承元等會稟訛追劉恒慶延欠官款詳文

核擬撥還官鑛總處借款銀兩詳文

遵議武陵縣廖令世英稟抽中費開辦學堂詳文

湘藩案牘鈔存第一冊勘誤表

頁數	行數	字數	誤字	改正
四十七	二十一	十一	塾	塾
五十二	二	二十四	同	稟
五十六	二十二	二十 <small>捐字下脫落</small>	總 <small>字</small>	
九十一	十九	四	歸	厯
九十四	十三	一 <small>具字下脫落</small>	有 <small>字</small>	
九十四	十四	十七	岸	案
百零一	十	十四 <small>官字下脫落</small>	錢 <small>字</small>	
百零四	七	九	繫	係



湘藩案牘鈔存

詳文一

籌設財政公所分科辦事詳文附簡章及歲用預算清摺

爲詳請

奏咨立案專案查接管卷內奉

前憲岑札准

度支部咨開本部具奏各省財政統歸藩司以資綜核一摺宣統元年四月初六日具奏本日內閣奉

上諭度支部奏各省財政宜統歸藩司以資綜核而專責成一摺各省財政頭緒紛繁自非統一事權不足以資整理嗣後各省出納欸目除鹽糧關各司道經營各項按月造冊送藩司或

度支使查核外其餘關涉財政一切局所着該督撫體察情形予限一年次第裁撤統歸藩司或度支使經管所有款項由司庫存儲分別支領卽由各督撫飭該藩司等將全省財政通盤籌畫認真整頓仍著度支部隨時考核分別勸懲以副綜核名實之至意欽此相應刷印原奏恭錄

諭旨咨行到湘札司欽遵辦理等因奉此湘省本應依限趕辦因本年三月內省城荒亂籌辦善後事務殷繁經莊前司稟奉憲台電奏展緩三個月奉

旨允准欽遵轉行在案按照展緩之期原應七月成立值譚前署司在任未久旋卽交卸本司於六月二十七日到任甫經接事頭緒紛繁清理月餘始克漸有端緒伏查財權統一爲清理

財政之基礎未便稍涉延誤湖南糧道早經裁缺歸併藩司經管鹽關各道近亦遵照

部章按月造冊報查此外管理財政各局以善後牙釐兩局爲總滙之區現在籌謀統一應將善後牙釐兩局裁併其附屬於善後局之籌賑墾務官運報銷各所應卽一律歸併由司經理其不關財政附屬善後局之軍裝所應撥歸兵備處管理以清界限惟是藩司用人理財責任本極繁重今以各局所之事歸併一處如非執簡馭繁深慮稽延叢脞自應設立公所分科治事擬就藩司署內設立財政公所分爲六科一曰總務科掌管機密文電函牘統計調查爲民政財政之總滙不隸於各科之事皆屬之一曰行政科掌管民政一切事宜凡關於吏治銓敘

承襲典禮之事皆屬之一曰田賦科掌管本省各廳州縣地丁
漕南驛站耗羨蘆課官租雜賦及清丈升科造辦奏銷蠲緩考
成核算交代各事宜一曰筦權科掌管鹽茶百貨釐金田房印
花牙當各稅煙酒賑捐雜捐各事宜一曰制用科掌管撥解京
協各餉部款洋款支發養廉俸工薪水及水陸防綠新軍各營
餉乾雜支各事宜一曰會計科掌管綜核公所收支銀錢簿記
及造辦報銷一切庶務事宜以上六科應派員分司其事庶得
各專責成免誤事機當此財政支絀之時設科用人不能不力
求核實現就各科事務之繁簡擬定員數之多寡各科書記員
繕寫生亦暫行酌定如果政務繁多趕辦表冊非添寫生不可
仍隨時酌量添雇總以款不虛糜事無廢弛爲一定不易之辦

法第歸併之始綜核不厭求詳本司責有專司原不敢稍存怠
忽但一人之精力有限竊恐耳目難周未能貫注擬請由司詳
委熟悉財政之候補道二員在公所幫同籌畫仍由本司總其
成俟日後辦理就緒卽行酌量請裁約計全所薪費歲需省平
銀七萬零四百六十四兩本司衙門及善後牙釐兩局原有經
費銀八萬零七百餘兩以此抵支每年尙可撙節銀壹萬二百
餘兩至歸併之後各科員數既多原有房屋實不敷用尙須就
署內北面隙地推展惟庫藏空虛建築費尙須籌畫應俟勘估
明確再行呈請

核示其財政公所未設以前田賦筭糴制用會計四科暫借善
後局爲辦公之地均於九月初一日實行成立除將各科長員

銜名另文詳報外所有籌擬統一財政歸併局所分科辦事酌定用款各情形理合將辦事簡章及歲用預算分別開摺詳資憲台俯賜察核

奏咨立案 宣統二年七月

籌設財政公所分科辦事簡章

第一條 統一財政係欽遵

諭旨辦理以全省出入款目皆歸藩司掌管全省收支數目自應皆由司署經理以符統一之宗旨

第二條 設立財政公所所有善後報銷牙釐籌賑各局事務統歸公所由藩司主持以一事權一切公牘均用藩司印信不另刊刻關防

第三條 藩司綜理全省財政事務繁重竊恐初時歸併未能貫注擬仿照江蘇四川山東辦法由藩司稟請

撫憲派委熟悉財政候補道二員在公所爲幫辦一管收款一管支款

第四條 軍裝所向係附屬善後局現在設立財政公所應將軍裝所撥歸兵備處管理以資節省

第五條 通省欸目除道庫關庫應凜遵

諭旨按月列冊造報外其餘司道局處凡有出入欸項皆應歸司查核各處按月預算列表支領下月決算列表報銷表冊程式均應一律整齊以免參差

第六條 川淮鹽口捐漕淮鹽釐一文四文加價江防經

費緝私局用凡向由宜昌川鹽局及淮鹽督銷局經收應解善後局者並各項稅捐向不隸於善後牙釐關署局者均一律解歸司署供支

第七條 藩司掌管民政財政應於署內設總務科以爲總滙機關設行政科以分管民政於財政公所內設田賦筭權制用會計四科專管財政事宜

第八條 財政公所卽就藩司衙門北面空地修建並將原有辦公房屋略加修葺劃歸公所作爲各科辦公之處以節經費

第九條 總務科爲各科之總滙設科長一員分三股
一秘書股 掌機密重要文電函牘並由藩司提派屬

於各科課之事及承辦籌備憲政事宜擬設一二等科員各一員一二等書記員各二人一等繕寫生一人

二收掌股 掌收發文件提要分送督催並核對監印各事宜擬設一等科員一員二等科員三員二等書記員二人二等繕寫生三人

三統計股 掌民政財政預算決算一切表冊及核辦禁煙表各事宜擬設一等科員一員二等科員二員一等書記員二人二等書記員四人一等繕寫生三人二等繕寫生三人

第十條 行政科管民政以及財政以外藩司職權所轄

事件設科長一員分二股

一銓叙股 掌文職各官升調補署丁憂起復病故叅罰迴避及緣營武職世職承襲發標及祠祭旌表一切關於典禮各事宜擬設一二等科員各一員一二等書記員各二人一等繕寫生三人二等繕寫生五人

二民事股 掌戶籍圖制營造詞訟各事宜擬設二等科員二員二等書記員二人二等繕寫生二人

第十一條 財政公所分立四科職掌如左

一田賦科 分三股設科長一員總管本科各股事務
地丁股 掌地丁起存驛耗蘆課雜賦租課學租並

蠲緩奏銷撥冊清丈升科墾務各事宜擬設一等科員一員一等書記員一人二等書記員三人一等繕寫生二人二等繕寫生三人

漕糧股 掌漕南漕雜屯衛兵米各項倉穀并蠲緩奏銷撥冊各事宜擬設二等科員一員一等書記員一人二等書記員二人一二等繕寫生各二人

交代股 掌核算道府州廳縣交代一切事宜擬設一等科員一員一二等書記員各一人一二等繕寫生各一人

二筭糶科 分三股設科長一員總管本科各股事務

釐捐股 掌通省鹽茶百貨釐金及木釐補抽口捐

官運江防經費緝私局用岸費等事宜擬設一等科員三員一等書記員二人二等書記員四人一二等繕寫生各一人

雜稅股 掌通省田房稅契收發契紙牙帖當稅礦稅藥釐煙酒印花稅等事宜擬設一等科員二員二等科員一員二等書記員二人一二等繕寫生各一人

稽核股 掌各局收發釐票編查印紙核算繳驗經驗各票核計功過等事比較各局釐稅收數長短等事宜擬設一等科員一員二等科員二員二等書記員十人二等繕寫生一人

三制用科 分兩股設科長一員總管本科各股事務
俸廉股 掌文員廉俸工食雜支各項薪水各署局
學堂辦公經費等事宜擬設一等科員一員二等
科員三員一二等書記員各二人二等繕寫生四
人

餉需股 掌京餉協餉部欸洋欸武員廉俸水陸防
綠新軍餉乾及賑務修理工程刷印文件一切支
應事宜擬設一等科員二員二等科員二員一等
書記員三人二等書記員四人二等繕寫生三人
四會計科 分三股設科長一員總管本科各股事務
收支股 掌銀錢收支流水分欸簿記事宜擬設一

等科員二員二等科員二員三等科員三員一等
書記員一人二等書記員二人一二等繕寫生各
二人

報銷股 掌稽核欸目辦理報銷事宜擬設一等科
員一員二等科員一員三等科員一員一等書記
員一人二等書記員四人一等繕寫生二人二等
繕寫生三人

庶務股 掌一切庶務辦理雜務各事宜擬設二等
科員一員二等繕寫生一人

第十二條 各科科長專管一科之事科員專管本股之
事均承藩司之命令

第十三條 無論重要尋常文件由收掌股收發科員隨到隨送藩司幫辦查閱後分送各科核辦如傳觀文件須隨到隨閱以三小時爲度逾時收回關係財政事宜皆本公所之責先送幫辦核定卽送藩司判行其用人行政與財政無涉者仍呈送藩司核辦以清界限

第十四條 凡已經分科之事應各歸各科承辦此科與彼科有交涉事件須和衷商辦不得交相推諉亦不得各存意見

第十五條 各科應辦之事均分別登記各署局未經具覆之件由各科隨時送稿行催解欸統由會計科分股列收列支按月將收支實存數目開摺呈藩司幫辦查核應

解未解之款亦由該管科開單送稿行催并每月分類列表送統計股彙辦統計

第十六條 各科公事緊要者應由科長或科員起草其餘公牘例稿均由書記員擬稿呈由科長科員覆核送判承辦科員蓋銜名戳記科長蓋用圖章

第十七條 書記寫生均須考選分派各科案卷表冊簿據應責成各科科員督同書記員掌管繕寫生專司謄寫稿件呈判繕籤後均歸收掌股核對印發稿卷均發交原科歸檔不得遺失

第十八條 公所各科人員不准兼外局差事有在本公所兼差者只支多額薪水不支兼薪

第十九條 各科書記員以下均受科長員之監督指揮
考核勤惰勤者稟請嘉獎惰者稟請更換

第二十條 收掌股收發文件應分別重要次要常件三
項登記入冊自發科以迄送稿常件不得逾七日要件不
得逾五日重要不得逾三日緊急最要之件即日發行收
掌股有督催之責

第二十一條 科長科員到公所辦事春季八時起至
四時止夏秋季七時起至四時止仍應設立考勤簿將每
員到所時刻及辦過事實登記呈閱

第二十二條 各科事務繁簡不一事簡之科其科課員
可以幫辦他科他股事務藉收通力合作之益

第二十三條 財政公所經費約數列左

幫辦 每員月薪銀二百兩

科長 每員月薪銀一百兩

一等科員 每員月薪銀六十兩

二等科員 每員月薪銀四十八兩

三等科員 每員月薪銀二十五兩

一等書記員 每員月薪銀一十六兩

二等書記員 每員月薪銀一十二兩

一等繕寫生 每人月薪銀八兩

二等繕寫生 每人月薪銀六兩

第二十四條 各科員生以事之繁簡定之如趕造冊籍

事多仍酌量情形隨時加派以免遲誤本章程如有應行修改之處隨時呈請

撫部院核定施行

設立財政公所歲用預算清摺

計開

幫辦二員

每員月支薪水銀二百兩

總務科 分秘書收掌統計三股

科長一員

月支薪水銀一百兩

秘書股

一等科員一員

月支薪水銀六十兩

二等科員一員

月支薪水銀四十八兩

一等書記員二員 每員月支銀一十六兩
二等書記員二員 每員月支銀一十二兩
一等繕寫生一名 月支薪水銀八兩

收掌股

一等科員一員 月支銀六十兩
二等科員三員 每員月支銀四十八兩
二等書記員二員 每員月支銀一十二兩
二等繕寫生三名 每名月支銀六兩

統計股

一等科員一員 每員月支銀六十兩
二等科員二員 每員月支銀四十八兩

一等書記員二員 每員月支銀一十六兩

二等書記員四員 每員月支銀一十二兩

一等繕寫生三名 每名月支銀八兩

二等繕寫生三名 每名月支銀六兩

行政科 分銓叙民事二股

科長一員 月支銀一百兩

銓叙股

一等科員一員 月支銀六十兩

二等科員一員 月支銀四十八兩

一等書記員二員 每員月支銀一十六兩

二等書記員二員 每員月支銀一十二兩

一等繕寫生三名 每名月支銀八兩

二等繕寫生五名 每名月支銀六兩

民事股

二等科員二員 每員月支銀四十八兩

二等書記員二員 每員月支銀一十二兩

二等繕寫生二名 每名月支銀六兩

田賦科 分地丁漕糧交代三股

科長一員 月支銀一百兩

一等科員二員 每員月支銀六十兩

二等科員一員 月支銀四十八兩

一等書記員三員 每員月支銀一十六兩

二等書記員六員 每員月支銀一十二兩

一等繕寫生五名 每名月支銀八兩

二等繕寫生六名 每名月支銀六兩

筭糧科 分釐捐雜稅稽核三股

科長一員 月支銀一百兩

一等科員五員 每員月支銀六十兩

二等科員四員 每員月支銀四十八兩

一等書記員二員 每員月支銀一十六兩

二等書記員十六員 每員月支銀一十二兩

一等繕寫生四名 每名月支銀八兩

二等繕寫生八名 每名月支銀六兩

制用科 分俸廉餉需兩股

科長一員

月支銀一百兩

一等科員四員

每員月支銀六十兩

二等科員四員

每員月支銀四十八兩

一等書記員五員

每員月支銀一十六兩

二等書記員六員

每員月支銀一十二兩

二等繕寫生七名

每名月支銀六兩

會計科 分收支報銷庶務三股

科長一員

月支銀一百兩

一等科員三員

每員月支銀六十兩

二等科員四員

每員月支銀四十八兩

三等科員四員 每員月支銀二十四兩

一等書記員二員 每員月支銀一十六兩

二等書記員六員 每員月支銀一十二兩

一等繕寫生四名 每名月支銀八兩

二等繕寫生六名 每名月支銀六兩

統計幫辦二員每員月薪銀二百兩每年共銀四千八百兩

科長六員每員月薪銀一百兩每年共銀七千二百

兩

一等科員十八員每員月薪銀六十兩每年共銀一

萬二千九百六十兩

二等科員二十二員每員月薪銀四十八兩每年共

銀一萬二千六百七十二兩

三等科員四員每員月薪銀二十四兩每年共銀一千一百五十二兩

一等書記員十八員每員月薪銀一十六兩每年共銀三千四百五十六兩

二等書記員四十六員每員月薪銀一十二兩每年共銀六千六百二十四兩

一等繕寫生二十名每名月薪銀八兩每年共銀一千九百二十兩

二等繕寫生四十名每名月薪銀六兩每年共銀二千八百八十兩

火食月支銀六百兩每年共銀七千二百兩

聯票紙張筆墨油燭煤炭一切雜用月支銀六百兩
每年共銀七千二百兩

門號茶厨親兵雜役辛工月支銀二百兩每年共銀
二千四百兩

總共月支銀五千八百七十二兩

統共年支銀七萬零四百六十四兩

遇閏全年銀七萬六千三百三十八兩

原有

藩署銀一萬七千八百五十六兩

牙釐局銀四萬零七百八十二兩

善後局銀二萬二千零九十七兩

共收銀八萬零七百三十五兩

撫院批已據詳核明恭摺具

奏并咨請

度支部查核立案矣仰卽飭承查照底冊照錄一分資轅備案
此繳清摺均送

酌定本司衙門吏書筆資詳文

爲詳請立案事竊維居官之道固須潔已奉公馭下之方尤在
防微杜漸本司蒞任以來卽以整飭官方剔除奸弊爲首務顧
去弊必自近始故所用家丁僅擇其樸實謹愿者六人以供奔
走均各優給辛工不惟不准收受屬員分文抑亦不能干預公

專前經本司訪聞得缺人員每於掛牌之後向有致送家丁道

喜錢文謂之門包業經本司手諭官廳通飭各屬一律嚴禁此

外如另有他項名目爲本司所未查知者均一律永遠禁革以

期弊絕風清惟家丁而外尙有書吏訪查各房平日承辦公件

無不有費如吏房之補缺署事繳憑考驗以及請咨赴引回籍

修墓年滿甄別丁憂起復註冊考吏等事或率由舊章或隨時

論費多則五六十串少亦十餘串至二三串不等名目既極冗

雜訛索亦無定程苟其不遂所求便思設法拖宕藪奸叢弊殊

駭聽聞從前缺分較優士紳豐厚雖取之太過或尙不爲所苦

近則平餘議提地方日瘠自好之士辦公尙虞不給安有多款

以供無厭之求第因事有常規遂爾相率隱忍夫書吏乃在官

人役原以抱贖承行非所應得之錢自不能不去其太甚現在
遵奉新章籌設度支公所分科辦事擬擇其舊有書吏之謹飭
明白者酌量改派書記寫生以供檢卷繕寫給其工食優以出
身所有田賦漕糧收支均應改歸公所既經改定章程即可杜
其需索之弊惟查擬改之銓選課卽爲現在之吏科改設向來
補缺等費出自各該員所願給尙非詐欺妄取者可比若概予
革除在書記員固應砥礪廉隅而繕寫生抄寫終年辛工無幾
倘並此筆墨之資而無之似不足以示鼓勵與其巧立名目仍
歸陽奉陰違曷若化私爲公轉得申明約束擬卽仿照鄂省辦
法仍留補署到省驗看註冊丁憂起復等項紙筆費酌定限制
除正班補缺仍照上中下三等酌給筆資及繳照繳咨認識印

結兩款原定給錢二串不減外其餘承辦一事每項祇准取錢四串如有駁查詳覆不得另行再取分文至各房應給門丁一切使費又刑房支領各屬囚糧藥餌扣給門房內費均行永遠禁革如再有意外需索一經發覺卽行從嚴懲辦以儆將來除懸牌曉諭並通飭各屬遵照一面查明其餘各房如有需索再行嚴禁外所有酌定吏書筆資以杜婪索緣由理合詳請

憲臺俯賜查核批示立案

宣統二年八月

督院批既據並詳希候

撫部院核示遵行此復清摺存

撫院批如詳立案仍候

督部堂批示繳清摺存

會議諮議局議決整頓擴充省城倉儲詳文

爲籌議詳復專案查前奉

憲台札據諮議局呈稱湖南素稱產米之區東南各省皆賴接濟去歲濱湖州縣盡成澤國長寶各屬又復歉收然自秋成後至今年阻禁數月內出口之米已二百萬石及省城以米貴釀鉅變常德重遭水災救亂振荒不遺餘力而由外省採運來湘之米不及二十萬石視出口之數僅十之一是知以湘米供湘食雖甚歉之歲無憂缺乏所患者事不預備蓋藏空虛耳省城爲全省根本果使倉儲充實足支半年更有餘糧以應各屬一遇青黃不接開倉出糶市價自平若有水旱偏災朝令夕發不煩再計人人知有恃無恐一切囤價居奇遏糶鬧荒之事自無

由生善後之亟無逾此者現在年穀豐歉雖不可知而秋後填倉決無不足儲穀百萬石值二千錢需銀不過百餘萬除平糶所餘及舊有食穀外度不過數十萬或由善後經費提撥專款或息借鉅款分途採辦由所籌之款分年攤還從容佈置諒非難事更復填補各屬常平倉以復定章整頓省城各公倉以爲補助以懲前愆後之計爲一勞永逸之謀非獨省城賴以安全實全省蒙其樂利除善後籌款已另提專案外所有整頓擴充省城倉儲一案經本局再三討論公同議決理合申叙緣由備文另摺呈候裁奪公布施行計呈清摺一扣前來本部院詳加核閱該局議決原案擬就省城官倉公倉實力擴充儲穀一百萬石以備振糶之用並擬就省城三倉認真整頓另由商會會

同公正紳耆息借銀十萬兩暨酌提全省公款推廣倉儲其各屬常平倉及歷年借用省城倉穀一律規復歸還各節是否可行應由布政司會商善後局籌賑局地方自治籌辦處商務總會公同妥速籌議切實辦法具復核奪等因行司奉此當經善後局分別移商去後迄今日久未據商會籌定辦法稟復前來事關荒政應由司處先行議復遵查省城府縣官倉穀石前因撥發賑糶存儲無多業經由司委員分赴南洲華容安鄉沅江澧州一帶將上年借給堤費暨歷年平糶穀價催齊採買運省填補一面並將各屬歷年所借省穀查明嚴札催繳現已據該印委等陸續運解抵省常平倉穀並經本司節次批飭各屬遵照

奏案設法規復均與該局議決之第一第二兩條適相吻合至
湘社湘義儲備三處公倉向由紳士經營雖存穀多寡不同而
事關公益利害實切乎紳民今諮議局擬就公倉認真整頓另
由商會會同公正紳耆息借銀拾萬兩暨酌提公款推廣倉儲
各節均係慎重民食有備無患起見應請照准公布仰懇
憲台札飭長沙府會督商會暨各公倉紳董切實辦理所有遵
札議復緣由理合具文詳請

憲台俯賜察核批示

宣統二年九月

撫院批已照詳飭行諮議局查照矣仰卽知照此繳

停支各署局處所節獎詳文

爲詳報事竊查湘省各署局處所委員月支薪水之外向有節

獎一欸約計每節需錢壹萬餘串當時原因各委員薪水微薄故按節提獎薪費津貼本係一時權宜之計並非作爲例支之欸現值清理財政迭奉

大部飭令將歲出各欸切實釐剔認真裁汰此項節獎名目造報既多窒碍各省亦所罕見亟應先行裁除以爲改良收支之基礎查目下各處委員薪水大半改給銀兩量事體之繁簡定薪金之等差較從前原領數目實已有增無減際此物力艱難新政繁興應付洋欸餉項及一切緊要之需東挪西湊實屬困難萬分擬請自宣統二年秋季止所有各署局處所委員人等節獎卽行一律停支以節經費而重庫欸除分別移行外相應

詳請

憲台俯賜察核批示祇遵

宣統二年九月

撫院批據詳已悉查節獎理由自爲獎勵勤慎從公之員現因財政困難擬一律停支以節經費亦當爲各寅僚所共諒也仰卽分別移行遵照此繳

擬請就地籌捐修理常德城工詳文

爲詳請

奏咨事案奉

憲臺批據胡道鑑瑩會同常德府譚守武陵縣胡令官錢分局章倅稟勘估常德被水衝潰崩裂各城垣工料數目列表呈核暨就地碍難籌款一案奉批會稟並表均悉此次常德被水沖潰崩裂各城垣經道府督率員紳周歷履勘核實估計修築工

料連同原估共需錢三十四萬餘千就地既碍難籌款而城已潰裂明歲春水發生尤屬可慮雖公款異常支絀亦未便置爲緩圖且此係以工代賑將來歸入工振彙核辦理仰布政司會同籌賑局迅速妥商核議籌撥俾可早日興工以杜後患是爲至要切切此繳表併發等因併奉抄發原稟下司奉此查此次常德被水冲潰崩裂各城垣經胡道等核實估計除上年原估錢十二萬八千三百餘串外應加錢二十一萬五百餘串設局費用尙未在内常德係西路重鎮城工爲全郡保障民命所關至爲重要誠如

憲批未便置爲緩圖惟各省修理城垣向應民籌民辦與官堤官修者不同近來公家財力本極困難加以奉行新政迭辦災

振杼軸久空積虧甚鉅前因展收西路行銷淮鹽一文捐緩難濟急飭由官錢局暫行籌墊已覺輾轉挪移極形支絀此次加估錢文如果專恃公家籌給撥濟何能有此力量常德地方繁盛殷富最多該紳民等身家性命所關亦未便任其漠視本司籌維再四前項城工除原估錢一十二萬餘串仍由常德官錢分局暫行籌墊支領俟鹽捐收有成數陸續歸還外此次加估錢二十一萬餘串應請

憲台

奏咨立案一面由司遴選殷實老成紳士會辦城工就地籌捐以免有誤要工茲查有該郡紳士分省補用道李紳壽熙湖北試用知府蔣紳謙老成殷實鄉望素孚應請由司照會該紳等

會辦常德城工就地籌捐收獲捐款隨時解交官錢分局另款存儲聽候撥用如有慨捐鉅款者並由該紳等知會府縣專案稟明

憲台

奏請

特予優獎以示鼓勵一面趁此冬令水涸之時應由譚守等會同李紳等先將應行折修城垣及加修石櫃照估興修萬一捐款不敷卽由李紳等會同地方官紳籌庶設法借墊將來連同官錢局墊款卽於鹽款一文捐內按成分年攤還以免延誤除移岳甯澧道並分飭該府縣官錢分局暨照會李蔣兩紳遵照外所有常德城工加估錢文擬請就地方籌辦緣由理合詳請

憲台俯賜察核分別

奏咨批示祇遵

宣統二年九月

督院批查此案曾經欽奉

寄諭當將原呈抄送

南撫院查照核辦在案據詳前情仰候

撫部院會核辦理此繳

撫院批現在欽奉

寄諭已會同

督部堂轉行矣仰卽遵照另檄辦理再胡道等稟呈工料數目表前經批發應卽繳院以備考查此繳

議覆衡清兩縣文生高子良稟利外取利違禁害烈一案

詳文

爲核議詳覆事案奉

憲台批據衡陽清泉兩縣文生高子良等稟利外取利違禁害烈公懇飭示等情一案奉批查借債以原借本金爲準借錢還錢借銀還銀銀錢價值漲落靡常以銀折錢以錢折銀均應按照時價應還錢者債主固不得以從前錢貴照原借時錢合銀數收銀應還銀者欠戶亦不得以現在銀貴照原借時銀兌錢數還錢此一定不移之理也仰布政司體察輿情妥議詳覆再行通飭遵照此批原稟抄發等因奉此仰見

憲台鑑空衡平折衷至當之至意曷勝欽服本司遵查人事之變遷靡定物價之漲落無常必按時值以取償庶足以杜紛爭而昭平準民間借貸不外銀錢洋元三種其時價雖有高低而

所借或係銀數或係錢數或係洋數自應各照本位歸還如欲以銀折錢以錢折銀亦應各按現在時價扣算斷不能以今日所還之債欸按照昔日之時價折扣譬之經商其囤積之貨有貴入而賤出者有賤入而貴出者或贏或虧事前本無把握要視出售時之價值爲準必無今日價賤卽照往日之貴價出售之理此事雖殊理無二致本司查核該生等稟詞大抵因今日銀價較昂擬照往日時價折算殊不思現在銀價若賤於昔日彼能照數貼補乎本司體察輿情仍不外借錢還錢借銀還銀較爲公允擬請嗣後借貸之人如能按照原借本位歸還彼此固無異議倘借錢還銀借銀還錢不論今昔時價若何一律須照歸還時之本價折算以免兩相爭執仍俟奉

批後通飭各屬遵照辦理所有遵批核議緣由是否有當理合具文詳請

憲台查核示遵 宣統二年九月

撫院批如詳通飭各屬一體遵照此繳

議覆萍礦局委員赴湘購米詳文

爲詳覆事案奉

憲台札開本年八月十一日准

盛大臣蒸電內開頃接萍礦林道電稱礦工人衆湘籍居多萍米不敷工食向賴湘米接濟現倉儲將罄急須預購惟湘省米禁未開請電商湘撫憲畧事通融轉飭各釐卡征釐驗放以萬石爲度俾安衆心等語查萍礦係屬贛界礦工大半皆係湘人

界連兩省向爲匪類出沒之所倘工食缺乏不特譁潰堪虞且恐別滋事端伏乞俯念地方緊要民食攸關准如所請以萬石爲度湘省歲稔糧價大平似亦兩益請卽飭經過釐卡照章征釐查驗放行礦安則湘界亦安實緞公誼等因到本部院准此合亟札飭札到該司卽便會同善後局妥速核議辦法詳覆察奪毋延等因奉此查此案續奉

憲台發閱北京

盛大臣號電內開萍礦缺米情形急迫湘省年豐米賤萍礦昆連購運兩益現數僅壹萬石似尙不難開導等因當經司局會商湘省連年被災蓋藏空虛惟萍礦工米相需甚殷係屬實情不得不設法變通由司發給護照准予照數採運壹萬石經過

醴陵局完釐放行電復去後嗣准總辦萍鄉煤礦處林道咨稱
派委員吳章在省承辦並請頒發護照給領應用前來業經繕
發護照拾張每張註明計米壹千石發交吳委員承領備用並
因湖省連年水災穀米一項刻尙嚴禁出口此次萍礦准採米
壹萬石係屬通融辦法既經商定以購運壹萬石爲限並應委
員會同稽查以示限制而符原案除札飭湘潭官錢局委員蕭
詠恩會同吳委員切實稽查將萍礦局購運米石數目按日記
明呈報查核並飭湘潭醴陵各釐局遇有前項米石經過呈驗
護照相符照章抽釐放行外理合具文詳覆

憲台俯賜察核批示祇遵

宣統二年九月

撫院批據詳已悉仰卽移行遵照此繳

整頓各屬欠解稅契章程詳文

爲詳明事竊照各屬交代歷有定章凡錢糧庫雜以及田房牙稅等項均應列入交單資司核辦自光緒二十七年整頓稅契改用三聯契紙詳定稅契專章將各屬征解契稅一切事宜撥歸釐局辦理如遇交卸責成後任將前任征解數目查明有無虧短專案報局查核倘有虧短卽作爲交代未清仍由局彙案移司分別札催委提並照章停其差委署缺是稅契之征解雖不列入交代正案冊籍而虧欠仍與正欸並重定章本極詳明乃近來各屬征收稅契因未入交代正案停委章程亦未實行任意虧挪拖延不解本年三月間曾經釐局清查會詳議請列入交代並開單移司應行委提者共十數州縣總計欠欸積至

四五萬兩之多甚至有延欠年餘數盈鉅萬者直視公款爲兒戲寔屬不成事體當此籌備憲政需款浩繁庫藏空虛點金無術支撥一切萬分爲艱之際欽遵

諭旨統一財權將釐善兩局歸併藩司設立公所若不就原有之款澈底清盤懲前毖後從嚴整頓詳定辦法幾至無從下手除從前積欠各款業經委員分別守提再勒限一個月解清如敢違延卽行據實詳請分別撤叅從嚴追繳外以後各州縣經征應解田房稅契以及印花各稅款均應隨徵隨解由公所經管科員每月清查一次將未到各處開單請催上季收款下季未到卽行委提並於交代清單添列雜稅一項遇有交卸責成後任稽核與正款并重查未解清不得贖徇混出總結如遷延

不解一面委員守提一面停其差委卽調署人員亦不准赴任
雖交代正案原列各款業已解清仍將冊結扣留俟雜稅各款
一律清完始行出詳延至二叅屆滿卽照例叅追似此辦理庶
各知自顧考成不敢仍前延玩除通飭各屬并刊刷成本以後
遇有委缺人員與原訂各項交代章程隨同委札頒發一體遵
辦外合將整頓稅契緣由具文詳請

憲台俯賜察核批示祇遵

宣統二年九月

諮議局議決整頓田房稅契查案不符未便遵刊公布詳
文

爲查案詳明請示祇遵事案奉

憲台札發核准諮議局呈送覆議議決整頓田房稅契議案一

件飭卽排印成帙通飭各屬遵行等因奉此本司因各屬征收稅契銀兩係撥抵新案償欸及練兵經費並抵補土稅不敷事

關
國稅欸須報

部不得不詳加審慎然後刊發公布期無流弊以利推行遵取奉發議案悉心核閱如原議甲丙兩章各條慮周藻密洵足杜絕匿稅報告一切弊端惟乙章內第一第二第五各條似尙有應行斟酌之處敬爲我

憲台縷晰陳之如第二條原議因契價用洋銀者如何征收尙未明示標準仍不免上下其手嗣後每契價壹元作銀六錢八分扣兌一節雖係按照省城錢業通行易銀市價酌定若以原

定契價每錢一串作銀六錢互相比較仍不免有所軒輊蓋洋元目前時價每元易錢一千三百餘文若照原定每錢一千作銀六錢核算則洋元似應作銀七錢八分方昭平允惟查光緒三十年通飭定價其時街市錢價在六錢以外故每契價一串從輕酌定爲作銀六錢近年銅幣暢行錢價日落常年市價總在五錢一二分上年復奉

部章增至九分收稅民力拮据卽上中各戶置產之後措繳稅款均不免有時爲難本司擬請從減改爲每契價一千作銀五錢洋銀一元作銀六錢五分扣算免致畸輕畸重藉示體恤而紓民力至第一條請援照湘陰新化勸學所承辦稅契成案一律改歸地方自治公所暨將來之董事會承辦一節檢查檔案

新化僅有宣統二年據該縣張令駿基轉據邑紳陳顯廷等稟請每契紙一張價在四十千以上者加收銀三錢以充學費經莊前司會同提學司議覆減爲每紙加收銀二錢其中並無由勸學所紳董承辦之語湘陰係於光緒三十一年據該前署縣王令以宣遵奉

前憲端札飭據邑紳仇道南等稟請倣照湘潭辦法由學務辦公所在縣承領三聯契紙分派各鄉凡民間置產買紙由各鄉彙報學務辦公所轉報地方官蓋印免致書吏家丁及買主從中舞弊復調查湘潭縣原案係於光緒二十八年該前署縣沈令贊颺任內據邑紳王時邁等稟請於原有育嬰業捐每契價銀百兩抽收五錢之外再加抽三錢作爲學費所擬條規亦祇

有契紙發交團紳分領由保甲局總其成學務育嬰共派司事
駐局管收業捐均無由紳董經收稅款之事若如此次發下諮
議局議案一章第一條及第五條所載承辦經征稅銀除截留
學堂巡警一分外隨征隨繳等語是以後直歸紳董經收各州
縣固難保不藉口推諉而經收之紳董賢否難齊侵蝕挪移恐
更爲事所難免州縣經征遇有虧挪尙畏撤參追繳不得不設
法措解自願考成改歸紳收萬一私虧在有身家者猶可將其
產業查封備抵若偏僻州縣之紳董多半生監承充類皆寒素
無可著追又將如何究詰卽如烟酒稅原定章程歸本地方紳
商包征包繳率皆藉詞延宕每年解到款項往往不及定額之
半前車可鑒流弊無窮况稅契爲報

部要需其性質係屬

國家稅與地方稅不同遵照

憲政編查館示似非諮議局所應議卽因內有學務警察附加之款恐書吏從中弊混亦祇可如湘陰湘潭等處成案將契紙由自治公所及董事會分發各團承領酌定互相箝制稽查之法斷不能改歸紳董經收有碍要需本司管理財政責有專歸當此新政繁興積虧過鉅庫儲支絀籌撥萬分爲難之際倘向有入款因更張而有所虧短若奉

部詰實不敢當此重咎應否發交諮議局另行妥議更正抑或
由司調查各省現辦情形再行參酌核議之處伏候

示遵緣奉札飭合將查案不符未便卽行遵刊公布緣由具文

詳請

憲台查核批示祇遵

宣統二年九月

湘省學款無著擬請酌加川粵淮鹽口捐詳文
爲詳請

奏咨事竊照湘省財力向不寬裕從前支用有常量入爲出尙可勉強敷衍自光緒三十一年以後停鑄銅元並將賑糶米捐衡寶配銷撥歸鐵路公司爲贖路之費每年入款驟短銀七八十萬兩出款則數倍於前遇有支付全恃輾轉挪息借商款爲暫顧目前之計前因善後籌賑兩局歷年積欠幾及三百萬兩而本年秋冬入不敷出暨宣統三年新增付款預計虧數約在六百萬以上是以前有官運東蘆鹽行銷衡永寶三府援照湖

北成案募集公債之請現在借銷東蘆鹽格於部議公債發行
尙無把握而一切應支款項均屬急如星火本司綜稽每年出
款如教育費警察費實業費添設巡警勸業各道調查諮議各
局籌辦審判自治各處一切開支皆未籌指有款絲毫無著而
其中尤以教育經費每年四十萬兩爲大宗竊思籌辦學堂資
遣出洋學生皆爲培植湘人而設能有一分經費卽湘人得受
一分教育惟公家旣爲地方培植人材則值此財力困難之時
卽應就地方籌此經費查庚子年因籌解新案賠款由紳民呈
請在行銷湘省鹽舫內每舫報效口捐錢四文十年以來毫無
流弊本司再四思維前項學款擬請援照口捐辦法凡全湘食
戶每購鹽一舫再行酌加口捐錢六文無論川粵淮鹽一律收

取仍照向章由淮鹽分銷各局暨川粵鹽釐等局卡經收解司專作湘省教育經費之用捐款雖收自商販食鹽則皆係湘民情理甚順非就場竈徵收不致有累場商於岸銷亦無窒碍而湘省學務得有憑藉庶幾足副

憲台維持教育之至意所有湘省學款無着擬請酌加川粵鹽口捐緣由是否可行理合具文詳請

憲台俯賜察核具

奏並乞分咨

兩廣四川督部堂查照實爲公便
廣西撫部院宣統二年九月

續擬印花稅入手辦法詳文附辦法六條

爲詳請示遵事竊查本年九月

度支部議復湖南省清理財政局宣統三年預算案冊內所增印花稅一條內開查湖南省印花稅開辦將及一年應有成效三年預算自當酌計收數方爲正辦應酌量數目於追加預算案內報部查核等因是

大部於此項稅務責望綦切於此項稅款期補土稅亦屬至殷極苦之籌圖誠以印花稅之性質爲貨物財產轉移之證據果能通用暢行自足補裨公帑紓裕商艱查湖南省自光緒三十三年奉到

度支部奏定章程卽經前藩司擬定辦法撰刊告示分飭各州縣遵照妥實開辦本司到任後復經籌議推行各在案現在各屬遵章招選總發賣人陸續具文來司請領印花運往分售固

不乏人而觀望不前未經籌辦或已領印花未經發賣者實居多數計自宣統元年籌辦之日以至現今領票州縣凡五十有六而實銷繳款僅八百餘串若照此數列入預算似覺過於短少若憑空定數亦非

大部所以期望司局綜核名實之心現當財用告匱庶政繁興若不將此項稅務參酌湖省情形妥籌辦法切實整飭其何以收推行盡利之效而副預算追加之議竊以制用固貴立法而謀始尤資利導查印花稅貼用性質約其大端可區二類一屬於官與官或與商民交接者一屬於商民與商民交接者今擬專屬之官與官或與商民交接者先從財政公所及大清分銀行長沙官錢局一切財用簿摺批迴領狀期票滙票以及其他

關於出入款項各券據入手貼用印花以樹先聲屬之商民與商民交接者先從契紙當票入手貼用爲養成人民信用習慣之關鍵惟定章契據應貼之印花責成立契據人於授受前貼用查湘省光緒三十四年湘省詳定稅契章程凡業戶持契投稅時應卽由官飭承將原契緊要字樣代爲節要寫入官紙今擬按照定章參酌本省情形略事變通凡田房買賣典當應貼印花之契據均由各官署代爲貼用以示簡便而昭畫一仍不准假手書吏亦不准別設印花專局庶於變通辦理之中仍與定章本旨不背至當票印花仍統歸當商於書票時遵照定章自行貼用茲經本司權其先後續擬辦法六條謹具清摺恭呈憲核如蒙

俯准卽由本司通飭各屬分別認真辦理期於公帑輿情兩有所裨至預算追加案擬請俟此次實行整理以後視各屬銷售如何再行酌議另案具詳所有續擬印花稅入手辦法緣由是
否有當伏乞

批示祇遵 宣統二年十月

續擬印花稅入手辦法六條

第一條 於財政公所內設一印花稅總處派雜稅股委員經理收發保管一切事項

第二條 查前次訂定本省辦理印花稅章程六條於各州縣發賣繳款之法條列亦甚詳妥此次續定章程意在籌定印花入手漸期推廣辦法與原訂章程毫不相歧凡

各州縣總發賣人及分售人均須遵照原訂及此次續訂
兩項章程辦理

第三條 查印花稅性質凡一切財產貨物當權利轉移
之時皆須貼用公家印花以爲確證惟範圍甚廣創辦之
初人民猶未具此信用習慣非先從官界入手提倡不易
暢行今擬自財政公所大清分銀行長沙官錢局領狀批
迴收支簿據經摺收據期票滙票以及關於一切財用轉
移等項切宜一一首先貼用印花以爲逐漸推行之標準

第四條 查奏定印花稅則第二條第二款內載田地房
屋典押契據及田地房屋買賣契據二項除照章稅契外
並須另貼用印花現在各州縣買賣當契官紙既均由財

政公所印發領用凡以後契據上應貼之印花亦均先時
由公所將印花稅票按各州縣現存稅契紙數酌量札發
自本年十一月初一日起一律分別貼用以後各屬有具
文來司請領契紙者卽由財政公所將各色印花酌分成
數隨同契紙一並札發貼用

甲此項印花既隨同契紙札發各州縣貼用平時卽由
州縣官妥慎儲藏如有散失情事卽由各該收領官
照數賠償

乙向來民間執契紙至各州縣衙門投稅無論當契賣
契均查係由該州縣官衙門於契紙文式書成後加
蓋縣印於價目之上此項印花亦卽於人民收執管

業契紙書成加蓋縣印之時預將填寫價目之處空
出不填一面視其價值分別票色填用印花卽將價
填寫於印花與紙面騎縫之間加蓋縣印發付民間
貼用則由官經理發領則附於契紙亦無胥吏侵擾
之虞

丙各州縣本省總發賣人及分售人專辦發售印花事
項此次各州縣領去此項印花祇能專作稅契紙貼
用之用不得另行發售以免紛歧

丁印花稅款由各州縣於核算契紙價目之時視其應
用何色稅票核實數目酌併加入連同稅契一併繳
收收入之款卽由各該州縣於解繳稅契款項到司

之日一併呈繳公所並於申繳文內末後附列印花稅繳錢若干一條如遇前後任交代此項印花並應隨同契紙列入代案

戊查奏定印花稅辦事章程第七條內載發售印花照票面價值提百分之七作經售人費用此百分之七費用總發賣人應得百分之三分售人應得百分之四今田房契紙印花既責成州縣於印給契紙時填用其照章應行提給七分費用卽作各州縣衙門保管貼用費用於繳解稅款時照數扣存

第五條 查奏定稅則當票票面銀錢合十千文以上者貼印花二十文現在印花稅甫經開辦各項應貼印花票

據人民之信用未深難收不招自來之效今擬各州縣地方印花稅務先從當票貼用入手以漸及於民間查光緒三十四年

度支部議覆惲侍御原奏內開當票應貼印花所費出自當商該商貲本既厚收數又微當不至於滋累若慮其藉口印稅加利盤剝則當商取息具有定章是當票之貼用印花於當商無所虧損於民間無稍擾累推廣進行實基於此全賴各地方官殷殷開導剴切勸諭期於當商發起普及民間倘各州縣官辦有成效卽由司分別核給獎勵甲各州縣當店均令充印花稅分售人如願充總發賣人者卽遵照定章取具保結呈請本司執照承充

乙各當店既令充分售人所有印花應照章自行購買貼用四分費用仍照章提給

丙當票印花應貼於票面向來寫數目之處於寫數目前酌定應用何色稅票隨時貼用並將數目寫於印花票與票面騎縫之間不得任意貼用致滋弊混

第六條 自此次限定印花稅實行之後以後各州縣遇有詞訟須呈驗財產契據案件如係在各州縣開辦印花稅日期以後應行貼用印花未經貼用者均一律按照定章加罰補貼印花各州縣官應認真辦理不准通融致碍推行

撫院批查核所擬章程六條尙屬妥協仰卽通飭各屬一體遵

照分別認真妥辦此繳摺存

請將山東試用道劉德沛二品封職劉德馨革職嚴追詳

文

爲會詳參迫事案據署常德府譚承元調署武陵縣廖世英委員蘇兆奎常德官錢分局委員章嵩年會電稟稱府城劉隆慶錢店係劉德沛劉藻芹及已故之劉德純兄弟夥開平日用度奢華濫出花票買空賣空風聲所播人爭持票向兌以故於光緒三十四年十月倒閉共欠官商銀四十餘萬比經前署府連故守培基督同縣委追獲官錢分局銀八萬八千餘兩錢壹萬串其餘所欠銀兩迭催未據清完雖允將田產抵償究之田屋半經朦抵數處又多荒瘠水田而劉德沛之弟復暗將家財分

析以圖隱騙該店所欠官商各款尙不下三十萬業經勒限速繳限期又已久逾若任其一味狡延不亟按律懲治不足以儆奸商而維市面應請將山東試用道劉德沛同知銜二品封職劉藻芹卽劉德馨詳請電

奏叅革一面查封家產交存商會備抵并勒傳劉德純之子劉子鸞歸案訊追等情據此本司局等查劉隆慶爲常德殷實錢店家產富饒故民間信用其花票與官錢局及各商號往來爲數亦鉅乃於倒閉之後不將所欠官商各款趕緊清完竟暗將家財分析輒以荒瘠水田搪抵前據劉德沛暨各商民等來省互稟已奉

憲台批由本藩司會同臬司委員蘇令兆奎馳往會同府縣查

明將劉德沛等看管勒限嚴追乃限期久逾仍未償清若不從嚴參辦將奸商倒騙成風官民均爲所困既據該府縣電稟前來除飭迅速查明劉德沛等家產有無寄頓提出交存商會變抵并查傳劉子駕到案一併嚴行監追外理合會同詳請

憲台察核電

奏請將山東試用道劉德沛同知銜二品封職劉德馨卽行分別革職以便從嚴追究并咨明

山東撫部院查照再此件係本藩司主稿合併聲明

宣統二年十月

議覆署東安縣汪令朝宗稟籌辦藝徒學堂酌擬章程詳

文

爲核議詳覆事案奉

憲台批據署東安縣汪令朝宗稟籌辦藝徒學堂酌擬章程開具清摺呈請核示立案由奉批據稟已悉該縣籌設藝徒學堂所擬章程經費能否妥協持久仰布政司核議飭遵具覆立案仍候

督部堂批示繳摺存等因奉此并據該縣具稟到司本司遵查此項藝徒學堂所以造就貧家子弟俾得習成一藝可以謀生固免坐失利源亦以杜其游蕩惟經費必期充裕而章程尤應統籌庶良法乃能實行學業始可持久本司爰照原擬章程逐加查核其中有未周妥尙須籌議者如第二章第四條有學徒畢業後須服本學堂義務教育一學期之語在該令之意原以該學徒既獲本學堂師承之益卽應服本學堂義務以作報酬

此則他項學堂固有行之者惟是該縣現定章程各藝徒入學之初卽須先繳學費藉資貼補且學藝少年類皆貧苦無依急謀生計入學之始已存求速致用之心今畢業之時復無操券卽得之利爲期半載未有薪資竊恐欲學者裹足不前轉非所以昭鼓勵似應酌定薪水以示濯磨又如第六章第九條內載總教習一員分班教授各藝徒一條查該縣所定課程分爲機織染色兩項其中種類尙多欲令一人兼教姑無論所延之藝師有無此等普通藝術而一人之精力有限旣教織工又教染業各科之程度不一卽分班亦資質不齊雖教習竭其智能而學徒材有高下兼營并騫不無顧此失彼之虞在該縣爲節費起見殊不知教員爲學堂關鍵藝徒進步之遲速繫之與其用

總教習而不能兼顧不如分延二人各專一門薪資量予勻分雖所增亦無多也其餘各條尙無窒礙之處應請卽如所擬辦理至經費竭蹶到處皆然該縣因籌款維難議定官紳集股合辦每股錢四十串文以二十五股爲率合錢一千串文由該縣於地方稅及固有公款內酌提錢四百八十串文其餘由各紳承認除開辦經費錢八十串餘作爲常年經費并有銷售物品之價值藝徒所繳之學費以之周轉當無不敷之慮惟專屬創始全在經理得人應由該縣遴選正紳專司出入核實支銷并隨時認真稽察以免滋弊而維公益除俟奉

批後轉飭遵照外所有遵批核議緣由是否有當理合詳請

憲台查核示遵

宣統二年十月

撫院批如詳飭遵此繳

議覆武岡州附生張鴻翼等請設醫院詳文

爲核議詳覆事案奉

憲台批據武岡州申據附生張鴻翼等稟請設立醫院擬定章程懇予立案等情奉批據稟已悉該生張鴻翼等稟請設立醫院固爲地方衛生公益起見第慈善事業籌募款項應以無擾爲主要查閱所擬簡章經費項內擬設壽春藥行凡遇買藥商人每串各捐錢四十文以資施藥之需似嫌過重至以醫學名義另立牙行代收豬捐性質尤屬複雜恐不免有壟斷之弊仰布政司會同巡警道核議詳覆飭遵仍候

撫院批示繳章程暫存等因奉此並據該州具申前來 本司道

等遵查醫院及醫學會之設所以研求醫術念切痼瘼本濟人利物之懷爲救困扶危之舉其關於地方利便誠非淺鮮惟章程必須完備而經費尤應妥籌庶良法乃可實行公益始能持久本司道等就原擬章程逐加查核其中有未周妥尙須籌議者數端如第二章第九條有赤貧病重不能就診又無力延診者許報明住址調查確實便道往診等語查人當病重之時奄奄一息其望醫之殷幾如望歲乃於延請之後必須派人調查已覺多費時刻且調查之後又必便道往診無論患病之人不能久待倘無便可乘勢必不能前去有利濟之名不能行其利濟之實是此條尙應修改也又如第三章第十四十六兩條有開設壽春藥行凡買藥商人每串捐錢四十文并設壽春猪行

代客買賣每串捐錢二十文等語查武岡地方並無大宗藥材其平日耑採土藥販賣者大都貧苦小民隨處搜尋零星銷售價值無幾皆從辛苦得來今每串須捐錢四十文雖取之買藥商人而商人仍取盈於販戶在收者固資集腋而捐者擾累何堪惟不於此項籌捐而藥資又無從出擬請飭令每串錢酌捐十文但取之買藥商人而不捐之於販藥小戶庶足以資補助而劑其平至設立豬行代客買賣不惟壟斷獨登且以醫院而兼牙行其名稱尤屬不經誠如

憲示性質尤屬複雜是此條之應予刪除也又如第十五十七兩條有武岡藥店每月須繳藥釐今遵牙帖納稅與土藥店之輸入藥釐不相牽混其高沙市石下江等處均照一律辦理並

將武岡原有之小豬廠歸併壽春豬行從前當繳之釐金亦歸壽春豬行交納等語查藥店所完藥釐豬廠所完釐金均爲地方正項入款關繫緊要該生等所擬分別專辦歸併跡近包攬稅釐是此事亦應考查也又如第二十四條內載地方如有違背第二十條之一二件而在外診脈者是爲庸醫殺人本會得以稟請地方官禁止之一條查第二十條之資格一係中學文理清通者一係練習醫學多年者一係品行端正者一係素無嗜好者固爲慎重醫生起見惟人心澆漓奸詐者多此章一定難保不彼此忌妬故作貶詞或挾嫌圖報任意誹謗攻訐成風實於世道人心大有關礙是此條尙應酌議也其餘各條雖尙無不合第開辦經費曾否籌有的歛醫生已否選派共須用人

若干每年經費預算若干均未詳晰聲叙此時縱急急籌款終恐難日久推行該州蘇署牧未經確切考查輒據情申請立案辦事實屬粗率現在該署牧已經交卸應請飭令接任州龔牧詳加考查妥籌辦理通稟核奪總期於事有濟於民無擾不負設院便民之意除俟奉

批後轉飭遵辦外所有遵批核議緣由是否有當理合詳請憲台查核示遵再此件係本藩司主稿合併聲明宣統二年十月撫院批據詳已悉仰卽轉飭遵照此繳

酌擬裁撤綠營辦法詳文附章程

爲詳請立案事案准清理財政局抄送

度支部核覆湘省預算表關於藩署各款擬增擬減清單第四

欵綠營兵餉一項飭令仿照浙江辦法將全省綠營除前議緩裁之鎮筭綏靖兩鎮乾州永綏兩協河溪鎮溪保靖古丈坪四營暫留不計外其餘一律裁撤等因過司准此查湘省綠營除緩裁各營外原定宣統四年裁盡現已裁至七期各營存兵無多既不足以彈壓地方徒事虛糜無補實際自應遵照

部議卽行裁撤俾得各謀生業藉節餉需惟既擬全裁所有應發官弁恩俸恩廉兵丁恩餉爲數甚鉅當此節年積虧庫儲支絀財政困難點金乏術之際自不得不預先籌定辦法以免臨時掣肘當經本司與財政公所幫辦袁道徐道悉心商議督同科員查明湘省各營除鎮筭綏靖兩鎮乾州永綏兩協河溪鎮溪保靖古丈坪四營原議緩裁不計外應全裁者二十三處統

計現存官弁自提督起至額外止共二百六十四員每年應發俸薪餉乾銀二萬零二百七十四兩一錢七分六釐又養廉銀二萬八千四百八十兩應給三年恩俸恩廉共銀壹拾四萬六千二百六十二兩五錢二分八釐現存馬戰守兵三千二百四十四名全裁應給一年恩餉銀四萬八千九百六十四兩二錢總共應給恩俸廉餉銀一十九萬五千二百二十六兩七錢二分八釐現在新政繁興百端待發如此鉅款實屬無從籌措經本司與袁道等再四躊躇不得不變通辦理所有裁撤官弁應發恩俸恩廉擬請照從前

奏定原案仿照鄂省辦法按季發給凡繳札歸田者先發一季俸廉其餘發給餉票分作十一期由本籍地方官按期兌給如

有籍隸他省並許轉託親友來湘兌取凡仍在本省聽候差委不繳札者先給一季廉俸其餘仍飭令該員按季自行赴司請領三年之內或蒙

簡放叙補別缺及另有差委卽行停止兵丁應發恩餉亦一律改爲四季分發裁撤時先發一季其餘分作三期發給期票藉紓餉力似此辦理亦須現銀五萬兩內外盤善兩局業已歸併司署通盤籌畫財政公所本年應行支解之款尙有一百三十餘萬而所有一切入款搜羅殆盡舉已解未解者約略估計不足五拾萬金尙短銀八十餘萬預算明年短絀更鉅日夜焦思無從籌措現擬由財政公所刊發餉票分現行期票兩種期票專用於裁兵時兌付各弁兵未到期應給季餉現行票已與官

錢局總辦朱道祖蔭商明由省內外官錢局照兌足昭信用與官票相輔而行無異現銀凡支發新軍及未裁各營餉項並州縣領欸均隨時酌量搭放藉資週轉妥擬詳細章程並票式二種另開清摺呈候

察核俟奉批准後一面刊刻發行一面通飭各局所州縣並移行各營隊一體遵照除裁兵應會商兵備處將一切預備周妥酌定日期另行專案詳請具

奏外合將遵奉

部飭裁撤綠營查明應發官弁兵丁恩俸恩廉恩餉數目酌擬辦法並由財政公所刊發餉票分期兌給緣由具文詳請

憲台俯賜察核批示立案

宣統二年十月

酌擬裁撤綠營辦法章程

一現裁各營二十三處官弁自提督以至額外共二百六十四員現存馬戰守兵三千二百四十四名共應給恩俸恩廉恩餉庫平銀一十九萬五千二百二十六兩七錢二分八釐

一官弁應發恩俸恩廉三年湘省裁兵原案辦法繳札歸田者卽全數發給其在省聽候叙補未繳札者仍按季發給今擬繳札歸田之員先給一季俸廉其餘發給餉票分作十一期由本籍地方官按期兌給并許抵完丁漕釐稅如有籍隸他省並許轉託親友來湘兌取聽候差委不繳札者先給一季廉俸其餘仍飭令該員按季

自行赴司請領三年之內或蒙

簡放叙補別缺及另有差委卽行停止

一兵丁應發恩餉一年亦一律改爲四季分發裁撤時先發一季其餘分作三期發給期票亦歸各地方官按期兌給并許完納丁漕釐稅與官俸一律辦理

一應發恩餉爲數甚鉅庫儲異常支絀卽分期發給籌措亦屬爲難財政公所積欠官錢局銀數太多官錢局旣無力再爲應付公所亦未便復向通挪現擬由財政公所自行刊發餉票藉資周轉以紓餉力

一刊發餉票分爲兩種一現行票分五錢一兩五兩十兩四等票內載明許其完納丁漕釐稅并由省內外官錢

局代爲收兌藉昭大信一期票按官弁每員兵丁每名
應得一季餉銀數目發給期票一紙到期由省內外官
錢局代爲驗明兌給本公所或官錢局現行銀票或卽
抵完丁漕釐稅均聽其便凡已經到期之票官錢局及
各州縣局所印委各員不得抑勒不收未到期者不許
特強索兌

一餉項均應發庫平公所現刊銀票若用庫平誠恐民間
不便行用現擬仍用省平於發餉時將應補庫平銀數
扣明按名照數加給

一財政公所刊發銀票除蓋用藩司印信外并由官錢總
局加蓋圖記以便代兌時查驗真偽省內外官錢局代

爲兌收財政公所銀票集有成數隨時解繳財政公所
由公所撥還現銀或卽抵解庫欸

一財政公所發出弁兵恩餉期票現飭由各州縣就近撥
兌如有執持到期餉票兌取或抵完丁漕許各州縣由
徵存地丁內提銀照兌所收期票准其抵解丁漕等欸

一此項餉票出入由公所另派專員妥慎經營以專責成
督院批據詳已悉南省財力奇絀各處綠營除鎮守兩鎮
乾綏兩協鎮河保古四營暫緩提議外不得不一律提前裁撤
以節餉需該司所陳分年籌給官弁恩俸恩廉辦法係屬因時
損益變通籌措均甚妥協自可照辦惟馬戰守各兵僅祇一年
恩餉共銀四萬捌千玖百餘兩若分爲四季給發各裁兵所得

甚爲零星不足濟事似不如將此項兵丁恩餉一次給訖較爲實惠照此辦理於該司所計現銀伍萬兩外約須加籌現銀叁萬數千兩可以集事能否辦到仰再悉心籌劃復奪并候撫部院批示繳摺一件票式二種存

撫院批據詳已悉兵丁口餉無多所擬分四季發給恩餉應改作兩次發給裁撤時先發半年餘發期票屆期一次具領至官弁三年恩俸恩廉千把以上按季發給千把以下應改爲三屆發給凡繳札歸田者先發一年餘發期票於第二三年年滿時分兩次具領以示體恤不繳札者仍照原擬分發三年之內或別有差缺或病故或犯有事故被控在案均卽停止至財政公所現行餉票須令照兌方便試辦之初尤須留意查察慎防流

弊勿失信用餘仰如詳辦理仍候

督部堂批示繳清摺票式存

申明定章通飭各署局處無論何項官紳均取具切保烟

結詳文

爲詳請飭遵事竊維禁烟之舉所以振起疲羸考察之嚴抑亦
慎重名器二者應相提並重固未可稍涉偏廢鴉片之害盡人
皆知

朝旨諄諄飭禁

大部亦一再奏定章程凡內外文武官員各學堂職員電報招
商礦務各局所委員各省商辦鐵路公司商辦總分會總協理
員紳勸學所諮議局自治會以及各學堂董事各省大小各衙

門幕友并學生營勇警兵苟有嗜好之人莫不應普通查禁取
結造冊詳咨誠以官員爲齊民之準紳董尤爲一鄉之望不能
不加以督率也故查驗有一定限期遲到者卽開去差缺欺飾
者立行褫革徇隱者併予嚴叅卽上年諮議局議決禁烟辦法
六條亦稱省城及各府廳州縣無論何項人等統限於宣統二
年十二月底止一律不准吸食鴉片逾限查有吸食者請照新
定法典草案第二百六十條辦理現雖已奉

大部擬定禁烟條例然應認真查禁則一也湘省自設立公所
以來所有業經戒斷及情形可疑之員均經分別調驗欺飾者
已隨時詳叅可疑者復續調查驗其向無嗜好者亦已飭令出
具永不吸食切結并取具同寅同鄉官保結一律造冊詳咨惟

各員之遷調頻仍卽各署局處會所亦分設太廣員紳之更易嗜好之有無平時接見難周卽爲稽查所不及而此輩轉可藉差使爲護符得以任情吸食甚至素有烟疾捏稱已戒而巧肆欺朦與長官晉接周旋毫不爲怪以致查禁業已兩載而土膏尙復暢銷倘任其長此因循不惟無以示齊民準則抑亦於禁烟前途大有妨礙擬請申明定章通飭各署局處水陸防綠各營及會所學堂無論何項官員紳董均於到任到差之始卽行出具會否吸食鴉片切結取具保結申資公所彙報仍違章每三個月結報一次并各將本署幕僚本堂學生及各該員所帶跟丁雜役巡勇親兵并所部兵勇有無沾染嗜好之人一律於文內詳細聲叙報查其有情形可疑無論何人一經本司查知

卽行遵章調驗倘有欺飾立予詳叅若該管官扶同瞻徇并請
分別懲處庶不至意存避怨卽員紳亦無從再爲掩飾抑本司
猶有陳者自捐例開而流品日雜新政舉而取材益寬局所紛
糅諸途并進朝爲掾佐夕已監司但見其翎頂輝煌莫辨爲何
項事例居然官貴抗禮公庭藉以爲干進之階實於世道人心
殊有關係值此整頓吏治之際若容此濫竽充數甚非所以正
官常本司現擬移行各署局處員紳各將履歷三代開具簡明
清單送司造册除正途及曾經引

見驗看各員無庸考核外其尙未到省各員係由勞績保舉卽
呈驗原案保札行知如係捐納候選等項人員并令將捐照呈
驗畢業生出身亦應呈驗文憑以憑稽核而免冒濫擬請飭下

各署局處會所各員紳一體查照辦理本司爲力祛烟毒整肅紀綱起見是否有當理合具文詳請

憲台查閱飭遵

宣統二年十一月

督院批查閱詳稱各節係爲厲行烟禁慎重名器起見應准照辦仰卽分別移行遵照仍候

撫部院批示繳

撫院批如詳辦理仰卽移行各署局處會所一體遵照仍候督部堂批示繳

遵議修理常德府城工辦法詳文

爲遵飭籌議詳請

奏咨事宣統二年十月初三日奉

憲台札開承准

軍機大臣字寄宣統二年九月初七日奉

上諭都察院奏代遞翰林院侍讀學士周克寬等請修理常德
州城呈一件著照所陳各節體察情形妥籌具奏原呈著抄給
閱看欽此遵

旨寄信前來飭卽遵照妥籌撥濟詳候具

奏計抄原呈等因奉此細繹原呈所陳各節不外三端一爲上
年估定本年被災以前已修之工一爲本年被災以後估計應
修之工一爲修費過鉅就地難籌查常德歷遭水患皆緣沅水
發自貴州建瓴而下府城實當其冲每當大雨時行水輒陡漲
數丈城外街道向多淹沒城門則恃閘板堵禦水不得入上年

沅水驟漲數次洪濤巨浪直射城垣以年久失修之城而禦銳不可當之水南面仁智橋等處北面祇園寺等處城墻被水冲塌開裂各六十餘丈地方官紳公議塌者重砌裂者拆修並以河身日淤日高南門筆架城外石岸與城東西之石柜四座每當盛漲均沒水底一律加倍高出水面共估工料錢十二萬餘串經現任提法使前岳常澧道周儒臣等電稟

前憲岑籌款修築復據武陵縣職員余嘉錫等稟蒙

前憲岑奏准展收西路各岸行銷淮鹽加價一文捐作爲修理城堤石柜經費其錢議由藩庫善後局先行籌墊以司局無款可墊改歸常德官錢分局墊支檄飭印委各員擇要興修旋據稟稱官紳復勘筆架城外河身灣曲正迎大溜加高石岸仍不

免於淘刷因議將灣處填平直修新城一道以順水性冀可保
全郡城並將城東之烏雞堤改修石脚其廻峰寺附近之鹽關
石櫃爲下游咽喉之地一經加高反嫌堵塞水口流不得暢決
議停修工較原估互有減增摺彼注茲費仍無甚出入鳩工庀
材於上年十一月興工至本年五月初間已將南門筆架城外
沿河石岸大西門外石柜護脚暨得勝宮土堤北城祇園寺旁
傾圮城垣城東之烏雞堤石脚次第修竣此上年估定本年被
災以前已辦各工之情形也本年五月初旬大雨如注上游黔
境與湘境之辰沅靖一帶山洪暴發同時入河常德城河水勢
之大爲數十年來所未有各城門均上閘板水幾漫城而入城
墻爲風浪鼓盪雨水傾灌崩裂之處不一而足而以南面水星

樓等處北面中學堂後等處爲最甚東面蜡樹園後等處與西面華光廟後次之以上各工經地方官紳共同勘估又蒙憲台檄委試用道胡道鑑瑩前往復勘或全拆或半拆必須一律重修南城東城以外原有護脚擇要加築高與城齊各城門城樓亦一併修葺城內西南隅則加築新城一百二十丈共估工料錢二十一萬五千餘串不如此工不能堅城不得保此本年被災以後估計應修各工之情形也至於修費向係民捐常德城軍周圍九里餘附郭之武陵縣承修四里八分桃源沅江龍陽三縣共修四里五分上年修費雖由常德官錢局籌墊而指展收西路淮鹽一文捐款歸還此鹽行銷常屬居多仍是民捐性質現官錢局遵守部章保存營業無論地方營辦何項公

益事宜不得再向該局借款免息是本年應修各工估錢二十
一萬五千餘串官錢局不能再墊湖省積虧過鉅歲計入不敷
出數逾二百萬兩更無餘力撥濟城工而城乃一郡保障且繫
後鄉數十村莊民命所關者大不容不修因思該處爲省西巨
埠商賈薈萃不乏急公明理之人但得殷實正紳爲之提倡可
期集事是以詳明

憲台由司照會分省補用道李壽熙湖北試用知府蔣謙會辦
城工並經胡道鑑瑩會同府縣勸諭李蔣兩紳暨各紳董就地
籌款該紳等擬具擔任籌捐借墊辦法稟經印委各員轉稟
憲台批司核議本司逐一復核一爲附郭捐股富紳商凡居郡
城內外者保護財產身家惟城堤是賴應不論本籍客籍按照

產業之多寡商務之大小合力認捐一爲外縣捐常德城垣向歸所屬武桃龍沅四縣攤修光緒二十七年修城龍陽沅江因災免攤桃源攤捐錢一萬串本年龍沅雖亦被水而此次工程浩大修費較之上屆加增兩倍應飭桃源縣勸令紳富照上屆捐數加倍認捐龍陽沅江兩縣剔除災區勸城鄉紳富量力書捐一募賑常捐本年常德水災司局詳蒙

憲台奏准開辦賑捐並七項常捐本爲賑濟之用現修常德城堤石櫃係屬以工代賑應准會辦工程紳董李壽熙等照章募捐募得捐款隨時交常德官錢局滙交長沙大清銀行上兌填給實收再由府縣出具印領來省領回發交工程局應用如有慨捐鉅款者由司詳請

奏給優獎第工需過鉅僅恃捐款斷不足用應一面由郡城紳商公同認墊墊款不能無着擬請

憲台奏展西路行銷淮鹽一文捐收至官錢局置紳商墊款一律還清再卽停止以上辦法係就該紳等原稟條目斟酌修改而本司考核常德公款尙有城堤修濬經費向附釐局抽收歲可得錢七八千串專備歲修城堤現既籌款大修是大修期內以及修理完固之後歲修卽可節省前項經費應悉撥歸本屆修城項下動支不得挪作別用工竣後同淮鹽一文捐一併歸還官紳商富墊款則墊款自易還清認墊者亦當深信不疑樂於從事此本年估修城堤經費籌捐籌墊並撥用原有歲修捐款之情形也經費或捐或墊或撥既已定有辦法工程重要當

此冬令水涸自應加緊趕修以防來年之水漲惟此次修培城堤石櫃購用磚石過多應集窑戶石工限期製造務以無誤工需爲度官錢局認墊之款僅敷年內之用來年工款尤須早爲預備應請

憲台仍委胡道鑑瑩前往常德督催工程並同府縣暨會辦城工之李紳壽熙等將殷富紳商應捐應墊之款儘一月內分別認定通報立案以免臨渴掘井貽誤要需又查印委各員轉據各紳稟稱此項大工非一二年所能告竣等語本司熟思審計辦工太久糜費必多所有上年本年估修各工應儘來年歲事若實趕辦不及則限宣統四年春季一律完工如能依限完工欸不虛糜工臻堅固應將在事員紳之任勞任怨潔己奉公者

援照應辦工賑成案詳請

憲台奏請獎勵其漁利自肥怠惰延誤者亦卽隨時詳奏懲辦以明賞罰而維要工所有遵飭籌議修理常德府城工辦法是
否有當理合詳明

憲台察核

奏咨立案實爲公便

宣統二年十一月

督院批據詳已悉仰候

撫部院會核

奏咨繳

撫院批如詳會奏分咨立案該郡城工關係緊要除仍委胡道鑑瑩前往督催外應由司責成常德府縣會督工程局各員紳

妥速辦理勿稍延緩草率是爲切要仰卽轉飭遵照仍候
督部堂批示繳

核議常德李紳壽熙等就地籌捐修理城工經費辦法詳

文附辦法八條

爲詳復事案奉

憲台批據候補道胡道鑑瑩常德府譚守承元武陵縣廖令世
英等稟李紳壽熙等承認就地籌辦常德城工捐款各情形至
所請官錢局墊足原估數目始行按成分攤暨頒發實收募捐
可否邀恩俯准之處伏候示遵由奉批查此案欽奉

寄諭遵經會同

督部堂行司籌議在案據稟李紳等擔任就地籌捐並摺開擬

辦各條仰布政司迅速核議妥籌辦法尅日詳復以憑會
奏毋延此繳稟摺均鈔發等因奉此並據常德府武陵縣會同
前由到司查此案欽奉

寄諭現已由司遵照會札籌議辦法另行詳請

奏咨奉批前因茲就該紳等原稟條目斟酌修改妥洽除抄發
常德府武陵縣遵照並移胡道查照外理合開具清摺具文詳
復

憲台俯賜察閱

宣統二年十一月

核議常德李紳壽熙等就地籌捐修理城工經費辦法八
條

一上年沅水爲災常德城垣崩塌開裂籌修城工暨加培

石櫃工原估錢十二萬餘串議由藩庫善後局籌墊經
前撫部院岑

奏准將西路各岸淮鹽加價一文捐展收三年歸還墊款
嗣以藩庫善後局無款可墊改由常德官錢分局籌墊
以十二萬八千三百串爲準本年五月沅水陡漲建瓴
而下其勢尤猛城垣被衝崩塌開裂之處倍蓰上年至
危極險據常德府縣稟蒙委胡道鑑瑩會同地方官紳
核實勘估工料併計共需錢三拾四萬餘串較之原估
幾加兩倍除官錢分局認墊十二萬八千餘串業據常
德紳商擔任就地籌捐借墊前項一文鹽捐自應詳請
奏咨展至墊款還清再行停止

一修培城垣石櫃係爲該郡紳商士庶保存身家財產不論本籍客籍應按產業之多寡商務之大小合力認捐捐不足數公同認墊限一月內將捐數墊數分別認定通稟立案分期措繳以濟工需如有慨捐鉅款者由司詳請

奏給優獎

一淮鹽一文捐本濟修城之用城工未完以前所收捐款儘數修城不還墊款俟全工告竣後統計官紳商庶墊錢若干再將前項捐款按照墊數攤還以照公允

一本年常德水災

奏准開辦銜封貢監翎枝並七項常捐本爲賑濟之用現

在修培城堤石樞係屬以工代賑應准由會辦工程紳董分省補用道李壽熙湖北試用知縣蔣謙承募賑捐常捐募得捐款隨時交常德官錢局彙交長沙大清銀行兌收填給實收再由該府縣出具印領來省領回發交工程局應用

一常德城垣向歸武桃龍沅四屬攤修光緒二十七年修城龍陽沅江因災免攤桃源攤捐一萬串本年龍沅雖亦被水而此次工程浩大修費較之上屆加增兩倍應飭桃源縣勸令紳富照上屆捐數加倍認捐龍陽沅江兩縣剔除災區勸城鄉紳富量力書捐

一城堤工程現既籌款大修是大修期內以及修理完固

之後歲修之費即可節省所有向由釐局附抽之城堤經費修濬經費應全數撥歸此次大修經費項下動支不准挪作別用工竣後同准鹽一文捐一併歸還官紳商富墊款俟墊款還清鹽捐停止釐局附抽城堤費修濬兩項經費按季截數交存大清銀行或本省官錢局按月五釐生息儲備將來修城之用並由常德府暨代收經費之釐局將每季抽收存放數目通報查考

一此次修城加培石櫃工程浩大既非尅期所能告竣趁此冬令水涸應亟擇要趕修通工亦儘來年歲事若實趕辦不及則限宣統四年春季一律完工以免拖延時日虛糜經費

一近年民窮財盡籌款奇難在事員紳監工必須認真購料尤宜核實務使工臻堅固款不虛糜如能任勞任怨潔已奉公俟全工告竣後應照歷辦工賑成案

奏請獎勵其漁利自肥怠惰延誤者亦隨時詳叅懲辦
撫院批如詳辦理另札飭遵繳摺存

擬請裁減飛翰水師五營置選鋒十營船板巡勇詳文
爲會同詳請示遵事竊查湘省宣統三年預算准清理財政局
移奉

度支部復覈擬增減各款案內第十類歲出軍政費第七款內
開水師經費三十四萬七千零七十六兩六錢四分八釐查水
師經費總數較己酉多八千一百二十三兩一分七釐可照刪

除計減銀八千一百二十三兩一分七釐等因伏查湘省水師一項原設有先鋒水師五營飛翰水師五營每營各設長龍一號先鋒舢板一號舢板十九號澄湘水師一營設長龍一號先鋒舢板一號舢板三十七號長勝水師三隊共設長龍一號舢板四十四號又飛翰水師添募巡目纜勇四十名均分別駐紮各處游弋巡緝現在匪風稍息又當撙節軍需之際既奉

部擬核減自應遵照酌量裁汰以節糜費

本司職道

等再四籌維

擬請將飛翰五營每營酌裁舢板一號又飛翰先鋒十營每營除長龍先鋒二艘勇丁不裁外其餘各哨舢板每船裁去槳勇一名共裁去弁勇一百八十五員名又巡目線勇四十名亦擬全數裁撤每年計可節省銀一萬三千六百餘兩較之部核刪

減之數有盈無絀其裁撤飛翰舢板各船餉項暨巡目線勇緝費請俟辦過冬防截至本年十二月底卽予停止至所裁選鋒飛翰水師十營舢板每船之槳勇一名應請截至本年十一月底止餉所有裁撤飛翰舢板五號之軍裝器械應飭令繳還軍裝所點收再查長勝澄湖水師額設舢板駐紮衡永辰沅一帶地方遼闊原屬不敷分布應請無庸裁減合併聲明所有擬請酌裁飛翰水師舢板五號暨全裁巡目線勇并飛翰選鋒十營舢板每號裁去槳勇一名各緣由是否有當理合具文會詳憲台俯賜察核批示祇遵

宣統二年十一月

撫院批如詳辦理仰卽分別移行遵照此繳

會議穀米開禁及加收湖省賑糶墊款捐詳文

爲會詳事竊查湖省出產以穀米爲大宗商民交易輪轉流通亦以此爲挹注上年濱湖州縣淫潦爲災秋收歉薄經

前撫憲岑於今春示令阻禁在案嗣據各廳州縣報稱本年收成豐稔派員分赴產米處所將去冬今春賑糶發出之倉穀一律採購填還並調查民間囤積米穀甚多得以閉禁過久穀米滯銷不能以粟易帛異常困窘商界亦因之無從輪轉迭由諮議局並商務總會呈請

憲台核議開禁復經

本司職道

等一再籌議自應及時弛禁以

蘇商困而順輿情惟查歷歲穀米輸出所有釐捐均經逐漸加征卽寓以征爲禁之意此次弛禁尤宜仿照辦理又去今兩年工賑用費甚鉅悉係借挪應付現在公家支絀萬狀擬就此項

出口穀米於今年開禁日始米每石加徵足錢二百文穀半之名曰湖省賑糶墊款捐由各米捐分局及本米捐總局經收如數彙齊轉解本財政公所藉資彌補而濟要需迭經面稟

憲台咨商

督憲並檄委袁道學昌前赴鄂省籌議兩省合辦加徵捐款以免澆漏嗣准袁道迭次函電已蒙

督憲發交鄂省會議應議可唯兩省合辦事類更章開辦尙須時日而本省開禁事宜現已刻不容緩復經本司職道等公同商酌擬暫請弛禁穀米出口按米計算以三百萬石爲限併懇憲台刊印護照貳萬壹千伍百張計千石壹張者五百張五百石壹張者壹千張壹百石壹張者貳萬張發本米捐局分撥應

用其運穀者卽以一米二穀折算商民在省河購運之穀米卽由商會隨時向本米捐總局領取護照分發承運之商持赴經過局卡報完釐稅捐款准予放行至濱湖各廳州縣所產穀米處處有行坵坵可購沿途價值相宜難保無隨處加載商會何能普及若必抑勒至省及就近商會補領護照然後驗放無論朝暮價值有別風雨順逆難計卽或稍稍時日亦恐轉盈爲虧殊非恤商之道且阻留船隻過多尤易合羣滋事矧商民取巧成性欲其每次如數報完誠屬罕見而溢出之穀米爲數甚微事亦甚小其時補收無照可發又豈能強起充公致滋口實自不如將此項護照分發各局卡其在外縣採運之米穀在百石以外者由經過各局卡就近隨同大票填發護照如不及百石

或溢出原領護照填載石數之外者均隨時由各該局按數填發大票此項大票所填米石仍由各該局存記數目歸入各該局原發運米護照總數內綜合計算不得逾於原發護照石數定額之外以示限制並由商務總會投票選舉分派董事九人住於省河輪船局及蘆林潭雷灣澄安岳州各局卡隨時記載經過出口米穀石數按旬核計分別具報本米捐總局及商務總會彙核總計輸出穀米已至限數卽行阻禁如此辦理似於流通物產之中仍寓保衛民食之意至由醴陵運往江西米穀出口米捐向由釐局代收此次加收賑糶墊款捐爲數無多毋庸另派稽查擬由該局代收照舊解省如蒙

俯如所請卽請頒發示諭由本米捐總局分發張貼一面由本司

職道等照會商務總會知照並由本米捐總局飭知各局卡於十二月初四日一律開禁稽徵所有會議穀米開禁及加收湘省賑糶墊欸捐緣由是否有當理合具文詳請

憲台俯賜察核

批示祇遵再此件係本米捐總局主稿合併聲明

宣統二年十一月

撫院批據會詳穀賤傷農請弛米禁出口米數以三百萬石爲限并加征賑糶墊欸捐米每石貳百文穀半之暨請由本部院刊發護照各節均如詳辦理惟現准

外部電英使以長沙商會欲米商領護照在商會掛號加以限制謂與條約相違已另文飭知在案查護照辦法不過爲稽查米數而設其實出口米數已有關單及釐捐各票可稽護照亦

無關緊要今姑如詳刊印護照發出米捐總局分發領用於米商報捐時隨同大票一律填給省城由商會派稽查紳董至米捐總局監視省外由米捐總局發由各分局填用亦由稽查紳董監視蓋護照不准另取分文當時隨票填給別無煩苛商民當可樂從若填票係一處所填護照又係一處所或填票係一時間填護照又係一時間則諸多紛擾轉恐商民疑阻原詳所稱省內由商會領發護照之處應毋庸議藉以俯順商情并免外人口實另據諮議局呈復米捐議案內請附收農會補助捐米每石十文穀減半應於開禁時一併准與附收即於原發捐票蓋印附收此項戳記無庸另設一票俾免煩瑣至兩省合辦一案昨已准

督部堂咨行司局核議應候復到再行咨商辦理除將先行開
禁暨加收捐款出示曉諭并電咨

督部堂外仰卽分別移行查照并錄批報

督部堂仍候

核示繳

會議土膏牌照捐仿照蘇粵辦法酌擬細則章程並頒發

關防詳文 附章程細則

爲會議詳請示遵事竊查各省土膏牌照捐一項用意
在禁而不在徵湘省於此項捐務遵照

部章早已先後開辦惟查蘇粵各省近復於此項捐務力圖推
廣之法以爲蘇息民瘡之計當此期限縮短之日湘省自應一

律仿照辦理以期廓清沉痾現經本司職道等按照粵章參酌本省情形擬定推廣牌照捐章程及總稽核處暨經收公所辦事細則徵收之數雖與

部頒牌照捐章每土壹兩抽錢肆拾文每膏壹兩抽錢陸拾文增加數倍究屬寓禁於征多取原不爲虐正本清源之計似無有逾於此者惟開辦之始若須另設處所不惟款項支絀亦恐時日遷延現擬將此項總稽核處暫時附設財政公所所有該處開辦經費暫由財政公所撥給該處總稽核委員樽節應用將來俟禁烟公所移定屋宇卽將該總稽核處擇期歸併俾昭節省而免糜費並俟該總稽核處成立之後經收有款所有一切開支再由該總稽核處自行支領按月造冊報查如蒙

俯准卽由本司職道等遴委妥員於十一月十五日先由省城開辦再行推廣各廳州縣並由本藩司刊刻木質關防一顆文曰湖南全省推廣牌照捐總稽核處之關防發交印用以昭信守謹繕具推廣牌照捐章程暨總稽核處並經收公所辦事細則詳請

憲核所有會議詳請推廣籌辦牌照捐各緣由是否有當理合呈候

憲台俯賜察核批示祇遵再此件係本藩司主稿合併聲明宜

統二年十一月

籌辦推廣土膏牌照捐章程

第一節 宗旨

第一條 現辦此項捐款用意
在禁而不在徵目前禁吸
之律未能從嚴祇有先使煙
價抬高則貧民無力吸食者
自思變計戒斷卽在中費之
家亦因煙價增高勢必減縮
煙量日減日少則沉痾自可
廓清矣

第二條 各省煙價高低漲落
不一現擬逐漸加增煙膏
價值亦須因地制宜湖南上
達滇黔下游則漢宜煙價倍
蕞於湘境查近日雲膏每兩
約錢三千四百文較之廣東
價值稍有參差現在推廣牌
照捐自應仿照廣東辦法將
湘省原有買生土一兩完捐
錢四十文熟膏一兩完捐錢
六十文改照廣東買膏一兩

生土一兩估定成膏五錢
買土二兩照膏一兩收捐大洋三角以後逐漸加增亦仿

照廣東各處辦法庶於煙禁可收速效

第二節 辦法

第三條 現辦推廣牌照捐一切皆仿照廣東辦法惟廣東專爲商辦湖南係官督商辦因就廣東章程修改

第四條 湘省各項承餉雖不似廣東之由商包然此項牌照捐以前辦法本未劃一現在推廣擬定爲官督商辦商人經收捐項兼有稽查之責委員稽查捐項兼有催收之責會同辦理免有隔膜

第五條 度支部初定牌照捐係就土藥而言查湘省歷年銷數洋藥居三成土藥居七成洋藥銷數以省城常德湘潭爲最其餘皆銷土藥惟煙台條約續增專條洋藥必

須拆包零賣之後方可抽收故應照廣東辦法舍土抽膏
洋藥自包括在內商人於售土時給予膏店吸戶煮膏執
照令其如數繳捐則此捐係取之於膏既有廣東開辦在
前外人決無干涉

第六條 煙土來源洋藥進口之數原有岳州長沙兩關
貿易冊爲憑土藥行銷之數原有統稅分局呈報冊爲憑
惟知其來源而不查其去路捐項仍恐漏匿自應責成商
人於發賣時查照購土購膏牌照內填土數膏數另給予
膏店吸戶煮膏執照卽由給予煮膏執照時按照所煮膏
數代收代繳俾免隱漏

第七條 官督商辦徵收此項捐款既有擔保之責又有

催收之勞且全省設卡選派員司丁役分佈緝私商人設立公所一切薪伙日用所費甚鉅其省外各屬並有滙解之費通年合計爲數不資非厚給津貼不足以資辦公而示鼓勵除分設局卡另由委員按月核實開報外現擬將此項捐款以八成歸公擬提二成作爲商人經費俾免竭蹶

第八條 省城選派一二商人總司其事以素業土店貿易較大身家殷實辦事公正之人承充令其聯絡省城及外府外縣土膏各店一律按照官定章程代收此項捐款省城則按旬呈報省外則按月報解由商交員由員解庫不得稍有逾延致啓侵挪之弊

第三節 權限

第九條 現定官督商辦與廣東稍有不符委員與商人同有責任委員於省城戒煙公所內附設籌辦推廣全省牌照捐總稽核處並頒刊關防設全省總稽核二員駐局稽核一員正稽查二員文案二員會計一員庶務兼管照一員司事書記由委員酌量事情繁簡派充商人亦應於省城設一經收推廣全省牌照捐公所派舉所董二人以下由所董酌量派充每日所收捐款若干所董分簿詳細填註稽查委員詳細開單報明總稽核處每五日由各土店開單呈報一次每十日由稽查委員造具清冊呈報一次俾可互相稽核庶免遺漏錯悞省外各屬視商埠大小

銷數多寡酌派委員

第十條 委員稽查之事所宜注意者在各店每日洋土藥買進之數及每日賣出之數須抽查該店帳簿逐一比較以防商人銷多報少之弊將該店每月進貨存貨總數與銷數互證倘有隱漏不難搜究並將各土店存銷件數按月結一總單以便逐屆遞勘

第十一條 凡稽查處委員司事薪俸日用等費均由本處開支

第十二條 本處所派委員專司稽查私漏及各舖店出入土膏數目與應收捐數其省外各員並有就近督催轉解之責各處經收商人所收捐款應按期繳由各該處委

員報解惟各屬遠近不一所需解費或滙費川費等項均應在經收商人二成津貼內開支

第十三條 如商家因捐款轆轤或與各舖戶爭執以及地方痞棍借端生事自所時有應由稽查委員與地方官承接與經收捐項所董無干

第十四條 一湘省洋藥土藥銷場一時難於調查故無總數可計既無總數而商務局面又遠不及廣東擔保金自難議及但商人既免擔保金而省外稽查收欸均須委員凡省外各稽核處則應於商人所得經費二成中每處月送洋銀壹百元歸委員核收支應商董以市經開辦請俟試辦三月後察看情形再行酌議

第十五條 推廣牌照捐省城擬於本年十二月初一日開辦起以三個月爲一期將現在銷膏之數分作八期按期遞減一成抽捐之數隨時體察情形按期遞加限至二十四個月後所有通省土膏銷數一律減盡
推廣土膏牌照捐總稽核處辦事細則

計開

第一條 現辦牌照捐宗旨在清查銷數限制吸食仿照蘇粵辦法立限定期銷膏之數按期遞減抽收之數按期遞增茲當試辦之初無論洋土膏每膏一兩均收大洋三角

第二條 省城舊有牌照捐向歸警務公所辦理今既由

本總稽核處推廣辦法應由本總稽核處於開辦後刊刷新式購土購膏牌照示期更換無此項購土購膏牌照者各店不得賣土賣膏

第三條 此項牌照捐雖係計膏抽收惟膏店與吸戶零星散處難於稽查故於生土到埠時先由稽核處發給查驗單爲憑必經查驗之土方准各該店發賣卽於發賣時代收此項牌照捐并填發煮膏執照所收捐款隨同查驗單及煮膏照繳驗按期交由經收所董轉解本總稽核處庶畧得其要領嚴杜走漏私售諸弊

第四條 現在禁煙之期已迫無論吸戶膏店均不得陸續囤積若不嚴行限制轉瞬期限已滿而各膏店囤積尙

多則斷難違

旨依限禁絕今定無論吸戶膏店祇准隨購隨煮不得故違延
匿以清根源而免朦混

第五條 民政部會同度支部奏定章程凡土膏各店所
領營業憑照每年須呈驗換給一次現辦推廣牌照捐所
有各商已領營業憑照者限於本總稽核處開辦後一律
來處呈驗蓋戳

第六條 省外未發營業憑照處之各土店俟各分處開
辦後卽向分處領取嗣後不得補領增開

第七條 開辦時凡各土店以前存積之貨亦須來總稽
核處與經收捐項公所兩處報明聽候查驗給單以杜取

巧省外照辦

第八條 生土店有貨進口清完稅課後須到總稽核處與經收捐項公所報明件數聽候查驗給單後方准發賣以便稽核如違罰究

第九條 本總稽核處新式購土購膏牌照換發後應將照內所填購土購膏數目彙一總數以便隨時與各店銷數比較庶於有無私售及銷多報少等弊便於稽查

第十條 甲處生土店如有將土分售乙處生土店銷售而非逕售膏店吸戶煮膏者應隨時詣處所將件數及領購之土店住址報明由各該處所每月將各生土店彼此販運一項摘出彙報由總稽核處按月據報冊覆查乙處

生土店進貨報單是否相符如有參差卽行根究處罰以杜土店膏店互相影射之弊

第十一條 擬先於省城湘潭常德洪江衡州津市岳州行銷煙膏最多之處首先委員設局會同商人開辦其餘均限於三個月內一律辦齊

第十二條 外府州縣所設稽核處及分處均一律照省城辦理其捐項由商人繳歸委員按月報解以期劃一而免分歧

以上均照廣東原章略爲修改
各埠經收牌照捐公所辦事細則

計開

第一條 湖南全省牌照捐省城公舉一二殷實商人由總稽核處照會充當經收推廣全省牌照捐公所董代收捐項隨時呈繳總稽核處其餘省外亦仿照省城由商董代收呈繳分所委員按月彙解仍給所董經收推廣牌照捐戳記省外亦照地名給戳以昭信守

第二條 此項牌照捐以稽查銷數杜絕囤積限制吸戶以期如限禁絕爲宗旨

第三條 土店運貨進口清完稅課後須到經收捐項公所報明進貨數目賣出貨時亦要到經收捐項公所報銷出貨數目以便稽查

第四條 凡違背定章不到經收捐項公所與籌辦總稽

核處報明入貨出貨件數舫兩及未領有購土購膏煮膏各單照者概以私土論無論軍民人等緝獲將土照膏捐加三倍處罰卽將土膏全數充賞仍將土膏轉交領有營業憑照膏店煮膏售賣

第五條 洋藥必須於拆包零賣之後方准抽捐煙台條約定爲專條今牌照捐係抽之於膏正與條約拆包零賣相符倘有奸商串通洋人或洋行包運違抗不遵章報明件數在洋人卽爲違約自應一律以私土論緝獲時卽照上條辦理

第六條 各土店須驗明買客領有購膏購土牌照方准發賣賣出若干卽照數抽捐並填給煮膏執照

第七條 熟膏一兩收大洋三角該捐項由發賣店代收
由公所隨時催繳此款係抽自吸戶與土店膏店營業無
礙

第八條 凡買生土者限半月內盡數成膏不得私藏久
囤破壞禁煙大局吸戶買土一兩立即照蒸膏五錢繳捐
多數類推

第九條 外府州縣均由總稽核處派去委員會同總商
設立分所照章一律辦理各土膏營業商人不得多生枝
節以專責成而歸劃一

第十條 土膏各店已領營業憑照者限於卽日到總稽
核處呈驗蓋戳

第十一條 吸戶如無購土購膏牌照則不准買土買膏
若未繳捐領取煮膏執照則不准煮膏如敢故違稟候從
嚴究辦

第十二條 如有奸徒作弊違背章程定卽稟請調銷營
業憑照勒令閉歇重罰示儆

第十三條 每生土一兩定以成膏五錢如買生土一兩
則繳納捐款以熟膏五錢計算有此定准庶知日後吸食
銷膏之數且抽捐時不致有爭論成膏數目多少之弊

第十四條 開辦以前各土店存積生土須於開辦日向
公所報明以便稽核日後銷數如違查出究罰

第十五條 如有未盡事宜隨時稟請增刪更改俾臻妥

協

以上均就廣東章程畧爲修改

撫院批如詳辦理已據情電咨

度支部
禁烟王大臣
民政部

先行立案仰卽補資章程三份呈候分咨並將展定開

辦日期暨委員銜名具報查考繳摺存

湘省學款無着酌加川粵准鹽口捐既經諮議局議決擬

請仍照原詳辦理詳文

爲詳請

奏咨事竊照本司前因湘省學款無着擬請援照口捐辦法凡

全湘食戶每購鹽一觔酌加口捐錢六文無論川粵准一律收
取專作湘省教育經費之用一案當奉

憲台筭交諮議局提議在案茲據該局公同議定此項加收口捐改爲每鹽百觔加收省平銀三錢以之補助各屬小學堂及追加各學堂尙有贏餘改充地方行政經費等情呈奉

憲台札行下司奉此竊查湘省學務開辦於光緒二十九年當時因辦學爲維新要政需用經費均由前善後局隨時墊發祇於三十一年奉

前升憲端

奏明在銅元餘利項下每年撥銀十萬兩旋因銅元停鑄餘利無着而學務日益發達又未便因款項支絀阻其進行以致善後局墊用學費悉屬挪借商款上年九月雖經各前司道將原案備荒之加抽穀米出口釐金指作學務之用而收入之盈絀

行視年歲之豐歉以爲衡每年至多收數不過六七萬金上年阻禁以後早已分文無收不能恃爲常款此湘省教育經費並未籌有的款之實在情形也茲閱諮議局呈文內稱湘省教育費均由財政公所指有的款已辦之學已有之款斷不能撥作別用卽亦不必加入新款等語自係不知此中原委致涉誤會現在財政公所每年支出學款本省官立各學堂約計銀二十三萬六千八百六十餘兩補助民立各學堂約計銀二萬兩滙解京師湖北上各學堂約計銀四萬九千餘兩滙解東西洋留學學費約計銀九萬八千餘兩總共需銀四十萬兩以外卽將此項加收口捐全數撥充前用尙慮不敷如照諮議局所議以之充作地方行政及補助學堂之款則是前項應發學款仍

屬絲毫無着不足仰副

憲台維持教育之至意本司反復籌思此次酌加川淮粵鹽餉

口捐既經諮議局公同議決呈請公布應懇

憲恩

奏明仍照原詳專作湘省教育經費俟試辦一年之後如果供
支從前學款更有盈餘再行撥作補助各屬學堂之用理合具

文詳請

憲台俯賜察核具

奏並乞分咨

鹽政大臣暨

督部堂

查照實爲公便
宣統二年十一月

兩江
兩廣
兩西
兩南
兩北
兩東
兩中
兩南
兩北
兩東
兩中
兩南
兩北
兩東
兩中

廣西
陝西
甘肅
四川
湖南
湖北
江西
福建
廣東
廣西
雲南
貴州
陝西
甘肅
四川
湖南
湖北
江西
福建
廣東
廣西
雲南
貴州

撫院批已飭復諮議局仍照原案加抽口捐專充教育經費並會同

督院恭摺具

奏暨分咨查照矣仰卽知照此繳

擬請規復衡寶兩岸配銷免收各項詳文

爲詳請

奏咨事竊照湖南省衡永寶三府前於光緒二十七年

奏明配銷淮鹽除正項釐課外其餘如償欸加價江防加價軍需加價練餉加價備荒經費學堂經費均未照通岸章程收取在當時開辦之初原因各該府屬自咸豐軍興借食粵鹽以後久爲粵私侵灌旣欲規復廢岸不得不酌免各項加價俾成本

輕減易於行銷藉敵鄰私即使淮銷加暢粵收無着而湘省應得款項不能取之於粵仍可取之於淮是以於省城設立緝私營務處招募水陸營旂分途扼要設卡大舉緝私經營數載始將衡寶兩岸逐漸規復現查衡寶配銷淮鹽已銷至三萬六千八百五十餘引成效大著此盈彼絀而湘省所收粵稅亦因之異常短絀竊查江防加價係光緒十年籌辦江防奏准每斤收錢一文旋經奏請撥濟滇餉軍需加價係光緒二十年奏准加收一文以備軍需練餉加價係光緒二十五年因挑練勇營奏准每斤加收錢二文償款加價係光緒二十七年籌備新案賠款奉文每斤加收錢四文均爲湘省應收之款現在淮銷既已日暢非將以上免收各項酌量規復不獨賠款無從湊足卽一

切堵遏粵私之歛勢將無憑開支必致裁勇併卡因陋就簡將
已成之功驟於一旦仍於廢岸銷市大有妨礙本司職道等會
同商酌擬請將衡岸配銷免收之償款軍需練餉等項加價按
照通岸辦法先行規復寶慶一岸雖與衡州同屬配銷而運費
較重并另收該岸緝私勇餉售價較衡岸不同擬先規復軍需
加價一項以恤岸情統自明年正月起即由鹽督銷局查照定
章折銀加入牌價抽收悉數解交湖南藩庫以濟要需而裕餉
源仍俟將來察看該兩岸情形如果准銷日益暢達再將衡寶
兩岸未經規復之各項加價經費斟酌損益量爲辦理蓋湖南省
得此款項即使粵收日絀而餉源已有着落無所用其顧忌重
權粵稅嚴堵粵私則粵銷必致愈形短絀而於淮引前途實有

裨益矣所有擬將衡寶配銷免收各項酌量分別收復以濟要
需緣由是否有當理合具文詳請

憲台俯賜察核具

奏分咨

鹽政大臣暨

兩江鹽督部堂查照并乞

批示祇遵宣統二年十一月

續擬規復衡寶兩岸配銷免收各項按照通岸辦法詳文
爲遵飭查明詳覆事案奉

憲台批據本司職道等詳請將衡寶兩岸配銷免收各項自明
年正月起按照通岸辦法酌量分別收復一案奉批據詳衡寶

配銷淮鹽成效大著擬將衡岸免收之價款軍需練餉等項加價先行規復寶岸情形與衡岸不同先復軍需加價一項自爲籌裕餉源起見惟查清理財政局造送預算歲入表內鹽課第二項第一目江防加價第二目軍需加價註明衡永寶配銷應徵加價另行列收第六目卽列配銷加價撥充學堂經費及湘省路款第七目又列衡岸續加價補助醴陵磁業學堂經費雖所用不同而加價則一也又查光緒二十七年新案賠款每觔四文卽係口捐光緒三十三年二月內據善後局鹽法道督銷局會詳寶岸牌價每百觔暫加收洋二角合之每票節存餘款每觔勻解口捐四文撥充路股四文衡岸每觔先復口捐四文加入牌價抽收均解善後局等情經

前兩江督院端暨

岑前部院批准照辦亦在案茲所擬分別酌復各項加價計衡岸每舫共加錢八文寶岸每舫加錢二文其中與前案有無重複抑係如何區別事關

奏咨不厭詳細研究仰再逐案查明詳復核辦勿稍延悞仍候督部堂批示此繳等因奉此仰見

憲台蓋慮周詳無微不至欽仰莫名伏查衡寶兩岸配銷淮鹽當其開辦之初原欲減價敵私爲規復淮岸起見所有各項加價均未照通岸章程一律徵收此次清理財政局造具預算歲入表內鹽課第二項第一目江防加價第二目軍需加價註明衡永寶配銷應徵加價另行列收等語查第一目江防加價所

云衡永寶配銷另行列收一節係光緒三十二年因邊界各局銷引日暢免收過多江防海防軍需練餉各款不敷甚鉅暫就衡州一岸每百斤徵銀一錢七分以資彌補復於光緒三十三年議將該項加價內提一錢撥充醴陵磁校學費此卽預算表第七目列衡岸續加價之款也又第二目列軍需加價所云衡永寶配銷另行列收一節係光緒二十七年開辦配銷輕本敵私以圖規復於免去一切加價之外專照海防軍需兩項科則按餉抽收原支瀨省各學堂經費繼則酌撥路款此卽預算表第六目列配銷加價之款也前詳請將衡岸配銷收復償款軍需練餉等項加價並未列入江防與預算表第七目衡岸續加一欸尙無妨礙惟查第六目所列配銷加價雖未指定名稱然

溯厥緣起係照海防軍需兩項科則按餉抽收是不言軍需而軍需加價已隱括在內自應詳加改訂以免重複至償款加價於光緒二十七年湘省奉派新案賠款七十萬兩除遵部飭每餉加抽四文外復由湘省士紳呈請報効口捐四文是償款與口捐先後共加八文茲查衡寶兩岸雖口捐四文照數加抽而償款四文尙未加復前詳擬請收復衡岸配銷各項內列償款加價一條職是之故本司職道等遵奉

憲批遂加審察所有衡寶兩岸擬請收復各項固期調劑以適於平尤必斟酌以求其當查腹岸各局向來雜支經費每百餉徵銀二分備荒經費每百餉徵銀一分衡寶配銷均未抽收此欵前詳規復衡岸配銷各款內列軍需一項既於預算案第六

目配銷加價名異實同應卽刪除改收雜支備荒兩項經費隨同償款加價練餉加價一併收復寶岸配銷擬將軍需加價二文改收練餉加價二文似此變通規復較諸原詳衡岸旣形減少寶岸並未加多於岸情旣無阻滯於湘欸庶乎有裨所有違飭查明暨續擬改正緣由是否有當理合具文詳覆

憲台俯賜察核批示祇遵

宣統二年十二月

撫院批據詳已悉旣據查明續擬改正仰候照章飭行諮議局議覆核辦此繳

遵議湘省穀米弛禁辦法並無與約章不合詳文
爲詳覆事案奉

憲台札開宣統二年十一月三十日准

英領事翟照會內開頃閱貴部院運米告示內開以穀米輸出
總額暫以三百萬石爲限輸限屆滿仍行阻禁倘未運滿此數
而米價騰漲過於常額亦卽隨時察酌情形提前阻禁此次暫
行弛禁凡購運穀米除原有釐捐仍照章完納外務宜恪遵新
章每米一石加完賑糶款捐二百文附收農會捐十文穀每石
加完賑糶款捐一百文附收農會捐五文等語茲閱以上各節
與約章之宗旨有不相符之處查條約內載若在某處無論因
何事故如有饑荒之虞中國若先於二十一日前出示禁止米
穀等糧由該處出口各商自當遵辦其禁止米穀並限滿弛禁
各告示均須由該省巡撫自行出示云云夫條約准予禁運出
口只係一時之從權並非如常之辦法而貴部院告示內載暫

行弛禁一語卽以開禁爲從權而以禁阻爲常事致與條約本意頗覺反倒也如有某處饑荒貴國政府祇能禁該處穀米出口亦不能因一處荒災而通省之米全行禁運如果因荒欲再禁止當於二十一日前出示無論貴部院所定運額滿否及穀米價值騰貴仍須預定期至方行阻禁再查英商運米出口於完納關稅之後不能再抽別項之捐本領事所以詳爲辯論者以期按照約章後可免煩交涉用特備文照會貴部院請煩查照希卽仍飭遵照條約辦理尙祈見復是荷等因准此合就札行札到該司卽便會同米捐局於文到三日內核議詳復以憑照復勿延等因奉此竊查湘省米穀前因上年水災蓋藏告罄於今春示令阻禁固爲保衛民食起見本年秋收雖稱中稔而

省城附近及南路各屬尙有以蟲旱爲災前經司局詳請暫行弛禁因恐此項米穀各處商民紛紛販運於民食仍有妨礙自不得不於流通之中稍示限制之意前詳請以三百萬石爲限者係就目前之情形酌定數目如果將來仍須阻禁自應先期出示照約辦理惟繹英領事照文內載禁運出口係一時從權等語查此項米穀凡阻禁弛禁皆係體察年歲之豐歉以爲衡斷與條約本不相背况約章並無禁運出口只係一時從權明文不得謂與條約本意反倒至英領事照文內闕如果某處饑荒祇能禁該處穀米出口亦不能因一處荒災而通省之米全行禁運等語查荒歉雖出一隅而維繫動關全局卽如上年濱湖水災而全省各州縣以致米穀缺乏價值增昂自不得不兼

願統籌爲一髮全身之計再此次加抽賑糶捐以及附收農會
捐款係屬內地捐章與關章絕不相涉無論華洋商人一律抽
收並非稍有歧異揆諸約章亦無不合所有遵飭議復緣由理
合詳請

憲台俯賜察核照復批示祇遵

宣統二年十二月

會議分撥湖南粵漢鐵路公司鹽米各款無庸逕解仍照

舊章辦理詳文

爲會議詳覆事案奉

憲台札據湖南粵漢鐵路公司咨呈內稱以本司衙門財政公

所甫經設立事務殷繁所有撥充路款之衡寶配銷及加價等
款向由督銷局解由財政公所轉解公司者請自十一月起卽

逕解公司照收其鐵路口捐係由各督銷分局解由財政公所轉送官錢局登入公司往來摺者并由督銷局轉飭各分局一併起具文批逕解公司核收至將來米捐開禁其應照案攤歸公司米款應請米捐局一體逕解公司列收以昭劃一等因飭卽會同米捐局鹽法道督銷局核議具覆並轉移知照等因奉此查此案前准粵漢鐵路公司移會到司當經本司以本衙門財政公所遵奉

部章統一財權將善後牙盤兩局歸併公所所有各該局向日經管承辦事件以及經收支發各款歸併後均係分科辦事各有專責前項撥充路款之衡寶配銷及加價等款前准督銷局照案咨解公所當經公所將收明緣由咨覆其各督銷分局解

到鐵路口捐等項亦經公所照數收明分別印發批迴並將收到各款陸續移解鐵路公司以資應用各在案是善後局雖經歸併而應行辦理各件並無遺誤定案已久歷年相沿未便因歸併公所驟爾改解致與前案不符至米捐應照案撥還鐵路之款將來米捐開禁亦應查照舊章辦理免致紛歧等情移覆鐵路公司並咨明米捐局暨督銷局各在案奉札前因遵復會同核議查鹽米各款分撥湖南粵漢鐵路公司爲

國家補助營業之舉行政衙門未便漫無稽核查鹽款配銷加價口捐等項向由本督銷局暨各分局解由財政公所轉解者係屬照案辦理嗣後自應仍舊無事更改其米捐應撥歸路款一項向由本米捐總局解由官錢局轉解者現擬由本米捐總局

按月將經收暨咨解欸項各若干照數開單移知財政公所一面仍照舊解由官錢局轉解鐵路公司以省周折而便稽核似此辦理既與舊案相符而本司衙門於各欸出納有所稽攷核與

部章統一財權之旨亦相照合除抄札錄詳轉移鐵路公司外所有遵飭會同核議緣由是否有當理合具文詳請

憲台俯賜查核批示祇遵宣統二年十二月

撫院批如詳辦理仰即轉移湖南粵漢鐵路公司知照此繳

會議高等實業學堂暫借銅元局及鍊鉛廠爲實習工場

擬請暫緩接收詳文

爲詳請事案准提學司咨稱案奉

憲台批據該學司詳請將前辦銅元局暫借高等實業學堂改設實習工場一案奉批如詳准予立案仰卽移飭遵照辦理併候札行清理財政局及官鑛處遵照此繳圖存等因又清理財政局奉

憲台札同前由飭卽會同官鑛處將一應房屋及舊存機器等件逐一點驗造冊點交該學堂接收管理等因查鍊鉛廠卽前次之銅元局廠屋機件成本約四十餘萬金而物料所存鋼鐵油漆價值亦昂本年五月

度支部具奏造幣廠章程第五條內載所有各省舊設銀銅元廠機器廠房材料准總廠選擇提用等因是湘省舊設銅元局之機器廠房材料應在聽候

大部選用範圍之內九月准清理財政局函開案照監理官前奉

度支部簡具奏鑄造國幣應一事權擬將各省所設銀銅各廠分別撤留所留之廠統歸總廠一摺抄行監理官遵照辦理滬省已裁撤之銅元局應將出入欸目機料物件開具清冊派員點驗等語當經本司開列清冊派員會同財政局科員前往該局廠按冊點驗在案是

大部慎重公項之意亦至周摯此次高等實業學堂擬借銅元局廠舊址爲實習工廠之用現當該局廠停辦之時如果占地無多爲時不久房廠室屋不加修改物料機件得資保存亦未始不可以移緩就急之計爲一舉兩得之謀茲學司原詳內稱

有因而不改者有因而稍改者有逐漸進行者則是以該局廠全部之機件房屋通同規畫爲該校實習之用無論學校與工廠專業性質不同卽照學司此次原詳內所稱高等實業學堂籌設實習工場應行購置一切器械物品及購地建築等費核實估計需銀叁萬兩除將蒙養院地址招商承售約可抵撥稻田地價壹萬五千兩外是所欠僅壹萬五千兩今請以銅元局四拾餘萬金之房廠機料借抵爲該實業學堂壹萬五千兩實習工場之用在學司振興實業固屬以公濟公之心而以湘省財政困難情形論之實有不能以數拾萬金之基本供數百十人實業練習之勢且查該局廠上係鉛瓦下係洋泥機件汽爐全體聯貫一經拆改卽難規復今該學堂分廠部署閱規遠模

既爲現在工場之計畫復籌將來逐漸之進行且謂廠中機器如有借用支用之處仍行按件造具報銷未嘗議及作價揆其用意是名爲撥借實則改用姑爲暫時之辭積爲永久之計本司通顧全局綜核緩急實難以大宗鉅資晉昇以研究學理至詳內所稱黑鉛廠除試金室外所有煤廠及爐竈各處概行照舊封閉無稍侵越並兼任保守之責以待公用查鍊鉛廠之廠屋卽銅元局之舊址鍊鉛廠所配用之地均銅元局所原有之地今該校所支配指擬之地又卽鍊鉛廠所原用之地今僅稱於鍊鉛廠借一試金室是誤以銅元局爲一處鍊鉛廠又爲一處所謂責任保管盡廠場之大器械之繁亦僅保管其爐竈煤廠其餘大約皆在該學堂計畫配用之內似此措辦不惟與

大部奏定章程不合卽就湘言湘本司日在窘鄉備形困難如部允改造或另辦他廠或招商承售均可少資利用以補積虧亦有未敢安於緘默者再四思維惟有仰懇

憲台俯念此項機械房廠廢之則易復之則難散之則易聚之則難飭司會同提學司官鑛處再行分別委員前詣該廠察勘形勢另行商訂借用辦法務期學堂局廠兩有裨益各清界限用副

憲台提倡實業慎重公產之至意至由財政局會同官鑛處點交接收一層擬請從緩置議所有會議高等實業學堂暫借銅元局及鍊鉛廠爲實習工場擬請另訂辦法暫緩點交接收緣由理合具文詳請

憲台俯賜察核批示祇遵 宣統二年十二月

撫院批據詳已悉仰卽分移另行會商妥善辦法詳候核奪飭
遵此繳

會議兩湖米捐改辦五口辦法詳文 附條件

爲會議具詳事案奉

憲台札准

督部堂瑞咨覆湘省議加抽米捐改辦五口一案飭司會同米
捐局核議詳覆等因奉此竊查兩湖米捐始則以寓禁於徵加
重捐款係慎重兩省民食之計繼則以此款撥補兩省鐵路之
需乃兩省平均分用亦係籌辦兩省互有關繫之事業抽收之
法由雜彙款而分解於鄂區分之局湖任經收而鄂主復查似

合而實非合相通適以相成惟查湘之南華一帶與湖北石首公安監利等縣犬牙相錯港汊紛歧商民避重就輕恒以湘捐四百鄂捐二百或繞越偷漏或影射取巧南華境內故不能不設卡稍多以防弊混而商民遂以節次稽徵藉爲口實本司職道等因以爲籌兩省實行合辦之法爲統一徵抽之地意在有益於公無損於商復以湘省歷年大災本年又重以匪亂湘夙瘠區羅掘告匱賑欸賠欸應付綦難故於此次米捐改併五口設局抽收之時議每石於原捐外加抽二百文以爲彌補之計茲鄂議原案擬於湘議五口之中改荊河腦爲覆查總卡而於洪水港濠溝兩處仍設兩分卡稽查湘中出口米穀查洪水港濠溝均屏在湖內係屬湖東港汊出口之地出此兩口之後溯

流至鄂仍須經過荊河腦局卡今荊河腦既議改爲復查總卡是洪水港濠溝兩處尙非扼重首要擬請於水大時由岳州局加派巡船用資稽查毋庸常年設卡以節糜費至象骨港一區前經職道學昌察看形勢與荊河腦相隔不遠今既設卡於荊河腦象骨港一卡自亦毋庸另設再此次改併局卡係以闔網疏目爲宗旨惟創辦之始事端繁重防範倘偶有不周弊端卽因而叢集奸商取巧勢亦不能不預爲之防所有湘省應行裁撤米捐局卡擬請俟實行歸併之後再由本米捐局察看情形分別先後陸續裁撤以期簡一而昭慎重至此次籌增捐款係議歸湘省特別事項之用今原案以鄂省未便向隅議爲鄂四湘六分用無論此次加捐與從前合辦米捐原案不能合而爲

一卽在湘言湖亦有不能爲四六劃分之勢擬請查照另摺所列鄂二湖八一條核辦又公安石首米穀既係產自鄂境自不能與湘米湖捐相提并論原案議以前三年收欸多數由北度支公所發照仍照鄂中捐章抽收亦屬兩不相背辦法惟鄂省此次酌定米額係照溢收之年計算倘各該縣經管得人將來北米出口自屬見其有餘而不慮其不足萬一北米輸運逾於定額各米捐分局應仍按照南米捐章抽收以防冒混委員一層不分湖鄂統由兩湖米捐總局擇賢選能頒札任用既混南北界限之嫌自收聲息溝通之效總之此案上關捐欸下繫民食在鄂省反覆籌商自係裕公便民起見在湘中審慎經始亦無非善善從長之心除禁米出口一層應由鄂省自行核辦外

所有遵飭會議兩湖米捐辦法應請咨覆各條理合繕具清摺
隨文詳請

憲台俯賜察核咨覆批示祇遵又此案前經

憲台簡行諮議局核議此次

督憲來咨本司職道等覆議條件應請

憲台一併札行諮議局知照至前奉

憲台札發議覆湘諮議局兩湖米捐案擬請連同諮議局原案
一併咨送

督憲併案彙核以免參差再此件係本藩司主稿合併聲明 宣

統二年十二月

議覆兩湖米捐實行合辦條件清摺

原案第一條

甲 北米按照前五年酌定常額

遵查北米捐欸向由鄂之太平藕池調弦三局抽收與南北兩省合抽米捐本不相涉今議兩省合辦意在謀統一而除煩瑣是北米應納之捐仍應與南歧而爲二惟查太平藕池調弦地境屬鄂均係南米出口之地亦係北米出境之地若按照南米一律抽捐自易啓鄂中紳民以異議若於商民納捐時再行分別南米北米收捐無論調查爲難卽以商情避重就輕而論勢亦有萬難防杜弊混者今原案請以米額最長之年收捐最多之數計算是以分別辦理之中仍有嚴示限制之意應

請照允

乙 北米由北度支公所刊發憑單

遵查太平藕池調弦三口同爲南北米出口之地捐數
既有多寡之不同商民或藉北米以朦混原案擬由北
度支公所發給憑單交由鄂中各該縣士紳管理自係
爲嚴杜冒混起見應請照允

原案第二條

遵查原案所載兩湖米捐局向由兩省各派道員一人
主管米捐事務今應仍照舊案由湘鄂兩省派湖南道
員一員充總辦湖北道員一員充會辦應請照允嗣後
無論鄂局湘局一切事務均由兩湖米捐總局總辦主

辦至任用委員原案議湘局用湘員鄂局用鄂員一節
查兩湖米捐本屬湘鄂合辦初無此疆彼界之分惟以
湘之雷澧一帶與鄂之公安石首壤地毘連港汊又復
紛歧商民因南米每石抽收四百北米每石抽收二百
避重就輕爭以南米影射北米紛紛偷運鄂省如太平
藕池調弦各口雖經派員稽征然僅收北米兼查南米
終以事屬隔省於司巡賣放之弊未能禁絕是在湘省
內地米捐局卡未經裁撤之時固已弊端迭出現擬改
設五口將內地局卡陸續全行裁撤其向在雷澧各局
卡完納之米捐勢將羣趨於太平藕池調弦三口該三
口全係鄂境若以鄂境概委鄂員不惟顯分畛域且恐

於交界處所南北兩省委員互相推諉以致有減折招徠諸弊其關係捐務實非淺鮮今擬請凡五口局卡無論潮員鄂員均可擇能而使由米捐總局酌選札委不必區分省界明示畛域

原案第三條

遵查原案議以荊河腦爲覆查總卡查荊河腦據長江之上游扼荆宜之衝要遠溯川流近接洞庭實商舶之要途爲權管所必重原案以南北川省之米經過荊河腦局一律抽捐無從區分必致動生窒礙誠屬通籌并顧之言應請照允將前議荊河腦一局改爲覆查總卡凡經過該處穀米無論川米南米北米均由該局覆查

如米石不符或漏未繳捐者均由該局隨時補照實數繳納捐款徵收之款除川米應由北省自行酌定辦法外餘如屬於南北兩省之米均全數按月解繳米捐總局分別收解任用委員卽照第二條辦理

原案第四條

遵查輪船在湘省裝運出口米穀湖中應徵出口釐金向係由湘省上游之靳江河釐局預爲抽收以杜冒混至鄂之寶塔洲局向來於此項輪船由湘入鄂米釐如何抽收未經開列原案無從擬議應請咨由鄂省查明

原案另案核辦

原案第五條

遵查此案原議加抽米穀捐款每石二百本係爲湘省培欸之需今原案議以此項增收捐款多係鄂民擔任且稱鄂中災欸工賑糶挪用之欸亦待籌還議於湘省此次增收之欸定爲鄂四湖六作爲兩省照欸還欸之用

用在鄂省援案分欸固不能不爲捐由鄂民擔任之辭惟查此項出口米穀有輸運至鄂銷售者亦有不僅輸售於鄂者原案謂至鄂銷售與山鄂經過轉運下行之米鄂省均有收捐之權利查此次湘省議加捐款仍係加收本省土產貨物賑捐辦法爲湘省一種特別捐項實與從前合辦分欸性質不同誠以從前米捐改爲鐵路之用係屬籌辦兩省互有關繫之事業爲數故不能

不平均至此次穀米議加捐款專係籌補積年虧空爲
湘省特有之計盡鄂省如欲加抽米捐以爲彌補賑糶
積虧之計亦未始不可於此次湘中提議案外別爲鄂
中加捐一案然此係行政範圍內之事如必以湘捐案
內應提分鄂中款項無論不可按兩湖合辦米捐案
於徵創始之原案以爲比附而湘中連歲大災本年又
重以匪亂湘本瘠區羅掘告既賑款賠款籌付無方故
此次議加捐款實具萬不得已之苦衷爲無可如何之
籌畫卽按之兩省困難情形亦有緩急之不同者又今
日商情困苦民力凋敝米價增昂在湘省豈不知銷場
食戶之難而財政窘迫需用孔亟舍此實別無大宗可

籌之欸爲濟急解懸之用故不憚煩難而毅然爲之鄂
與湘猶左右手足也湘安鄂安湘豐鄂豐此次捐款之
所籌集卽爲湘中治安之所倚繫湘中多受一分惠卽
鄂中隱收一分之益爲湘計卽所以爲鄂計前由北藩
司高凌霨北江漢關道齊耀珊職道學昌面商將鄂四
湘六之議改爲鄂三湘七辦法亦鑒於湘之困難與鄂
之關繫也職道學昌堅未敢認亦以此案所關者大湘
中需盼此欸又復至殷今原案仍議以四六分用此湘
省所以不能不斤斤曲爲陳說也惟查太平藉池調弦
三口均屬鄂境今湘議增收本省土產穀米捐款雖屬
以湘欸籌湘事而局隸兩省欸屬湘用在各局亦有經

收之勞擬請將湘省此次議加捐款定爲鄂二湖八兩
省劃用原案所謂湘省提議籌畫實有始事之勞是鄂
省亦知湘中籌款之難而此次擬分捐款亦當諒湘中
以往復商榷一再經畫之苦衷也又此案原議籌付賠
款今鄂中所分既指爲賑款之用湘省歷年賑糶積虧
之鉅視鄂當不加少此次加捐之款應請查照議復諮
議局原定名曰歸還賑糶墊款捐以期與鄂同一名稱
撫院批查新加米捐已准

督院電知鄂湘分款辦法行知在案其荆河腦覆查總卡既爲
扼要杜弊而設自不可裁仰候咨覆

督院查照繳

會議擬將沅江官田淤荒暨新河兩岸地皮田畝作價抵
還善後局虧欠官錢局款項詳文

爲會詳請示事竊照湘省支應各款除司庫外向以善後局爲
總匯之處從前京協各餉與夫一切支款皆有常經出入相衡
尙不致十分缺乏自光緒二十九年籌辦廣西邊防以後騰挪
牽補遂形竭蹶嗣因衡寶配銷暨分湘賑糶米捐撥歸鐵路公
司每年入款驟短銀四五十萬兩又歲增新軍薪餉雜支出款
銀四十餘萬兩原案指撥銅元餘利之出洋游學經費京師暨
本省各學堂經費無着銀復四十餘萬兩以入抵出不敷恒在
百萬以外而籌辦新政增支之款仍復紛至沓來每遇支放全
恃息借爲暫顧目前之計自歸併公所以後本司綜核欠款除

銀行商號不計外共積欠本官錢局銀一百八十八萬九千九百餘兩懸欠月息及墊付岳常澧各屬賑款尙不在內值此財政困難已極之時告貸尙苦無門又何能得有餘力清釐舊欠但此項挪用銀兩均係本官錢局票本及官紳商富存放生息之欸久假不歸不特錢局周轉不靈卽財政公所應負月息亦必繼長增高終成坐困又不得不於無可設法之中勉籌抵償之法查光緒二十四年辦理沅江墾務以來築成老官官附新護三垸招民佃種委員經管收租修堤清查淤荒等事老官垸計有淨田六千八百一十六畝三分官附垸計有淨田二千八百七十五畝一分三釐新護垸計有淨田二千九百八十三畝二分一釐共計淨田一萬二千六百七十四畝六分四釐同蘆

課淤荒計值錢三十拾萬串又光緒三十二年因開濬北門外新河收買日僧水野梅曉碧浪亭房屋基地又碧浪湖河東維駝嘴譚家洲關福寺等處田地七百二十八畝六分四釐二毫三絲五忽並週圍湖岸餘坪隙地爲開挖新河之用自新河開濬後沿河兩岸均成高阜與火車站接近三五年後卽爲商賈薈萃之區此項地契房屋等件以及田地計值銀三十萬兩本司職道等會商量擬請將濬江官附護三垵田畝並近來淤出官荒暨北門外新河兩岸田地並地契房屋等件悉數撥歸本官錢局管業作爲償還借款本息銀三十萬兩錢三十萬串如蒙批准卽將前項卷宗契據圖冊一併移交本官錢局接收無論守售悉出本官錢局自行經理其餘借款仍由本司設法陸續

籌還以免久懸所有善後局虧欠官錢局欸項擬將沅江官田淤荒暨新河兩岸田地先行作價抵還緣由理合會詳

憲台俯賜察核批示祇遵再此案係本審司主稿合併聲明宣統

二年十二月

撫院批據詳已悉湘省財政入不敷出積欠該官錢局銀一百八十八萬九千九百餘兩月息及墊付賑欸尙不在內日積月累將無已時自不得不設法償還沅江官垸及碧浪湖等處田房均係公家之產以抵公家之欠原屬可行惟茲事有應研究者數端一沅江三垸之外蘆課淤荒及碧浪湖岸餘坪隙地各有若干頃畝與附近民業如何劃分界限應先勘定以免日後糾葛一各項田地歷年所收花息計有若干向係作何支銷清

理財政案內曾否將此項出入列冊報部一沅江築成三垸及
歷年修堤自光緒二十四年至今共用款若干收買碧浪湖等
處田房共用款若干現在作價自係照時值估計比較從前已
用成本盈絀若何一來詳抵還借款本息銀三十萬兩錢三十
萬串其中還本若干還息若干應分晰聲叙一各項田地歸官
錢局承受後守售既由局經理其有糧名者自應過戶若沅江
三垸應如何納課亦須議定立案以上五條仰卽會同分別查
議詳覆核奪再各項田地抵歸官錢局管業局卽業戶契據應
由司移交其卷宗圖冊仍應存司備案並卽遵照此繳

遵議安福縣彭令杰墾稟將稅契改歸自治所報繳酌提

捐款一案詳文

爲遵批核議詳覆事案奉

憲台批據安福縣知縣彭令杰墀稟阜縣園邑士紳辛柱等請將稅契改歸自治所報繳提充冊書過糧花紅並附捐錢文作自治經費各情繕具簡章轉懇查核立案批示遵行由奉批據稟已悉查稅契歸自治公所報繳核與十一月初一日會議廳議決條件兩歧仰布政司查明核議詳復飭遵此繳摺存等因奉此並據該縣稟同前山到司本司查核原稟內稱該縣稅契自改征九分以後征數頗減因花戶藉口稅重多所隱匿冊書從中串同舞弊所致擬請如各紳所稟援照議案改歸自治公所代報代繳並擬定簡章數條雖係爲整頓稅收起見惟查諮議局整頓田房稅契請改歸自治局董事會經理一案前經本

司查案不符議駁詳奉

憲檄業已將整頓田房稅契案刊發通飭各屬遵辦所定辦法條欵已極周密該縣應卽遵照認真辦理嚴杜弊混於此項稅收自不難日有起色所請將稅契改歸自治公所報繳之處應毋庸議以歸劃一至稟稱該縣自治經費所差尙鉅擬於稅契項下每業價一串加收附捐錢五文不惟與原定九分六分外不准絲毫加收

部章顯有違背致干部詰且該縣稅契旣因加收民間藉口稅重多所隱匿如再增收附捐錢文豈不愈滋苛累隱匿勢必較前更甚於正稅前途大受妨害所請斷難准行其自治不敷經費應仍由該令會集邑紳另籌的欵以資辦理所有違批核議

緣由是否有當理合具文詳請

憲台俯賜察核批示祇遵

宣統二年十二月

撫院批如詳飭遵並移地方自治籌辦處知照此繳

會議寶岸淮鹽分局加收牌價情形及六項捐款詳文
爲會議詳覆事案奉

憲台批據寶慶府職員岳鎮斌等稟爲藐徇匿朦別懇札撤一案緣由奉批查寶慶府中學堂需款抽收煤鐵紙木皮葑六捐定案已歸數年前據該署府王守稟陳勢難裁撤情形業經批司核飭遵照在案該職等須知興學爲地方公益亟應踴躍輸將何得一意阻撓至淮鹽加抽牌價捐據王署守稟稱光緒三十三年前署邵陽縣上官令稟經提學司詳駁卽行作罷是未

加收而該職等謂有此項加捐足爲中學堂補助並據寶岸各鹽店唐克聚等稟稱遵繳已經三年有餘殊爲不解仰藩學兩司會同淮鹽督銷局確切查明寶岸淮鹽局是否加收牌價其收若干作何支銷據實詳復一面由司札飭寶慶府將前六項稟定捐款愷切勸諭商民照案遵捐以重學款副稟批發又據職員唐光聚稟稱無案私加可否遵繳稟請批示以便祇遵一案緣由奉批仰藩學兩司會同督銷淮鹽局查照岳鎮斌等稟內批示辦理副稟批發各等因奉此查此案迭據該職員岳鎮斌等具稟到司當經節次明晰批示並飭令該署府王守壽齡查明稟覆在案奉批前因遵卽會同查核仍分行該署府王守壽齡並寶岸淮鹽分局詳細確查稟候詳辦茲據該岸淮鹽分

局委員翁經歷燕冀稟稱卑局前於光緒三十三年二月初三日接准署邵陽縣上官令移知並由前寶慶府潘守清出示曉諭邵邑鹽商販戶首事等於領銷淮鹽每百斤暫捐小洋一角以備官立學堂經費如將來稟准奉批飭加牌價此捐卽行停止移商由局代收卑局於二月初六日起代收此項鹽捐旋奉總局札飭收回水販津貼每百斤洋一角以七成解充各州縣學堂經費以三成提解學司衙門作爲師範學費其實慶鹽商捐助學費之欸一律停收免致與岸銷有礙等因奉此卑局遵於六月初六日停收此項鹽捐移覆邵陽縣署有案可稽所有二月初六日起迄六月初六日止代收學捐共計小洋一萬四千七百五十四角均經如數移解邵陽縣署有案此三十三年

加收學捐停收學捐之確切情形也嗣後卑局牌價內所收學費一角卽係收回水販津貼之款此外並未另收商捐卑職去臘到差查局售牌價係省平銀五兩四錢四分今正開秤伊始奉飭停收牌價內拖費三分故今牌價改爲省平銀五兩四錢一分現據職員唐光聚等稟稱卑局無案私加牌價一角未知係指在牌價內私加否抑指在牌價外另加否如謂牌價內私加卑局現售牌價省平銀五兩四錢一分除將列款撥餉繕具簡摺呈請察核外其隨票課釐清冊申資憲局有案可查如謂牌價外另加卑局現售牌價省平銀五兩四錢一分邵邑商民普衆週知卑局逐日起票賑簿有數可查城鄉各鹽商領銷簿據隨處可以調查卽唐光聚等旣稱開設鹽店儘可傳案飭將

該店何日來局領鹽若干出價若干由局核對起票真偽自明
綜之通岸牌價局委私行浮收從律懲治卑職到差以來售鹽
牌價在此五兩四錢一分之內涓滴無私具有報冊在此五兩
四錢一分之外如有絲毫浮冒願甘叅撤監追再查卑岸城鄉
各商販亦無唐光聚牌號合併陳明并賚呈清摺稟乞核示等
情前來本司職道等詳加查核查此項加價光緒三十三年曾
據邵陽縣稟請代收商捐一角經

前撫憲岑批行本提學司會同查核試辦嗣恐於岸銷有礙經
本鹽法道咨行本提學使司詳請毋庸置議復奉批示應免置
議各等因均經轉行該岸淮鹽分局遵照辦理在案茲查該委
員稟稱各節均與原案相符其所賚清摺逐款列登亦尙無背

案浮收情弊該職商等迭次稟難保非捏詞架誣希圖聳聽藉爲抵搪前項捐款之計興學爲地方公益自不能任聽該商等一意阻撓除該郡六捐應仍飭令劉諭商民照舊抽收以重學款外所有遵批查核寶岸淮鹽分局加收牌價各緣由理合會同詳請

憲台俯賜察核批示祇遵再此件係本藩司主稿合併聲明
宣統二年十二月

撫院批據詳已悉既經司局飭據寶岸淮鹽分局委員翁燕翼稟復光緒三十三年二月准邵陽縣移知每鹽百斤暫捐學費小洋一角由局代收旋奉總局飭停截至是年六月初六日止代收學捐解縣有案去臘售牌價係省平銀五兩四錢四分今

正奉飭停收拖費三分改爲省平銀五兩四錢一分涓滴歸公
具報册此外如有絲毫浮冒願甘撤叅監追並查明該岸城鄉
各商販亦無唐光聚牌號等情該司局核岸相符該岸分局並
無浮收情弊應無庸議該職商岳鎮斌等來轅妄稟其爲希冀
聳聽圖抵煤鐵紙木皮靛六項捐款可知唐光聚又冒充商販
出頭扛幫本應一併查究姑予寬免仰卽轉飭寶慶府剴切勸
諭商民人等務將前六項捐款照案踴躍輸捐以重學款是爲
至要仍補詳

督部堂聽候批示錄報此繳

另擬辦理供應章程詳文附章程

爲詳請批示飭遵事竊照光緒三十一年奉

前升憲端札飭以長善兩縣差事紛繁所費不貲以至吏治民生不暇兼顧飭令前善後局設立支應所選派委員辦理供應俾得盡心民事等因當經各前司道會同商確先後擬定章程詳奉批准立案遵行在案伏查原定章程新官到任填衙係視衙署之寬窄酌量費用之多寡院司道府均有一定數目常年供應除

憲轅由支應所承辦外其餘各衙門均係酌定包費按月送請自行購辦定章不可謂不周無如數年以來歷任各官雖皆力顧廉隅逐處撙節而丁役人等往往不知仰體過事奢求以致支應委員左顧右忌甚屬爲難值此物力彫敝之時亟應將支應章程酌量變通以期核實本司與在省司道公同商確擬請

嗣後

欽差過境及

憲轅填衙常年供應均由財政公所另行派員辦理外此外三
司三道及首府到任填衙物件廚房伙食均照額定數目送交
新官自行派人備辦如新官係屬署事或由本省陞遷者則其
原有什物本屬完全填衙費用並照定數減半送給倘因新官
係由別省陞調來湘地方生疎無人照料卽由長沙府將應領
費用若干先行電知請其酌派委員或長沙府委員代爲備辦
惟領款不敷所用應由代辦之員逕向新官請領補發以免賠
累此項填衙物件均係公家發款置辦自藩司衙門起至長沙
府署止遇有交卸並應將公款所辦各件造冊移交後任點收

不得聽任丁役搬運致有缺少茲經本司另擬章程八條開摺呈請

憲核如蒙

批准即將原定章程一律取銷查照新章辦理

宣統二年十二月

另擬支應章程八條

一擬

欽差過境及

撫憲到任填衙常年供應仍由財政公所派員承辦務宜實事求是逐處撙節力杜虛糜浮冒等弊外其餘三司三道以及首府各官到任填衙用費如係署事或由省內遷移者均照額定數目減半支給自行飭人備辦

其實缺新官並由別省陞調者由長沙府將應領數目先行電知請其酌派委員或由長沙府委員代爲辦理茲將各司道暨首府填衙用費額定數目列左

藩司到任填衙銀一千四百兩又三天伙食銀一百兩共計省平銀一千五百兩

提學司到任填衙銀一千二百兩又三天伙食銀一百兩共計省平銀一千三百兩

提法司到任填衙銀一千二百兩又三天伙食銀一百兩共計省平銀一千三百兩

鹽法道到任填衙銀七百兩又三天伙食銀一百兩共計省平銀八百兩

巡警道到任填衙銀七百兩又三天伙食銀一百兩共計省平銀八百兩

勸業道到任填衙銀七百兩又三天伙食銀一百兩共計省平銀八百兩

長沙府到任填衙銀六百兩又三天伙食銀六十兩共計省平銀六百六十兩

一司道首府新官無論先住行台或逕入衙署所有夫價水脚行李挑力以及本官官眷幕友內外僕從應用木器錫器銅器磁器一切陳設暨內外燈彩堂帳鋪墊簾幕官轎執事簽筒筆架公案印圍鼓點等件並內外伙食各處葎糊油飾彩畫等事悉在領數內支用倘有不

數卽由代辦之員逕向新官請領公家不再預聞

一常年費用除

撫轅仍由財政公所承辦外其餘各衙門包費每年藩
學臬三司各長平銀一千二百兩鹽法巡警勸業三道
各八百兩長沙府六百兩此項包費嗣後由財政公所
查照所定數目按月勻攤於每月十五日致送遇閏照
加凡屬各署宅門以內常年零星歲修工程置辦一切
器皿裱糊窗棚冬夏換季鋪墊簾幕涼棚大橋等件宅
門以外每年開封印信大堂堂帳公案案圍

敕印盒架包圍籤筒筆架硃墨硯公座座墊燈彩地毯等項
頭二門照壁鼓樂亭官廳等處一切修理並應用器具

鋪墊門簾等件暨轎夫扶轎差役之涼暖帽並臬署督
審局首府發審局等處添補修整桌椅鋪墊門簾一切
應用各項物件以及常年小工打掃上夜值宿各項人
役悉在前項包費內由各衙門自行購辦備用

一過境差使除

欽差部員由財政公所派員辦理外此外尋常各差接差送差
及督審局候審所聽刑提案各役工食仍歸兩縣自行
料理

一撫轅每年茶貢木箱包箱夫價棧廠閱兵搭棚鋪設菜
飯點心以及舉行

萬壽慶典均由財政公所派員預備其餘朝賀行香祭祀播種

求晴求雨救護日月等項亦仍歸兩縣料理

一各國領事及游歷洋人如須款待酬應之處無論鉅細均由長沙關代辦所需銀錢仍由財政公所查核撥還

一常年經費原在釐牙局外銷款內籌銀二萬兩嗣後改由官錢局盈餘項下撥用以後官錢局應將所撥銀兩按月移送財政公所另款存儲聽候支發

一此次改章以後所有支應委員卽行裁撤合併聲明

撫院批如詳立案仰卽遵照辦理並分別移行知照此繳清摺存

議覆全裁綠營發給餉票遵批辦理詳文

爲詳復事案奉

督憲瑞批本司遵奉

部議全裁綠營酌擬辦法並由財政公所刊發餉票由奉批據
詳已悉南省財力奇絀各處綠營除鎮守綏靖兩鎮乾綏兩協
鎮河保古四營暫緩提議外不得不一律提前裁撤以節餉需
該司所陳分年籌給官弁恩俸恩廉辦法係屬因時損益變通
籌措均甚妥協自可照辦惟馬戰守各兵僅祇一年恩餉共銀
四萬捌千玖百餘兩若分爲四季給發各裁兵所得甚爲零星
不足濟事似不如將此項兵丁恩餉一次給訖較爲實惠照此
辦理於該司所計現銀伍萬兩外約須加籌現銀叁萬數千兩
可以集事能否辦到仰再悉心籌劃復奪并候
撫部院批示繳摺一件票式二種存並奉

憲台批同前由奉批據詳已悉兵丁口糧無多所擬分四季發給恩餉應改作兩次發給裁撤時先發半年餘發期票屆期一次具領至官弁三年恩俸恩廉千把以上按季發給千把以下應改爲三屆發給凡繳札歸田者先發一年餘發期票於第二年年滿時分兩次具領以示體恤不繳札者仍照原議分發三年之內或別有差缺或病故或犯有事故被控在案均卽停止至財政公所現行餉票須令照兌方便試辦之初尤須留意查察慎防流弊勿失信用餘仰如詳辦理仍候

督部堂批示繳清摺票式存各等因奉此仰見

憲台加惠兵丁之至意查湘省財政困難已極此次應發官弁恩俸恩廉兵丁恩餉分刊現行票期票兩種按期發給原爲藉

紆餉力起見現在既奉

憲台批示將兵丁恩餉改爲兩次發給裁撤時先發半年餘發期票官弁三年恩俸恩廉千把以上按季發給千把以下改爲三屆發給凡繳札歸田者先發一年餘發期票分兩次具領似足以示體恤應請遵照辦理至湘省綠營除前議緩裁之鎮寧綏靖兩鎮暨甯甯經議裁之乾州永綏兩協河溪鎮溪保靖古丈坪四營外其餘撫標提標永州鎮標並已經裁存各協營均應一律裁撤容俟會商兵備處布置周妥酌定日期再行專案另詳除分別移行外所有詳復緣由理合具文詳請

憲台俯賜察核批示

宣統二年十二月

督院批如詳辦理仰卽移行一體遵照仍候

撫院批示繳

撫院批據詳已悉仰卽分別移行知照仍候

督部堂批示繳

議覆常德府譚守承元等會稟訊追劉恒慶延欠官欸詳
文

爲核議詳覆事案奉

憲台批據常德府譚承元武陵縣廖世英官錢分局委員韋嵩
年委員蘇兆奎會稟訊追劉恒慶延欠官欸一案情形乞核示
由奉批據稟已悉查劉恒慶錢店欠官錢局本銀五萬五千五
百九十餘兩又息銀一萬四千六百五十兩有奇原議抵收房
屋作價一萬三千兩現繳穀一萬石飭擔認之胡紳變繳一萬

兩又擇膏腴田產三處約價三四萬兩究竟田價實有若干房屋穀石等價是否核實本果還清利息能否酌減仰布政司會同官錢總局查核議覆飭遵至前辦常德官錢分局委員吳承恩司事任湘承陳春生如果欠該店銀三千一百九十餘兩亦不能任其延欠應由司局飭查追還以昭平允此繳并據劉雲章等以力盡累重等情呈奉

憲台批查恒慶店欠官局利息係自倒閉之日起計算論官局營業性質自不能免論該店虧累情形不無可原是以於常德府印委各員會稟內批行司局核議在案據稟前情仰布政司會同官錢局速議具覆并追令前官局委員司事吳承恩等將欠款清還一面由司查照稟列並做心等欠戶分飭各該地方

官從嚴查追切切副稟批發各等因奉此并據該府縣等暨劉雲章等先後稟呈前來本司道等遵查劉雲章等所開恒慶錢店出票過多應兌無錢以致倒閉因是謠風四起常郡各錢鋪均岌岌可危經地方官紳商電致官錢總局速籌接濟維持市面計自前年八月起至年底止運赴常德現銅元五十二萬串其中購自漢口者多本省鼓鑄者少核計元價運脚加以輪拖費用每串價銀六錢內外迨後元價跌落不但并無餘利抑且總局受虧甚鉅不意劉雲章等反謂官錢局獲利二萬餘兩因之邀求免息實屬不明事理况劉雲章等現尙未至破產卽商律亦無准予免息之條業經本司道等飭令常德府督同該印委等迅提劉雲章等到案嚴切比追務令將官錢分局本利銀

兩尅日如數清繳倘再延玩卽行詳叅革追至外欠恒慶各欸無論官商紳富自應一律查追以昭公允當經本司道等查照稟列各欠戶聶徹心等分飭該管府轉飭原籍地方官勒傳到案訊明嚴追其前辦常德官錢分局之吳令承恩欠欸亦經飭令該府縣查明確數詳請咨追除由本司道等隨時催飭迅速追繳外所有違批核議緣由是否有當理合詳請

憲台查核示遵

宣統二年十二月

核擬撥還官鑛總處借款銀兩詳文

爲遵飭詳覆事案奉

憲台札開據官鑛總處司道詳稱案照本處迭准藩司函開以財政公所出入不敷請撥借銀欸維持周轉業於本年九十月

間陸續撥借銀貳拾萬兩本處現因採存礦砂掃售入款較多年內約可敷衍開年以後支絀情形概可想見加以發行公債票責成本處每年籌備攤還本息銀貳拾陸萬伍千兩來年爲第一期亟須先期籌備懇飭司一俟籌有的款即將先後撥借之省平銀貳拾萬兩併大清銀行借款息銀四千六百兩全數撥還俾資應付再本年六月譚署藩司任內迭由本處解存司庫洋例銀壹拾叁萬貳千叁百兩合省平銀拾貳萬玖千陸百伍拾兩又查歷年與善後局往來撥借款項互相劃抵尙存省平銀壹拾肆萬貳千肆百七拾玖兩壹錢四分捌釐叁毫以上兩項擬請併飭藩司悉數撥還庶得各清欸目藉可以資挹注如果來年獲砂日旺消路大通以入抵出綽有餘裕仍可接濟

公用等情到院飭司卽便查照核擬具覆查考等因奉此查前善後局每年需款浩繁往往入不敷出全賴與各處展轉騰挪相爲支拄以故歷年積虧至貳百餘萬兩之多積累旣深清償殊非易易本年歸併公所支絀情形尤甚於前而出款浩繁實有岌岌難支之勢故迭次與官鑛處商借銀兩以資周轉原議俟庫儲稍裕卽行撥還現在庫藏雖仍異常支絀惟官鑛處旣需款在卽自當勉力設法於年內籌措銀拾萬兩移還官鑛處收用餘數統俟籌有的款再行撥還惟官鑛處所辦各礦現經竭力擴充來年砂利之優自可操券而獲仍望官鑛處兼籌並顧以維大局除於年內籌措銀拾萬兩另文移還該處核收外所有遵飭核擬撥還官鑛總處借款各緣由理合具文詳覆

憲台察核飭遵宣統二年十二月

撫院批已據詳檄飭官鑛總處遵照矣此繳

遵議武陵縣廖令世英稟抽中費開辦學堂詳文
爲會議詳復事案奉

憲台批據武陵縣廖令世英稟爲抽收買賣田房二分中費開
辦初等小學及簡易識字學塾懇請批示立案由奉批據稟已
悉仰提學司會同布政司查核飭遵仍候

督部堂批示繳等因奉此查此案前據該縣稟同前由到司當
經本司以民間買賣田房例有中費前據常甯縣稟請酌提此
項中費三分之一爲辦理自治經費業由前牙釐局照章議駁
詳准

撫部院轉飭遵照在案該縣所請於前項向有中費五分內提
取二分作爲開辦初等小學堂等項經費批准立案等情核與
定章不符仍應會集邑紳另籌的款以資辦理批示印發去後
茲奉前因本司等遵卽會同核議查籌款興學原屬近今急務
而興學尤以教育普及爲切要之圖該令原稟內稱該縣學堂
無多擬先開辦初等小學及簡易識字學塾提取稅契中費二
分作爲開辦經費自繫爲推廣教育起見該令熱心學務不無
可取惟稅契一項關係要需湘省自改章加徵以來稅收已不
爲旺雖經本藩司從嚴整頓聞據各該州縣稟稱稅契短收情
形猶以民間藉口稅重時有隱匿所致爲詞且調查民間買賣
田房一家置產買賣兩家之族友親鄰皆欲沾潤中費稍不遂

意卽多梗阻若於應得中費內提捐二分不惟於買賣機關轉
多窒礙亦恐業戶藉詞苛擾隱匿愈多正項稅收更必大受妨
害應請札飭該縣將此項捐款卽行停止其辦學不敷經費該
令應勉爲其難另行商籌別款方臻妥協所有會議武陵縣稟
請抽收賣買田房二分中費開辦初等學堂及簡易識字學塾
礙難照准立案緣由是否有當理合詳請

憲台俯賜察核批示祇遵再此案係本藩司主稿合併聲明宜

統二年十二月

擬院批據詳已悉仰卽轉飭遵照仍補詳

督院查核暨候批示繳

湘藩案牘鈔存

詳文二

會議永定縣自治所所長侯昌銘稟請籌截留稅契餘款
爲自治經費詳文

遵議裁併雷澧總分各局卡詳文

會議東安縣朱令靖培稟請加收契紙捐辦理各項要政
詳文

請將文員廉俸等項撥歸地丁股掌管各項倉穀撥歸制
用科學管詳文

遵議長沙縣沈令瀛善化辦胡令應雲會稟酌擬整頓典
買田房稅契章程辦理一案詳文

會議鄂諮議局議決兩湖米捐合辦分欸詳文

會議酌量抽取淮鹽餘舫行用兩項詳文

遵議熊紳希齡等請撥鳳芷磁業試驗場經費詳文

會議擬將製造局改借高等實業學堂作爲實習工場詳
文

湘省財政困難擬請暫緩編設陸軍警察隊詳文

湘省推廣牌照捐礙難銷除仍懇分咨 大部每年承認

照繳洋藥加稅詳文

擬請籌設官紙印刷局詳文

遵擬開辦官紙印刷局章程詳文

附章程

請將丁漕兩庫書吏酌改書記寫生並將原有規費及本

司應得平餘併行提歸公用詳文

會議整米兩局抽收銅元補水詳文

實業學堂因爭借銅元局爲實習工場要約停課遍發傳單懇請追究詳文

會議院司道公費並擬裁各州縣教佐各缺詳文

會議撫院原定公費劃分清楚擬請照章改設幕廳詳

文附清摺

會議官紳籌設公米所辦法詳文附條件

湘省學款驟難改照新案辦理詳文

會議裁撤綠營日期擬請改至六七兩月爲止詳文

籌議添募巡防五隊並訂購槍枝及擬請緩解協餉緩辦

審判詳文

呈資裁存各營弁兵員名數目清摺並請示長沙協撫標
左右兩營原募土兵應否裁撤詳文

遵飭籌撥偵探隊經費詳文

遵議首府縣詳稱集紳妥籌阻禁穀米詳文

遵飭議覆諮議局經收田房稅契案內條件詳文

議覆黃侍御原奏湘省礦產豐富亟宜提倡新法厚集資
本各節詳文

遵議原有鐵路口捐改爲教育口捐詳文

第一次議訂土藥統稅改歸湘省自辦辦法詳文 附簡章

湘藩案牘鈔存第二册勘誤表

頁數	二	二	二十九	六十五	六十五	八十五	八十七	八十八	百零一
行數	五	五	十一	十八	二十一	二	十七	十六	十五
字數	十	十一	十六	二十	九	七	八	十七	
誤字	備	籌	免	彈	淨	會	戴	挂	俟
改正	籌	備	允	強	浮	繪	載	挂	第

湘藩案牘鈔存

詳文二

會議永定縣自治所所長侯昌銘稟請籌截留稅契餘款
爲自治經費詳文

爲會議詳覆事案奉

憲台批據永定縣自治公所所長前內閣中書侯昌銘稟奉縣
錄批飭籌議截留稅契餘款以作自治常年經費乞示遵由奉
批據稟已悉飭承檢查本部院衙門未據該所長稟報有案所
稟是否可行仰地方自治籌辦處查明原案會商布政司核議
詳奪飭遵此繳等因奉此由處移司會同核辦 本藩司 查此案
前據該縣具稟到司當卽批示以該縣辦自治需款甚鉅籌措

維艱前經自治所紳集議擬於稅契項下每契價錢壹串仍作銀壹兩征收以陸錢稅入報解以肆錢稅入撥充自治經費既據該令查明該縣稅契業價壹串向來均作銀壹兩徵稅民間成爲習慣相安無事自治經費又舍此委無別款可籌應准畧予通融如稟照辦等語印發去後嗣復據該縣以該自治所紳侯昌銘等因籌辦自治經費無出請截留稅契業價四錢溢徵之款提充經費暨將稅契一項由自治所代報代繳並先於城廂內外張貼廣告據情轉稟前來復經 本藩司 批飭以經徵田房稅契地方官責成綦重前諮議局整頓田房稅契請改歸自治局董事會經理一案業經 本司 議駁詳奉

院批刊發整頓條款通飭各屬遵辦該縣自應恪遵前發條款

認真辦理乃該自治所紳等不諳事體遽謂稅契一項已准自治公所代辦並張貼告白實屬冒昧已極該令慢不加察率請批示尤屬糊塗仰仍凜遵前次通飭妥爲經理該紳等不得妄行干預致取咎戾等語印發在案茲奉前因 本司職道 等詳加查核辦理地方自治備籌憲政之基礎推行尤不容緩經費自當妥籌以期次第擴充日臻完善故該縣前次稟稱自治費用無款可籌請將稅契溢徵之款作爲此項常年經費當時 本司 因念該縣地方瘠苦籌措款項自屬爲難且係在整頓田房稅契條款未經通飭之前尙可略予通融批准照辦現在既經通飭契價每錢一串明定作銀五錢徵收各屬均已遵行該縣亦應遵照辦理以歸一律不得藉詞民情相安仍照前業價

一串作銀一兩徵稅致礙稅收而貽民累除以前溢徵之款擬請從寬准其撥充自治公所應用以促進行外嗣後自治不敷經費應仍由該令會集邑紳就地另籌的款藉資接濟所有遵批會議緣由是否有當理合具文詳請

憲台俯賜察核批示祇遵再此件係本 藩 司 主稿合併聲明宜

統三年正月

憲院批據詳已悉仰卽轉飭遵照此繳

遵議裁併雷澧總分各局卡詳文

爲詳請示遵事竊照前牙釐總局奉

憲台札據諮議局呈稱據南洲廳段雲松華容縣宗惟實安鄉縣孟炳燮等以釐金子卡林立百弊叢生懇請裁併等情又據

南洲華容安鄉各廳縣職員左記言等稟同前由並發陳請書一本飭令會同米捐總局妥議詳復核奪等因奉此當經前牙整總局札委張倅惟寅馳赴雷澧兩局周歷各卡併案查明稟覆並移米捐總局會同查核詳辦業經先行呈報

憲台在案嗣據張倅查明繪具圖說稟復復經牙整總局將張倅圖說各件札飭雷澧花晚岡兩局專辦委員再行詳細查考並將雷澧各分卡如何酌量裁撤兩局歸併辦法是否可行飭卽會同詳察稟復去後旋據雷澧局專辦委員楊倅澤春花晚岡局專辦委員黃令鏡澄稟稱雷局之五田渡梅田湖芝蔴坪中河梁澧局之梅金窰五方嘴東壩口劉家嘴各子卡均與鄂界毘連犬牙相錯稽查堵緝在在均關緊要三仙湖柴碼頭腰

口羌口鳳凰嘴五卡實扼雷澧門戶注茲口二步窰大湖口張家台夾洲五卡又輔各卡截徵查注卡冬令水洞山南洲烏嘴鱧魚鬚明山頭至洞庭東湖僅此一河可以行船局卡設此甚爲合宜而夏秋水漲港汊分歧凡注卡上游明山頭湖枝口均利舟楫不但東湖船隻多繞道出此以圖偷漏卽常德益陽一帶地方往南華境內者亦莫不由沅江草尾出蕭公廟進湖枝口以避三仙湖非特注卡無從抽收卽仙卡亦暗受影響擬請將注茲口卡於水漲時移設明山頭水落仍設注茲口以扼緊要而免漏溢有卡堵截則商船仍常經過遵章完釐如堵卡一撤則商民惟利是圖自必千帆萬檣爭相趨避而徵收之卡反無所事事矣以上各卡或徵出口或徵落地或屬堵緝偷漏或

屬扼要稽抽皆未便裁撤致礙收數三汊河子卡上有芝蔴坪中河梁收其出口下有腰卡柴卡爲其門戶該卡雖畧有所收亦無非預收他卡之稅又汀家洲與柴碼頭晃湖寺與梅金窰均兩相對峙相距不過四五里而梅金窰總扼晃湖寺麻鵲嘴二河之要柴碼頭踞汀家洲河之上風岸應請將三汊河汀家洲晃湖寺三卡一併裁撤以免贅設而節公帑華容子卡向收該縣城門市釐金每月額徵捌拾串此外護城八垸及南山西北上下數十里所產穀米等貨均以華城爲屯滙交易場應完釐稅尙未承包每月收數約計四五拾串除開支外所餘無幾雖值旺時亦不過收至八九十串而已今該處紳商議定嗣後每月加繳錢貳十五串共每月額繳壹百零五串文由該市公

舉殷商按月包完查該處內地出產卽不在雷局完釐亦難飛渡岳局楚弓楚得尙無損於公家此次加增之數雖少於抽收而減去一卡之開支卽等增一分之釐稅通盤籌算盈絀不致相懸應請將華卡裁撤以順輿情而免怨望各卡裁撤之後雷澧門戶洞開畛域將欲消除比較毫無把握惟有兩局歸併庶無爾我之分查雷灣專局原設鱧魚鬚澧安專局原設花碗岡各處一隅均難遙制非擇一適中之地不足以資考察查有安鄉縣北門外深柳書院附近地方旣爲各子卡縱橫適中之地易於控制又踞仰天湖達楓林港黃金窰黃泥窰福星橋四河之咽喉最便扼徵其水道深濬亦較勝於他處擬請將雷澧專局移併該處額曰安鄉釐局但該洲向無局房舉凡購地填基

庀材造屋需費甚鉅擬暫賃民房試辦數月後俟有成效再行稟請委員勘估修造局屋至原設安鄉縣南門外之仙桃卡距離該地不及四里俟專局併移之後卽宜裁併以節虛糜惟雷灣花曉岡兩處均係出口仍應各設子卡酌派司巡數人並請將羌卡稽查委員移駐雷灣以便隨時督率核實稽徵此擬裁併移設專分局卡之大概情形也雷澧歸併屬卡較多事務愈繁責任愈重擬請添設司事四人一專管三四聯大票月給薪水拾串凡各卡領票繳票之事均歸經理以免推諉而專責成一核對各卡繳驗經驗查向章並無此項司事故磨票洗票暨大頭小尾之弊層見疊出此次歸併請加派一人月給薪水拾串凡各卡繳來繳驗留票一有可疑隨時追究以示周密而昭

慎重其餘二人設爲總稽查每月各給薪水貳拾串文夫馬費八串文遴選切實可靠之人充之分派梭巡各卡明查暗訪一遇商船隨時覆查使司巡咸懷儆懼窒貪慾竊設卡稽徵原爲裕課而整收之衰旺全視司巡之賢否爲準繩而司巡之中又以稽查爲最關緊要查雷澧定章雷局稽查司事每人每月薪水十串而已澧局稽查司事每人每月薪水拾貳串而已雷局巡丁每月僅工食四串澧局巡丁每月僅工食四串貳百值此日食昂貴之時辛資太薄事畜無資不僅束身自愛者視釐章嚴密相率他去行爲無狀者因負欠太重以身試法似此仍前敷衍而釐弊終難湔除若欲澈底澄清自非酌加辛資不足以彌廉隅而資鼓舞擬請將稽查司事分等訂薪其事繁稅旺

如三仙湖鳳凰嘴兩卡每月加成薪水貳拾串文事務稍簡如
劉家嘴二步密大湖口張家台夾洲五卡每月薪水仍定爲拾
串文其餘各卡均每月加成薪水拾肆串文收核填票改歸一
律每月各給薪水拾串文巡丁每月加成工食五串文使潔己
奉公者衣食稍足內顧無憂加以總稽查二人在在覆查使有
畏忌不致自肆則從來相沿積習適成牢不可除之弊竇或可
從此釐剔一新以上加增各項薪水工食爲數雖鉅而以此次
裁併後每月額支壹千捌百貳拾六串零六十六文較從前兩
局額支壹千捌百叁拾叁串捌百九拾壹文尙可減少開支錢
柒串有奇是在公家不費壹文之帑而在釐務自有起色之時
此裁卡節費擬添設司事酌加辛糧有盈無絀之大概情形也

等情並呈雷澧局卡水道全圖一張開支統計表二紙前來查雷灣花畹岡兩局子卡林立久爲商民所詬病現據該員等稟稱將三汊河汀家洲晃湖寺暨華卡仙桃卡五處一併裁撤並擇雷澧適中之地設一專局以資控制既經該員等會同察勘事屬可行惟前奉

大部裁併局卡之文所有各局支款業經本司分別裁減在案該兩局現裁五卡是該五卡常年用費本應全行刪除藉昭撙節來稟請以所裁之款酌加局卡各司巡並添設司事四人經理各事揆諸兩局原額支款每月僅減錢柒串有零核與大部裁減局用之本意未能愜合姑念該員等稟爲整頓釐務起見該兩卡司巡辛工本薄非酌量加給不足養廉擬卽照准

嗣後該局卡司巡既經優給辛工自應奉公守法格外勤慎倘復有舞弊營私情事一經查覺定卽儘法懲治該兩局歸併之後地方遼闊責任愈重該局專辦委員務應隨時攷察認真辦理倘或稽徵不力以致收數不旺卽唯該專員是問批飭遵照辦理至花畹岡局專辦委員黃令鏡澄前經詳請調辦潮潭釐務時因雷澧兩局正在籌議歸併故將黃令遺差飭由雷局專辦委員楊倅澤春兼辦俾資熟手而專責成茲據楊倅稟稱該兩局實行歸併擬於安鄉縣深柳書院附近地方建設專局俟擇定地址稟請委員勘估修建並請將雷澧花畹岡兩局原領木質關防二顆具文繳銷另請頒發關防一顆各等情本司詳加覆核該兩局現今歸併所有安鄉縣深柳書院附近地方既

據稱爲適中之地建設專局足資控制當經批飭該倅察勘地
址繪具圖說稟候核奪詳辦並擬由司一而另刊木質關防一
顆文曰安鄉釐金專局之關防頒發該局印用以昭信守而符
名實正核辦間又奉

憲台批據楊倅澤春稟歸併日期暨裁撤各卡專局擬暫設雷
灣並懇另頒關防以昭信守仰候示遵一案奉批據稟已悉仰
布政司查核飭遵具覆此繳並移清理財政局知照圖表均存
等因奉此所有先後遵飭查裁雷灣釐金兩局各分卡暨改建
專局並另刊關防各緣由是否有當理合具文詳請

憲台俯賜察核批示祇遵再米捐局各子卡現因改辦五口尙
待籌商一俟定議再行會同米捐總局另案詳辦合併聲明 宣

統三年正月

撫院批如詳辦理仰卽分別飭遵並移諮議局查照仍候
督院批示此繳

嗣後委署人員明定期限起程赴任詳文

爲詳明事竊查州縣乃職任親民佐雜亦分曹贊治故無論正
署捧檄之官皆有一定期限不准任意延宕誠以官之更調非
因人地不宜卽因事故撤省不容稍涉遲迴也況自國會期限
縮短憲政應力促進行若省門業已懸牌新任仍逗遛不進前
官旣存五日京兆之見卽本署之書役地方之紳董率多呼應
不靈不惟貽誤堪虞亦失量能授職之初意乃查委缺各員往
往於奉札之後延不起程有遲至月餘或三四月之久始行到

任者考求其故非因缺苦希冀量移卽因錢漕爲前任徵完欲
遲到而省賑累但計缺分之優瘠入款之盈絀而於地方人民
之寄轉漠不關心甚非所以肅吏治若不明定期限嚴示懲處
殊不足以儆玩泄擬請嗣後凡委缺人員均飭令於奉札後限
十日內起程按路程之遠近定到任之遲速倘中途因風雨阻
滯難以前進應准按日扣除至多不得過十日仍將遲滯日期
報明沿途州縣轉報查考並於申報到任文內詳悉聲叙自此
次定章後在省候補人員並無差委而無故逗遛者逾限五日
記過一次逾限十日記大過一次逾限十五日記大過二次卽
予撤委並停差委兩年如所委之員現充各署局所要差准其
自銷差之日起扣若實有事故航延並准其先行據實呈明或

酌核給限或由司委代以專責成其調署各員仍令於交代清楚後卽赴調任倘逾定限均行照章詳奏本司爲整飭吏治起見是否有當理合詳請

憲台察核批示祇遵宣統三年正月

督院批察核所議辦法甚屬周密鄂省州縣以及各項捐局委員亦不免此弊除札飭司局一體仿行外仰卽遵照辦理仍候撫院批示繳

更定土店吸戶煮膏收捐章程詳文

爲詳明事案查本司職道等前就廣東推廣土膏牌照捐章程參酌湖省情形修改詳奉

核定咨明立案准於財政公所附設推廣土膏牌照捐總稽核

處業經遵照開辦抽捐之法原定二土一膏每膏一兩收捐大洋三角旋因各土膏店舖撓和烟灰烟渣舞弄漁利甚至一土一膏之外尙有長餘伊等私收之捐較公家幾至一倍尙復成何事體嗣後應定爲一土一膏不得再以一土折膏五錢計算既定爲一土一膏凡吸戶買土一兩亦照膏繳捐大洋三角其膏店一土一膏之外有長餘者亦應儘數據實呈報繳捐以杜隱匿除卽通飭各稽核處並出示曉諭外理合具文詳請

憲台俯賜察核立案

宣統三年正月

會籌裁撤綠營日期並酌擬應行布置事宜辦法詳文

爲遵飭會籌裁撤綠營詳請

奏咨事案准清理財政局抄送

度支部核覆湘省預算表關於藩署各款擬增擬減清單第四款綠營兵餉一項飭令仿照浙江辦法將全省綠營除前議緩裁之鎮筵綏靖兩鎮乾州永綏兩協鎮溪河溪保靖古丈坪四營暫留不計外其餘一律裁撤等因准此查湘省綠營除緩裁各營外原定宣統四年裁竣現已裁至八期各營存兵無多既不足以彈壓地方徒事虛糜餉需無補實際自應遵照

部議卽行裁撤俾得各謀生業藉節餉需惟既擬全裁所有應發官弁恩俸恩廉兵丁恩餉爲數甚鉅當此節年積虧庫儲支絀財政困難點金乏術之際不得不預先籌定辦法以免臨時掣肘除已由本藩司擬具刊發餉票兌付裁撤弁兵恩俸廉餉詳細章程詳奉

憲批移行遵照外所有裁兵應行布置事宜現經本司道等會同詳細商酌反復籌議謹將酌擬辦法縷陳

憲鑒查湘省原設制兵三十一標鎮協營除鎮寧綏靖兩鎮乾州永綏兩協鎮溪河溪保靖古丈坪四營暫留綏裁並龍陽營業已裁竣外尙餘應裁二十二標鎮協營計現存官弁自提鎮起至額外止共二百五十八員馬戰守兵共二千四百八十五名擬請以本年三月三十日爲全行裁撤之期此外撫標暨長沙協原有詳准改募土兵共二百一十名又撫提兩標原設練軍各五百名係由制兵及土兵內挑練除已遞年裁減外現共存練軍六百零一名應請一併裁撤所有應裁各營武職內提督一員總兵一員均擬請開缺他省未裁綠營以前遇有提鎮

缺出由部開單照裁缺章程儘先請

旨簡放其副叅游都守以及千把外額俟裁缺後查取履歷分別詳咨註冊遇有他省及本省未裁綠營相當缺出儘先叙補或量其人材各予差委其未經簡放叙補之前及並無差委凡係此次實缺被裁員弁均一律請給恩俸廉三年千把以上仿照鄂省辦法按季發給千把以下畧予變通改爲三期發給倘三年之內或病故或犯有事故被控在案查係實在者均卽停止如有於裁撤時自願繳筭歸田者概先發一年餘發期票分兩次具領裁兵應給一年恩餉擬分兩次發給裁撤時先發半年現銀餘發期票一次具領仍由各該營主管官造具花名清冊咨司請領回營會同地方官按名散放以昭核實至各營制

兵向有看守城門及防護庫獄押解人犯餉鞘保護教士教堂
監斬行刑一切事項擬請將看守城門改歸巡警其保護教堂
等事均飭令各巡防隊就近派撥勇丁保護押解併擬責成各
該營預將向來各主管事宜先行開報一面就近分別移知巡
警巡防隊及地方官以便派撥警兵勇役接收經營妥爲辦理
一面將原領操馬變價還司並將原管舊存軍械暨營基操廠
衙署兵房一切公件分別造冊就近移交各地方官接收具報
惟各營官弁既有領發裁兵恩餉及移交一切應辦事件其裁
缺日期似應量予寬展擬請以四月底爲裁缺之期以便清理
而免局促此外乾州永綏兩協保靖鎮溪河溪古丈坪四營既
奉

部議暫留應請仍照本藩司前詳自宣統二年七月起一律照章依限裁汰惟乾州鎮溪河溪古丈坪四營向隸提標管轄現提標已裁應請將乾州鎮溪河溪三營就近撥歸鎮軍鎮管轄古丈坪一營撥歸綏靖鎮管轄俾資統攝俟奉

批示後卽分別移行遵照辦理所有會同籌議緣由是否有當理合具文詳請

憲台俯賜察核分別

奏咨宣統三年二月

撫院批據詳已悉所籌裁撤綠營日期及一切應行布置事宜辦法極爲詳細周妥惟撫標練勇現據中軍稟請酌留已行司核議應俟覆到再行會同

督院核定

奏咨仰即分別移行遵照仍候

督院批示此繳

會議東安縣朱令靖培稟請加收契紙捐辦理各項要政

詳文

爲會議詳覆事案奉

憲台批據署東安縣知縣朱令靖培稟自治公所勸學所紳呈請加收契紙捐辦理各項要政據情轉懇核示祇遵一案緣由奉批據稟已悉該縣籌辦新政經濟困難自是實情擬就光緒三十四年稟定契紙捐籌加凡價在五千元以下者捐錢五十文十千元以下者捐錢一百文價多五千元增進一級等情查籌加此

項捐款原注重在發達之家今十千以上者價多五千方增五十文而五千以下者之小戶均捐五十文殊欠平允似不如每價一千捐錢十文之爲公道惟新章稅契買價九分典價六分應納正稅較從前爲多若再加收契紙捐究竟有無窒礙是否可行仰布政司會同提學司巡警道自治籌辦處查核議覆飭遵此繳等因奉此查此案前據該令具稟到本藩司當經批示以該縣辦理各項要政籌款維艱現經邑紳集議加收契紙捐撥充經費呈請轉稟立案等情查田房稅契自宣統元年十月遵照

部定章程經徵此外不准絲毫多取迭經通飭各屬遵辦前據瀋溪縣願令委員秦令會稟擬抽此項捐款作爲警察自治經費

費當卽照章會詳議駁在案該縣事同一律自應恪遵定章辦理所請加收契紙捐之處礙難照准等語印發去後茲奉前因
本司職道等遵卽會同詳加核議該縣地方瘠苦籌辦學警自治各項要政支款自屬浩繁固非多方籌措不足以資應用而促進行惟擬於稅契項下以按級累進之法加收契紙捐充作各項經費無論加收方法未盡平允小戶不免煩言卽使強制施行亦於正稅前途實有空礙蓋湘省田房稅契自賣契改徵九分以後查核各屬收數較經收六分時頗形短絀推原其故雖由於民間典賣田房交易衰旺時有不同而所以致此項交易衰歇亦未始不由於應納正稅比從前爲多中人家已屬力有未逮成交不易加以狡詐業戶藉口稅重間有隱匿若再

准其加收此項捐款民間擔任愈重田房交易自必日形減少甚或短價瞞契弊混更較甚於前不惟有違

部章非所以昭大信亦恐正項稅收大受妨害將來收數必至每况愈下較前銳減稅契一項係抵補洋土藥稅釐各項要款

本司職道

等熟察情形不得不預爲籌及且該縣於光緒三十四年未奉新章改徵九分以前既已稟准開辦前項捐款豈能再有加增致礙要需而貽民累其學警各項不敷經費仍應由該令勉爲其難會集邑紳另籌款項妥速辦理不得再行加收契紙捐錢文以致與定案兩歧所有遵批會議緣由是否有當理合具文詳請

憲台俯賜察核批示祇遵再此案係本藩司主稿合併聲明

統三年二月

撫院批如詳飭遵此繳

請將文員廉俸等項撥歸地丁股掌管各項倉穀撥歸制

用科掌管詳文

爲詳報事竊照財政公所原設制用科內分俸廉餉需兩股支
發文員廉俸役食囚糧驛站馬棚等項則隸俸廉股支發綠營
武員廉俸兵餉等項則隸餉需股雖事由該兩股承辦而欸由
地丁股開支及至田賦科辦理奏銷并平時清算代案調查提
撥隔科片詢非特耽延時日抑且貽誤堪虞查前定辦事簡章
曾聲明本章程如有應行修改之處隨時呈請

憲台核定施行本司審度情形現在辦理既有窒礙應卽酌量

劃撥將以上各項事件撥歸田賦科地丁股掌管卽將俸廉股改爲雜支股專管各項薪水各署局學堂辦公經費以歸劃一而免隔閡至田賦科所管墾務一事向歸善後局經管各項倉穀僅止省倉一項歸制用科掌管其餘各屬常平義社各倉又歸田賦科承辦同一倉穀而分隸兩科彼此遇有牽涉旣不免查詢之煩且批行之件未能一致殊非核實之道現在廉俸各項旣撥歸田賦科支發則制用科事務較簡應將墾務及常社各倉仍撥歸制用科分股掌管以清界限惟地丁股旣管廉俸各款事務甚繁該股科員書記寫生無多應將制用科俸廉股二等科員陸爾昌撥歸田賦科並將辦理各項書記寫生各酌撥二名由田賦科科長督率辦理以專責成除飭遵外理合具

文詳請

憲台俯賜查閱立案

宣統三年二月

遵議長沙縣沈令瀛善化縣胡令應雲會稟酌擬整頓典
買田房稅契章程辦法一案詳文

爲遵批核議詳請立案事案奉

憲台批據長沙縣知縣沈瀛善化縣知縣胡應雲稟知縣等會
同酌擬整頓典買田房稅契章程辦法開摺仰乞核示遵行由
奉批據稟擬設公所派紳查驗印契爲整頓田房稅入手辦法
但須經理得人力杜需索留難之弊庶幾於公有濟於民不擾
仰布政司核明所擬簡章妥爲酌議如果毫無流弊卽行通飭
照辦仍先詳覆立案此繳清摺截式存等因奉此並據該縣等

具稟到司本司遵查湖省田房稅契自宣統元年十月遵奉部章賣契改徵九分以後各屬收數較經收六分時頗形短絀固由於民間典賣田房交易衰旺時有不同亦未始非業戶藉口稅重間有短價瞞稅所致雖前經刊發整頓條款通飭各屬認真遵辦仍恐奉行不力短價瞞稅情弊未能盡除將來此項稅收勢必每况愈下遠不及前稅契一項係抵補洋土藥稅釐各項之欸關係極爲緊要自非隨時力求整頓嚴飭各屬切實稽徵不足以裕稅收而絕弊混今該令等稟請設所派紳查驗印契並酌擬簡章各條本司逐條詳加查核於清釐積弊之中仍寓體恤民艱之意且查驗此項印契選用公正邑紳經理概不假手書差自可免除需索留難諸弊辦法均屬妥協亟應照

准並通飭各屬仿照辦理實於稅契前途大有裨益除一面先行由本司札飭該縣等遴選正紳妥爲經理并刊刻查驗戳記頒發鈐用以資信守暨通飭各廳州縣照辦外所有遵批核議緣由理合詳請

憲台俯賜察核立案

宣統三年二月

撫院批如詳立案仰即通飭各屬一體遵照此繳

會議鄂諮議局議決兩湖米捐合辦分款詳文

爲會議詳復事竊奉

憲台札開案准

督院瑞咨據湖北諮議局呈復該局議決兩湖合辦五口抽收賑糶捐款一案飭司局會同核議具覆等因奉此查此次鄂諮

議局決議各案如第一條第二條第四條均與鄂中官廳所議辦法無甚出入前經本司
等均已按照鄂議辦法會同查核具詳並請

憲台咨鄂暨筭行湘諮議局在案此次應請毋庸重申前說仍予查照司局前詳辦理至第三條所列議裁荊河腦覆查總卡及第五條所列湘鄂平分捐款兩節在鄂中固爲裕商利用起見惟查荊河腦地居衝要司局原議五白本係以該處爲經徵米捐專卡誠以該處扼荊湘之咽喉爲稽徵最便之地河流平緩且利泊船前者鄂中司道議以此卡改爲覆查總卡亦以五口改設事屬創始萬一奸商司巡相倚爲弊其影響於捐務者至不可言故不能不於荊河腦設卡總事覆查以資防範且察

閱地圖由洞庭東而入鄂者雖有城陵磯局扼其首害由洞庭西而入荊江者雖有太平調弦藕池三口據其衝要而內湖港汊時淤時泛有昔爲平原而今成滯澤者有昔爲斷潢而今成通津者地勢遞變防範遞難故設卡荊河腦爲一成不易之計又湖東由蒼梧台迤東經洪武港可以溯流繞道而北入荊江由君山迤北度後湖可以東入鄂而西北入荊江雖零河支港絕非巨商大舶所通行之地而商人重利輕勞若非荊河腦設有專卡嚴事堵防勢必迂曲涉險羣趨於湖東之一途其關於稅收者尤非淺鮮且荊河腦爲由川赴鄂通衢卽令有卡堵截而川米從中混合分別尙慮其難而况調弦口以下南境由陸繞運上船之米穀尤非該處有卡扼要補徵不足以杜繞越偷

漏之弊前者本司職道等議於此條請照鄂司道原案辦理亦係力防漏卮之意茲鄂諮議局援引鄂統捐覆查案以爲比例究竟鄂中統捐覆查有無弊竇事隸鄂中行政範圍無從議擬惟此次議設覆查專係經管米捐事項將來有無弊竇全在任用得人卽未可懸以鄂案相繩亦不能遽以噎而廢食至分欸一條經司局一再磋商湘中財政困難積虧亦鉅此次增收捐欸實難於二八列分之外另議增加困苦情形已於前詳縷晰聲叙此次鄂諮議局議改第三第五兩條擬請均仍照司局議復鄂中司道原詳辦理所有遵飭會議鄂諮議局議決兩湖米捐合辦分欸緣由是否有當理合具文詳請

憲台俯賜察核轉咨批示祇遵再此件係本藩司主稿合併聲

明 宣統三年二月

督院批仰候

撫院核示遵行繳

撫院批查新加米捐已准

督院電咨鄂湘分款辦法行知在案其荊河腦覆查總卡既爲扼要杜弊而設自不可裁仰候咨覆

督院查照繳

會議酌量抽取淮鹽餘餉行用兩項詳文

爲會議詳請示遵事竊維理財之道以鹽務爲大宗而籌餉之方以剔弊爲先務就湘省歲銷之淮鹽籌湘省歲增之進款求其有益於公而無損於民者莫若餘餉行用兩項謹將此中詳

情爲我

憲台縷晰陳之查湘省鹽觔加價原係按觔抽收取之於食戶並非取之於運商乃鹽價加抽一次商利卽增進一次究詰原因則以侵蝕餘觔故也攷之淮鹽定章每票五百引運鹽四千包包定場秤八十六觔申合局秤百觔除津貼船戶滲耗不計外每票入倉之鹽計有局秤三十八萬五六千觔現查湘省加價每票包繳三十六萬六千觔以實銷之鹽比較包繳之數每票餘觔幾及二萬觔之譜就近年湘銷三百六十票計之所有餘觔一項歲約七百二十萬觔之多湘省加抽各項每鹽百觔數至二兩若以七百二十萬觔照數攤算是運商虧繳加價每年已有十四萬餘金夫鹽觔加抽原以公家困難爲籌款者所

不得已之舉商人惟利是視因以明侵暗蝕昧公益而便私圖是此項餘舫卽令悉數歸公本屬正當辦法第查鄂西皖三岸加價每引包繳七百五十舫每票均照三十七萬五千舫扣解湘商餘利向來較優嗣後加價一項應卽參照該三岸辦法責令運商加繳九千舫每票以三十七萬五千舫爲定額無論商運官運與夫平江專岸均一律照辦此係湘省特別自籌之款所有額解本省外省各處加價均請暫照原定科則每票以三十六萬六千舫撥解其餘悉歸湘用約計常年進款可增七萬餘金似此酌量規定在原分此項加價各處並未較前減少而於每票餘舫仍留一半津貼運商尤屬格外體恤况鄂西湘皖爲淮鹽四大引岸該三岸加價每引既以七百五十舫包繳湘

省按照辦理於歲政既昭劃一即鹽商亦無可藉詞又查湖岸各處鹽行向執三分之例每鹽百觔加抽行用至一錢數分每票卽坐享數百金之厚利近如長沙湘潭湘陰湘鄉益陽岳州常德辰州等處歲銷鹽二百餘票所抽行用每年約十二萬餘兩該鹽行等以非商非販之徒僅持一紙行帖剝取民財現在分銷遍設此項鹽行本應一律革除將所抽行用概行提充公款姑念該鹽牙等一朝歇業未免促其生計現擬將此項行用以一分五提歸公家以一分五給與行戶但就各埠現有鹽行之處照舊抽取並不得於舊例三分之外溢取絲毫以歲抽行用十二萬兩計之除酌給行戶一半外而湘省進款歲增六萬餘金於財政不無裨補以上二端或係中飽或屬陋規當財力

艱窘之時爲實行清理之舉化私爲公之道似無有逾於此者
本司職道等籌商往復意見相同如蒙

俯允卽由本督辦局轉飭各岸分銷局暨各處現開鹽行自本
年四月起遵照此次詳訂章程一律遵辦並將所收該兩項銀
兩專款解交湖南財政公所核收存儲俾資挹注而紓困難是
否有當理合具文詳請

憲台俯賜察核批示祇遵再此件係本藩司主稿合併聲明宣

統三年二月

督院批據詳已悉仰候

撫院批示繳

撫院批如詳辦理仰卽分飭遵照仍候

督院批示繳

遵議熊紳希齡等請撥鳳芷磁業試驗場經費詳文

爲詳請事案奉

憲台批據熊紳希齡黃紳忠浩等請撥鳳芷磁業試驗場經費一案奉批據稟鳳凰廳屬之南華山芷江縣屬之沙溪地方均設有磁業試驗場該兩處原料豐富不亞醴陵因經費支細請予設法補助擬懇將辰沅道稟准釐局提撥四屬師範學堂津貼銀六百兩移充鳳凰廳磁業試驗場經費並懇在沅靖官運局羨餘項下撥給六百金以作芷江縣磁業試驗場經費究竟能否照准仰南布政司分別移會提學司勸業道辰沅道官運總局核議詳奪并照會該紳等知照仍補稟

撫院核示此繳稟抄發等因奉此查此案前奉

撫院批示所請籌撥款項補助鳳芷磁業試驗場事關民生日用所需應即照准仰布政司轉移辰沅道分飭鳳凰芷江兩廳縣傳知學生邱茂楨田瞻等將該廠章程妥訂呈詳立案并由司查明前署辰沅道袁道稟准由釐局項下津貼師範學堂每年六百兩原案撥作鳳凰廳磁業試驗場常年經費其芷江磁業試驗場亦即由辰沅道傳知沅靖官運局設法按年籌撥以裨實業並移提學司暨該紳等知照原呈抄發等因到司當經本司遵查釐金項下津貼苗疆師範學堂每年銀六百兩原案係光緒三十二年莊升道創設鳳乾永保四廳縣師範學堂經費無出稟奉

前憲龐批由前牙釐局議詳在釐金項下每年撥給津貼銀六百兩就近由辰州釐金分局按季撥交該道轉給並聲明嗣後無論何項學堂一切經費不得援以爲例以示限制而固餉源在案嗣於三十三年經朱署道以苗疆地方僻陋向學寥寥酌提經費穀四百石挑選學生二十名分送長沙常德等處肄習所有釐金津貼銀六百兩因公帑奇絀即經截止迨宣統元年袁署道籌議規復四屬師範學堂需用經費稟請仍由釐金項下查照原案每年撥給津貼銀六百兩奉

前督憲陳批准行由南提學司分移遵照其時湘省財竭情形有非鄂省所知因未邀奉

前憲岑批准行司兼值財政困難經費支絀前項津貼銀兩迄

未照撥熊紳等所稟蓋誤以釐金項下一款業已仍照原案撥用苗疆師範既未規復因請將前款改撥鳳凰廳瓷業試驗場經費現查釐金項下津貼銀六百兩前次詳撥僅支一年自三十三年停支迄今已逾三載既未復行提撥他用久已併入釐金報解且釐金一項出入均有常經如額解京餉協餉以及本省營餉皆係按期支解刻不可緩之款加以近年核造預算卽爲決算標準更屬無可騰挪原撥銀六百兩在預算支出項下既未列入則釐金指款項下卽未提出鳳凰廳磁業試驗場所需經費現既無從追加預算未便遽將釐款撥給至批指沅靖局籌撥之款亦卽遷移辰沅道飭知詳復

撫院在案茲奉前因所有釐金項下原撥津貼師範學堂銀六

百兩久已停支無從撥作瓷業試驗場經費緣由是否有當理
合備文詳請

憲台俯賜察核批示祇遵

宣統三年二月

會議擬將製造局改借高等實業學堂作為實習工場詳
文

為詳請核示事案奉

憲台批據本司具詳高等實業學堂暫借銅元局即鍊鉛廠為
實習工場擬請另訂辦法暫緩點交接收一案奉批據詳已悉
仰即分移另行會商妥善辦法詳候核奪飭遵此繳等因奉此
遵即移明提學司一面會同札委候補知縣姜令汝翼試用從
九閔鈞前赴銅元局確切勘明據實稟復去後茲據姜令等稟

稱遵即會同高等實業學堂監督曹典球學務公所科員羅州判厚忻於本月初六日馳赴該局逐一會勘查從前銅元局烘片碾片春光印花鎔銅各廠及修理室物料庫等處均皆機件林立什物山積一經挪移斷難修復即迤東翻砂廠一處雖屬空曠什物較少惟現在印刷局及子彈廠開辦在即該廠距汽爐咫尺將來安放機件及匠人工作均皆必需之地以目下情形而論尙恐地方狹隘不敷展布即有餘地亦難敷該學堂實習之用卑職等復與磋商勸令別開生面以圖一勞永逸隨即同往稻穀倉製造局地方周勘四至寬廣約計四百六十方丈內布機器廠一所鍋鑪煙囪畧加修改即可就用其餘大廳房屋及織布廠染布房均皆寬廣足敷支配卑職等相度形勢堪

資應用惟曹紳典球面稱尙須建築等情稟復前來伏查銅元局機器房廠材料應遵

大部奏定章程准總廠選擇提用暨派員點驗情形前詳業已聲明如果銅元局得有餘坪曠屋可資該校實習之用但期於部章無所違背於局廠無甚窒礙亦未始不可商訂辦法爲一舉兩得之謀無如該局各廠現經委員姜令等逐一勘明均皆機件林立什物山積即使翻砂廠一處什物較少而官紙印刷局現在籌款開辦詳明將該處局屋分別布置實無餘曠能爲該校支配工場惟稻穀倉舊製造局前經本司議請變價詳奉憲台批飭調查卽經派員查明自學宮街起至稻穀倉止共占面積四百六十方丈大小房屋六十七間按照時價可值銀壹

萬壹千餘兩現又據姜令等會同勘明堪資應用雖曹紳而稱
尙須建造而當此財政困難之時祇求足以敷用似不應徒飭
觀瞻過求完美本司處會同商量擬請卽將稻穀倉舊製造局
給予高等實業學堂改作工場俾資實習而宏教育如蒙批准
卽由司移會工藝學堂將借用房屋一律交還再行派員點交
實業學堂接收管理一面並將舊有機噐擇其緊要起存銅元
局妥爲封貯以昭慎重似此辦理庶幾學堂局廠兩有裨益足

副

憲台提倡實業慎重公產之至意所有遵批會商緣由理合具
文詳請

憲台俯賜察核批示祇遵再此案係本藩司主稿合併聲明宜

統三年二月

湘省財政困難擬請暫緩編設陸軍警察隊詳文

爲詳咨事案奉

憲台札准

陸軍部咨湘省陸軍業經編練成立應卽編設陸軍警察隊以資監察茲派陸軍警察畢業學員王蔭槐前往籌練並墊給銀三十兩咨院行司遵照迅籌經費會同兵備處編設陸軍警察隊並先籌銀三十兩滙解詳咨等因奉此遵查光緒三十四年四月初七日

陸軍部

奏定陸軍警察隊試辦章程內開應設營隊數目當權衡鎮協

情形分別酌定以足敷分布爲度等語湘省陸軍因餉項支絀已議緩成鎮僅祇練成一協兩標及炮工輜樂各營隊現如編設陸軍警察一隊按照奏定章制核算每月該支薪餉銀六百一十七兩二錢無閏年共該支銀七千四百餘兩連開辦建築軍械川資等費併計需款萬餘兩上年造報預算冊內並未開列此項支數事後追加必須籌有的款方能舉辦現值財政困難已達極點本司忝筭度支點金乏術實難爲此無米之炊再四思維擬請咨明

陸軍部暫緩編設并將該學員咨送回京俟將來籌有萬餘金的款再請派員來湘編練庶與

度支部

奏准通行維持預算辦法不相違背所有

陸軍部墊發銀三十兩現經照數籌措發交湖南大清分銀行商號承領限於四月二十日滙京赴

陸軍部呈繳理合將擬請暫緩編設陸軍警察隊并籌解墊給學員銀兩緣由具文詳請

憲台俯賜察核分咨

陸軍部並繕發咨批下司以便轉給領投守候批廻回銷宣統三年二月

撫院批據詳陸軍警察按照

奏定章制歲需用款萬餘兩上年預算冊內並未開列此項事後追加必須籌有的款方能舉辦現在湘省財政困難達於極

點無從設措請咨明

陸軍部將陸軍警察隊暫緩編練並將派來隊官咨送回京各節所陳委係實在情形應卽照詳辦理惟念陸軍警察關於軍人風紀最爲重要且軍部政令務取齊一今各省皆已遵章開辦獨湖南置爲緩圖誠恐遽予咨回有干

部駁本撫院再三審度擬就院署親軍衛隊中挑選合格目兵改編警察隊卽以原有之餉抵支所增當亦無幾其餘一切設備務從至簡至省辦理但求粗立基址徐待擴充不令稍涉鋪張致滋糜費至應如何核減容將辦法咨商

陸軍部核定再行飭遵其部派隊官王蔭槐來湘已久應得薪水自在部奉差之日起應由財政公所查照定章如數核發移

送兵備處轉給具領俾資旅用此係本撫院酌劑苦心除於咨文內聲敘明晰並另將解款咨批繕發外仰即遵照辦理並移兵備處知照此繳

湘省推廣牌照捐礙難銷除仍懇分咨 大部每年承認
照繳洋藥加稅詳文

爲詳覆事案奉

憲台札開案准

度支部佳電內開外部函稱洋藥加稅英使已允加至每擔完稅釐二百二十兩但要求除進口稅釐並征外所有各省征收洋藥各他稅捐應概行銷除等因貴省上年實收洋藥牌照捐銀若干本年約可收銀若干此外有無他項稅捐統希飭屬查

明確數迅速電覆以憑通盤核計酌奪辦理其土藥牌照捐每
年收數希一併查明電覆等因到本撫院准此合亟札飭札到
該司即便遵照迅卽分別查明欸目開摺詳候電覆毋延等因
奉此查湘省每年洋藥銷數不敵土藥三分之一又上年洋藥
銷數且較宣統元年爲少湘省於洋藥向有落地捐一項上年
計實征錢四千餘串又有牌照捐一項征自吸戶不分洋土藥
上年實征錢六萬餘串至推廣牌照捐一項係本司爲嚴申烟
禁仿照蘇粵章程詳請開辦亦係按膏征捐取自吸戶不分洋
土藥自上年十二月初一日開辦起至本年二月十五日止僅
省城常德湘潭三處共實收洋四萬餘元至本年約收之數查
預算册歲入欄內於洋藥落地捐列銀二千三百餘兩惟推廣

牌照捐事屬創始前年無數可以比附僅追加銀二十萬兩併向有之土膏牌照捐收數一併計列此湘省屬於洋藥土藥上年收欸及本年預算案列收之欸之實在數目也本司恭繹部電按之湘省現時禁煙情形竊有不能已於言者竊查光緒十一年煙台條約洋藥進口每箱完稅銀三十兩釐金八十兩以箱數計不計擔數若指運湘省則由湘省按箱抽收落地捐一道亦未分別擔數茲

英使於進口洋藥允以每擔照向章加至一倍自係重稅輔禁之意惟查湘省土質溫輒種煙區域甚多上年本司蒞任後卽經嚴飭各屬分別拔禁務期根株淨絕復遴委委員分途密查亦期嘉植民生不遺餘毒又以黔粵各省運入土藥至多因仿

蘇粵章程開辦推廣牌照捐不分洋藥土藥均於變膏後一律
征捐意在限制吸戶嚴待煙民亦期早圖禁絕之意茲

英使議於各省徵收洋藥各他稅捐概行銷除若如所議是湘
省牌照捐亦將在銷除之列無論牌照捐爲湘省籌辦禁煙關
鍵萬難遽予裁撤即劃列洋藥土藥牌照分別徵免而土商吸
戶意存取巧勢或以土藥混充洋藥或專售洋藥而不買土藥
雖土藥牌照捐可以照辦而洋藥免捐亦將受無形之影響流
弊所伏其關於煙禁者不可勝言又

英使所議擔數未知較之箱數輕重何如卽就箱數按計加徵
之稅合之湘省現行推廣牌照捐章亦有多寡懸殊不能遽允
其請者查每箱計載土四十元重一千九百餘兩約爲一百二

十斤按湘省現行推廣牌照捐章每兩收吸戶銀洋三角合之
每箱之數徵捐將六百元又此次捐款湘省原定以三個月爲
一期每一期遞加一倍額定以八期禁絕推至八期之時遞加
之捐款益以踵多以遞進踵多數倍於加稅之捐款而銷除於
洋藥入口一項百一十兩之加稅其爲細爲盈在湘省實有礙
難遵行者再四思維惟有仰懇

憲台俯念此案關係之重湘省籌辦烟禁之苦准予分咨

度外支務部於議加洋藥稅釐一案務與英使聲明外省所收牌照
捐係洋藥拆包之後熬成烟膏按膏之分量責成吸戶繳捐與
進口稅釐毫不相涉且洋藥土藥一律按膏徵捐並無歧視應
不在銷除之列如因此爭執致英使不免議加則其新加之一

百一十兩湘省擬請按照湘埠洋藥關單銷數每年於推廣牌照捐收數項下按數認承繳解

大部其湘省應收之洋藥落地捐及土膏牌照捐均仍照舊抽收務期寓禁於徵推行無阻用副

憲台履念民瘼早除痼疾之至意至各省洋藥土藥捐款名稱雖各不相同而實行烟禁之意則一此案可否仰邀

憲恩併予咨請

大部通行各省均即一律援照蘇粵章程開辦推廣牌照捐卽於牌照捐款收數項下按照各埠關單所載洋藥銷數仿照湘省辦法按年如數認承繳解以期互相維持而免紛歧本司爲厲行烟禁力防弊端起見是否有當理合具文詳請

憲台俯賜察核批示祇遵

宣統三年二月

擬請籌設官紙印刷局詳文

爲詳請示遵事竊查官紙印刷事業執持信用與法律相輔而行於文牘可收整齊畫一之益於版權可杜詐僞奸欺之弊湖北議開辦於前天津則踵行於後用意甚深獲效至溥查湘省文化蒸萌庶政繁縟所需於紙品印刷者至多而形式紛淆製備瑣滯上之貽行政之累下之啓欺僞之漸勢非由官籌設官紙印刷專局一所參照津鄂辦法不足以消弊混而資利用惟湘省財用支絀本年又奉

部文調取湘中所有官照文憑契尾糧串鹽茶引牙帖以及各項官用證券送部妥定格式概歸中央官紙刷印是湘省此時

籌辦此項局廠似應從簡易入手以應各官署局隨時需用之單簡紙品及活動印刷品類之用方與

部印品物不相衝背且可輔中央官紙印刷之力之所不及誠以中央官紙印刷性質係指可以先時酌定程式及數目之各項官用證券品而言至學堂之講義及有關學務之各項簿籍章程規則財政局調查局及自治籌辦處並各署營之簿籍表冊暨報告書通用文牘之文封冊簿蓋捐之各項簿籍冊據審判廳之呈詞狀紙暨拘傳各票巡警之戶口牌冊各州縣之徵冊紅簿解批差傳票紙點單呈詞狀紙保結以及其他各項官報或程式不能預爲指劃或配用不能預爲定數或爲日行公牘不可偶缺之件或爲商民領用不可暫緩之品似應均由本

省自爲刷印以免紛歧而昭便捷是此項官紙印刷局在滬中實爲萬不可少之舉在現時尤爲刻不容緩之圖本司悉心籌酌擬請就省城南門外舊設銅元局房屋暫行開辦官紙印刷局一所卽定其名曰湖南官紙印刷局先從簡易入手一切費用力求樽節仍隸於財政公所管理另派一員駐局辦事開辦成本擬定銀壹萬兩爲購備機器紙張之用如蒙

俯允卽由本司籌款委員分別妥擬詳細章程再行詳請

憲台核定咨

部立案一面由本司督飭趕緊興辦以資輔助而促進行期副憲台提倡文物祛除弊害之至意至該銅元局機料物件前經本司開列清冊派員會同財政局科員前往該局按冊點驗自

應照舊封存聽候

大部選用如果印刷局有需用該局之件亦應遵照原案呈由
憲台會商

大部辦理所有擬請籌設官紙印刷局緣由是否有當理合具
文詳請

憲台俯賜察核批示祇遵再此次

大部所議印發契尾糧串牙帖以及其他官用證券湘省現當
財政困難此次籌辦官紙印刷屬於簡易自應遵照

部示前赴領用惟查上列各項均關於官用證券最重之品若
陸續請領則程途悠阻緩急無期若彙總領購而物價程費又
種種不貲擬請俟款項充裕再行體察情形度量能力如確有

窒礙難行者卽由司剴切陳明妥爲設法另案詳請通融辦理
合併聲明 宣統三年二月

遵擬開辦官紙印刷局章程詳文 附章程

爲詳復事案奉

憲台批據 本司詳請開辦湖南官紙印刷局一案奉批據詳已
悉所擬借用省城南門外銅元局房屋籌設官紙印刷局意在
使通省官用紙品咸收劃一整齊之效並非專爲籌款起見而
籌款之法卽隱寓其中具見籌劃苦心惟現據諮議局及紙舖
印刷店商紛紛以官奪民利等詞來轅呈懇挽回自應將商民
需用紙品及印刷品一概剔除俾免藉口此外應行規畫布置
事宜仰卽通盤籌計妥訂章程及施行細則具詳立案仍候

督院批示繳並奉

督憲批示據詳湘省擬就省城南門外舊銅元局房屋籌款開辦官紙印刷局等情已悉仰候

撫院查核示遵此繳各等因奉此竊維湘省籌辦官紙印刷本爲整齊文牘杜絕奸欺起見既非專重籌款亦異與商爭利本司前次原詳所叙僅係就官用品酌擬辦法並未牽及商用民用品類茲奉

憲台批示是本司原詳之用意已上符

憲台恤商之盛心惟印刷爲官局籌辦宗旨所在勢難連同商民用品一併剔除誠以印刷屬之官業東西各國無不皆同湘省此次籌辦官紙印刷上所以爲輔助中央之機關下所以謀

畫一文牘之效用措施至苦關繫極大應請仍照前詳辦理惟擬於原定官用品中畧分專用通用兩項專用品指各署局專用之件卽統歸官局專售通用品係屬於官通用之件並准各紙商承領分銷仍由官局核定價值酌予折扣於官紙則收推廣銷路之益於商家亦有公同坐獲之利是一面限制版權仍一面顧全商民擬由本司先行出示曉諭商民一體遵照用副憲台提倡文物軫紓商力之至意至開辦時應行籌畫事項亦經本司悉心擬議反覆研究參照津鄂官紙印刷章程按以湘省現在情形擬定簡易入手辦法謹分舉其要爲

憲台觀縷陳之印刷紙業端緒紛繁非統攝分任不足以專責成今擬置經理委員一人主管全局事務餘則分設三部日編

輯部曰印刷部曰庶務部三部之外別爲三廠曰石印廠曰鉛
印廠曰手工廠編輯庶務事端繁重擬請共遴派委員一人主
管以示鄭重印刷則任用司事三廠則各用監工綜持一切均
受經理委員之考察分職任事綱舉目張防彼此推諉之嫌有
指臂相聯之效此任用員司之辦法也查印刷機器之大而精
者每部需款約在數千金之外現在湘省籌辦此項官紙印刷
僅取爲輔助中央印刷之機能自亦不能意主恢擴擬請購辦
石印機器一部小號三部鉛印機器大小各二部及兩類機器
附屬之應用各件又長沙日報館現有鉛印機器新舊各一部
此次亦擬請歸併官局以期統一查該報館向係隸歸學司管
轄此次擬請歸併仍應一面由司咨商學司酌定辦法另案具

詳此配置機件之辦法也官紙印刷雖係行政範圍究屬營業性質前經本司詳請以壹萬兩爲開辦經費自係力從撙節之計畫今擬以二千兩購備石印機器各項以四千兩購備鉛印機器各項以五百兩購備各廠應用物料以三百兩修改房屋以七百兩置辦應用木器各項以一千兩備造出品紙料以一千五百兩作爲活支之用將來動用數目如有伸縮亦由本司飭令該局臨時酌量辦理總以撙節爲主力戒浮糜至每月局用薪工亦即由財政公所給領別如各委員司事薪水擬俟開局後由司察看情形再行酌定局中入款亦隨時繳解公所以便稽核而免紛歧此酌定用款之辦法也東西各國法規均有出版施行之條此次湘省開辦官紙意期畫一文牘自應仿照

辦理嗣後各種官用改良程式紙品每一種出版後卽由本司核定限期專用品則通飭各屬依限遵用並按照鄂省章程以領用多寡酌定功過章程容俟擬定另行呈核至通用品則由官局先行宣佈限期俾各紙商承領分銷各屬得以就近購用其他各署局所應用之品開辦時亦由本司移知請其一概發交官局代印收回工本並不發售各屬之丁漕糧串征冊紅簿各種應由各屬於開徵三個月前查明應用數目申報到司備案一面知會官局照印繳價自定期施行日起無論何署局所均不得再仍前沿用舊式以符齊一之制此酌定限制之辦法也總之湘省此次籌辦官紙印刷款主其細而效期其大體取其輕而用持其重除將各項細則續行酌擬另案呈核外所有

遵批酌擬開辦官紙印刷局章程理合繕具清摺隨文賚呈
鈞核如蒙

俯允卽由本司分別委員經始局務及購備機器俟開局後再
行呈請轉咨

度支部立案是否有當伏乞

憲台俯賜察核批示祇遵宣統三年三月

擬定開辦湖南官紙印刷局簡明章程

一名稱 仿照湖北定名曰湖南官紙印刷局

一局址 以本省南門外之銅元局房屋改用

一箠轄 隸於藩署財政公所

一員司 設委員一人經理全局事務分屬任職析作三

部

甲 編輯部 設委員一人編纂二人總校二人繕校
四人圖畫一人專編校書報表冊簿籍暨繪畫各種出
品圖樣以及經辦各項往來文牘等事不分等差

乙 印刷部 設一等主管司事一人二等監工司事
二人三等監工司事四人專司印刷紙品書報暨經營
各工廠以及物料等事

丙 庶務部 由編輯部委員兼管設一等主管司事
一人二等稽核司事二人二等管庫司事一人三等管
櫃司事三人二等採辦司事一人專司收支款目核算
報銷暨發售出品接待商人採買物料稽查工廠收發

貨料等事

一工廠 承辦各項出品分設三廠

甲 石印廠 落石房照相樓隸之

雕刻銅版本爲石印最要機能現時款細擬稍緩再圖購備

用廠長一人工匠臨時酌定專印各項通用文牘以及糧券釐票契紙呈詞訃狀公債票官錢局銀洋錢票以及其他各項

乙 鉛印廠 排字處鑄字處隸之用廠長一人工匠臨時酌定專印各項書報簿籍章程表冊以及各署局所通用文告各學堂修業文憑課本講義

丙 手工廠 分裁切裝釘摺拋裱黏鑄印五所設廠長一人工匠臨時酌定專辦裁邊齊線摺釘裱糊及雕

刻木版

一購備 擬將長沙日報館新舊鉛印機器各一部歸併
官局一面由司咨商學司酌定辦法再行呈核此外應
請添購大石印機器一部小石印機器三部二號落石
機器一部二號軋墨機器一部上石照相鏡頭全副各
色油墨藥水全套八頁書鉛印機器一部四頁書手搖
機器一部三號鉛字一副以及銅模鉛料襯鉛刻坯各
種花邊線條油墨均添配齊全至於應用紙料亦一併
預先酌辦

一出品 凡官用品擬酌分十項開列於左

子 布政司衙門財政公所清理財政局官錢米捐等

局官鑛處賑捐土膏禁煙之有關糧稅釐捐各項簿籍
票册牌照契紙保結

丑 提學司衙門學務公所及省城省外各學堂之有
關學務各項簿籍及圖書表册課本講義惟學堂講義
擬請聽其自來不加限制以官局機件不多恐難分佈
寅 提法司衙門之有關訟獄各件及審判檢察兩廳
之印花呈詞狀紙暨拘傳各票

卯 巡警公所之有關警務各項册籍及傳提各票戶
口牌照

辰 勸業公所之有關農工商務各項册籍及稅照免
票

已 鹽法道衙門暨長沙岳州常德新關之稅單護照
及各項簿冊

午 督銷總局之運單執照及有關鹽務之各項票簿
未 常備巡防兩軍督練公所陸軍學堂各營局之簿
籍表冊報告書

申 各屬之丁漕串票徵冊紅簿解批屍格差傳票紙
點單呈詞狀紙保結

酉 各衙署局所之詳冊申文照會咨文移文牒文札
文紅白稟清摺稿紙批紙申封移封馬封排單各項冊
簿

按中央官紙局官式未頒以前凡上列各項擬先行

分別自酌定式或由各局署自行擬定程式交局暫
爲印用一俟 部頒官式到湘再行遵改

一程式 凡普通官用品各種封面頁數邊線花樣標識
等項擬仿湖北官紙印刷局標本略爲變換其各署局
所及各學堂專用之品由司移請自行擬定程式發交
官局照印各定一式用事區別

一定價 各項出品之價值擬仿照湖北官紙印刷局現
行定價按成本之多寡略爲增減

一限期 紙品出版由司酌定限期凡關於行政專用之
品各署局所均由司移請此後均發交官局代爲承印
僅收回工本並不另售各府廳州縣擬請通飭依限遵

用統須於限期前預先到局訂購將按年或按月應用數目約估大數逐細開報備案不得仍用舊式致涉紛歧並按照鄂省章程以領用多寡酌定功過

一批發 所有普通用品均由官局稟定價值酌量折扣批發各紙商承領分銷祇收固有之利概不零售各署局所及各學堂各府廳州縣按照稟定價值逕向各商店購買

一基本 擬就詳定開辦成本一萬兩撙節動用約計購辦大小石印機器上石照相鏡頭以及落石軋墨機器鑄字機鉛字銅模鉛料油墨等類需銀六千兩購辦各廠應用物料需銀五百兩修改房屋需銀三百兩購辦

應用各項木器鋪墊洋燈碗蓋等類需銀七百兩購辦各項紙料需銀一千兩尙餘一千五百兩作爲活支之用

一盈餘 官局盈餘擬仿商家公廠辦法將所有紅利共作十四成以八成歸公以一成作爲公積以二成分送購紙最多之各署局所以三成分派作辦事人花紅年終歸庶務印刷兩部員司結算由司核定每一年分給一次

一薪工

甲 各委員及編輯部編纂總校員每月薪水應俟開局後酌定

乙 各部司事擬分三等其薪水亦擬俟開局後酌定
丙 各廠長各工人每月工費擬俟開局時酌定
丁 各廠工徒第一年概不給資第二年擬每月每人
一元以後遞增

戊 公丁工資每月分一元二元不等

一支解 官局係直隸財政公所開辦後每月薪工火食
等項應由公所支給官局每月售品進款亦隨時解繳
公所所以清界限惟局中僅開員司火食至一切雜用均
須自備工匠火食費由局併薪工算給以昭簡便

督院批據詳及清摺均悉仰候

撫院查核咨

部立案暨候批示繳

撫院批如詳辦理仰卽遵照仍候

督院批示繳清摺均存

請將丁漕兩庫書吏酌改書記寫生並將原有規費及本
司應得平餘併行提歸公用詳文

爲詳請立案事竊照本司衙門經收通省地丁驛站存留原有
大庫一所額設書吏一十八名庫丁十名分別經管彈兌銀兩
收支帳目後裁撤糧道將漕糧軍屯等款撥歸藩司經收添設
漕糧庫原有書吏除裁減外酌留書吏四名庫丁六名經理彈
兌收放等事地丁庫向係三八堂期收放銀款漕糧則定爲二
七收放款項免致擁擠混淆辦理多年尙屬相安上年本司詳

請將善後釐金裁撤歸併改設財政公所因善後釐金兩局原有入款銀錢不一票幣居多而且積虧過鉅不得不挪移借墊與丁漕兩庫各屬解款均須彈兌現銀出入皆有常經不能絲毫挪動者性質迥不相同一經混合竊恐牽動庫款積久皆化爲票幣現銀日少遇有緩急必滋貽誤故於釐善兩局舊有款項另派科員經理而丁漕兩庫因循其舊未議更張兩庫書吏庫丁例支工食有限全賴規費以資養贍從前官錢局詳定解兌藩糧庫款章程時均經查明悉數列入除科房書役經費之外有由本司平餘等項內提給者每年所得約計銀五千五六百兩現在院司道公費業已詳定實行本司原有平餘提撥歸公以資勻定則書吏規費自不能不一併行提歸公改用書記

寫生以歸一律經理庫款關繫至重所定薪水不能不較公所別項書記稍優地丁庫收支款目繁雜擬用一等書記兩人一掌案一管庫各月給薪水銀二十兩二等書記六人分別彈兌銀款清理帳目各月給薪水銀十六兩一等寫生兩人各月給薪水銀八兩二等寫生兩人各月給薪水銀六兩漕糧庫款目較簡擬用一等書記寫生各一名二等書記寫生各一名薪水等第照地丁庫一例支給庫丁酌用一等兩名一守地丁庫一守漕糧庫各月給工資銀六兩二等庫丁八名各月給工資銀三兩每逢二七在漕糧庫三八在地丁庫搬運餉鞘無須分別並派一等科員一人協同庫官稽查清理月薪照財政公所一等科員支給銀六十兩似此辦理通年合計應支給薪工銀四

千一百七十六兩火食銀六百七十餘兩遇閏須加增銀三百九十餘兩以書吏原有規費支給各項卽遇有閏之年亦尙可長餘銀數百兩歸入公用詳定之後卽就原有書吏擇其辦事勤慎公事熟習者酌留數名其餘考驗召募由科員庫官管理督率以昭慎重是否有當合將丁糧兩庫改用書記寫生卽提原有規費發給薪工擬將辦理緣由具文詳請

憲台俯賜察核批示立案

宣統三年三月

督院批據詳已悉仰候

撫院批示繳

撫院批如詳辦理仍候

督院批示繳

會議釐米兩局抽收銅元補水詳文

爲會銜詳請酌核飭遵事竊查貨釐徵收捐款向係制錢自銅元漸次暢行後釐米兩局餉捐均改爲徵解十足銅元計每銅元百枚折合實錢九百八十文故商民完捐照章應加補底錢二十文零四毫然歷年外局徵收多半不止此數本司職道等派員密查復博訪周諮聞有收三十文者有四十文者甚或有多至五十文者攷之案檔雖經三令五申嚴檄明飭而陽奉陰違所收終未畫一間有廉潔之員以一隅爲創或稟定遵行或自行示革卒以人易境遷仍復如故在商民之良善者以爲數無多取懷而予視爲相沿之積習其刁狡者或藉以爲求讓輕完地步亦有浮收太多商民出非情願因而上控者本司職道

等每於外局委員來省接見卽詰責其何以違章多取據各該員據實直陳亦實有爲難情形凡各局卡徵收釐捐每值大幫貨船大批穀米一到該處人聲喧雜此完彼催其時或數銅元或點台票錢紀少僅一人多亦不過三五人未免顧此失彼奸商輒從中取巧非攪入假票卽少不足數稍不經意卽受損失錢紀固無力賠償委員亦無從填補加以每次解餉點解彈收下河起坡銅元一再盤數無論如何慎重總須差數此項失耗間亦甚鉅若強令承解巡丁賠繳則此不耕而食之流勢將出而舞弊且征收之責最重者莫如稽查稽查卽能潔己奉公然非精細者仍不免爲巡丁船戶所愚弄至擇一得力者爲稽查而定月薪不過十二串是豈能贍其身家又何能不畧費津貼

多取原因率由於此本司職道等細核種種情節再四思維與其仍其名曰二十文零四毫而其實或不止加倍何如化私爲公明定數目去其太甚稍留津貼以養其廉畫一征抽免貽商人之口實竊以爲巡丁雜役惟利是圖固無足論而委員司事必有以養其身家始足驅有用之材而收得人之效若議一律加薪通盤籌算爲數甚鉅現在財政困難殊非易易擬請將補水一欸每銅元百枚收補水錢三十文仍照章以二十文四毫申解總局其九文六毫卽由各分局另欸存儲除彌補假票少數種種損失外再餘之數以五成津貼委員其五成由委員酌獎司巡以示鼓勵而杜浮濫在各局既有明定津貼在商家亦免意外需索似此辦理如再有稽征不力及通同舞弊浮收一

文者一經查出委員則分別詳請撤參司巡則提省從嚴懲辦
總期信賞必罰於餉捐有益而於商民無損以仰副
憲台實事求是之至意如蒙

批准再由司局會同頒發告示分貼各局俾衆周知所有會議
釐米兩局抽收補水緣由是否有當理合具文會銜詳請

憲台俯賜察核批示祇遵再此案係本辦司主稿合併聲明宣

統三年三月

撫院批如詳辦理仰即出示曉諭各局卡一體遵照此繳

實業學堂因爭借銅元局爲實習工場要約停課遍發傳

單懇請追究詳文

爲詳請事竊於上年十二月二十二日淮南提學司咨奉

憲台批據詳擬將舊銅元局暫借高等實業學堂改作實習工場一案奉批如詳准予立案仰即移飭遵照辦理並候札行清理財政局及官鑛處遵照此繳圖存等因並抄詳咨會到司本司當以銅元局廠屋機件成本約四拾餘萬兩而所存物料價值亦昂

度支部具奏造幣廠章程第五條內載所有各省舊設銀銅元廠機器廠房材料准總廠選擇提用等因是則該局所有廠機應在聽候

大部選用範圍之內且該學司原詳該校購機購地建築等費原估銀叁萬兩除已抵撥壹萬五千兩外所欠僅壹萬五千兩而詳內所據監督曹典球稟則建議因改直將全局機房通同

規畫爲該校之用勢難故違

部章遽以數拾萬金之基本爲該校一部分之所需然以該校學生嚮學方殷不能不悉心規畫是以有委員履勘另訂辦法之請也迨至本年正月十七日奉到

憲台批准另商辦法奉經移明南提學司一面委員會同曹監督勘明該局機件林立什物山積一經挪移斷難修復卽有餘地亦難敷該校實習之用並經飭據勘明城內稻穀倉地方舊製造局一所地面四百六十方丈大小房屋六十七間價值壹萬壹千餘兩相度形勢堪資應用本司當以學司原議志在借地借房舊製造局地面旣寬房亦不少足敷該校之用學堂當無異詞是以復有改借舊製造局之請也嗣於三月初五日奉

到

憲台批開據該司以南城外銅元局各廠機器林立什物山積一經挪移卽難修復擬將城內稻穀倉舊製造局改借高等實業學校作爲實習工場自係爲遵照

度支部奏定章程保存機器材料以待選擇提用起見然仍別擇相當局廠撥借應用具見於慎重公產之中仍寓顧全公益之意苦心調劑洵爲兩得其宜自應照准定議惟前據提學司稟稱高等實業學堂學生進習本科已歷五學期之久而

學部注重實習考察綦嚴此項工場須臾不容再緩又據教育總會函稱該校實習所購各種機器所聘各門洋教習均早到湘苦於無地安置難施教授情形尤爲急迫查舊製造局不無

破壞改作工場勢不能不量加修葺且現有工藝學堂建設其中遷讓亦非易事以此周折理料必尙需時實業學堂實已迫不及待未便遷延本撫院再三審度應如來詳以舊製造局改撥高等實業學堂由提學司督同該校監督迅卽詳加勘驗擇其必不可已之工程酌量修改但期合用不求美觀以爲經久之計目前姑將城外銅元局暫借開辦以應急需局內房屋無庸改動各廠一應機器材料由提學司會同官鑛處派員前往逐項檢點造具清冊就廠內劃出空間房屋概行封固保存不得絲毫挪借損壞以備

大部提用一俟製造局修理竣工再將銅元局遷讓不得久踞用符定案至舊製造局估工修理應如何確定期限銅元局空

餘廠屋應如何劃清界限保存之機器料物如有遺失損壞應如何擔任責成並飭提學司督同該校監督妥議條款先行移明藩司會詳立案以昭慎重本撫院以該校學生株守待課廢時失學不免虛擲光陰至爲可惜爰出此兩全辦法揆諸該司實事求是之本意度必深表同情也除行提學司官鑱處外仰卽分移遵照辦理此繳等因奉此本司自應會同南提學司遵照辦理另文具詳惟查該實業學堂學生於三月初一日未奉憲批以前要約停課遍發傳單略謂銅元局撥充本校工場方奉

撫院札飭驗收機器房屋不意藩司格令不行必欲另行建築則經費動數拾萬金何從籌此鉅款以湖南公產充湖南公益

猶且阻窒多方而欲別謀款地必愈在不可知之數母甯解散
早自引退等情以致初二日諮議局有敦促點交之函初三日
教育會有數月未交之詰種種要求無非由偏信傳單而起查
學生聚衆停課輕發傳單久干嚴禁該校學生囂張至此該校
監督不阻一辭若不嚴行追究將來學風日下必至不可收拾
本司再四思維惟有照錄全案繕具清摺連同原發傳單據實
詳請仰祈

憲台俯賜察核迅飭追究以端士風而維學務並乞批示祇遵
宣統三年三月

撫院批查此案前據實業學堂全班學生以實習無期自行解
散等詞來轅遞稟當因其意存挾制批行提學司嚴加申飭並

查明倡議解散之人從嚴懲儆在案茲據詳該學生等罷課要挾之外且有徧發傳單之事實屬有干嚴禁該校監督及職教各員並不先事阻止是否有意縱容亦應澈查除札行提學司遵照前批嚴行追究務得倡首之人酌議詳辦以端士習而肅學風外仰卽知照仍候

督院批示繳

會議院司道公費並擬裁各州縣教佐各缺詳文

爲會議詳覆並請

奏咨事案奉

憲台札本年二月初六日准

東三省督院錫歌電內開

資政院議減各項公費承先後電商凡關於他項經費雖無可減總當勉遵去年十二月二十八日

諭旨極力削減至於各官公費以及督撫司道各科員薪俸實有萬難遵辦之勢業已聯銜電奏等因行司飭將公費按照部定之數自本年正月起遵照實行並由司籌議詳辦等因奉此遵查湘省院司道府廳州縣以及佐雜各官公費上年遵奉部飭擬定列入豫算除擬酌裁佐貳之閑冗瘠苦各缺外計需省平銀捌拾伍萬陸千肆百兩合庫平銀捌拾貳萬叁千肆百陸拾壹兩零嗣奉

大部核減一成計需省平銀柒拾柒萬零柒百陸拾兩合庫平銀柒拾肆萬壹千壹百壹拾伍兩零將各庫局向來支發各署

經費停支計共庫平銀玖萬肆千捌百壹拾肆兩零酌提各項平餘規費並驛站三成約共庫平銀肆拾陸萬捌千捌百伍拾肆兩零復奉

部核定驛站酌提五成應加提壹萬壹千貳百柒拾壹兩零並續擬裁各署役食由各官公費內自行開支可增停支銀肆萬柒千捌百零壹兩零以抵公費所需尙不敷庫平銀拾壹萬捌千叁百柒拾餘兩值此公欸奇窘本年籌增之欸尙無的實把握上年

奏裁各缺至本年二月二十一日始奉

部文核覆是以所定公費迄未實行惟現值清理財政之時若公費久任稽延不惟與預算案不符而各署之收入較優者開

支仍無限制收入瘠少者辦公暨竭堪虞於財政清釐諸多窒礙若款未籌定而貿然實行則又無以應付庫款恐受其影響

本司等一再商榷實屬措手爲難查

憲轅及司道各署經費向由局庫支給者多而府廳州縣各署經費則多恃州縣平餘以資挹注佐雜各署則本無固有之利改定公費直等無米爲炊不得不分別籌畫以期事可實行現將

憲轅及各司道並藩臬首領各官所定公費就局庫向來應支之款及藩司所得平餘各署向有規費提抵相衡尙敷支給擬自本年四月初一日起先行實行按照原定公費數目九成支發司庫原有支款一概停支平餘規費提歸司庫惟各道原有

各屬公費向由各州縣平餘內捐解州縣未行公費以前平餘
尙未提繳仍由各屬照解其不足公費定額者由庫補給多於
公費定額者解繳司庫俟州縣公費實行平餘悉數提繳再行
由庫全支統計院司道公費應支省平銀拾叁萬零陸百捌拾
兩提抵各款省平銀拾叁萬貳千肆百捌拾貳兩零尙盈餘銀
壹千捌百零貳兩零繕就院司道公費提抵各款比較表一紙
呈請

察核至府廳州縣公費照原定數目核減一成實需省平銀伍
拾捌萬貳千肆百捌拾兩所恃以爲抵支者以各屬丁漕平餘
爲大宗前經財政局派員調查雖已得其大概然而銀錢市價
漲落無常水旱偏災不無蠲緩前擬定一額數責成州縣解繳

又恐銀錢市價漲落過多有盈皆私以入已不足則無人認照
本司等與財政監理官商定擬於實行公費後改令各屬儘征
儘解征洋征錢之處即照實征錢洋一律就近解交官錢總分
局隨時作價除解正雜各欸之外平餘悉數提收是亦涓滴歸
公之道但平餘究竟能提若干必須行之一二年方有把握目
前約計總屬不敷不得不返覆斟酌當此憲政推行之際欲使
費不虛糜必先官無冗設上年原定公費於佐雜各官已畧裁
汰州縣以上均仍其舊本年預備立憲期限縮短各級審判廳
皆當漸次成立此後民刑訴訟應歸司法獨立即自治會亦次
第興舉地方應辦之事皆有佐治員佐理是州縣之事當以分
而見少凡屬同城州縣既可歸併而附廓首縣與知府同城亦

可酌裁改各府如直隸州體制管領地方兼轄屬縣若遼省之奉天錦州黔省之都勻大定等府俱已行之有年未聞或虞叢脞擬請仿照辦理除長沙府地居省會政事較繁甫設埠頭華洋交錯恐難兼顧應將善化歸併長沙縣管領仍以知府專轄屬縣外其餘如邵陽武陵巴陵衡陽清泉零陵沅陵永順芷江等九縣一律擬裁均由各府直轄其地方初級各審判廳未設立以前民刑訴訟與夫緝捕等事暫由知府經理倉穀城池丁漕雜稅皆由知府經管征收其祭祀等項銀兩凡各府之向所有者悉仍其舊各府之向所無者則將各縣應領祭祀等銀留存撥歸各府支用長沙縣本有應支應領之款即將善化縣領款全裁衡陽縣應支應領之款既撥歸府中則清泉領款即可

裁省第知府既管領地方斯辦公費用較重應請照一等知縣公費各歲支九成實銀捌千陸百肆拾兩惟原定長沙府公費壹萬肆千兩長沙縣壹萬貳千兩未免過優擬改長沙府爲玖千兩仍照九成支給長沙縣應與一等知縣一律毋庸格外加多其既經裁撤各縣除分防縣丞巡檢有彈壓地方之責者未便同裁外所有現裁之善化邵陽巴陵武陵衡陽清泉零陵沅陵永順芷江等縣教諭訓導典史計二十缺應一併全裁學校則撥歸府學經管監獄則撥歸經歷兼司如此量爲變通既不致於廢事而節出公費及現裁知縣教職俸廉等項銀柒萬柒千玖百餘兩以之彌補各府廳州縣公費之不敷尙可有盈無絀惟佐貳雜職各官雖屬閑曹然亦有分巡緝捕典獄之責不

能不一體酌給公費以資辦公查原定各佐雜公費照九成支發計共應需省平銀伍萬柒千陸百兩除裁役食及前次裁缺俸廉津貼等銀壹萬壹千叁百餘兩抵支外不敷尙鉅本司等再三籌議查尙有長沙府經歷湘潭縣縣丞湘陰縣縣丞慈利縣九谿巡檢城步縣橫嶺巡檢衡山縣永壽巡檢藍山縣大橋巡檢龍陽縣龍潭巡檢沅陵縣船溪巡檢麻陽縣高村巡檢東安縣蘆洪巡檢靖州零谿巡檢桂陽縣文明巡檢以上府經歷縣丞巡檢計十三缺或與長官同城平日無所事事或雖有分防地段平時仍寄駐縣城既等冗官類皆瘠缺地方偏僻均非必不可少之員考察情形似可再與裁撤以汰閑冗將所裁各官公費廉俸計共銀柒千叁百餘兩即以抵補各佐雜公費之

不足尙不敷銀叁萬捌千餘兩委實無可再籌伏查

部章勻定公費之意固爲酌提中飽歸公亦爲整頓吏治起見若仍以區區款項無着致任善政稽延當非

大部之意此項所短叁萬捌千餘兩擬卽在上年新籌之穀米行政經費內指撥支給俟再查有他項盈餘規費可提足資抵補卽行停撥至裁缺知縣佐貳雜職各官內如有升階者擬請准其卽以升階補用應赴引者卽令請咨赴引并免繳離任銀兩以示體恤未有升階者照例歸裁缺卽用班補用懸缺未補者卽行停補所裁教諭訓導各員並請歸於裁缺卽用班遇缺卽選如蒙

允准並請

憲台速賜

奏咨一俟奉准

部文卽當分行各屬遵照截缺將應辦事宜分別交代清楚並將府廳州縣佐雜公費以次實行庶與預算案不致相違卽以仰副

憲台求是於實之至意所有會議先行院司道公費並酌裁知縣教雜各缺以補府縣佐雜公費不敷各緣由是否有當理合列表開單會詳呈請

憲台俯賜核示具

奏並祈咨明

度支 部查照速覆 宣統三年三月

督憲批仰候

撫院察核辦理繳表摺存

撫院批據詳並表摺均悉所有院司道並藩臬首領各官公費擬自本年四月初一日起先行實行按照原定公費數目九成支發各節應准照辦由司分別移行遵照至所擬裁撤各州縣教佐等缺因爲籌節費用以補不足起見惟新官制不久卽須頒布其地方行政官階級如何規定現尙未見明文自應稍從緩議免致多事紛更不得已則查照民政部通咨先將同城縣缺酌量裁併或尙可行仰再會商妥議詳覆核行此繳表摺存

會議撫院原定公費劃分清楚擬請照章改設幕職應詳

爲會議詳請事案奉

憲台札開案據本司等會詳所有院司道各署公費擬自本年四月初一日起先行實行等情應卽照辦查公費既已實行本撫院衙門一應開支向例概由支應局供給者除關於行政經費酌擇數端畧如各司道衙門所設公所之例歸於行政經費項下開銷以歸一律外其餘署用各項自四月初一日起統由本撫院在於公費內動支毋庸由該公所支應合行列款札知札到該公所卽便遵照辦理此札計單等因奉此當由本衙門會同財政局司道等集議查上年擬定公費章程於定公費後應在公費內開支與仍在公欸內開支之欸在第一章第五條

內分別規定詳請

奏咨在案其時僅及大致未盡周詳茲奉

憲台開單指示就原定公費章程詳細劃分清楚自應遵照辦理惟查

憲轅辦公照章應設幕職廳與各司道等衙門設立公所本屬事同一例上年辦理本年預算遵照

憲台札發預算表其中僅有委薪火食書吏辛工等名目未照幕職廳規定是以郵電川資印刷修理添置雜支等項向山善後局及支應所逕支者或統入他款或酌裁提抵遂致多未列入

憲署經費項下茲經逐款查明在預算全案之內款項非盡無

着惟如衙署修理工本在臨時門工程經費內酌列預備金
貳萬兩抵支各衙署局所祠宇等修理之用嗣經

度支部將預備金全數核刪至鋪陳換季等本在額定支應經
費二萬兩之內因籌公費時議將平時各署供應停止於其中
酌提一萬兩抵支公費是鋪陳換季等項已歸無著細釋

憲台札於分別公私之界已極嚴明所有單開各款皆屬因公
必需現經本司等籌議除因公郵電摺差費用等本在預算之
內照舊由財政公所支給外其餘擬請

憲台照章改設幕職廳卽就

憲署原有委薪火食及書吏辛工銀三萬五千六百三十五兩
零並查提各科應有規費一併抵支改定幕職員薪火食及書

記辛資等項另由本司在列入預算之支應經費內更撥銀四千三百六十五兩抵支紙張印刷修理添置雜支等項共成銀四萬兩按月由財政公所提收勻支作爲

憲署幕職廳經費卽乞按款規定咨

部立案實用實銷庶與預算不致相違而需用均歸有著所有遵奉院司道公費先行實行札單除分移遵照外謹就單開各節條注遵籌辦理之法開摺呈覆並擬請

憲署照章改設幕職廳緣由是否有當理合詳請

憲台察核速賜示遵

宣統三年三月

會議遵籌撫院公用經費分別開支清摺

計開

一每月奏摺奏包應歸行政經費開支

查此款原定章程漏未詳及應補入動支公款條內由
財政公所開支

一自用信紙簽封筆墨由公費開支外署中公牘稿批示
札各項紙張應歸行政經費開支

查此條署用紙張向由各科書吏在司庫領有紙札銀
兩包用無庸另作開支如改設幕職廳即以司庫紙札
銀兩提歸幕職廳經費支用

一寄遞各處公文郵費及電報費歸行政經費開支

查此條與原定章程相符預算內列有各署因公郵電
費壹萬壹千餘兩由財政公所開支

一拜本發摺差弁一切川資用項應歸行政經費開支

查原定章程委員調查事件川資仍准動支公款此項應與委員川資一例由財政公所開支

一刊刻各項公用木板及官用印刷品應歸行政經費開支

查此條與原定章程相符未設幕職廳以前由財政公所開支如改設幕職廳應規定列入幕職廳經費開支

一修理衙署工程如係折造另案撥款辦理如係滲漏修補及配用窗片等項凡屬上房以內者其泥木工料概由公費內支至其餘公廳及本署辦公員弁丁役人等所住之公屋如遇修理仍應歸行政經費開支

查原定章程小修在公費內支大修在公款內支與前條同一用意惟上年預算原在臨時門工程經費內列預備金貳萬兩經

度支部核刪應請在幕職廳經費規定修理費一項如遇大修臨時籌款追加

一本署遇有添委辦公幕職人員其所住辦公處所需用棹椅器具應歸行政經費開支

查此項原定章程漏未詳及現查預算案內列有支應經費省平銀壹萬兩作爲特別典禮酬應及新任長官客官行臺之用現擬在支應經費內酌撥銀兩歸入幕職廳經費開支

一署內公用廳事及幕職各員辦公處所每遇冬夏換季如鋪墊涼棚之類應歸行政經費開支其上房以內則均於公費內自行開支以清界限

查原定章程鋪陳換季均在公費之內未經分別上房與辦公處所理應遵

示劃分請在幕職廳經費內規定由支應經費內一併撥款

撫院批據詳並清摺均悉本撫院衙門幕職廳正籌議照章改設如援照督院來電鄂省現辦章程核計經費較現支委薪火食書吏辛工紙張等款加增甚鉅湘省財政奇窘不能不力求節儉應如何分別裁減尙費躊躇前據來詳從四月起實行院

司道各官公費因將本衙門關於行政經費開支各項分條開列札行備案以清界限茲據請將原有委薪火食書吏辛工暨向章支應各款每年共籌撥銀四萬兩請改設幕職廳按月由財政公所批解以充經費由院實用實銷等語但能足供支用亦復何事多求應准自四月起先行試辦如實在不敷再行酌奪決不濫費至員書薪火辛工及一切雜用均係按月開支未便攤開應照鄂省辦法遇閏照加其摺開劃分公用各條併准查照辦理仰卽遵照此繳

會議官紳籌設公米所辦法詳文附條件

爲會議詳明事竊本藩司奉

憲台札飭在省城籌設官米局多所公平售賣以期維持市價

並由司妥議章程慎選員司迅速開辦一面行令長沙府督飭長善兩縣出示嚴禁奸商囤積抬價如敢違犯卽行提案究罰並飭將辦理情形具報等因奉此仰見

憲台鄭重食政體恤民艱之至意莫名欽佩查湘省素號產米之區近年以來水旱頻仍人民恒以缺食爲苦遂以荒歉爲至駭可怖之事上年省城以米價驟漲影爲變亂現在米價又漸增高若不設法維持其何以安衆心而重民食現奉

憲台飭令於省城籌設官米局多所售米平價自屬嘉惠窮黎之舉惟查湘省各屬上年均係豐收此次設局籌辦平價自與尋常荒年籌辦平糶性質不同又時值仲春距秋成之日尙遙若多設局所全用官倉存穀不惟青黃不接之時各屬之荒歉

可慮卽以穀數時日兩兩比較亦難以三十餘萬石之儲穀支應民食至百二十日之久本司職道等會集士紳反覆籌議僉謂此次設局賣米意在杜奸商抬價之弊既不類於平糶復不屬於營業自應以官紳一氣通力合辦爲至計以實惠及民不憚賠累爲要旨以簡易撙節不派委員爲辦法因擬改定其名曰公米所碾賣之米每穀萬石官倉出穀七千石紳倉則出穀三千石暫於省城南北門各設一所按日發賣俟青黃不接之時買米人多再圖推廣卽責成長善兩縣各於轄地境內所設處所各選派公正士紳二人經理該兩縣有承辦之責應不時蒞所察視以昭鄭重至各所賣米每日擬請各壹百石爲額每升售價不得過五十文如米價每石漲至六串亦卽詳請阻禁

以符原案當經公同擬定簡章九條如蒙

核准將來開辦卽擬按此實行似此辦理庶於維持市價之中
仍有嚴示限制之意 本司 職道 等偕同士紳一再商酌意見相
同除遵照行令長沙府督飭長善兩縣出示嚴禁奸商囤積抬
價外理合將官紳會議籌設公米所辦法繕具清摺隨文詳請
憲台俯賜察核批示祇遵再此件係 本 藩 司 主稿合併聲明 宣

統三年三月

會議合辦公米所條件

計開

一此次設所賣米係由官紳合辦非平糶性質定名曰公
米所

一責成長善兩縣選派公正士紳各二人辦理每人月送
轄金十二串文

一每日每所賣米限定一百石

一先在南北門各設一所俟青黃不接之時買米人多再
圖推廣處所

一賣米按照草潮門定價每升至多不得過五十文

一每人每日限買一升

一升斛一律用草潮門礮坊升斛

一碾買之米每穀萬石官倉出穀七千石紳倉出穀三千
石

一米價漲至六串即行阻禁以符原案

督院批據詳籌設公所辦法及摺開章程均悉仰候

撫院核示遵行繳摺存

撫院批據詳已悉所擬合辦公米所條件甚屬妥協應准照辦
仰卽轉飭遵照仍候

督院批示繳摺存

湘省學欵驟難改照新案辦理詳文

爲詳明事案准提學司咨准

清理財政局移開案照敝局試辦宣統三年預算各署局處堂
所冊表彙編全案詳請咨

部旋奉核復經抄呈

撫部院劄交諮議局議復隨將復案分別移行並經各署局處

堂所移復申復各在案茲經敝局核編復定預算總冊詳請

撫部院分別

奏咨除俟奉

部覆再行移會外所有各署局處堂所出入款項較之原算多有更改相應開摺移會爲此合移貴司請煩查照計移送清摺一扣等因准此本司竊維清理財政固以確定預算爲入手之方尤必改良收支爲實行之據良以預算一定則劃分出入全局必賴通籌酌劑盈虛財權先宜統一此古者制用之恒規亦各國現行之通例也上年貴司衙門改設財政公所詳奉

撫憲核定簡章其第一條卽標明統一財政係欽遵

諭旨辦理以全省出入款目皆歸貴司掌管全省收支數目自

應皆由貴署經理以符統一宗旨等語蓋欲定整齊畫一之規必先爲正本清源之計現在宣統三年預算新案以本年正月初一日起爲實行之期本年收支卽不得改良方法其現行案內各款自應截至上年年底爲止若仍循照辦理則其中窒礙情形實有萬難施行者查本司衙門所管教育經費歷年指定各項款目以貴司衙門財政公所爲大宗此外則鹽道衙門督銷局以及其他各署局亦皆分案認定按年或解由學務公所轉發或逕撥各學堂領收歷經照案辦理惟是從前原有款項多由專案陸續指撥零星湊集而來同一學堂也而款目分隸多處同一學款也而門類別爲數宗名義既極分歧數目尤多瑣雜律以本年預算新案既不能鍼孔相符將來彙總報銷

更何由條分縷析若尙因仍舊案勢必窒礙滋多且此次財政局核定預算各款較之原數多有更易頓改舊觀斷非依附前案所能強相比例又況本年既爲現行舊案及預算新案前後接續之一大關鍵尤應改定辦法劃清界限以免混淆現經本司察酌情形並督飭會計科各員就此次財政局移送教育經費預算全案清摺詳細覆核將其中所列各項學款逐一清釐如該校款目向歸某署局一處支發而本年預算又毫無變更者擬即全行提出繕列一摺並分條敘述理由請仍循照舊案辦理此外各項則本年預算數目較前既多增減而舊有款項又復複雜零星收支之數勢不能強相符合不得不另案核辦茲經按款標題另爲一類查照財政局核定預算確數開列一

表並分別注明按月攤領數目擬請援照財政公所章程第五條所開各司道局處凡有出入款項皆應歸司查核由各處按月預算列表支領之例嗣後此項按月分領款目即請由財政公所按月核支解送學務公所轉撥應用其表中所列工業農業等款向歸本校自行具領者此後亦均一律改由學務公所彙收轉發以昭劃一而便稽查其向由貴司衙門及財政公所按月按年應解各宗款目自本年起均可停發從前繁瑣之案一律取銷至其餘各署局處向來認解各款本應改送貴司衙門彙收分撥但名義歧雜目前未便遽議更張擬請仍照舊案暫由學務公所經收隨時轉解貴司衙門歸墊似此一轉移間而後本司衙門經理各項教育經費與財政局本年預算數目

乃能比照實行既無窒礙之虞復鮮紛歧之患且於貴司統一財權以及

大部改良收支之本旨尤屬兩相符合一舉數善便莫大焉惟此次表中所列按月領款數目通年合計較從前畧有增加若僅以舊案有著之款抵支爲數實尙虧短現值財政公所款項支絀籌撥或不免爲難然本年爲預算案實行之期此項教育經費既經列入預算原屬歲出經常項下應支之款卽有不敷亦應彙入全案通籌抵補較之從前畫分畛域情形已不相同自未便繩以舊案且表列各校額支款目上年試辦預算時均係屢經修正裁減始克核定之數本年各校業已迭向本司衙門紛紛照額請領而本司衙門向無專款存儲既不能於舊有

欸項之外另籌增撥勢不得不仰賴財政公所改照新案分別核支除另文詳請

撫憲察核批示外應請貴司通籌協濟自本年正月起卽一律改照新案辦理按月核照表列數目解欸過司俾資分撥相應將詳擬辦法分繕甲乙丙丁四摺並另單說明理由咨請查照辦理計咨送清單一紙清摺四合等因准此查湘省學堂專欸向指銅元餘利及穀米加倍兩項自光緒三十三年銅元停鑄後餘利絲毫無著穀米加倍一欸豐年約可收銀拾餘萬兩歉年約可收銀數萬兩封禁之後亦屬毫無收數而學堂支出之欸官立各校每年須銀貳拾餘萬兩民立各校每年須銀貳萬餘兩滙京學欸每年須銀貳萬餘兩東西洋留學生學費每年

須銀拾萬餘兩補助外省學費每年須銀貳萬餘兩合計約在四拾萬兩以外此項學款歷年均屬東挪西湊勉力支付故前善後局積欠銀至貳百四拾餘萬兩其中固有別項挪用而要以學款爲大宗上年九月由財政公所開具說帖擬在鹽餉加價項下每觔加錢六文作爲學款詳請

憲台發交諮議局議決現在雖蒙

憲台奏請施行而鹽政處核議准駁尙不可知未能遽作抵欸卽使全數邀准每年約可收銀叁拾餘萬兩以之撥充前項學欸尙屬不敷茲准提學司此次來文宣統三年官立各校每月除原支外須加發銀六千八百叁拾餘兩民立各校每月須加發銀壹百叁拾餘兩新增各校每月須加發銀七千零叁拾餘

兩合而計之每年實須加發銀拾餘萬兩在學務逐年進行自爲教育必須之款而財政公所債臺高築實難爲無米之炊查預算案以收支適合爲準現奉

部示凡有追加之數均須預籌的款方准追加不得指東挪西以防虧欠用意至爲深遠此次學款驟加實屬無力應付應請仍照上年原支數目發給一俟穀米加倍鹽觔加價兩項收數綽有盈餘再行查照新案補發至各署局處向來認解學款暫仍照舊解由提學司核收逕行支發以免歧異而昭劃一所有學款驟難改照新案辦理緣由理合具文詳請

憲台俯賜察核批示祇遵

宣統三年三月

撫院批據詳已悉仰卽移會提學司查核妥籌辦理此繳

會議裁撤綠營日期擬請改至六七兩月爲止詳文
爲遵批會議詳復事案奉

督憲瑞批司處會籌裁撤綠營日期並酌擬應行布置事宜辦
法一案奉批據詳已悉所擬裁營截餉改標各辦法均屬妥洽
查此案雖係裁撤綠營然裁撤之原因係關於湘省財政預算
案內清釐核減之一宗應由

南撫院主政會同本督院銜名分別

奏咨辦理仰卽錄批報明

撫院核辦可也至詳內副叅遊以下各員弁遇有他省及本省
未裁綠營相當缺出儘先叙補一條查鄂湘兩省武職現已奏
明一概停補停選無可再補應將此條酌量刪改以昭覈實併

卽知照此繳等因奉此當卽遵錄呈報奉

憲台批飭會同兵備處遵照

督院妥議辦法分別詳請奏咨本司道等遵卽會同核議擬請
自綠營裁撤以後所有應撤各營武職內提鎮大員擬請仍照
原詳所擬均請開缺他省未裁綠營以前遇有提鎮缺出由部
開單照裁缺章程儘先請

旨簡放其副叅遊都守以及千把外額現湘鄂兩省武職已奏
明一概停補停選無缺可補擬請於裁缺後如查有年力富強
才堪造就者均查取履歷由本處分別詳咨註冊遇有應行差
委事件量予委用其未得差委之前凡係此次實缺被撤員弁
均一律請給恩俸廉三年千把以上仍照鄂省辦法按季發給

千把以下畧予變通改爲三期發給倘三年之內或病故或犯有事故被控查實均卽停止如才具平庸及年老之員弁均請令其繳劄歸田所有三年恩俸廉銀概先發一年餘發期票分兩次具領如有於裁撤時自願繳劄歸田者亦如之再原詳各兵丁請截至三月底全行裁撤裁缺則以四月底爲期現在爲時已過且案關全裁內有提鎮大臣必須先行奏明請旨欽遵辦理裁兵日期擬請改至本年六月底裁缺展至七月底爲止以便清理是否有當合將遵批核議緣由具文詳請憲台俯賜察核於原詳內逐一更正分別奏咨再此案應請

憲台主政合併聲明

宣統三年四月

督院批如詳辦理仍候

撫院察核會銜

奏咨繳

籌議添募巡防五隊并訂購槍枝及擬請緩解協餉緩辦
審判詳文

爲詳請

奏咨事竊查湘省民情彈悍會匪充斥伏莽徧地竊發堪虞全
賴防營棋布星羅藉資鎮攝惟是幅員寬廣境地阻深匪類最
易潛踪而西南邊界又多與粵桂黔蜀接壤匪警頻聞人心極
爲淨動如粵桂交界之江華藍山等縣黔蜀交界之桑植保靖
等縣黔桂交界之靖州通道綏寧城步等州縣均有外匪竄擾

分別調派防隊會合搜捕其留駐省城者不過數隊四路策應實苦單薄不敷分布現值粵東匪徒起事勢極猖獗亟宜未雨綢繆妥籌防備本司道等會同悉心商酌擬請添募巡防五隊並設統領一員專爲游擊之師以備邊警策應之用一切營制餉章悉照舊設各巡防隊辦理約計招募經費及添置軍裝器械等項需銀一萬餘兩每年共需薪餉等銀六萬餘兩兵精尤貴器利目前軍用利器以槍砲爲先湘省各巡防隊所用槍支多係向年隨時購置種式不一速率各力參差不齊大非軍用所宜前奉

陸軍部通飭各省軍隊習用槍支均須改用一律湘省以欸絀因仍未改茲擬向湖北槍砲廠訂購小口徑槍八千支每支配

筆碼五百顆分給各巡防隊換領應用俾昭整齊而利行陣約計槍支連配筆碼約共需銀三十萬兩擬分三年付清價銀綜計每年連添募防隊薪餉共需銀十六萬餘兩此外如添購原有槍砲子彈銅帽火葯以及招募偵探各種用費爲數亦復甚巨際茲財政困難已達極點委屬無從籌畫惟事關固圉保疆萬不能以財力艱窘置爲緩圖若坐事因循設有變故地方偶遭蹂躪重煩事後補苴則損失轉恐不可計數彼此一再籌議於無可設法之中爲移緩就急之計擬請

奏准將應解各省協餉暫行緩解並請將應設審判廳暫緩開辦此外如學務等項經費凡可節省者暫從節省俾得藉資挹注湊濟要需一俟事機順手地方救靖再行察酌情形分別籌

辦總期憲政學務均有進行之實而無偏廢之虞如蒙
批准即懇

憲台遴委知兵將領分途招募一面電飭鄂廠訂購槍枝俾得
早日成軍以衛地方所有會同籌議添募巡防隊并訂購槍枝
及擬請緩解協餉緩辦審判以期節省濟用緣由是否有當理
合具文詳請

憲台俯賜察核分別

奏咨 宣統三年四月

督院批據詳已悉仰候

撫院

奏咨繳

撫院批據詳已悉該司道等以湘省民情強悍會匪充斥伏莽徧地竊發堪虞近鑒於粵匪之亂尤應未雨綢繆請添募巡防五隊并訂購鄂廠快槍八千枝子彈四百萬顆以便通省防隊一律換給新槍俾增武力具見所規遠大力任其難查各防隊所領槍枝亦有已換新槍者約計目前添購四千枝已足敷用似可分作兩批訂購稍紓財力至請緩解協餉緩辦審判廳能否

奏邀

俞允事未可知除添募防隊及原防各路軍隊如何歸併分布候即籌定辦法派委統領另札行知并分別奏咨外仰即遵照仍候

督院批示此繳

呈資裁存各營弁兵員名數目清摺並請示長沙協撫標

左右兩營原募土兵應否裁撤詳文

附清摺

爲詳請示遵事案奉

憲台批本司會同兵備處遵批會議裁撤綠營酌擬應行布置事宜辦法及原詳裁兵裁缺各日期擬請改至六七兩月底止一案奉批據詳已悉現因粵省匪亂各處伏莽生心防務正在戒嚴之際業經本撫院由電

奏陳撫標練軍各營不能裁撤又苗疆要地各綠營原議分十年遞裁者現亦暫緩實行此外應裁二十二標鎮協營均照來詳兵以六月爲限官以七月爲限一律裁撤所籌裁撤後應分

別布置事宜亦均如詳辦理仰候會同

督院專案

奏咨立案仍候

督院批示繳等因奉此除分別移行遵照外惟查練軍本就標兵挑練編成原定撫提兩標各挑練五百人除原有底餉外由前善後局添籌按月每名加給練餉一兩二錢長沙協本隸提標因其原駐省城故練軍與撫標合而爲一該協占額一百名常德協附入提標與長沙協一律相同至於土兵起於光緒二十六年因制兵遞年裁汰不敷差派該營詳奉

院批由善後局議准將撫標左右兩營暨長沙協分派駐防七城及西北城外溁灣市各處兵丁二百一十名每名每月原有

津貼銀一兩二錢之外再按月每名加給銀三錢由三營各自
招募土兵七十名以供差遣該三營又各舊有土兵十名餉項
相同均由善後局支給此練軍與土兵分別緣起之大略情形
也撫提兩標原議均係二十年裁盡練軍亦在其內現已裁至
第八期撫標兩營制兵不足原練之數則以土兵陸續補入稽
查現在各營領餉冊報撫標尙存練軍三百名提標尙存練軍
二百九十八名蓋練軍原恃標兵底餉若裁標存練則底餉一
去專恃後加練餉難敷日食又須另籌津貼自不如標練均存
免致開除底餉又費周章茲奉

憲台批示撫標練軍各營不能裁撤是否專指撫標練軍而言
抑併提標練軍該括在內查湘中全省原有三十一標鎮協營

除苗疆八營緩裁龍陽一營業已自請全裁外現存二十二標
鎮協營撫提兩標及長沙常德兩協均在其內若提標練軍一
併暫留則應裁者僅十八處即但留撫標練軍應裁者亦僅止
二十處長沙協卽應改隸

憲標合將裁存各營弁兵員名數目附開清摺呈候

核定該協與撫標左右兩營原募土兵應否裁撤理合一併具
文詳請

憲台俯賜察核迅速批示以便遵照辦理並造預算

宣統三年四月

湖南已裁二十二標鎮協營裁存官弁兵丁名數清摺

計開

撫標

叅將一員

額外一員

守備一員

馬兵二十九名

千總三員

戰兵六十名

把總五員

守兵一百三十三名

外委六員

提標

提督一員

把總一十一員

叅將一員

外委九員

遊擊一員

額外四員

都司一員

馬兵三十二名

守備一員

戰兵一百六十二名

千總六員

守兵一百二十九名

永州鎮

總兵一員

外委九員

遊擊二員

額外五員

守備四員

馬兵十四名

千總四員

戰兵一百九十一名

把總八員

守兵三百六十一名

長沙協

副將一員

外委五員

都司一員

額外三員

守備一員

馬兵十三名

千總三員

戰兵十八名

把總五員

守兵七十九名

衡州協

副將一員

額外二員

都司一員

馬兵二名

千總二員

戰兵八名

把總二員

守兵三十名

外委三員

寶慶營

都司一員

外委三員

守備一員

馬兵二名

千總一員

戰兵八名

把總三員

守兵四十名

沅州協

副將一員

額外一員

守備一員

馬兵六名

千總三員

戰兵二十名

把總五員

守兵六十四名

外委五員

靖州協

副將一員

額外一員

千總一員

馬兵十三名

把總三員

戰兵五十名

外委四員

守兵一百五十七名

永順營

都司一員

額外一員

千總一員

馬兵十一名

把總二員

戰兵五十三名

外委三員

守兵一百一十九名

常德營

都司一員

額外一員

千總一員

馬兵四名

把總三員

戰兵二十六名

外委三員

守兵四十六名

岳州營

守備一員

額外一員

千總一員

馬兵二名

把總一員

戰兵九名

外委二員

守兵二十八名

澧州營

守備一員

額外一員

千總一員

馬兵一名

把總三員

戰兵八名

外委三員

守兵三十七名

臨武營

守備一員

額外二員

千總一員

馬兵二名

把總三員

戰兵二名

外委二員

守兵三十三名

宜章營

守備一員

馬兵二名

千總一員

戰兵四名

把總三員

守兵三十四名

外委三員

桂陽營

守備一員

馬兵二名

千總一員

戰兵四名

把總三員

守兵二十六名

外委二員

九谿營

遊擊一員

額外一員

千總一員

馬兵四名

把總三員

戰兵七名

外委三員

守兵三十名

武岡營

守備一員

額外二員

千總一員

馬兵三名

把總二員

戰兵二名

外委三員

守兵三十五名

綏甯營

遊擊一員

馬兵四名

千總一員

戰兵二十四名

把總三員

守兵九十五名

外委二員

長安營

遊擊一員

外委三員

守備一員

馬兵七名

千總一員

戰兵二十名

把總二員

守兵九十五名

永定營

都司一員

馬兵一名

千總一員

戰兵四名

把總一員

守兵二十三名

外委一員

辰州營

都司一員

額外二員

千總二員

馬兵二名

把總五員

戰兵十一名

外委四員

守兵三十四名

嶺東營

把總一員

戰兵四名

外委一員

守兵十二名

額外一員

以上共官弁二百六十員

馬戰守共二千四百九十一名

撫院批據詳及清摺均悉撫標練軍應挑留精壯三百名酌照防營體制編爲三哨合作一營其官弁額缺仍全行裁撤改設營哨各員用資約束卽以原有廉俸餉乾及練軍薪公津貼等項抵支當可有盈無絀此外邊要各處原議分十年遞裁者現

亦暫緩實行弁勇均仍其舊湘省制兵三十一標鎮協營除已
裁竣之龍陽一營外計分別裁留改編者爲撫標長沙協免裁
者鎮守綏靖兩鎮乾州永綏兩協鎮溪河溪保靖古丈坪四營
全裁者提標永州衡州寶慶沅州靖州永順常德岳州澧州臨
武宜章桂陽九谿武岡綏甯長安永定辰州嶺東二十標鎮協
營按照資摺所開官弁兵丁數目計應裁官弁自提鎮起至額
外止共二百六十員馬戰守兵共二千一百九十一名兵丁以
本年六月爲限官弁因辦理移交展限一月以本年七月爲限
統行裁撤提督及永州鎮兩員

奏明遇有未裁綠營各省提鎮缺出由部開單請

簡其副叅以下由督練公所行取履歷查明年力可用與否飭

令分別候差歸田應發三年恩俸廉銀千把以上分十二期按季發給千把以下分三期按年發給概行先發期票屆期呈領無論在省候差及繳筭歸田均照此一律辦理期票上載明不准先期抵給別人作用以防遇有扣繳別生轆轤兵丁應發一年恩餉卽照前詳核給其制兵向充各項差使省城仍以改編之撫標練軍會同巡警巡防隊照料省外已裁綠營各屬卽照前詳分別改派惟府廳州縣城治未駐有防隊者應飭擴充警察整頓團練以保治安其餘事宜均查照疊次詳批辦理除會奏稿另檄行知外仰該司查照批飭現裁弁兵造具應發恩俸廉餉數目暨裁撤後節存俸廉餉數目并改編撫標練軍酌照防隊薪餉比較該營原餉有無溢出通盤計算造資清冊三分

以憑分咨

陸軍支度兩部立案再查該司前詳開列弁兵各數與此次摺開不符現係據清摺核辦並仰知照仍候

督院批示并移督練公所三處暨清理財政局查照此繳摺存
遵飭籌擬偵探隊經費詳文

爲詳覆事案奉

憲台札開據巡警道稟稱廣東警告謠傳人心惶惑請添設偵探長一員副探長二員探目十名探兵百名作爲偵探隊每月需經費銀七百二十兩又招選警兵四百名一案奉

批據稟已悉該道有見於廣東匪警因籌先事預防之道請添招巡警四百名偵探隊一百名自係爲防緝奸宄保衛治安起

見當此人心浮動匪類橫行非兵警之力不足以鎮壓地方一有疏虞則耗損財力將不可以數計誠不能專持節省主義置全局安危於不顧除將辦理情形分別

奏咨外候飭財政公所如數籌撥經費以資布置惟辦法以鎮靜爲宜選募偵探以有身家有來歷者爲要仰卽妥慎籌辦慎毋稍涉張皇切切此繳印發外行司遵照籌撥欸項確數詳報核咨等因奉此查巡警道稟請添設偵探隊一百名並招選警兵四百名自係爲保全治安而設誠如

憲批所云湘省財政艱難凡事固以撙節爲要義然至關於防禦危亂保衛治安之用則不容稍有靳惜惟查湘省巡警經費由公所開支者每年銀六萬一千餘兩洋貳千叁百餘元錢叁

萬四千餘串文購置警服等項活支尙不在內因無的款可指均係隨時挪移應付巡警道深知公所艱窘情形已函認俟白籌房舖各捐辦有成效卽行按數抵支方冀可以稍紓喘息茲奉前因核計偵探一項全年約須銀玖千兩招選警兵一項全年約須銀貳萬兩有奇兩宗合計約在叁萬餘兩爲數甚鉅當此庫儲奇絀之時出入兩抵不敷在百萬以外仰屋興嗟點金乏術委無現成的款可以指撥惟事關保衛地方不得不於無可設法之中勉力圖維本司籌思再四擬請將偵探隊經費暫由公所設法籌措應付其招選警兵四百名餉項一時實難再籌竊思保衛地方固屬緊要而缺餉譁潰亦實可虞應俟巡警道籌有的款再行添募是否有當理合將遵飭籌撥添設偵探

隊經費緣由具文詳請

憲台俯賜察核分咨批示祇遵

宣統三年四月

撫院批據詳已悉省城現擬添募軍隊整頓巡防需餉較繁添設崗警一層自可暫從緩議仍當體察情勢如遇必需添設時再行酌核辦理至偵探隊月餉卽由該司按月如數籌撥以濟要需仰卽移知巡警道查照此繳

遵議首府縣詳稱集紳妥籌阻禁穀米詳文

爲詳請核示事案奉

憲台批據本司詳據長沙善化兩縣詳據地方自治公所呈鄉間穀米時價騰漲呈請出示阻禁一案奉批米價騰漲已過常額自應照案阻禁惟按照約章禁米出境宣布後尙有二十一

日限期此二十一日之內恐輸出更多必先於事前妥籌布置務臻完密仰卽督同首府縣會商公正紳士迅速籌擬宣禁後一切維持辦法由司核明詳覆定期實行等因奉此本司遵卽札飭首府縣會紳妥籌稟覆詳辦茲據該首府縣等詳稱知府等遵卽邀集地方正紳悉心妥籌查省城民間倉棧存儲無多卽合官倉及紳管各倉約畧統計亦不敷甚鉅茲據職紳曾廣漢等呈稱民食重大公懇節制外輸以衛治安等情請卽轉詳等因知府等伏查邇來糧價翔貴民食維艱匱乏情形極爲可慮應請照案分別阻禁以防將來而弭隱患擬請自出示之日起准各輪船於宣布後二十一日期限內照章裝運以符定約至民間穀米船隻自應以出示日起一律阻禁不准載運無所

謂二十一日期限惟念該商販等在未經出示之先不無業經裝載之船似應予以體恤分別程途遠近酌定限期湘潭省城米船運由蘆林潭出口者以出示三日爲限運由岳州出口者以五日爲限仍准該商人完捐過關以順商情而示區別知府等商之正紳詢謀僉同理合將遵飭會籌辦法詳請憲台俯賜核辦示遵等情據此查現在米價日漲羣情惶迫自應及時宣示阻禁以維民食應請

憲台核示禁期俯予電

奏惟查約章准於宣示阻禁期二十一日內凡輪船仍照常裝運穀米出境自係專就洋商購運一項言之查長沙至漢口通商大輪分班往來尙有定數而每次裝運之米亦可以約數計

及惟內地商運民船盈千累萬一聞阻禁爭相售買爭買愈極
糧價愈昂其漫無限制妨礙民食較之輪運之害爲尤甚茲該
府縣等擬請於民間穀米船隻與輪運者分作兩項其辦法雖
屬異趨而按之本省現在穀米匱乏民食艱窘情形權其緩急
輕重似有不能不出於此者且在未經出示之先該商販業經
裝載之船並寬予限期仍一律准其輸運出境似於商販亦體
恤周至本司詳察該府縣等所擬各節自係鄭重民食辦法是
否有當理合具文詳請

憲台俯賜察核批示祇遵再此案阻禁期定應請

憲台照會領事出示曉諭並請札飭本司暨米捐局以便將釐

捐關於阻禁應行籌辦事項從速會同辦理合併聲明

宣統三年四月

撫院批據詳已悉業經本撫院

奏明阻禁矣仰卽轉飭各地方官各局卡認真查禁勿稍疏懈
此繳

遵飭議覆諮議局經收田房稅契案內條件詳文

爲詳請事案奉

憲台札開據諮議局覆呈整頓田房稅契一案仍持前議無非
爲慎重書吏舞弊起見然書吏經手稅契有弊紳董經手稅契
亦不能斷言其無弊與其改絃更張何如仍因舊貫據該司呈
遞意見書前來並山本撫院將原呈發交會議廳覆行審查僉
云國家稅地方稅章程明年卽可頒布徵收機關自當同時規
定此案公同議決由院核准改正飭司通行斷難更議如謂書

吏尙有弊端可再飭知各屬於大堂設櫃徵收山自治公所派人稽查如此防弊當益詳密餘仍應照前札辦理等情當由本撫院核其所議尙屬妥協飭卽通飭各屬遵照辦理等因奉此查此案前經本司將該局原議整頓田房稅契章程由紳董經收不無流弊未便照刊公布詳奉

憲台發會議廳公會議飭各廳州縣每五日將稅契收入數目揭榜宣示以杜書吏朦弊呈由

憲台分別節飭諮議局知照並行司通飭遵照乃諮議局復於本年二月間具呈堅持前議續請施行本司查諮議局原呈所叙書吏舞弊各節尙屬空言而司中檢查近來各屬稟報案件如宜章永定兩縣自治所紳於議案尙未刊刻公布之先卽張

貼告白通知稅契各業戶自某月日起至本所投稅並聲明自治經費由公所代收雖奉

憲台謂其有越權限嚴行批斥然據接署宜章縣吳令申報該縣因自治所紳張貼告白不准縣署再收稅契以致上年十月二十一日以後毫無收數風聲所播現象已至於此若竟改歸紳收流弊所極不可思議事關

國稅入款大宗通省徵收定案本司不敢阿徇含默是以備述意見開具說帖呈候裁酌施行茲奉

憲台發交會議廳公同議決飭令各廳州縣改爲設櫃徵收由自治公所派人輪流稽查以防弊竇行司通飭自當遵照辦理惟此案前奉

憲台交由會議廳公同議決行司轉飭遵辦諮議局仍執原議一再具呈萬一遵札刊布之後該局又復退有後言恣意翻騰朝令夕更更使各廳州縣無所適從擬請

憲台將本司前次所呈意見書一併飭行諮議局覆議如無異議俟呈覆到日再行排印通飭各屬一體遵辦以昭信守而免紛更是否有當理合具文詳請

憲台察核示遵

宣統三年四月

撫院批據詳已悉此案據諮議局迭次呈覆堅持原議均經本撫院徵諸廳議根據

館文極力駁斥不稍遷就亦以契稅爲正供所係流弊不可不防此次筭覆文內擬再飭知各廳州縣官各於大堂設櫃征收

稅契由現在之籌辦自治公所暨將來之自治會每日派人輪
流稽查意在嚴防書吏弊端藉免該局藉口業經筭知該局查
照並札飭該司通飭遵辦在案茲據詳稱此節應俟該局毫無
異議然後通行免致朝令夕更所陳不爲無見應即照准惟請
將前呈之意見書發交覆議一節此案前已筭知該局查照茲
復筭飭該局覆議前後兩歧殊覺自相矛盾現該局正在臨時
開會之時此案果退有後言不久當即呈覆屆時再將該司意
見書發交覆議可也仰卽知照此繳

議覆黃侍御原奏湘省鑛產豐富亟宜提倡新法厚集貲
本各節詳文

爲會議詳覆事案奉

憲台札開宣統三年二月十八日准

農工商部咨開宣統三年二月初七日軍機大臣片交欽奉

諭旨農工商部奏議覆御史黃瑞麒奏湘省鑛產豐富亟宜提倡新法厚集貲本一摺著依議欽此欽遵到部相應恭錄

諭旨粘抄原奏咨行貴撫欽遵查照可也等因到本撫院准此查湘省鑛產豐富如能設法籌辦自可廣闢利源應飭布政司提學司會同勸業道官鑛總處通盤籌畫悉心妥議以憑酌核除分行外合行札飭札到該司即便遵照

農工商部原奏所籌各節體察湘省情形迅速會同妥議詳覆核咨勿稍延緩此札計單等因奉此本司道等遵即按照

大部核議原奏所籌各節逐一會同詳細體察悉心妥議如原

奏鑄學人材亟宜培養任用湖南高等實業學堂設立鑄學專科請將黑鉛提鍊廠撥歸高等實業學堂改建模範實習工廠旁設應用化學各廠以盡探實業之奧自是出於培植人材擴充實業之至意惟查黑鉛提鍊廠卽湘省舊設之銅元廠自銅元停鑄後約計所存機械材料房廠本金在四十餘萬之多上年五月奉

度支部具奏造幣廠章程內載所有各省舊設之銅元廠機器廠房材料准總廠揀選提用嗣准清理財政局函開案照前奉度支部劄具奏鑄造國幣應一事權一摺鈔行監理官遵照辦理應將湘省已撤之銅元廠出入欸目機料物件開具清冊派員點驗等語當經本署司開列清冊派員按冊點稽在案是銅

本甚鉅此種重價機器卽昔年停用時亦妥爲照管何至任其
銹損若令學生拆卸研究其使用之法是拆卸現用之機器爲
學生研求之標本輕重似覺失宜又原奏化分鑛質局與測量
鑛山區域宜及早興辦等語經部議飭速爲籌辦是此切要之
圖辦理誠不容緩查湘省應設化分鑛質局前奉

憲台札准

大部咨飭由 職道 等籌議開辦當卽遵照頒發簡章妥爲商酌
現已擬定辦事細則並籌畫極爲儉省辦法預算建築爐室購
備藥品器具等費及常年經費數目已開摺具文會詳俟奉
批後卽當督飭經理員趕速興辦總期欸不虛糜有裨實際至
清釐鑛山區域一事尤爲鑛政扼要辦法惟湘省辦鑛多用土

法開採其呈請勘鑛向由 職 道衙門隨時札行該管地方官飭測繪生測量鑛線詳會界圖彙呈核辦前奉

大部頒發分年籌備事宜表曾經移知鑛務總公司將未經領照之鑛催令填造圖表送領開照並一面通飭各廳州縣一律確查蓋湖南全省商鑛均歸總公司稽核編號辦理業據編號各鑛繪圖請領開照者截至上年十二月止共四十起移由 職 道彙案詳咨上年復奉

大部飭查相省歷年商辦鑛務情形當即分別開具表式移請總公司派人携表前往各路鑛山確查照填並札飭各屬曉諭鑛山一體遵照惟各路商鑛散處四方距省有遠至千餘里者非輾轉查詢無從澈悉本年復奉催檄又經移催據稱調查已

有端倪尙未一律完竣應再分別催取一俟填送圖表彙齊卽行詳咨此正籌辦未完之情形也又原奏指定官鑛爲保息經費以大招商股擬先將三路總公司與官局聯合爲一局由地方士紳公舉殷實通達之人擬請撫臣奏明

簡派爲全省鑛務總理專治其事如鐵路總理直轄於農工商部等語查水口山鉛鑛及平江金鑛每年所出餘利合計約三十餘萬兩因近年湘省財政困難經

憲台

奏請援案試辦公債票指定官鑛餘利爲本息抵欸一面責成該處每年提出售砂餘利銀二十六萬五千兩另數存儲以備按期照付此項公債本息抵欸勿論公家如何爲難不得挪移

借用在案本處預算官鑛每年餘利除

奏撥公債備抵費外其餘儘敷各項常年經費

大部因原奏擬招商股一千萬兩仍指水口山平江官鑛
息費遂疑公債備抵費不在原奏所指官鑛三十萬兩之
咨查平江金鑛每年出金二千餘兩有無抵撥是否可靠
疑平江金鑛亦不在此三十萬兩之內矣不知官鑛出產
口山爲最旺平江次之每年合計各鑛所出餘利僅此三
萬兩公債保息費取於此處中辦事費取於此各局開採
取於此砂價騰落不常一遇滯銷恐慌萬狀三十餘萬之
尙不能決其可靠豈於公債備抵外別有三十餘萬耶至
總公司與官局聯合爲一局查官鑛資本出於官款開辦

約計五十餘萬兩純係公益營業每年餘利皆爲行政經費之補助於近年湘省財政不無補苴商辦之三路公司自光緒二十九年湘紳稟請開辦原案定額招株股三百萬兩

前升撫趙熱心提倡飭善後釐金墾務鑛務各局認官股銀十五萬兩週年八釐收息填票給摺在案自繳股本以來歷年收到三路公司息銀合計不足應繳利銀十分之一迭次備文催繳無着本司職道等竊以未便將已有成效之官鑛合併於利息無着之公司况現行之公債備抵金全賴官鑛爲信用一旦變更人心搖惑困難更不堪想

大部亦洞悉其情已將三路總公司聯合官局爲一請撫臣

奏派總理直轄於農工商部一節議駁在案本司職道等擬請

仍照

部議量予變通之法商辦之三路總公司總理應准由公舉呈明地方官考核詳咨奏派凡公司辦礦事宜仍由總理呈明辦理至官礦總處開辦資本係提用釐金善後等款五十餘萬兩嗣因砂價停滯復借用釐善等款二十餘萬兩官本營業原期濟用况已抵公債本息關繫甚鉅應請仍照舊章由本商司管理以期統一而資酌劑當此民生困乏籌款維艱財源命脈恃此一線生機更宜加意整頓力戒虛糜隨時稟請

憲台核辦以上各節經本司職道等往復磋商意見相同所有核議緣由理合具文詳請

憲台俯賜查核准予咨覆實爲公便再此件係本藩司主稿合

併聲明 宣統三年四月

撫院批已據詳咨覆

農工商部查照矣仰卽遵照此繳

遵議原有鐵路口捐改爲教育口捐詳文

爲遵飭妥議詳請奏咨以維學款事承准

督辦鹽政大臣戴 咨開本處會同度支部具奏湖南鹽務加價已重實難再行加價致碍鹽法且滋隱患一摺於宣統三年二月二十三日具奏奉

旨依議欽此相應刷印原奏恭錄

諭旨咨行查照可也等因到本撫院承准此合就札行札到該司卽便查照另行妥議詳辦併分移知照此札等因奉此查核

原奏以上年雲南省奏請每鹽百觔提加馬脚銀五錢核與光緒三十四年

度支部通行御史王履康原奏不符駁令停辦在前湖南籌補教育經費請加抽口捐每觔六文與上年雲南提加馬脚銀兩事同一律未便辦理歧異擬請飭將該省鹽價仍按部章辦理不得再加以維鹽法而杜隱患其教育經費另行就地籌補奏明辦理等情會奏奉

旨依議欽此轉行到司竊維前奉

憲台具奏豫籌湘省學款不敷甚鉅擬加口捐專充教育經費一摺實以湘省地方行政經費以學務爲大宗開辦以來卽無經常的款歲出需銀四十餘萬兩全係騰挪湊墊現時財政日

益困難羅掘一空并至無從挪移亟須指款籌補因將擬加口捐專充教育經費理由筭交諮議局議決公布是酌加口捐以籌抵預算不敷出於萬不得已之舉茲奉前因湘省鹽觔勢難再議增加但學款重要若不設法籌定則湘省學務非特難期進行更慮無以支挂然歲需既鉅即欲就地籌捐奏明辦理而零星集合滄海一鷗實屬於事無補自應另籌扼要辦法以期欸集而民不擾查粵漢鐵路收回自辦設立公司招商集股經湘省士紳集議詳奉

前憲岑於光緒三十四年五月十二日具

奏仿照光緒二十八年因償欸報効鹽觔口捐成案辦法民間購鹽一觔再加工捐錢四文無論川淮粵鹽一律照章輸納以

充鐵路經費奉

硃批著照所請該部知道欽此行司開辦迄今四載踴躍輸將毫無窒碍現在幹路奉

旨均歸國有今昔情形既各不同自宜因時變通以期適合所有原充鐵路經費口捐錢四文一欸以之撥充教育經費則食鹽皆自湘人口捐仍係培植湘省子弟既與前奏就地籌捐原案相符且係昔年奏奉

諭旨允准在御史王履康奏案之前欸經籌定並非新加與督辦鹽政大臣會同

度支部奏駁之案亦不相背實於民力毫不加損而於學務大有裨益所有擬將原有鐵路口捐改爲教育口捐緣由是否有

當理合備文詳請

憲台俯賜察核據情具

奏並分別咨明

督辦鹽政大臣

度支部查核示遵

宣統三年四月

撫院批查專充鐵路經費之口捐現據該司另文會詳遵

旨停收所請

奏咨撥充教育經費應毋庸議仰即知照繳

第一次議訂土藥統稅改歸湘省自辦辦法詳文

附簡章

爲詳復事竊奉

憲台札開宣統三年二月二十二日准

湖廣督院瑞箇電開准

度支部號電本日本部具奏各省禁土入境出境於禁種前當已有把握擬請將各省土藥統稅局卽行裁撤惟本年禁種卽能一律淨盡而各省存土數尙不少若部局裁撤卽免收稅項亦屬無此辦法應如何籌辦之處請飭各省督撫斟酌奏明辦理等因一摺奉

旨依議欽此除抄奏咨行外先此電聞等因准此查此項抄奏咨到尙需時日究竟內容如何無從深悉鄙意近日禁煙效力之大皆由寓禁於徵土價翔貴此時存土尙多捐稅萬無免理第部局旣裁不便添設省局將來徵收之法必須斟酌盡善而查緝私販私種清查囤土尤爲不可疏懈事關大局務貴從同

我公如有高見乞先見示俾有遵循毋任盼仰等因到本撫院准此查此案前准

度支部電已行司籌議具詳在案茲玩

督院不便添設省局之意蓋以部局之奏請裁撤由於各省禁土入境出境既禁土入境出境矣而又大張門面設局以徵收入境出境之土藥稅捐於名義上不免背馳然各省存土既多暗中輸運事所必有甚或大幫私販聚衆至數千人萬餘人公然荷擔橫行闖越關卡緝私勇隊能有幾何勢必束手放行莫能攔阻是既有存土卽有販運之人遽免稅捐萬無此理故督院又有查緝私販私種及清查囤土不可疎懈之說然土之爲物易於藏匿其價百倍於私鹽私鹽尙難查緝何況土藥至

種植之利亦百倍於五穀貧民向恃爲衣食之源一旦禁革別無抵償而謂其能滌慮洗心竟不一思嘗試誰其信之況深山窮谷僻壤遐陬查禁委員足跡安能徧到煙苗淨盡實際頗有難言至於土膏商店其囤積之土尙可設法稽查若巨室大家室廬深邃雖有囤土莫敢誰何又何所施其訶察即使懸不費之賞定告密之條而良懦遭殃勢豪倖免吞舟漏網騷擾難堪恐亦無此政體事關大局究應如何布置如何稽查如何可期實行毫無窒礙如何可收實效不涉繁苛允宜廣集衆思公同討論務期斟酌盡善足利推行合亟札飭札到該司即便遵照札行事理廣詢博采徵集羣言熟慮深思折衷至當妥擬章程辦法詳候復核咨商嗣奉

憲台札開本月十二日准

度支部真電開十一日欽奉

諭旨度支部奏各省土藥擬請比照洋藥酌量加稅每百觔征銀貳百叁拾兩等語着照所請辦理欽此原奏內稱現裁土藥統稅各局實未據各省議定辦法接收而洋藥進口已經外務部與英使商定稅釐併征加至每百觔叁百伍拾兩土藥亦須同時比例加稅擬定爲每百觔征稅銀貳百叁拾兩自奉

旨日起凡現在未經禁運及本產本銷各地方卽按新章徵稅仍候各省擬定善後辦法由部核定咨明督辦統稅大臣將征稅事宜分別移交辦理等語除咨達外先此電聞飭卽遵照辦理嗣復奉

憲台札開四月十五日准

督辦土藥統稅大臣柯咸電開土稅部局全撤專候貴省派員接辦現又奉

旨加稅亟應依限征收以專責成而清界限貴省何日開辦分局卽於何日撤回已電飭各局遵照特此奉達敬祈示知等因准此合亟札行札到該司卽使遵照迅速妥籌議詳接辦各等因奉此仰見

朝廷鄭重煙禁防杜漏稅之至意莫名欽服查此次部局議亟裁撤自係以各省土藥均既不准出境入境此後遂無土稅之可征抽禁種乃有把握起見惟湘省於禁種一端迭經本司雷厲風行嚴行查拔誠以本省種煙之弊害甚於外來販賣之土

約外來土約以散銷於通衢大市巨室富戶者爲多至本省自種煙苗其患先中於鄉村鎮集食貧力作游手無聊之人以言吸食富者少而貧者多以言禁革城市易而鄉鎮難本司上年蒞任之後故於禁煙一事力求查禁之法務期根株之絕亦本源之地易清而鄉曲貧愚之沈迷煙癖爲可慮也現已時逾季春據各屬密查委員迭次聲稱煙苗均已逐漸減少是本司於禁種一項尙能隨時施以查禁之力此後自當以注重外來土約及限制本省儲存土約爲正本清源最急至要之辦法查湘省外來土約以川土黔土爲大宗川土之入湘者約以吉岡坪里耶爲要道黔土之入湘者約以晃州沅州洪江麻陽鴉拉營托口廣坪靖州綏甯爲要道峰迴嶂繞隨處可通途歧則防不

勝防夾帶則察難遍察又此項土販類非正經商賈奸橫是其
慣技往往結伴至數千人負擔橫行闖越關卡阻禁既苦勇力
單薄拿辦又恐激出事端是湘省入境土藥之難禁止實亦地
勢財力之所囿限至內地儲存土藥之能否限制尤以外來土
藥能否禁絕爲斷現外來土藥既無可遏止而內地儲存土藥
自亦不能爲單獨之制裁此湘省今日之欲阻禁外來土藥及
限制本省儲存土藥之爲難實在情形也惟立法固貴取弊而
因時乃能制宜經 本司再三籌擬竊以爲今日外來土藥已成
強弩之末以現時煙禁而論稽核內銷實重於防杜外運以湘
省情形而論嚴搜出境復易於偵查入境 本司審時度勢博訪
周諮按之禁令揆之芻章爲不禁自絕不惡而嚴之計自以分

查內銷嚴稽出口從重抽稅輔以牌照捐爲切近易行疏密得中之辦法查湘省未設土藥統稅以前凡湘產及外來土藥均係由各釐局代抽藥釐如無釐局之區則專置局卡或則徵稅或則緝私如吉崗坪如慈利如廣坪類爲特設局所專權土葯之地其他如津市洪江常德之審勘要隘佈設分卡尤爲指不勝屈惟特重入口意主征稅緝私則厚藉以養勇堵截則密卡於深山多一卡則多入一欸獲一私則多征一稅至此次稽查外來土藥意在嚴申禁令與從前之注重納稅者迥不相同既非專注重於稅收其何能多設卡以養勇今擬沿其法而略變其例自部局移交本省自辦之日爲始凡省內釐金各局無論爲向征百貨爲單權木茶爲分等鹽麩凡隸本局範圍者均有

稽查徵收土藥之責如無釐局之地則由牌照捐處設局專抽仍與牌照捐不相混合運土者有護照完稅者有稅單至各州縣以及其他牌照捐處均有派人隨時偵察協同各局查禁之職任雖非攬總徵抽之策究屬分途爲理之政此分查內銷之大概辦法也至入口局卡既不注重所恃以稽查內銷者自以釐局及牌照捐兩處爲依賴茲釐局既無限制必在何處完釐之條文假使土藥出省銷售而牌照捐處勢亦無從施其偵查之能力萬一奸商意存取巧是由入境以至出境竟可以不納一稅直達贛鄂雖曰範圍甚周何異堂籬盡撤爲今之計惟有注重第一出口局無論外來及本省土藥之出省者均限於出口第一局以上各局完稅仍鈐用指銷單卽由商人於出口時

呈繳第一局查驗惟第一局職任復查不再收稅如商人土藥至第一局時尙未完納稅款經局查明卽以私論除將土藥以五成充賞以五成解繳公所外並按罰五倍以示懲儆司巡有扶同舞弊徇隱者亦卽盡法懲治庶於寬與自便之中仍有嚴爲扼筭之地此嚴抽出口之大概辦法也查此次奏定土藥新稅章程每土百斤徵統稅庫平銀貳百叁拾兩自係以洋藥入口稅額新議增重內地土藥稅額自亦不能不一律酌加以爲輕重兩無所畸之計竊查洋藥入口各有定地從重增加尙易爲力至土藥則紛散雜聚來去無常又部局旣已裁撤各省統一自見其難卽以此項統稅歸各省自辦而論如湘省之土來自川黔川黔兩省勢不能不隨時徵稅黔土入鄂經湘而達其

稅不徵之自黔則徵之自湘是銷土之在湘者而徵款則在黔
銷土之在鄂者而徵款反在湘無論湘款黔用鄂款湘用於財
政權限既屬不分卽各按收數分省撥解既無如從前部局統
一之機關自難收楚弓楚得之實效在

大部飭令各省自辦之初意豈不以各省土藥既已封禁自無
甲省土藥來入乙省乙省土藥出至丙省之事不知封禁一事
理論之則易施行之則難虛應之則易實措之則難誠以封禁
之要鍵不在禁出境之運土者而在禁境內之種土者種者若
絕運者自無今出土大省於自種之烟苗一時既不能淨絕所
謂禁運出境恐屬空言寡效之文本司循核名實未敢故爲苟
同之論然湘省之一時不能封禁又係以川黔過境之土爲多

窒碍情形已縷陳於前今爲就湘言湘之計擬嗣後本省銷售之土藥均照新章每百斤征抽庫平統稅銀貳百叁拾兩至外來無論何省過境或落地土藥亦均照本省土藥例每百斤納統稅銀貳百叁拾兩以重取不爲虐之義爲隱寓遏來源之方此湘省擬遵照新稅征額抽收之大概辦法也至牌照捐爲對於吸戶之限制與土藥統稅雖非聯貫合一之政而禁令所關實有交互稽較之責擬嗣後凡關於土藥銷運稽查事項均由各統稅局與各牌照捐稽核處隨時商酌施以稽核之力以收聲息溝通互相維持之效此擬以牌照捐與土藥統稅相輔而行之大概辦法也現經本司擬訂接辦部局統稅章程二十五條此項稅務卽隸於財政公所筦轄科管理各局處經收此項

稅款於原有關防之外並各另頒土藥新稅關防一顆於原有局牌以外並各另懸湖南土藥新統稅分局牌名一方以示區別至辦事細則已詳載於擬章之內如蒙

俯准卽乞分別咨明

度支部
稅務處 察核並先乞

憲台批示由本司派員前往洪江統稅局接管移交事項一面由司趕製各種應用印花票據撰擬告示通飭各局處一律遵照辦理是否有當理合將擬定辦法繕具清摺恭呈

憲台俯賜察核批示祇遵再長沙統稅卡已經撤回鄂省現時由輪載運土藥落地時均係由司派員往驗如係照章應補新稅之士並經派員押往銷地取具保結封存各該行棧俟湘省

實行接受自辦後再行按數補稅發銷合併聲明

宣統三年四月

第一次擬訂徵收土藥統稅改歸本省自辦辦法簡章

一此次籌擬稽查土藥辦法係體察湘中情形以嚴稽出口分查內銷按照新章抽稅不禁自絕爲宗旨

一自湘境部局裁撤之日起凡入境出境及在境內土藥均由本省各釐局及無釐局地方之牌照捐稽核處查驗稽徵有釐局地方仍須至釐局納稅

一晃州沅州麻陽鴉拉營廣坪靖州綏甯吉崗坪里耶慈利均爲川黔各土入境扼要之地查各該處向無釐卡除里耶應由該處鹽局委員兼辦外餘如晃州沅州麻陽靖州綏甯慈利應由各該處牌照捐稽核分處兼辦

至吉崗坪爲永綏廳所屬鴉拉營爲鳳凰廳所屬廣坪爲會同縣所屬應各由該廳縣牌照捐稽核分處設局兼事稽徵其稽徵一切事宜仍須與牌照捐劃清界限不得混合開辦之始事端繁重屬於稽查土藥事項應由司另委專員經理以專責成其餘如湘境各屬向係種土之地並一律責成各屬牌照捐稽核分處從嚴偵查至各地方官本有禁種專責此次所訂章程毋庸規入

一入境土藥如係在湘省內地銷售者卽由各商販於各局完稅時自行報明由局隨時粘貼印花填發稅單及指銷單銷土時由各商於銷土地地方將指銷單呈繳各

該處牌照捐稽核分處核明數目塗銷仍按月將底單封繳財政公所所運之土不准沿途酒賣至出境售賣之土藥亦須按照內地售賣稅章在內地各局納稅粘貼印花填給指銷單巡指填湘境出口第一局地方由第一局將原單收回就近交付牌照捐稽核處以便鈎查仍由牌照捐處將此單按月封繳公所備查

一凡本省儲存土藥或外來土藥無論在內地何處銷售及出口何處銷售者總須在內地各局處納稅一道惟出口土藥應先在內地經過之局處將稅款交納清楚不得至出口第一局呈報完納意存取巧至出口第一局亦只任稽查不再收捐如土藥至出口第一局時尙

無印花指銷單者經局查明除將土約以五成充賞該出口第一局員司人等以五成繳歸公所外並加五倍示罰

一此次議令各釐局代抽土約稅款與牌照捐所徵抽者雖屬兩事而寓禁於徵力期煙害淨絕之義則一嗣後各釐局所抽土稅填發商人指銷單後仍須一面將指銷單照驗填明移報各指銷地方之牌照捐稽核處以期互相考察而免疏漏

一此次查緝私販意在清釐來源既由各局處分途清查自與從前設局專事緝私重在收稅辦法不同除各局處原有巡丁派令輪流稽查外不再加募緝勇以節糜

費

一此次分局稽征土葯統稅無論在本省境內何局完納每土葯百斤均照新章納正稅經費庫平銀二百三十兩

一入口第一局現在既不注重而外土輸入內地亦難爲必須在何局完稅之限制將來外土運入勢必散漫無可稽考擬專置一運土護照爲稽考土葯入境之計凡入境土葯均須至第一局領填此項護照護照載明經過何處凡經過局卡均須蓋一經驗戳記如土葯販運至內地時無此項運照者雖未行抵銷售地方經過局卡查出均以私論至銷售或出口時未經完稅之土雖

有運照仍照第五條處罰

一應以冕州沅州洪江各處爲鎮遠土藥入口第一局麻陽鴉拉營托口爲銅仁土藥入口第一局廣坪靖州綏甯爲黎平土藥入口第一局吉崗坪里耶爲四川酉陽州入口第一局永州雙江爲兩粵土藥入口第一局

一應以岳州安鄉醴陵爲出口第一局

一自部局裁撤之日起凡以前已完統稅在湖南省內存儲

之土均限五日內就近各赴該局處

有局地方則赴局無局地方則赴牌照捐處

報明呈驗繳銷執照由本省各局處核對無訛卽換給印花及指銷單只取公費公費按原來稅則十分之二扣收以出示後五日爲率過五日後如本省存儲之土

有隱未呈報者一經查出均照新稅補納以防冒混又此種土藥並限三個月內一律銷完逾三月後亦照此次新章納稅以示限制至此項印花及指銷單均由財政公所特別擬製與尋常通用者不同貼用之法同第四條

一各屬境內多有肩挑擔負土販於各鄉墟鎮剪土零售去來無定最爲煙禁一大弊害應責成各局及各屬牌照捐稽核分處隨時多派報口偵查如售賣時無印花及指銷單或挑運時無運照或無土膏牌照執據者除將私土全數充賞外並將此項販私賣私之人送交地方官盡法懲治

一嗣後凡屬於土藥事項均歸財政公所筭權科雜稅股
管理

一此次頒發印花指銷單稅單運土護照均由財政公所
刊製加用本司印信發付各局處領用

一各局處經徵稅款按月彙同釐款繳解財政公所會計
科其稅單存根亦隨同釐收經驗各票封解財政公所
筭權科查核各稽核分處有經徵土稅者亦照此辦理

一除冕州沅州麻陽鴉拉營廣坪靖州綏甯吉崗坪慈利
九處應另派人前往會同各該處牌照捐稽核處分別
任事外其餘各局所用之人均照舊不增加

一各局經徵此項稅款不列比較

一 權量土藥觔兩一律用庫平十六兩正秤統由財政公所製備較準分途發用以期符合

一 無論何土經過何局均照章核實收稅不准通融減折如有減折攬收情事一經查覺即將局處各員分別從嚴詳請叅辦土藥全數充公以示懲儆

一 各局填寫指銷單稅單應將土藥件數箱數元數斤兩印花號數詳細填明以杜弊混

一 土稅完後即由各局將印花隨時粘貼土上如印花先未粘貼於查驗時商人始行呈出或粘貼不牢或係揭起另貼破碎不全或有印花而無指銷單或有指銷單而無印花除將土藥分別扣留罰辦外並查係何局處

所發卽稟明將委員撤究

一土膏雖有牌照捐亦有以土熬製成膏載運入境或以私土偷製成膏載運出境希圖漏稅者應參照

部局定章辦理凡商旅自備吸食者攜帶煙膏不得過五兩煙灰不得過十兩逾此應卽報稅每熟膏一斤照土藥一斤完稅每烟灰貳斤照土藥一斤完稅一律粘貼印花發給指銷單再往銷售地方繳完牌照捐款隱匿不報查出全數充公

一部定土藥統稅新關抽收章程凡土藥由上游經過者卽由上游第一關抽收下游上運者卽由下游第一關抽收均由稅務司代徵其正稅經費由各關監督報解

仍視收數多寡由統稅局酌給津貼於經費項下開支
各省新關由各分局派員查驗仿照宜昌關辦理等因
查湖南新關於土藥稅向無徵數惟間有川土在宜昌
報關由輪運湘銷售者湘省既非上下游俟一關凡在
此次新稅則宣示後之土藥應如何稽徵候上下第一
關卡省分擬定通行辦法後再行酌辦至新稅則未宣
示以前之土藥現已完舊稅並已起運在途者應由省
河輪船局查驗遵照

部示並部定每百斤二百三十兩新稅章程補令繳納
正稅及經費銀一百十五兩換給指銷單運往銷地發
售

一此次加增新稅應照部示除已在本省落地之土藥應免補新稅外餘如已完舊稅現尙未經到湘之土藥均一律由各局按照新稅每百斤納庫平銀貳百叁拾兩數目補加正稅及經費銀一百十五兩不稍通融

湘藩案牘鈔存

詳文三

呈復土藥統稅改歸自辦辦法以分查內銷注重出口從

重抽稅土在湘印稅在湘一案詳文

呈明湘省遵照鄂議土藥辦法窒礙情形詳文

議訂補徵土藥新稅辦法詳文

附簡章

第二次核議土藥禁運本省自產土藥出境並酌定過境

辦法詳文

附簡章

會議兩湖賑糶米捐暨衡永寶配銷溢銷鹽釐實非因路
抽捐不應停收詳文

遵飭將賑糶米捐及衡永寶配銷鹽課兩款開辦撥收案

據並近三年徵收實數開摺呈核詳文 附各案

請將米捐配銷鹽課兩款所填股票概歸財政公所管理

詳文

覆查各署局應解撫院未經列抵幕職廳經費各款詳文
議覆江南缺米籌款購糧平糶現值湘省阻禁礙難照准

詳文

擬請飭令石首縣另選正紳分派該縣產米地方察實確
係北米始發憑單詳文

改訂釐金比較詳文 附清摺

會請核咨高等實業學堂暫借銅元局劃分界限情形詳

文

實業學堂借銅元

理詳文

會擬變通徵收牌

請將革職留任調

奏參革職永不

會議擬將長沙日

請飭抄發各項公

委員查勘各屬煙

尤懲處詳文

委查署永綏廳同

縣謝啓發記大

呈文一

申報札委各員馳赴各州廳縣查禁種煙呈文

申報據常德府譚承元等冬電稟查封劉隆慶財產呈文
申報札委各員前赴各州縣復查烟苗呈文


申報土膏牌照捐報私查罰及店舖漏報捐款條規呈文

附條規

申報撤銷經收公所呈文

湘藩案牘鈔存第三冊勘誤表

頁數	行數	字數	誤字	改正
十	十二	九	健	鍵
十九	十七	十四	旣	暨
二十	三	三 <small>得字下脫落不字</small>	不	
二十三	二十二	六	路	省
三十二	十七	十	欸	股
五十	十五	五	千	十
七十四	十二	一 <small>參字下多一外字</small>		
七十七	八	二十	活	話
八十六	五	十	則	罰



湘藩案牘鈔存

詳文三

呈復土藥統稅改歸自辦辦法以分查內銷注重出口從

重抽稅土在湘卽稅在湘一案詳文

爲併案詳復事案奉

憲台札開准

度支部沁電開土藥稅務已經本部奏交各省辦理除已完部局統稅之土應照本部翰電分別辦理外嗣後甲省收稅之土或補稅之土運銷乙省應如何彼此互相稽察土商應完之稅各省如何征收撥解其照章應提經費拾五兩各省如何分撥支用卽由各省自行會商報部彙核等因到本撫院准此合亟

札行札到該司即便妥速議詳核辦勿延又奉

憲台札開准

江西撫院馮豔電開度支部沁電土藥稅務各省會商等因查
土藥部局裁撤既歸各省自辦自以就銷場徵稅爲正當辦法
若概由起運之處征收則除向來著名產土數省外他省均無
稅可收自應由起運之處發給運照標明指銷省分俟土藥到
指銷之省入境第一局卡一律收足稅銀貳百叁拾兩將照繳
回起運省分互相稽考其經由鄰省出境均不另抽過境稅以
示限制如此則本省所銷之土卽由某省收稅似尙公允敬以
奉商祈酌核見教等因到本撫院准此合亟札行札到該司卽
便妥速核議詳復勿遲同日奉

憲台批據本司詳復土藥統稅改歸湘省自辦一案奉批據詳已悉察閱所擬章程於稽查徵收之法俱甚周密現在洪江土藥稅局已終歲無收是並無大宗入境土藥可知茲擬不設專局而歸各釐局稽征辦法最爲簡便惟度支部注意在稅款之如何分撥迭准

江西撫院來電亦以此爲言已分別行司核議來章於入口出口之土均歸本省收稅而於他省已收統稅入境之土與本省已收統稅運銷他省之土彼此如何交割尙未議及此層若不能決誠恐紛紜轉囑窒礙滋多仰再悉心籌議詳候咨商

度支部暨鄂贛等省妥酌定議此繳各等因奉此仰見

憲台籌畫周詳慎重稅收之至意竊維禁煙要政莫先於禁種

莫難於禁運於萬難遽禁之中籌一不禁自禁之策勢非從重稽徵終不足遏來源而收煙禁之實效在

大部飭令各省自辦之初意豈不以各省土葯既已封禁自無甲省土葯來入乙省乙省土葯出至丙省之事不知封禁一事理論易而施行難今產土大省於自種之烟苗既未淨絕自難徵禁運出境之實而湘省封禁亦格於川黔過境之土一時不能實行勢不得不就範圍之所及以自相爲封自相爲禁爲湘省厲行烟禁之辦法今欲策自相爲封爲禁之效驗自不能不出於重徵之一途誠以重徵以爲封不封之封也重徵以爲禁不禁之禁也前詳就湘論湘縷陳辦法無論土之來去何處銷售何處總須按照新章在內地納稅一道者亦以湘省之封禁

難於他省而急於他
大部沁電以新徵十
憂乎其難者以言
湘省實爲過境之要
弊防不勝防本司前
外來土稅亦屬虛有
一省徵欸又一省徵
分而糾合牽混之弊
諉勢不至以分撥爲
爲宗旨雖與

部章徵有出入而郵

部情正復相同至贛省議就銷場徵稅辦法固屬正當實亦不無弊竇例如黔省起運之士指銷鄂省其經湘之路峯迴嶂繞隨處可通點者中途酒賣強者闖越關卡阻禁則無此勇力押運又恐其賄縱雖有運照直可以不完一稅不入指銷之省而攫厚利以去以正當公允之法適開奸商影射趨避之門種種情形實多窒礙木司於禁種一項雖能隨時施以查禁之力漸圖根株之絕惟於社防外來之士一再以思苦無良策茲值新定稅額一律增重之時惟有請就此次改歸自辦之始以分查內銷注重出口從重抽稅爲不禁自禁不封自封扼要之辦法土在湘省卽稅在湘省湘境所徵之稅卽爲湘省應得之款重稅限於外厲禁寓於中又對於他省已收統稅入境之士暨本

省已收新稅運銷他省之士既無彼此交割之煩自收寓禁於徵之效本司上維

部章下審情勢爲因地制宜正本清源之策計似無逾於此者如蒙

核准卽乞查照前詳先行

批示遵辦是否有當理合併案詳復

憲台俯賜察核分咨示遵宣統三年五月

呈明湘省遵照鄂議土藥辦法窒礙情形詳文

爲詳覆事竊奉

憲台札開宣統三年五月初四日准

湖廣督院瑞支電開土藥統稅部局裁撤改歸各省辦理准度

支部電令各省會商接收辦法鄙意擬出境之土由起運落地
省分各半分收稅項經過之省稽而不徵由司刊給聯票印花
以備經過及所到地方查驗其有在本省已完全稅或起運處
未曾納稅而落地自完全稅者彼此存記分別劃撥似此互爲
挹注較覺平允昨電商度支部頃准覆電囑由敝處提議會商
各省報部定議用特專電奉商尊意如何迅乞賜示以便另擬
詳章呈政等因准此除電復支電敬悉土藥統稅由起運落地
省分各半分收最爲平允卽請主持妥定詳章咨部定議以資
遵守外合就札行札到該司卽便遵照等因奉此仰見

憲台慎重煙禁規畫公允之至意欽服莫名竊本司細繹電情
熟察情勢揆以湘省煙禁之關繫實有不能不爲

憲台陳者查川黔產土省分均以成封成包整裝出境但收起
運得半之稅其款已屬甚鉅湘省本非著名產土之地出境本
不甚多嗣經奉禁種之令本司雷厲風行嚴行查拔據迭次密
查委員聲稱各屬煙苗均已逐漸減少自無大幫土販出至他
省之事既無出省之土自無起運之土若特懸一起運半稅之
令恐反又誘人民以私種之心此起運半稅屬於湘省爲難之
實在情形也至於落地之土視銷場爲衰旺銷場之衰旺專視
吸戶之多寡以爲衡湘省自煙禁嚴行以來富室大家之吸食
者不必謀諸土膏商店往往囤積邃室取用不窮其關於銷場
者大約以零星小戶貧而力作者爲較多前經本司特設省城
牌照捐總稽核處又於各屬設稽核分處開辦數月尙有成效

迭查呈繳牌照銷售數目亦能依限遞減吸者既減則他省之指銷湘省者能有幾何若恃此落地半稅自爲挹注竊恐以歲入之資爲徵收之經費而不足以本省應完全稅之土混爲半稅之外土而有餘既有礙於稅收復重妨於烟禁此落地半稅屬於湘省爲難之實在情形也起運半稅之關於烟禁也如彼落地半稅之妨於煙禁也如此勢非注重於過境之土不可惟原電所載經過之省稽而不征在湘省尤有難言者湘省爲川黔起運贛鄂落地之中樞卽爲土藥過境之要道其間峯巒繚繞湖港紛歧私販夾帶防不勝防設若銷鄂銷贛之土經湘省之中途而繞越以去緝之不可罰之不能在湘省既全無徵收之權在鄂贛亦大失正當之稅既啓商民以瞞越之漸適開烟

禁以取巧之途其妨礙尤爲可慮總之稽徵並行則居中扼要固有裨於湘省之煙禁兼可以杜他省之巧偷此兩得之事也有稽無徵則運鄂運贛應完之稅不惟湘無所取卽鄂贛亦各失所征勢不至於奸商熾僥倖之心煙禁不極於弛放而不止此兩失之事也本司前詳所陳土在湘省卽稅在湘省以分查內銷注重出口從重抽稅爲宗旨者固爲就湘言湘萬不得已之計亦係爲鄭重煙禁起見茲奉前因理合將湘省遵照鄂議辦法窒礙情形續行具文詳請

憲台俯賜察核批示祇遵

宣統三年五月

議訂補徵土藥新稅辦法詳文附前章

爲詳請事案奉

憲台札開四月十六日准

度支部電開文電悉查洋藥一節已經外部電復不應就地補稅其土藥辦法除已經落地存積行棧舖戶之土毋庸補稅以免騷擾外凡新章前已完稅而現運入境者或改章時起運在途而現運入境者或已落地而現復運出境者均應照新章補足加稅以歸劃一而杜弊混等因准此合亟札行札到該司即便遵照辦理等因奉此查湘省

部局現已停撤而本省自辦土藥統稅辦法前經本司具詳亦尙未定現在照章應行補稅土藥去來絡繹若不由司先行擬定徵收辦法隨時補抽不惟無以順商情且恐浸久成一漏卮茲擬請由各釐局及無釐局地方之各稽核處分別將此項應

補土藥稅款按照原來稅款切實補抽換給稅單指銷單加貼印花以原有之局處經徵應增之稅款於費用不加多於稅務爲有裨仍與各釐局同隸於財政公所筦權科管理謹擬暫行補徵土稅簡章七條如蒙

俯准卽由司撰刊告示及各項單據印花通飭各釐局及牌照捐稽核處趕緊遵辦是否有當伏乞

憲台俯賜察核批示祇遵再土藥統稅改歸本省自辦案業經

本司遵批詳復應仍候示遵辦合併聲明

宣統三年五月

擬訂補徵土藥新稅簡章

計開

一凡現運入境之土如在改章前實係已經完稅或改章

時業已起運在途或已落地而現復運出境之土均一律由各局處按照新稅每百斤納庫平銀二百三十兩章程除已完舊稅一百十五兩外應加納正稅及經費銀一百十五兩以補足二百三十兩之數

一凡前項應補新稅之土由商人就近各赴該局處

有蓋局地方則

赴赴局無局地方則
赴牌照捐分處

自行報明呈驗原領執照或箱單所填

劬兩元件核與原貼印花號數相符自係已完舊稅即由該局處將執照或箱單收回一面按照照內單內所列兩數件數飭令繳納正稅經費每百斤庫平銀一百十五兩一面換給印花填發稅單及指銷單聽該商運往銷地發售不再補收

一該商如係指銷內地之土由該商於銷土地地方將指銷單呈繳各該處牌照捐稽核分處核明塗銷如銷土時無此項新稅印花及指銷單者經局處查明除將原土全數充公充賞外並加五倍示罰

一此項應補新稅係指改章以前已完舊稅者而言如查有前項土藥印花執照號數不符及有印花而無執照者均以私論應卽照章全數充公加罰不准援補稅之例希圖規避

一印花稅單指銷單均蓋用新稅關防如查獲假造應照偽造關防例治罪

一此次補收新稅除正稅及經費庫平銀一百十五兩如

數繳納外並無絲毫別項名目如有故意留難藉端需索規費情事准該商人指名稟由各該局處從嚴懲辦一補完新稅後卽由各局處將印花隨時粘貼土上如印花先未粘貼於查驗時該商始行呈出或粘貼不牢或係揭起另貼或破碎不全或有印花而無指銷單或有指銷單而無印花除將土葯分別扣留罰辦外並查係何局處所發卽稟明將委員撤究

第二次核議土藥禁運本省自產土藥出境並酌定過境

辦法詳文 附簡章

爲詳請事本月十八日案奉

憲台札開本月十六日准

湖廣督院瑞咨開查前准

度支部咨具奏裁撤土藥統稅各局請將善後事宜責成各省督撫辦理一摺奉

旨依議欽此咨行欽遵查照辦理等因准經欽遵諭旨查照原奏將裁撤部局善後事宜辦法恭摺

奏報並分咨查照在案初擬凡入鄂境之土無論是否落地及由此經過運往他省一律由鄂收稅嗣復詳細籌思恐事實上不易辦到乃電商

度支部請將土藥稅則改爲由起運及落地省分各半分收經過之省稽而不征旋准復電令由鄂省提議會商各省報部定議又經電商

各省督撫會商去後茲准各省復電多數贊成查統收部局業已停征自應取決多數從速定議接辦以免稅務日久虛懸行據湖北布政使余誠格會同禁煙公所坐辦湖北補用道沈秉權擬具接辦部局征收土藥統稅暫行章程及票花式樣一併咨呈並據聲明嗣後出境土藥如有已在本省報完全稅或起運處未曾納稅而落地始完全稅者應行彼此存記以備劃撥而資挹注至照章應提經費銀十五兩亦請照本省應收稅銀分撥支用冀免偏枯至鄂省原收土行捐現已免收辦理牌照經費益形竭蹶擬請將營業憑照費照原章加兩倍徵收藉資補助等情前來本督院覆加查核似尙妥協除將征收土藥統稅暫行章程咨請

度支部核定轉咨示覆以便接辦並分咨查照外所有章程票
花式樣咨請查照施行等因並章程一紙票花式樣各一紙到
本撫院准此合亟札行札到該司即便遵照將發去章程票花
式樣查收叅酌仿照辦理具報等因奉此仰見

憲台蓋畫持平慎重稅款之至意本司亟應恪遵鄂章查照辦
理惟湘省於禁種土藥現既畧具成效似於禁運一項有所著
手他省過境之土既難遽禁其往還則本省自產之土不得不
先禁其外運以清本省自種之源細繹

外務部與英使續訂條件於未滿七年期內無論何省栽種業
已斷絕並經禁止他省土藥入境則洋藥亦禁止運入該省似
此隨時提前辦理在我既有自由之權等因是禁運一端就本

省言固爲禁種之要健卽就各省而論尤爲杜絕輸入之根基
現擬由本司嚴申禁令自統稅自辦以後凡湘省自產土藥均
一律不准出省銷售一面按照原詳分查內銷辦法先將本省
未落行棧或囤積在家之土責成各屬釐局及各屬牌照捐稽
核分處澈底清查一次藉杜私售私吸之弊本司盡其在我爲
正本清源起見不敢稍行顧惜致於煙禁有礙此則本司汲汲
不遑再三籌思不能不爲此提前辦理之舉而於本省自產土
藥起運一項按照鄂章稍事變通者也又過境之土稽而不徵
本司自應嚴飭兼辦新稅之各屬局處實力稽查斷不敢稍存
畛域惟湘省當黔土過境孔道若專重入湘第一口稽查押送
非獨不勝其煩而奸橫土販往往聚集多人逞其闖越關卡之

慣技查驗不服堵截不能勢非多設局卡多派弁丁不足以資
鎮攝前洪江部局開辦統稅佈卡養勇經費甚鉅值此財力艱
絀川黔封禁土稅已成努末之時更屬無從措手惟有不注重
入口第一局則土販入口以後分途運售其勢必至析總爲分
迨散至各局卡人數漸少稽查較易施行仍以出口第一局爲
扼要堵截之所兼事查驗其有外來無運照稅單之土查出均
照本省自產之土完納全稅不准出省以杜私販取巧之倖心
其領有運照之土查明元件斤兩貨票相符照章查驗放行如
有貨票不符揭動印花等弊卽爲中途酒銷之確証全數扣留
充罰以儆不至指銷省分卽行灑賣之弊似此辦理雖未注重
入口第一卡而稽徵兼重仍握扼要之權雖不押運而酒銷卽

行充罰仍無不至指銷省分之慮核與鄂章過境土藥辦法用意無稍出入至洪江部局之設有保商營者誠以入湘之土川黔爲最洪江一局關係重要現川黔既經封禁來源有限其地已非衝繁與從前情形不同現經

憲台將該營調赴他處應請毋庸續行募緝以節糜費茲經本司悉心籌酌擬定簡章二十二條是否有當理合隨文詳請

憲台俯賜察核批示祇遵

宣統三年五月

第二次擬訂徵收土藥統稅改歸本省自辦辦法簡章

一部局既撤嗣後凡屬於本省土藥稽徵事項以財政公所筭權科爲稽徵總機關凡徵收稅額遵照部定新章

實行

一此次籌擬土藥善後辦法係體察湘中情形凡本省各屬自產土藥只准在內地各屬撥運銷售自此章程發示之日爲始一律不准出境

一自湘境部局裁撤之日起凡本省自產土藥應由各產土地方之各釐局及無釐局地方之牌照捐稽核處查驗稽徵外來落地土藥入口時應請領運照至內地局卡完納半稅一道惟不得至落地局處始行報納至過境土藥經過各釐局及無釐局之稽核處均應呈驗起運省分執照如無執照在內地查出者卽照本省自產土藥稅章完稅仍不准出境如在出口第一局查出時卽全數充公並加五倍示罰

一在本省自產之土藥應就近將土藥數目呈報該縣釐局如無釐局則呈報牌照捐處核明土數卽照新章納稅由各局隨時粘貼印花填給指銷單卽本地自產之土銷售本地亦須填付指銷單一紙以免撥運他處至商人持領之指銷單應由銷土地方之牌照捐處收回比對移報單仍一面繳銷存查

一除土藥落地半稅票及以上作抵押憑單應照鄂式辦理外湘省既將自產土藥全行禁運出境所有關於起運各票據自應毋庸規入惟湘省對於自產土藥應自行製用統稅單指銷單兩種對於過境之土仍用鄂定通行票據以歸一律惟統稅單用三聯指銷單用四聯

屬於統稅者一給商人一繳財政公所一留本局處存
查屬於指銷者一給商人一移報指銷地方之稽核處
一繳財政公所一留本局存查對於外來落地土藥除
統稅指銷單應與本省自產土藥一律填給外另加一
運土藥護照亦用四聯一給商人一移落地地方之局
處一繳財政公所一留本局存查此項單照以及貼土
印花均由財政公所筭權科擬製頒用

一冕州沅州麻陽鴉拉營廣坪靖州綏甯吉崗坪里耶慈
利均爲川黔各土入境扼要之地查各該處向無釐卡
除里耶應由該處鹽局委員兼辦外餘如冕州沅州麻
陽靖州綏甯慈利應由各該處牌照捐稽核分處兼辦

至吉崗坪爲永綏廳所屬鴉拉營爲鳳凰廳所屬廣坪爲會同縣所屬應由各該廳縣牌照捐稽核分處設局兼事稽徵其稽徵一切事宜仍須與牌照捐劃清界限不得混合開辦之始事端繁重屬於稽查土藥事項應由司另委專員經理以專責成

一禁種爲地方官專責此次湘省籌辦土藥統稅善後事項係專注本省自產之土以爲嚴禁私種之計嗣後凡各釐局及各牌照捐處均有協同查禁之責期昭周密一凡本省自產土藥無論在內地何處銷售總須在內地各局處納統稅一道每百斤完納正稅及經費庫平銀二百三十兩至外來落地銷售土藥仍照

督憲酌訂通行章程按照原來斤兩重數無論在內地
何局處呈報納稅查驗票花相符卽予繳納半稅不稍
通融惟不准延至落地銷售局處始行繳納如至落地
銷售時尙未領貼票花者卽照第二條過境土藥出口
時示罰

一此次議令各釐局代抽本省自產土藥及外來落地土
藥稅款與牌照捐所徵抽者雖屬兩事而寓禁於征力
期煙害淨絕之義則一嗣後各釐局及無釐局地方之
稽核處所抽土稅填發商人指銷單後仍須一面將指
銷單照驗填明移報各指銷地方之牌照捐稽核處以
期互相考察而免疎漏

一此次查緝私販意在清釐來源既由各局處分途清查自與從前設局專事緝私重在收稅辦法不同除各局處原有巡丁派令輪流稽查外不再加募緝勇以節糜費

一入口第一局現在既不注重而外土輸入內地銷售者亦難爲必須在何局完稅之限制將來外土運入勢必散漫無可稽考故於原有押送傳單外加一運土護照爲稽考土藥在內地行銷者之証惟此次土葯運照均由入境首局核填照內載明經過何處凡經過局卡均須蓋一經驗戳記倘外來土葯運經內地各局卡時如無此項運照者雖有起運省分過境票據仍恐不免有

改報落地或分撥零售之弊一經經過局卡查出均以私論至外來落地銷售之土葯亦須於入口局領填此項運照無運照者查出照過境無照章程辦理卽有運照如至落地銷售時尙未完稅查出以五成充賞查出之局以五成繳解公所並加五倍示罰

一經過湘境行銷他省之土其未起運省分報稅者經湘省各局處查出卽照本省自產土藥稅章完稅不准出境其已在起運省分報稅者湘省既不注重入境首站局處其在湘省境內酒銷之弊自應嚴防責成出境第一局查明土藥件數箱數元數斤兩印花號數相符並無折損印花貨票不符情弊方准出境倘有以上各

弊卽係在湘西銷之確證卽行全數提充仍加五倍罰
辦以杜弊混

一應以晃州沅州洪江各處爲鎮遠土藥入口首局麻陽
鴉拉營托口爲銅仁土藥入口首局廣坪靖州綏甯爲
黎平土藥入口首局吉崗坪里耶爲四川酉陽州入口
首局永州雙江爲兩粵土藥入口首局以岳州安鄉醴
陵平江瀏陽攸縣郴州宜章爲出口稽禁首局

一自部局裁撤之日起凡以前已完統稅於部定新章前
已在湘省內存儲之土均限五日內就近各赴該局處

有局地方則赴局無局
地方則赴牌照捐處報明呈驗繳銷執照由本省各局處

核對無訛卽換給印花及指銷單只取公費公費按原

來稅則十分之一扣收以出示後五日爲率過五日後如本省存儲之土隱未呈報者一經查出均照新稅補納以杜冒混又此種土藥並限三個月內一律鏟完逾三月後亦照此次新章納稅以示限制至此項印花及指銷單均由財政公所特別擬製與尋常通用者顏色不同貼用之法同第四條

一各屬境內多有肩挑擔負土販於各鄉墟鎮剪土零售去來無定最爲禁煙一大弊害應責成各局及各屬牌照捐稽核分處隨時多派報口偵查於售賣時無印花及指銷單或挑運時無運照者除將此項私土全數充賞外並將販私賣私之人送交地方官盡法懲治

一各局處經徵稅款按月彙同釐款繳解財政公所會計科其稅單存根亦隨同釐收經驗各票封解財政公所
筭權科查核各稽核分處有經徵土稅者亦照此辦理
惟各局經徵此項稅款不列比較

一除晃州沅州麻陽鴉拉營廣坪靖州綏甯吉崗坪慈利九處應另派人前往會同各該處牌照捐稽核處分別
任事外其餘各局所用之人均照舊不增加

一權量土葯斤兩一律用庫平十六兩正秤由財政公所製備較準分途發用以期符合

一無論何土經過何局均照章核實收稅不准通融減折
如有減折攬收情事一經查覺即將局處各員分別從

嚴詳請察辦土約全數充公以示懲儆

一土約完稅後卽由各局將土約件數箱數元數斤兩印花號數分別詳細填註票花之上以杜弊混並將印花隨時粘貼土上如印花先未粘貼於查驗時商人始行呈出或粘貼不牢或係揭起另貼破碎不全或有印花而無指銷單或有指銷單而無印花除將土約分別扣留罰辦外並查係何局處所發卽稟明將委員撤究一熟膏煙灰一概不許入境如試辦未久遠來客商或有誤犯者姑准暫照應完之捐交納貼花給票以杜弊混如有隱匿不報或積慣販私者查出照私土例充公罰

辦

一此次加增新稅應照部示除已經落地存積行棧舖戶
之土應免補新稅外凡新章前已完稅而現運出境者
或改章時起運在途而現運入境者或已落地而現復
運出境者均一律由各局按照新稅每百斤納庫平銀
二百三十兩數目補加正稅及經費銀一百十五兩不

稍通融

督院批據詳已悉查核簡章所擬各條大致尙妥惟第十四條
內載凡以前已完統稅於部定新章前已在湘省內存儲之士
均令換給印花及指銷單按原來稅則收取十分之一公費爲
數雖屬無多究與現定新章不准額外多收分釐之宗旨相背
此項公費應卽停收又此種土藥並限三箇月內一律銷完逾

三月後仍照新章納稅用意係在限制速銷起見然亦不無涉於苛擾此條務宜詳加斟酌妥爲刪改復候核奪餘照所擬辦理仰卽遵照仍候

撫院批示繳摺存

撫院批所擬簡章甚屬妥洽仰卽移行一體遵照仍候

督院批示繳摺存

會議兩湖賑糶米捐暨衡永寶配銷溢銷鹽釐實非因路
抽捐不應停收詳文

爲會議詳請奏咨事本年五月初七日奉

憲台札開五月初三日內閣奉

上諭署理大理院少卿王世祺等奏湘路加抽各股請一律停

止一摺前因鐵路幹路收歸國有曾經降旨停收川湘兩省租
股并飭將此外另立名目捐作修路之款查明請旨辦理誠以
閭閻困苦日甚一日鐵路既歸官辦凡因辦路累民之舉應卽
悉數蠲除俾得稍輕擔負茲據湖南京官聯名奏稱該省路股
除田租外尙有米捐鹽捐房捐各名目似此層層剝削不惟取
之富戶且至擾及貧民倘不一律停收仍不足以示體恤詳閱
該員等所奏頗能仰體朝廷德意俯察民生疾苦著卽將湖南
所有因路抽收米捐鹽捐房捐各股與前項租股概行停止其
已收之款仍著郵傳部督辦鐵路大臣湖南巡撫恪遵前旨一
併詳細查明妥擬辦法奏聞不使有絲毫虧損并著該撫刊刻
謄黃再行曉諭毋任隱匿遲延以廣仁施而紓民力欽此欽遵

到院合亟恭錄札飭札到該司即便遵照刻刻謄黃通頒各屬
敬謹張貼一體欽遵此札等因奉此仰見

朝廷於注重路政之中深寓體恤民艱之意莫名欽服查湘省
因路抽收各款如租股房捐鐵路鹽斤口捐三項自應遵
旨一律停收以期實惠及民惟湘省路款除集股抽捐以外尙
有公家撥濟之款如兩湖賑糶米捐暨衡永寶三岸配銷溢銷
鹽釐兩款謹將撥助緣由撮舉大要爲我

憲台觀縷陳之溯查兩湖賑糶米捐係光緒二十八年由
前撫憲俞會同

前督憲張奏請開辦每米一石抽錢四百文穀則減半所收錢
文分半備作鄂湘兩省賑糶之用至光緒三十一年經湘士紳

呈請補助路款奉

前撫憲端飭將賑糶錢文自是年五月起撥濟鐵路應用并據湘紳呈請將來全路告成作爲借款分次攤還各等語是此項捐款係光緒二十八年開辦至三十一年始行撥濟路用乃屬一時權宜之計并非永久籌助之方與專爲修路而議加抽者要自不同此開辦兩湖賑糶米捐既撥濟路用之大概情形也又查衡永寶三岸配銷溢銷鹽釐於光緒三十三年經

度支部核定以衡永寶本係廢岸現正極力推廣應卽以一萬三千四百十五引爲定額其自三十二年起再能銷引增多除一萬三千四百十五引歸入通省銷數併算其所餘增銷之引卽盡數撥歸該岸應用以期拓銷而資兼顧等因是以此項配

銷溢銷鹽釐在

大部定案時指明撥歸該岸應用并非撥充路款時以湘路款
絀不得挹彼注此以期路工早觀厥成本年

督辦鹽政大臣飭將此項撥款查照歷年撥數酌中定以成數
爲補助鐵路經費餘皆撥充湘省行政經費亦以湘省行政經
費奇絀故代爲此還諸固有之計畫亦確徵此款之爲暫時撥
借路用毫無疑義此衡永寶三岸配銷溢銷鹽釐暫時撥歸路
用之大概情形也竊思米捐之設實因湘省出產以穀米爲大
宗豐年尙覺有餘歉歲頓形不足欲於流通之中稍示限制之
意故不得不增加捐款以期寓禁於徵此爲保全民食慎重荒
政起見并非專爲籌款而設且事在湘路開辦以前其非因路

抽捐尤彰明較著應請查照原案將此項捐款專備鄂湘兩省賑糶之用以符名實而備緩急至衡永寶配銷溢銷鹽款係屬額定之課釐新釐與鐵路鹽斤口捐一項迥不相若該三府引岸現經

督辦鹽政大臣奏准將永州八屬暨衡州之耒陽安仁常甯寶慶之武岡城步新甯等州縣劃歸粵引今昔情形又自不同但此項課釐係屬正額無論十四州縣劃歸粵引以後准鹽銷數盈縮如何凡屬向係衡永寶三岸溢銷鹽斤仍應按引扣收以重課釐現值改章伊始引岸既有區別辦法不無變通究應如何規定之處自應因時制宜另案詳辦除將湘路抽收租股房捐鐵路鹽斤口捐一律遵

旨停收外所有兩湖賑糶米捐暨衡永寶配銷溢銷鹽釐實非
因路抽捐不在

諭旨停收之列各緣由理合具文詳請

憲台俯賜察核具

奏并咨

度支部 郵傳部查照示遵 宣統三年五月

遵飭將賑糶米捐及衡永寶配銷鹽課兩款開辦撥收案

據並近三年征收實數開摺呈核詳文附各案

爲遵飭錄案詳咨事案奉

憲台札開照得兩湖賑糶米捐及衡永寶配銷溢額鹽課均非
因路抽收之款經本撫院電部商辦咨准

度支部銜電開真電悉所有賑糶米捐及衡永寶配銷增銷鹽課開辦撥收各項案據並近三年徵收實數迅卽鈔錄送部以憑酌核具奏等因到本撫院准此除分行外合亟鈔稿札行札到該司卽便遵照辦理迅速錄案詳咨勿延此札等因計抄電咨稿一紙奉此查米捐一項係光緒二十八年由

前撫憲俞會同

前督憲張奏請開辦以徵爲禁每米一石抽錢四百文穀則減半所收錢文分半備作鄂湘兩省賑糶之用至光緒三十一年經湘省士紳呈請補助路款奉

前撫憲端飭將賑糶錢文自是年五月起撥濟鐵路應用是此項米捐之設本在湘路開辦以前其非因路抽捐固彰明較著

至衡永寶配銷釐課係光緒三十三年奉

度支部核定衡永寶本係廢岸現正極力推廣應卽以一萬三千四百十五引爲定額其所餘增銷之引卽儘數撥歸該岸應用以期拓銷而資兼顧是此項配銷增銷鹽課在

大部定案時指明撥歸該岸應用並非撥充路款時以湘路款細不得不挹彼注此以期路工早觀厥成該款本屬課釐非各項加價所可比擬且係暫時撥助與鹽餉鐵路口捐一欸專爲脩路加抽者情有不同溯查湘省自米鹽兩欸撥助路工以來歷年積虧至二百餘萬現在預算不敷每年至一百五十餘萬以前積欠旣恃收還前欸以償負以後不敷亦藉停止撥助以彌補該兩欸均非因路加抽不在

諭旨停收之列所有前列撥借款項自應及時撥還作爲國家行政經費之用既與原案相符而於湘省集虧亦大有裨補現將米鹽兩款開辦撥收案據並近三年徵收實數分別開列復於各案加具按語以期明晰而資參考所有遵飭詳辦緣由理合具文詳請

憲台俯賜察核并咨明

度支部查照示遵

宣統三年五月

計鈔電稿

北京度支部郵傳部督辦川粵漢鐵路大臣端武昌瑞督帥鈞電辰密鐵路收歸國有兩奉

諭旨刊刻謄黃均已敬謹刊印頒行全省張貼曉諭在案恭繹

諭旨所有國路抽收米捐鹽捐房捐各股與前項租股概行停止之意原指因路抽收之各捐股而言查兩湖賑糶米捐係光緒二十八年由張文襄在兩湖督任會同前湖撫俞奏請開辦係因米穀出口太多以徵爲禁所收捐項專備兩省賑糶之用此舉尙在粵漢鐵路未向美國贖回以前嗣因贖路所借英款須按年籌還本息始聲明以賑糶米捐作抵鄂既定案湘紳援以爲請始由午帥在湘撫任內批准撥濟路用是米捐並非因路抽收之款也又查衡永寶配銷釐課於光緒三十三年二月經度支部定案以一萬三千四百十五引爲定額其餘增銷之引卽儘數撥歸該岸應用時以湘路款絀不得不挹彼

注此由岑前撫徇湘紳之請批准撥借路用當據湘紳呈稱俟全路開車照普通股一律認利仍分年籌還是此項課釐係湘路權宜借用亦非因路抽收之款也其因路抽收之款一租股每糧一石隨繳路股一元二口捐每鹽一斤加收路股四文三房股上年九月經諮議局議決可行甫經開辦以上三項應卽遵

旨停止抽收至賑糶米捐鄂湘兩省工振股繁正苦無款籌濟應請仍照原案抽收抵充兩省賑糶之用衡永寶益銷課釐本年

督辦鹽政大臣議令查照歷年撥款酌中定數補助鐵路餘皆撥充湘路行政經費湘省預算歲出尙短一百四五

十萬今湘路既收歸國有借款興辦此項鹽款應請全數撥充湘省行政經費以資彌補所有查明湘路抽收援借各款應否由鄂湘兩省分別會同

大部暨

督辦大臣奏明請

旨辦理之處伏乞會商酌核迅賜示遵至深感禱楊 真

賑糶米捐及衡永寶配銷鹽課開辦撥收各案并近三年徵收實數清摺

照錄湖南撫院俞光緒二十八年十月二十四日札文爲咨行事照得本部院於光緒二十八年十月十六日附片具

奏開辦兩湖賑糶局以徵爲禁一片除俟奉到

硃批恭錄另行外所有片稿合行札發札到該局即便移行查照此札

計抄片稿

再湖南地方素稱產穀之區自光緒二十一年以後水旱頻仍恒虞乏食加之財力耗竭民氣日趨浮囂偶值糧價昂貴輒卽訛言流布盜賊繁興情形極爲可慮上年夏間大水爲災臣竭力設法督屬振糶并酌借官欸將潰決堤垸卽爲修復境內幸護謐安其未經被水地方秋收早得中稔穀價因以稍平而各屬商販卽聞風翕集有尙未刈穫豫向田中買定者有甫經收割卽挑運上船者小民急

於近利不肯稍爲留存奸商但求取贏輾轉販運銷場更難究詰將見儲蓄一空青黃不接之時毫無可恃據各屬士紳公請禁止穀米出境臣諄飭各司道詳籌妥議僉以江皖等省糧價亦高商賈販運巧詐百出暗中偷漏防不勝防非但徒負遏糴之名於民食毫無裨益且將使原有釐金亦歸無著不如以徵爲禁使商販成本加重販運自稀藉以存留穀米備本地緩急之需第湘鄂兩省唇齒相依湘米運出既減鄂省米釐必因而短絀勢不能不統籌兼顧擬於穀米出口之湘陰等縣設立兩湖賑糴局凡遇米船經過每石收錢四百文穀則減半所收錢文專備鄂湘兩省賑糴之用由湖北商務局江漢關道湖南善後釐

金各局司道會詳前來臣復與督臣張臣往復函商意見
相同隨飭照議開辦所有辦理緣由謹附片具陳伏乞
聖鑒謹

奏

照錄湖南撫院俞光緒二十八年十一月三十日札文
爲恭錄事照得本部院於光緒二十八年十月十六日附
片具

奏明辦兩湖賑糶局以徵爲禁一片除片稿前已札發外今
於本年十一月二十六日接回原片奉

硃批戶部知道欽此合就恭錄札行札到該局即便移行欽遵
查照此札

照錄湖南撫院端光緒三十三年三月初四日札文

爲札飭事案據湘省紳士

前刑部右侍郎龍國子監祭酒王

翰林院編修汪與分省補用道孔紳憲教

前甘肅甯夏府知府黃紳自元安徽候補道席紳滙湘候

選道張紳祖同來呈內稱竊維南省鐵路前經紳等呈請

趙升院奏定由本省鳩集股資修造支路一條一由常辰

直入川境與粵漢幹路相接一由衡寶出武岡黔陽晃州

入黔省之鎮遠府境此二路均與長沙幹路相接衡定議

先造常辰一路計程七百餘里需費約八百餘萬兩甫議

開辦集股適粵漢幹路力爭廢約收回自辦幸

廟謨之已定聯上下於一心紳等叅酌情形預籌辦法惟以亟

籌確實的款趕辦支路爲當務之急庶足以濟艱鉅而立
根基去歲公會商每年由商民集資二十萬擬立章程
作爲股票又援案請仿照湖北賑糶捐全數撥充鐵路經
費辦法將本省每年所收賑糶捐一律儘徵儘撥以濟要
工再懇歲提銅元餘利二成專充鐵路之用合之當成巨
款并聲明賑糶捐輸銅元餘利兩項以公濟公請不計息
將來全路告成或作借款分次攤還或作股票照章分利
前已公呈

陸前院批准在案現在時事愈迫人心益切隱憂但支路
早覩一日之成功卽地方早收一日之利益輿情激切盼
望彌殷况紳等以築造支路爲下手之基萬難再事延緩

擬卽開辦籌款購地一面遴紳分往遠近各處招收路股
尅日開工將來幹路收回則公司規模已定深固不搖卽
加籌巨款人情必更踴躍大工不難速就此則可爲預計
者也伏祈俯鑒紳等迫切之情准將光緒三十一年正月
起所收賑糶捐全數發給仰懇札飭賑糶局按月儘數撥
解紳等公司由公司隨時移覆備案不勝悚惶待命之至
惟乞俯賜察核立予施行等情并接

龍侍郎諸紳函開賑糶米捐雖蒙批准迄未批發茲特具
呈請領仰祈批飭釐金善後兩局照數撥解或四月以前
業經各局支用卽俟將來銅元獲利陸續補還惟命是聽
等語據此查湘省鐵路贖約購地需款甚鉅曾經議將賑

糶米捐儘數撥歸鐵路應用本年四月經

督部堂與本部院會委各紳辦理湖南鐵路籌款購地公
司事務總局刊發關防分別移請照會札飭各在案茲據
前情應卽查照來函自本年五月初一爲始飭由釐金善
後兩局將所收賑糶米捐另欸存儲按月將收數移知鐵
路籌款購地總局聽候隨時撥用餘照來呈辦理除照會
并分行外合亟札飭札到該局卽便會同釐金局遵照札
飭事宜妥爲辦理仍按月將收到賑糶米捐數目具報查
考此札

謹按米捐一項因湘省素稱產穀之區價值較廉商販運
往下游各省視爲利藪在豐稔之年均輸原以均富并無

妨害一遇歉收民食幾難自保當光緒二十七年大水爲災穀產頓減商販惟利是圖不顧地方重要依然紛紛採運因於光緒二十八年詳奉

前撫憲俞

奏辦兩湖振糶米捐以徵爲禁凡出口之米每石收錢四百文穀則減半所收錢文專備鄂湘兩省賑糶之用迨光緒三十一年湘紳以鄂省因收回美商承造粵漢鐵路購買合興公司股票支付金元小票息金攤還贖路本息無欸可籌撥借鄂省賑糶米捐一欸應用有案援照呈請將湘省賑糶米捐亦悉數撥借路用并聲明以公濟公請不計息將來全路告成或作借款分次攤還或作股票照章分

利等情在案此項米捐開辦在收回鐵路以前其爲路工借用并非因路抽收顯而有證實屬不在停收之列且此項捐款盡抽之湘省豐收弛禁之年現值阻禁卽屬無款可收尤足見此款之抽與不抽不在路工之辦與不辦而在米禁之弛與不弛現查鄂省撥濟路用振糶一款業於宣統元年奏准收回仍歸鄂省賑糶及地方積穀緊要之需湘省事同一律上前兩年工賑用費甚鉅米捐撥助路工無可支應悉係借款墊付後此工賑亦屬難免倘無的款勢屬可危現在粵漢幹路

國有定爲政策借款建築毋庸再事撥濟以後抽收此款自應照案撥還仍作湘省賑糶及地方緊要之用以符原案

附錄鄂省撥濟路用賑糶米捐奏請收回原案呈

核

附錄兩湖督院陳宣統元年十月札文

爲行知事照得本部堂於宣統元年十月初二日專差附
奏湖北賑糶米捐顧名思義應專充鄂省賑糶之用一片除
俟奉到

硃批恭錄另行外所有片稿合先抄行爲此札仰該局即便遵
照此札

計抄片稿一紙

再兩湖有賑糶米捐一欵係前湖南撫臣俞廉三奏准開
辦其時因各處米商赴湘購米絡繹不絕動致民間儲蓄

一空遂將出境之米酌定捐輸由鄂湘各半分收名之曰
兩湖賑糶米捐既寓以徵爲禁之意又備歲饑賑糶之需
用意至爲深遠嗣以鄂省收回美商承造粵漢鐵路購買
合興公司股票支付金元小票息金攤還贖路本息一時
無款可籌經前任督臣飭將此項米捐備撥墊用本爲一
時權宜之計本年鄂省水災奇重小民困迫情形慘不忍
睹全待多方拯救庶資存活雖仰蒙

朝廷施濟於上兼賴官紳商界協助於下而業經動用之款數
已不貲此後由冬徂春爲日甚長賑撫工糶需款尤鉅司
局經營措拄異常爲難伏思鄂省應得一半賑糶米捐原
爲災荒而設際此饑饉洊臻之日顧名思義自應將前項

捐款仍撥充賑糶之用以符奏案而濟急需所有鄂境粵漢鐵路之應還本息金元小票息金及粵漢川漢兩局局用鐵路學堂經費現在粵漢及鄂境川漢兩路均歸郵傳部接收此後支付上項款目亦應由郵傳部籌給其以前爲該兩路墊用之振糶米捐如能由部歸還清欸固屬最善否則卽作爲兩路之股欸給以股息俟開車見利照章分紅以期兩有裨益嗣後鄂省應得之振糶米捐卽歸鄂省專款存儲作爲接濟荒年振糶及地方積穀緊要之需據湖北善後局司道詳請奏咨前來臣覆核無異除咨郵傳部查照外理合附片具陳伏祈

聖鑒謹

奏

宣統元年十月十五日奉

硃批該部知道欽此

照錄湖南撫院岑光緒三十三年三月初四日札文

爲咨行事光緒三十三年二月二十四日准

度支部咨開北檔房案呈據兩江總督咨稱湘岸衡永寶
配銷協湘一半課釐撥充江北練兵新餉前准

湘撫部院暨江北提督先後咨商飭司籌議迄未定案經
本部堂據情咨部暨陸軍部核覆在案茲據湖南紳士在
籍國子監祭酒王先謙等懇撥廢岸配銷鹽款暫充路股
以維要政而濟急需事竊粵漢鐵路自收回自辦以來廣

東湖北均已定議開辦惟湘省路線綿長籌款困難一切
尙無成議即使招股踴躍而贖路保息設非另籌鉅資濟
以公欸措手益難查淮巖一項湘民歲輸三百餘萬爲財
政大宗前議援照江西辦法加抽鹽價而前辦湘岸督銷
局程道鈇祥以慮致隣私侵越嗣復公同酌議請以衡永
資配銷淮鹽淮湘各半釐課等款撥歸路用仍作爲官股
邇時湘省幸隸輯轅於上年六月荷蒙大帥電商調任督
鹽院周迭訥司局會議兩淮恩升司復稱於淮並無虧損
議准照辦嗣周前院以四岸新增額銷溢收釐課奏充江
北軍餉未卽允行復經批行接任趙運司濱彥會同湘局
程道鈇祥再行通盤籌議當據詳復湘岸邇年淮銷增暢

即將衡寶銷引剔除正岸溢收尙多堪充江北練兵經費并於一半歸淮釐課項下每年指提銀壹萬兩湊濟江北軍餉餘款悉充湖南路股俟大工告成分年籌還等情并顧統籌所議亦尙允協而江北劉前提台以有關餉需未允照辦其一半歸湘釐課經理支解向由湘省主政上年秋冬兩季計銀二萬餘兩業經呈蒙調任湘撫憲龐飭局如數解交鐵路公司其餘歸淮各款迄未定議照解此配銷款項未經全數撥充路股之原委也伏查衡永寶向食粵鹽之區爲淮引不到之地歲納粵鹽釐稅爲數不資光緒二十七年湘撫憲俞因籌備償款奏辦該三府官運粵鹽并配銷淮引所征課釐淮湘各半分解原以湘釐之

所得藉抵粵稅之所失既與正岸無干并無溢銷可比且江北軍餉已有專注之資而廢岸配銷應無類及之理茲若併歸江北湘省先難照辦業經司局詳明在案夫以衡寶配准自湘創辦經營勸導諸有萌芽邇來該處居民聞有移作路股之議多願改食淮鹽銷數漸增頗著成效如此議一定當號召三府紳耆羣起擔任義務則數百年已廢之岸不難悉數恢復擴增引票操券可期其有濟於湘路者爲時甚暫而爲淮網開此莫大利源寔巖政之厚幸是所籌者路股而其效正不僅在路股也今湘路計長二千七百餘里約須股本三千萬元而每年贖路之款及金圓小票數十萬兩保息之款又非數十萬至百萬不可必

須另籌的款彌補現在本省所籌僅振羅一項尙難應手此外更成議全無事機已迫萬難再緩欣逢大帥重蒞兩江熱心路政配銷之議仰荷主持於前必蒙成全於後應懇俯賜查照原議准將衡永寶三府配銷准鹽釐課新釐等款全數撥充湘路之用所有歸淮之款作爲江南官股歸湘之款作爲湖南官款俟全路開車後照普通路股一律認利仍當分年籌還其配銷加價一項爲數無多有歲支金陵中西醫院及湘省各學堂經費自應照章分解有餘請概行併入路股在湘岸則出之羨餘在鐵路則視爲命脈且暫於廢岸移少數之鹽釐可爲國家積多數之股本裨益大局迥異尋常如蒙俯准請卽分咨大部立案并

飭湘岸督銷局會同鐵路總公司查照辦理仍一面妥議
章程呈候鈞核至江北餉糶原有正岸溢款數在十萬兩
左右并資取給請充路股之款實於江北無妨茲擬仍照
運司所議於歸淮項下歲撥解銀壹萬兩倘銷引增多亦
可酌加解數以盡兼顧之義鐵路關係自強政策

朝廷銳意振興以前電線商輪莫不取資官款卽今各省鐵路
甯滬則稱貸於戶部銀行浙江則捐借公帑况粵漢一路
貫通江海爲全球有數利權無如款鉅期迫民力斷難獨
支非賴公家設法濟助何以資提倡而維要政所有請撥
湖南衡永寶廢岸配銷鹽款全數暫充鐵路官股緣由理
合公懇察核等情據此查此案前經咨達大部尙未接准

核復據呈各情咨部請煩查照併案核復等因前來查此
項湖南衡永寶配銷鹽欵暫充鐵路官股一案經本部於
上年十二月十六日分咨兩江總督湖南巡撫文內以湖
南通岸鹽釐等欵及衡永寶官運鹽釐等欵皆係解交湖
南善後局收用其應撥路欵卽飭湖南善後局自行酌量
辦理等因又於是日電復湘撫元電文內聲明衡永寶配
銷遞加暢旺自應竭力維持以擴銷路其撥提溢銷一節
應將通岸及衡永寶各收欵均勻攤撥且通岸及衡永寶
鹽釐等欵均係解善後局收用所有衡永寶應支之欵卽
應由善後局通籌勻給以資兼顧再查湘岸原派十二萬
五千引三十一年銷鹽十六萬一千餘引除去江北所提

溢銷及衡永寶新加配銷之數比較原派引數尙屬有餘
應將全省溢銷二萬七百餘引徵收正雜款項儘數解充
江北練餉以符原奏等因分別電咨各在案茲准兩江總
督咨稱前因自係在未接部文以前應仍查照前咨及前
電辦理惟衡永寶本係廢岸現正極力推廣應卽以一萬
三千四百十五引爲定額其自三十二年起再能銷引增
多除一萬三千四百十五引歸入通省銷數併算該岸應
需之款仍由湖南善後局勻給外其所餘增銷之引卽儘
數撥歸該岸應用以期拓銷而資兼顧除咨復兩江總督
轉飭查照外相應咨行湖南巡撫可也等因到本部院准
此查此案前准

度支部暨

督部堂先後來咨均經分別咨行在案准咨前因除分行外合就札行札到該局即便查照並移奏辦湖南鐵路總公司知照此札

謹案衡永寶配銷項下一款於光緒三十三年奉

度支部核定衡永寶本係廢岸現正極力推廣應卽以一萬三千四百十五引爲定額其所餘增銷之引卽儘數撥歸該岸應用以期拓銷而資兼顧經湘紳呈請將此項配銷鹽款暫充鐵路官股俟全路開車後照普通路股一律認利仍當分年籌還等情在案本年

督辦鹽政大臣飭將此項撥款查照歷年撥數酌中定以

成數爲補助鐵路經費餘皆撥充湘省行政經費亦以湘省行政經費奇絀故代爲此還諸固有之計畫亦確徵此欸之爲暫時撥借路用毫無疑義該欸本屬課釐并非各項加價所可比擬且係暫時撥濟與鹽餉鐵路口捐一項專爲修路抽收者情有不同雖該三府引岸現經

督辦鹽政大臣奏准將永府八屬暨衡州之耒陽安仁常甯寶慶之武岡城步新甯等州縣劃歸粵引今昔情形又自不同而此項課釐係屬正額歷查鹽務凡遇減價敵私輕本拓銷等事祇有免收加價辦法并無准免釐課成案無論十四州縣劃歸粵引以後准鹽銷數盈縮如何此項溢銷鹽斤必無免收課釐之理既經聲明籌還有案實爲

路成不在停止之列暫借係屬應還之款湘省新舊積虧五百餘萬內有二百餘萬實因歷年將米鹽兩款撥助路工所虧目前預算不敷亦至一百數十萬以前積欠所恃前借之款照案歸還以之償負即使路未告成無款攤還苟能照案填還股稟一律認利亦得恃以作抵舊欠至此後預算不敷又專藉停止撥助以資彌補

附錄督辦鹽政大臣仿照歷年撥數酌中定以成數補助路工餘皆撥充行政經費原案呈

核

附錄湖南督銷淮鹽總局宣統三年四月初九日咨文
爲咨會事案奉

督辦鹽政大臣載札開鹽務總廳案呈查湘省財政前因
預算不敷擬加鹽價六文以資彌補業經本處會同度支
部奏駁行知遵照在案茲本處訪查得湘省鹽務但能釐
別得法未始不可籌措鉅款無須加取於民釐別者何一
爲運商包舫酌量加增也湘省鹽舫加價因向多匿報自
光緒二十八年始定爲每票按三十六萬六千舫包繳照
定章核算每票五百引運鹽四千包包定罈秤八十六舫
申合局秤百舫除鹵耗不計應有局秤三十八萬五六千
舫以實銷之鹽比較包繳之價其中餘羨每票不下四百
金始以湘銷三百六十票計之則歲已十四萬餘矣言巖
政則係官中之私論稅法確爲中飽之歎今卽從寬辦理

將湘岸加價無論官商運與夫平江專岸均按鄂西皖三岸加價每票照三十七萬五千觔扣解常年可增進款六七萬兩一爲經紀行用革除歸公也各岸之鹽行自同治初元多半革除湘省亦定有限制准停閉而不准增設乃歷年既久影射朦混遂得遺留至今鹽行坐享厚費民間大受戕削現在鹽歸官賣城鎮商埠均設有督銷分局與商販直接交易售價又縮短期限承銷必存互保該鹽牙毫無擔負徒恃一紙行帖坐得每票數金之行用且欺侵壟斷以及倒欠公款無所不至實爲病民蠹國之尤查長沙湘潭湘鄉湘陰益陽岳州常德辰州等處歲約銷鹽二百餘票按每票鹽價二萬餘兩每兩行用三分約計歲收

行用十二萬餘兩應卽革除鹽行名目將此行用如數歸公以地方之款辦地方之事實屬有益於公家無損於商人至各該鹽行仍准比較稅則換領他項牙帖不令失業當亦無所藉口一爲腹地免收宜酌量加復也湘岸岳州臨華賢湘潭各支店并攸縣湘鄉澧水沅靖等處因鄰私逼近於應徵加價或酌予核減或全數免收初係因時變通并非一成不易比年淮鹽引地逐漸拓展而寶衡銷數尤足力敵鄰私向之所謂邊岸者今多變爲腹地而不肖商販轉得居爲利藪黃緣爲奸宣統元年督銷局曾將平江攸縣及子店所減之價量予收復竟有百方運動要求免加者若非貪圖入己何必出此今若一律加復如岳州

及臨華二縣并潭各子店所減湘省償款之半每百觔一錢四分攸縣全減之二錢八分湘鄉澧水所減之善舉備荒兩款每百觔四分又岳州臨華免收學費四分之一沅靖免收一半全行照案收足歲約增進銀二三萬兩一爲衡永寶溢銷之款不宜盡撥湘省路股也查光緒三十三年因籌辦鐵路湘省呈請將衡永寶釐課加價撥充路股部議以一萬三千四百十五引爲定額歸入通岸溢銷撥充江北軍餉此外增銷之引悉歸該岸應用并無悉充路股明文查衡永寶現行章程應歸湘省之款每票五百引內有每引六兩二分之釐課銀三千餘兩每引八錢之新釐銀四百兩每引二錢四分零之抵補藥稅銷鹽省分

加價銀一百二十餘兩每百觔五錢六分之口捐路捐二千餘兩通盤計算增銷引鹽一票卽增進銀五千五百餘兩就岸情論衡州推廣較易寶慶次之永州又次之該三岸增銷現已七十餘票從前撥歸路股每歲不過萬兩前年已增至十七八萬去年且逾二十萬矣路捐四分加價尙不在內應查照歷年撥數酌中定以成數爲補助鐵路經費餘皆撥充湘省行政經費統籌兼顧裨益良多以上四端約畧計之已不下四十餘萬要皆求鹽務固有之利或實事求是或化私爲公或酌盈劑虛但能辦理得宜欸集而民不擾惟事關整頓鹽務非詳晰討論不足以資抉擇而利推行爲此札仰該局立即按照所指各條切實查

明迅速稟復以憑核辦等因奉此查衡永寶行銷淮鹽除一萬三千四百十五引歸入通岸併算其餘增銷之引除抵補藥稅口捐兩項仍照岸分解外所有課釐新釐現已儘數撥歸湘省路款究應如何劃分數目補助鐵路款項及充湘省行政經費應由

貴司會同

鐵路公司核議移覆以憑轉詳定案奉飭前因除行各分局暨淮商公所遵照外相應備文咨會

貴司請煩查照迅賜核議見復施行須至咨者

兩湖賑糶米捐近三年數目

光緒三十四年

徵收錢一百零柒萬壹千肆百壹拾壹串捌百文除
支銷并分鄂外撥解湘路公司錢肆拾捌萬貳千玖
百柒拾串零零叁拾文

宣統元年

徵收錢壹百貳拾叁萬玖千陸百壹拾貳串伍百文
除支銷并分鄂外撥解湘路公司錢伍拾陸萬壹千
捌百零柒串伍百玖拾貳文

宣統二年 是年二月阻禁十二月初四日始行弛禁

徵收錢貳拾貳萬玖千玖百陸拾捌串貳百肆拾捌
文除支銷并分鄂外撥解湘路公司錢捌萬串文

衡寶配銷增銷鹽課近三年數目

光緒三十四年

徵收銀五萬四千六百兩零九錢二分

儘數撥解湘路公司

宣統元年

徵收銀壹拾捌萬肆千捌百肆拾伍兩捌錢柒分

儘數

撥解湘路公司

宣統二年

徵收銀貳拾伍萬零壹百拾叁兩貳錢柒分

儘數撥解湘路公司

撫院批資到清摺已據詳咨送

度支部查核並請

奏明辦理矣仰即知照此繳

請將米捐配銷鹽課兩款所填股票概歸財政公所管理

詳文

爲會議詳請分咨照案撥還以重公款事案准湖南粵漢鐵路總公司咨開案查宣統元年正月間御史黃瑞麒

奏請凡各省因鐵路加徵各款路成卽行停止其所收之款悉令填給股票按照商股給息作爲輸出地方公積官紳互相稽核不得侵蝕冒濫以重款目欽奉

諭旨著郵傳部知道欽此查湘路加徵各款以米鹽爲最先光緒三十年十月經在籍前刑部侍郎龍紳湛霖等請將賑糶米捐撥作路工經費奉

前撫院陸批飭照准自是年五月起至宣統三年四月止先後共收銀九十六萬四千六百八十七兩七錢八分六釐九毫扣

洋一百四十一萬五千八百五十三元又光緒三十一年正月
經前總辦督銷淮鹽局程詳准請將衡寶配銷鹽款充作鐵路
股分自是年六月起至宣統三年四月止先後共收配銷課釐
並加價省平銀六十七萬二千二百五十三兩一錢四分四釐
一毫八絲扣洋九十八萬一千八百二十八元整又光緒三十
四年十二月經敝公司呈請將川淮粵鹽每觔加價四文附入
本省口捐一體抽收充作路費之用蒙

前

督院陳
撫院岑

會銜奏准自宣統元年七月起至三年四月止先後

共收銀五十九萬四千一百二十七兩一錢六分七釐七毫合
洋八十七萬零四百八十八元照案三共實填股票三百二十
六萬八千一百六十元分年分別陸續算息共扣洋十九萬六

千六百五十四元六角上年三月初四日省城米荒之變敝公司商同鄉人立即將此項息銀全數動用以資救濟並在公司入欸內預支息洋三千三百四十五元六角湊成洋二十萬元歸入振糶另案報銷正核辦間接諮議局移稱案查貴公司歷年所收鹽捐及米捐各欸皆係全體民人所負擔業經公同議決亟應照歷年收數填給股票作爲湖南全省公共股本以其餘利爲備荒賑欸及舉辦本省地方實業公益之需所有此項公股自應公舉殷實廉正鄉望素孚之人經管以昭信實現經本局公舉朱紳昌琳爲總經管黃紳忠浩譚紳延闈胡紳璧幫同經管此項鹽米捐各項公股票即請貴公司查明歷年收數照數填給股票送交朱紳收存以後關於此項收欸並請陸續

按數填票照送移請公司希卽查照施行准此敝公司應卽查照將上項股票息摺共股洋三百二十六萬八千一百六十元一併備文移請朱京堂驗收暫存應如何將米股本息全數專作通省備荒之用及如何將鹽股本息作爲舉辦本省地方實業公益之需應候公同協議另呈辦理相應備文咨會爲此合咨貴司請煩查照立案再本年三月二十五日准督銷總局咨稱衡永寶配銷課釐撥充路款應找解庫平銀九萬一百十三兩二錢七分於三月二十九日解交湖南布政使司核收又五月初九日復准咨稱衡永寶配銷加價除照章解支外結報至上年十二月底止應撥充路款省平銀九千九百九十九兩九錢六分一釐於四月二十九日解交湖南藩司核收轉撥等因本年四

月以前據淮鹽各分局文報鐵路口捐合共銀四萬八千五百二十六兩九錢一分四釐並經批解財政公所尙未准撥前來應請一併文透截數以便一律照填股票報銷合併咨明等情到司由司轉移道局會議查米捐一項因湘省素稱產穀之區價值較廉商販運往下游各省視爲利藪在豐稔之年均輸原以均富並無妨害一遇歉收民食幾難自保當光緒二十七年大水爲災穀產頓減商販惟利是圖不顧地方重要依然紛紛採運因於二十八年詳奉

前撫憲俞

奏辦兩湖振糶米捐以徵爲禁凡出口之米每石收錢四百文穀則減半所收錢文專備鄂湘兩省賑糶之用迨光緒三十一年

年經湘省七紳呈請

前撫憲端准將光緒三十一年五月起所收賑糶米捐一項儘數撥歸鐵路應用湘紳原呈並聲明事屬以公濟公請不計息將來全路告成或作借款分年攤還或作股票照章分利至衡寶配銷課釐並加價一項係光緒三十三年奉

度支部核定衡永寶本係廢岸現正極力推廣應卽以一萬三千四百十五引爲定額其所餘增銷之引卽儘數撥歸該岸應用以期拓銷而資兼顧經湘紳呈請將此項配銷鹽款暫充鐵路官股亦據聲明准鹽歸湘之款作爲湖南官股俟全路開車後照普通路股一律認利仍當分年籌還各在案是以上兩項均屬公家援助公司以濟要工之款既據原案聲明一則日分

年攤還照章分利
其爲公司因路工
勛鐵路口捐一欸
文援引御史黃瑞
諭旨一案係專指
前項米捐及衡寶
成不在停止之列
幹路

國有定爲政策所
行政經費之用就
鉅因米捐撥助路

撥還償墊工賑之需就原案之所有籌償原款之所虧辦法之允當無逾於此其配銷鹽款實卽課釐並非各項加價所可比擬照章此款歸湘應用溯查湘省白米鹽兩款撥助路工以來歷年積虧至二百餘萬現在預算不敷每年至一百五十餘萬以前積欠既恃收還前借以償負以後不敷亦借停止撥助以彌補值此支絀萬狀本屬需款不需股之時但該公司既因經費不足始行撥借公款現未竣工營業無款歸還擬填股票列抵亦屬正當辦法惟是撥借之款與因路加徵者辦法自不能同既曰作爲官股自應屬之國家行政經費範圍亦非地方公股所能援以爲說茲來咨將米捐配銷鹽款暨鐵路口捐各款填給股票一律作爲全省公共股本既屬顯背御史黃瑞麒奏

奉

諭旨又復廢棄暫作官股分年攤還之原案酌理準情均屬無此辦法擬請將歷年所收鐵路口捐一欸所填股票遵

旨作爲輸出地方公積公舉經管其歷年所撥米捐暨配銷鹽課兩欸所填股票概由該公司移送財政公所作爲官股以符原案而重公欸至來咨所請找解配銷課釐加價銀兩查此欸前奉

督辦鹽政大臣札開配銷一欸並無悉充路欸明文從前撥歸路欸每年不過萬兩前年已增至十七八萬去年且逾二十萬應由司局查照歷年撥數酌中定以成數爲補助鐵路經費餘皆撥充湘省行政經費行令遵照辦理等因本年已解過該公

司配銷項下省平銀五萬一千四百七十三兩零八分五釐三毫即可作爲酌撥之數其餘自應遵照

鹽政處札飭概充行政經費以符部案前准該公司咨請撥解到司業經移復在案應請仍照前移辦理所有會議請將米捐配銷鹽課兩款所填股票概歸財政公所管理緣由本司道局往復會商意見相同是否有當理合備文詳請

憲台俯賜察核分咨

郵傳部暨
度支部暨

督辦鐵路大臣並飭行諮議局分飭該公司及查賬員查照辦理批示定案再此案係本番司主稿合併聲明宣統三年五月

覆查各署局應解撫院未經列抵幕職廳經費各款詳文

爲詳復事案奉

憲台札開案據該司呈稱四月分幕職廳經費應解銀三千三百三十四兩除解過員薪火食統計省平銀三千零三十兩零七錢八分八釐外尙應解銀三百零三兩二錢一分二釐等情前來查幕職廳經費前據司詳每年籌撥銀四萬兩按月批解由院實用實銷等情當經批准自四月起先行試辦如實在不敷再行酌奪在案所有四月分員薪火食等項據稱解過省平銀三千零三十兩零七錢八分八釐惟此項內有巡查丁道現年偵探蔡淋川兩員薪水共銀壹百零四兩與幕職廳無涉應歸兵備處開支實計解到銀二千九百二十六兩七錢八分八釐又查四月分十科寫生按月支給工食津貼等項計庫平銀

五百三十兩零二錢四分五釐八毫申省平銀五百五十一兩
四錢五分五釐六毫又應支錢一百十千零八百十二文另單
分款開列粘發備核除將現解省平銀三百零三兩三錢一分
二釐抵支外實計不敷省平銀二百四十八兩一錢四分三釐
六毫又錢一百十千零八百十二文應由司如數補解以憑歸
墊合亟札飭札到該司即便遵照尅日補解勿延再十科寫生
內有已領至六月分者並另有不按月請領之欸均未列單內
合併札知此札等因並奉發粘單一紙奉此

本司遵查

憲署書吏原領工食津貼一項向係各署局隨時支領嗣因設
立幕職廳業經本司會同提法司詳明請就

憲署原有委薪火食及書吏辛工銀三萬五千餘兩並查提各

科原有規費一併抵支改定幕職原薪火食及書記辛費等項
另由本司籌撥銀四千三百餘兩共成銀四萬兩按月由財政
公所提收勻支作爲幕職廳經費並乞按款規定咨

部立案隨於四月分查得應解銀三千三百三十四兩除解過
員薪火食統計省平銀三千零三十兩零七錢八分八釐外呈
解銀三百零三兩三錢一分二釐申請

核收茲奉

札飭補解十科寫生工食津貼等項不敷銀二百四十八兩一
錢四分三釐六毫又錢一百十千零八百十二文每月約需銀
三百兩自應遵照辦理惟查司庫款項支絀異常早在

憲鑒此項按月計算雖爲數無多然必須籌款抵支未便以空

言應付現經本司覆查各署局應解

憲轅各款除已經列抵公費不計外原單內尙有未經列抵者
併計十款共銀一千六百十三兩三錢五分六釐擬請一併抵
支全年計算無閏之年尙不敷銀一千九百八十六兩六錢四
分四釐遇閏加銀三百兩本司再四籌畫別無他項餘款足資
提補惟查有丁漕兩庫書吏並庫廳書役酌改寫生提出原有
規費化私爲公除按月發給薪工外餘銀八百兩儘數撥補此
外尙不敷銀一千一百八十六兩六錢四分四釐另由裁革司
書行提規費化私爲公撥作財政公所公用項下照數提支遇
閏加提銀三百兩係於無可設法之中勉籌奉飭補解之數嗣
後按月隨同幕職廳經費併由財政公所具文申解卽乞

批示作爲定案是否有當理合分晰開具清摺並先將四月分應補解銀三百兩隨文齎解

憲台俯賜察核彈收示遵再十科寫生工食有領至六月者亦有按月未經具領者應請分別按名補給扣支合併陳明

宣統三年五月

清單

四月分十科經書領款

吏科經書劉和衷領廩工庫平銀二十五兩一錢六分

兵科稿生藍鴻鈞領廩工紙張庫平銀二十兩零三錢三

分三釐

又領軍需辛工庫平銀三十四兩

又領軍需七折辛工錢三十二千文

刑科稿生羅席珍領廩工庫平銀四十五兩七錢一分零

三毫

又領詞訟保甲庫平銀二兩

又領警務辛工庫平銀五兩

又領京控工食庫平銀三兩三錢三分三釐

稿科經書李翕和領廩工庫平銀二十一兩七錢零八釐

揭科經書湯慶章領廩工庫平銀三十兩零九分三釐七

毫

又領加增工食庫平銀十七兩

職科經書沈玉美領廩工庫平銀二十四兩一錢三分二

釐

又 領軍需辛工庫平銀五兩

又 領牙釐局辛工錢八千文

驛科稿生王靜存領廩工紙張並

漕廩工

庫平銀二十五兩

二錢一分三釐六毫

本科經書湯啓後領廩工庫平銀四十五兩六錢三分三

釐三毫

又 領辰州關工食庫平銀三兩三錢三分三釐三毫

戶科經書李特昭領廩工庫平銀二十九兩三錢三分三

釐

又 領交代辛工庫平銀十兩

又領官運緝私工食庫平銀四兩

又領鑛務工食庫平銀九兩一錢六分六釐

又領釐金工食紙張錢十三千文

又領口捐工食錢九千四百文

又領長岳兩關工食紙張錢十八千八百文

咨科經書劉儒邦領廩工庫平銀三十一兩五錢零三釐

又領軍需工食庫平銀二十五兩

又領加增工食紙張庫平銀八兩

又領漕項工食紙張庫平銀一兩三錢三分三釐三毫

又領官封紙張庫平銀一兩三錢三分三釐三毫

又領辰沅道工食紙張庫平銀四兩

又 領熬金工食紙張錢十一千文

又 領長岳兩關工食紙張錢十八千六百十二文

學兵湖城 軍需房 五科稿生楊立成等領津貼庫平銀二十三兩

十科稿生劉儒邦等領津貼庫平銀五十四兩二錢六分
一釐

又 領酒席盤費庫平銀十三兩三錢三分三釐

內號方咸泰領工食庫平銀五兩三錢三分三釐

又 領加增工食庫平銀三兩

共庫平銀五百三十兩零二錢四分五釐八毫兩四申省

平銀五百五十一兩四錢五分五釐六毫

又共錢一百一十千零八百十二文

附抄抵支各款

提法司年解銀三十九兩九錢九分六釐

鹽法道連閏年解銀八百五十七兩八錢八分

辰沅道連閏年解銀四十八兩

辰州關年解銀三十九兩九錢九分六釐

督銷局連閏年解

銀八十四兩三錢一分
錢二十四千文

官鑛處年解銀一百二十兩

提學司連閏年解錢二百四十千零四百文

長沙關連閏年解錢二百三十五千文

岳州關連閏年解錢二百四十四千四百文

長沙縣年解錢六十九串九百九十六文

共銀一千一百九十兩零一錢八分二釐又錢八百十三千七百九十六文

二合銀四百二十三兩一錢七分四釐

統共銀一千六百十三兩三錢五分六釐

撫院批查本年四月分十科書吏寫生辛工津貼等項不敷省平銀三百餘兩據解三百兩業已兌收所請自五月起隨同幕職廳經費按月解銀三百兩應暫照辦現在

奏設幕職廳每月應支一切經費詳開欸目冊另文札發備案仍俟每月核計實支若干開數行知至摺開提抵十欸內鹽法道連閏年解銀八百五十七兩八錢八分現據鹽法道呈報有閏之年共發銀八百八十四兩九錢三分八釐無閏之年共支

銀八百七十四兩五錢二分八釐核與來摺不符且鹽法道向支驛科年底盤庫工食銀十六兩應由道仍照舊章屆時呈解又官鑛處年解銀一百二十兩內一百兩係戶科辛工自應提抵其餘二千兩係戶咨兩科年終應分紅獎屆時應由官鑛處逕支給獎又長沙縣向解典息錢每年七十串文此係

趙升前院捐款甘棠勿剪未便更章亦仍由縣按季提息呈解均於幕職廳月支經費欸目冊後附列理由仰卽遵照將提抵各欸查明更正另開準確清摺呈核再前札所叙寫生工食有領至六月者四五等月均未具領本已扣支其不按月請領者係臨時特別之欸不歸幕職廳經費內開支應由原發交所照舊章辦理亦於幕職廳欸目冊後註明併卽知照此繳摺存

議覆江南缺米籌款購糧平糶現值湘省阻禁礙難照准

詳文

爲詳覆事案奉

憲台札開宣統三年四月二十九日准

度支部咨開漕倉司案呈本部會議兩江總督等電奏江南缺米擬由兩淮運庫借撥銀兩購糧平糶一摺宣統三年四月初四日具奏奉

旨依議欽此除飛咨兩江總督江蘇巡撫遵照外相應抄錄原奏恭錄

諭旨飛咨湖南巡撫遵照可也等因到本撫院准此合行札飭札到該司即便分別移行遵照此札計單等因奉此查湖南省穀

米前因輸出太多儲藏漸罄市價騰貴民食維艱四鄉痞徒因
之煽惑愚民倡喫排飯前據長善兩縣詳據湖南自治公所呈
請阻禁到司情詞迫切衆論僉同業經本司據情詳奉

憲台電

奏阻禁以維民食仰蒙

俞允遵於四月十二日刊刻告示曉諭自本月宣禁之日起至
五月初三日扣足二十一日爲止限期以內仍准輪船裝運出
口以符約章至內地商運民船自出示之日起卽行禁止不准
載運出口除鄂省軍米由官給發護照來湘採辦者另定查驗
章程不在此限由司通飭各釐局一律遵照并移會米捐總局
各在案茲奉前因查江南籌款來湘購米同爲維持民食起見

但事屬平糶既非軍米可比又值湘省阻禁之時實與通商章程有礙未便通融辦理致違定章而妨民食理合具文詳請憲台俯賜察核據咨

兩江督院查照並懇

批示祇遵

宣統三年五月

擬請飭令石首縣另選正紳分派該縣產米地方察實確係北米始發憑單詳文

爲詳請酌核飭遵以維捐款而重民食事竊查兩湖米捐合辦五口建議之始原以南北捐章相去太遠商人趨輕避重往往南米混北希圖減捐搬運繞越弊端百出於精捐民食兩有妨害故原議請將鄂省捐數一律照湘章抽收冀昭劃一而杜取

巧嗣因鄂省官紳一再議駁謂鄂僅一隅之米每年收數無多如照湘捐征收民力實有未逮遂有發給憑單之議復經鄂省查明以藕池收捐最旺之年定爲北米之額由北度支公所刊印憑單編列年號發縣舉紳管理核實填發倘有串通奸商冒領情事准由局員分別稟辦是於湘鄂合辦之中仍有南北收捐之別而北米有限制南米自不得混充能多收南米之捐卽多分解北省之欸故兩省通籌合辦立法不可謂不周第立法立宜防弊生實事由貴求是前據藕池口局委員龍令燦章稟稱石首縣在藕池下首設立憑單局於兩省捐欸大啓漏卮等情到局業經本局詳奉

憲台轉咨

督憲批飭該縣會同該局委員妥籌辦理並移請北藩司飭令
嚴定辦法不准擅自設局各在案乃現又迭據各局委員紛紛
具稟本總局詳加查核實有不得不嚴防流弊者據調弦口局
委員陶令延譽稟明卑局查明商人劉大福捏造行票冒領憑
單分別處置又據雷灣局委員李令翥華稟稱石首縣憑單任
用黃其仁卽黃星齋在梅田湖六姑菴向來搬運最盛之地私
立戳記串通奸商以代憑單又據稟稱查有米船在梅市地方
無帖之久大米行運米祇有清單由黃紳蓋戳並擅取戳記行
用錢文各等情據此正議詳請

憲台核奪飭遵旋又據調弦口局委員陶令稟稱卑局盤獲商
船喻正清等冒領北米憑單接合影射行戶傅義順偽造賬簿

捏開清單請飭石首縣澈究等情查閱各稟內稱所言皆確鑿
可據本司職道等伏查憑單之設其立法始意原以產米本在
各鄉故憑單發由縣紳取其便民而不擾今縣紳發憑單不在
各鄉而在運出之地不能使鄉民徒以縱奸商今且直欲舍官
發有數之憑單而私造無窮之清單戳記以爲証據種種狡變
伎倆無非一意營私核與原定章程限額防弊之意實大相刺
謬總之憑單一事地方官委之紳士絕不過問而所派者又絕
非正人遂至憑單發於運米之區勢必侵佔產米運出之額清
單戳記操劣紳之手顯爲招至南米弊混之媒而北米並未見
其有益於南米已立見其有損若非嚴加整頓撤換劣紳另選
正紳令於產米之區妥籌發給憑單辦法其流弊不知伊於胡

底且現置南省阻禁如長此任其包攬以南混北源源運出儲蓄立空於湘省民食岌岌可危甚非我

憲台曲體民隱一視同仁之苦心本司職道既有所聞不敢壅於上聽撥請飭令石首縣速將管發憑單之黃其仁卽星齋立卽斥退再遴選正紳分派該縣產米地方察實確係北米始發憑單則真係北米不至因侵額而向隅若非北米亦不能冒領以取巧庶幾公私兩利南北同沾本司職道等仰體

憲德爲兩省民食精捐起見除詳明

督院並移會北藩司查照外具文詳請

憲台俯賜察核批示祇遵宣統三年五月

改訂釐金比較詳文附清摺

爲詳請示遵事竊維湘省釐務於光緒三十三年經

前憲台岑釐訂新章力加整頓核計自三十三年九月起至三十四年八月止全年收數逾額五十二萬有奇宣統元年經前牙釐局司道詳准將各局長收之數以一半加入比較作爲新定比較額數久經通飭遵辦在案當其訂章伊始原就各局前三年收數平均計算懸爲定額乃時逾數載情勢頓殊就近年各局釐收逐加審核有昔旺而今淡者有彼減而此增者詳察情形固由物產之豐歉難齊亦以商埠之盛衰互異若非通盤籌畫酌予變通將長收者可僥倖以奏其功短收者終以踟躕以底於過殊不足以資鼓勵而昭激勸查釐金三十五局額定比較數目計共錢二百三十六萬六千九百三十二串有零現

將各局釐收查照光緒三十四年暨宣統元年二年各局長短數目分別勻攤卽以三年平均之數作爲此次比較之數計共錢二百三十七萬零七百九十六串按之舊日比較尙屬有盈無絀嗣後各局員司人等如果認真稽徵力祛弊竇其經徵釐欸有能溢於現定額數以外者方爲長收仍按二成提獎以符舊章惟辦理未及三月或因木差事故致被撤委者雖係長收概不給獎遇有短收局員仍應照章撤差記過停委以示懲儆現將各局比較逐一釐訂計大局九局上中局九局中局九局小局八局所有各局委員薪水應卽查照各局等差照章分別支給似此重加改訂辦理庶得其平如蒙

俯允擬請自本年七月初一日起爲新章實行之期謹將各局

全年比較總數先行開具清摺一面將各局細數按照十二個月分別旺淡逐一勻攤以期核實而昭平允所有改訂釐金比較緣由是否有當理合具文詳請

憲台俯賜察核批示祇遵

宣統三年五月

改訂勻攤釐金各局比較數目清摺

計開

湘潭局

應攤錢十一萬九千四百九十二串文

城陵磯局

應攤錢十三萬五千四百六十九串文

岳州局

應攤錢十二萬六千九百七十八串文

雷市局

應攤錢十二萬三千七百三十三串文

平江局

應攤錢十萬零一千八百七十五串文

小淹局

應攤錢三十萬零二千五百六十串文

辰州並浦市局

應攤錢十六萬三千三百七十四串文

常德局

應攤錢十萬零二千零八十六串文

靳江河局

應攤錢十萬零六千八百十一串文

以上九局比較在十萬以上照章定爲大局

永州局

應攤錢九萬四千七百七十串文

三汊磯局

應攤錢九萬一千六百八十三串文

省河並輪船局

應攤錢七萬一千三百六十一串文

益陽局

應攤錢八萬零一百四十五串文

衡州局

應攤錢七萬七千五百零四串文

鼎家市局

應攤錢七萬八千三百三十八串文

安鄉局

應攤錢七萬一千二百三十四串文

瀏陽局

應攤錢六萬三千零二十二串文

托口局

應攤錢六萬二千五百七十六串文

以上九局比較在十萬串以下六萬串以上照章定

爲上中局

醴陵局

應攤錢四萬八千四百八十二串文

攸縣局

應攤錢二萬六千八百八十串文

洪江局

應攤錢二萬二千七百二十三串文

梨梨局

應攤錢四萬三千一百零八串文

宜章局

應攤錢三萬一千六百八十四串文

郴州局

應攤錢二萬三千一百九十九串文

津市局

應攤錢二萬四千四百六十七串文

白沙局

應攤錢四萬七千二百九十四串文

石門局

應攤錢二萬六千九百十二串文

以上九局比較在六萬串以下二萬串以上照章定
爲中局

湘鄉局

應攤錢一萬五千三百四十七串文

武岡局

應攤錢八千零八十二串文

邵陽局

應攤錢一萬四千四百二十四串文

湘陰局

應攤錢一萬八千五百六十串文

靖港局

應攤錢一萬五千六百十五串文

新化局

應攤錢一萬八千六百三十二串文

雙江局

應攤錢八千五百五十五串文

本城門市局

應攤錢三千八百二十一串文

以上八局比較在一萬串以下照章定爲小局

督院批據詳及清摺均悉仰仍詳候

南撫院核示遵行仍錄報備查繳摺存

撫院批據詳已悉查岑前院任內整頓釐金章程曾經本撫院於奏保長收各員案內咨

部有案此次改訂比較自爲因時變通核實稽徵起見應行照准仰卽通飭各局卡一體遵照仍另繕清摺一分呈候咨送

度支部立案此繳摺存

會請核咨高等實業學堂暫借銅元局劃分界限情形詳

文

爲會詳核咨事案奉

撫憲批本司處詳擬將舊製造局借給高等實業學堂作爲實習工場一案奉批據詳已悉該司以南城外銅元局各廠機器林立什物山積一經挪移卽難修復擬將城內稻穀倉舊製造局改借高等實業學堂作爲實習工場自係爲遵照

度支部奏定章程保存機器材料以待選擇提用起見然仍別擇相當局廠撥借應用具見於慎重公產之中仍寓顧全公益之意苦心調劑洵爲兩得其宜自應照准定議惟前據提學司

稟稱高等實業學堂學生進習本科已歷五學期之久而
學部注重實習考察綦嚴此項工場須臾不容再緩又據教育
總會函稱該校實習工場所購各種機器所聘各門洋教習均
早到湘苦於無地安置難施教授情形尤爲急迫查舊製造局
不無破壞改作工場不能不量加修葺且現有工藝學堂借設
其中遷讓亦非易事以此周折理料必尙需時實業學堂實已
迫不及待未便遷延本撫院再三審度應如來詳以舊製造局
改撥高等實業學堂由提學司督同該校監督迅卽詳加勘驗
擇其必不可已之工程酌量修改但期合用不求美觀以爲經
久之計目前姑將城外銅元局暫借開辦以應急需局內房屋
無庸改動各廠一應機器材料由提學司會同官鑛處派員前

往逐件檢點造具清冊就廠內劃出空間房屋概行封固保存不得絲毫挪借損壞以備

大部提用一俟製造局修理竣工再將銅元局遷讓不得久踞用符定案至舊製造局估工修理應如何確定期限銅元局空餘廠屋應如何劃清界限保存之機器物料如有遺失損壞應如何擔任責成並飭提學司督同該校監督妥議條款先行移明藩司會詳立案以昭慎重本撫院以該校學生株守待課廢時失學不免虛擲光陰至爲可惜爰出此兩全辦法揆諸該司實事求是之本意度必深表同情也除行提學司官鑛處外仰卽分移遵照辦理此繳等因奉此並准財政局監理官咨開昨

電請

部示旋奉

部庚電內開歌電悉銅元局機器等項經湘撫電請撥借實業學堂實習之用業由本部電准暫借將來總廠需用仍應選撥等語茲據電稱各節除關係鑄造銅元機器物料仍應妥爲封存聽候選擇外餘准該學堂借用並飭將借用廠房機器等項詳細開單報部可也等因准此查銅元局面積甚廣機件林立學堂雖係暫借自以劃清界限爲第一要義當經本司處會商提學司委派卞守斌孫陳直牧繼良等與高等實業學堂監督曹典球前往會勘茲據該守等劃分地段開具清摺前來本司處覆加查核所開前後四至界線尙屬規畫井然應即將鍊鉛各廠及銅元局之辦公室總辦公館等處暫借該堂應用其原

有烘片碾片春光印花鎔銅各廠均皆照舊一律封存派員駐局看守原存機器要件逐一開具清冊呈資以昭鄭重至此該堂借廠原屬學期急迫一時權宜之計誠如

憲台批示不得久踞以昭限制現在城內舊製造局機件什物業經由司委員遷移完竣應請飭下提學司迅速派員前往估勘修理以便該堂尅期遷讓用符原案而資保存所有高等學堂暫借銅元局劃分界限情形理合詳請

憲台俯賜察核示遵並懇咨明

度支部查照實爲公便再此案係本署司主稿合並聲明宣統

三年五月

撫院批查此案續准

學部來咨已分行該司暨提學司會同議詳在案應俟會詳到院再行彙核併咨免啓爭執仰卽分移遵照此繳摺冊圖分別存送

實業學堂借銅元局作實習工場一案請仍准照前批辦理詳文

爲錄案具詳事案奉

憲台札開宣統三年四月初五日准

學部咨開實業司案呈據湖南高等實業學堂教務長黎尙雲呈稱湖南高等實業學堂急需工廠實習已經湖南巡撫電請度支部核准撥用銅元局在案及近閱提學司吳慶坻復湖南京官電稱實業學堂實習工場現奉撫院批准暫借銅元局爲

學生實習地仍撥給稻穀倉舊銅元局址改設工場尅日修葺并添入興業公司房屋足敷應用等語查湖南高等實業學堂所習學科爲鑛業土木機械應用化學并附設工業教員講習所爲金木工等科非建築極大工廠不足以分科實習若該司所稱稻穀倉舊銅元局址房屋旣已損敗地域不過二十丈且在城內不能再圖擴充並無自來水又近軍裝火藥局極爲危險萬不可用作工場又查南城外銅元局久經停鑄曾改爲提煉黑鉛廠就已有之鍋竈爐房及發動機等件以爲冶金實習之用並不必再耗多金另行修葺至銅元局原有機器多已提賣現除銅元印花等機尙可選擇提運外其局中什物及黑鉛廠新添之件閒廢不用必至生鏽若行拆卸又卽破壞是閒廢

於公家未必有益提運則於器械有損况造幣廠監督及幣制局司員皆言湖南斷不至再行開鑄銅元既不開鑄則不可拆卸之機器及零星物件概撥爲學堂實習之用尤爲便利而不耗費現今公家財政支絀學堂實習又不容緩更何必舍適用之銅元局仰屋咨嗟另謀建築至謂物料機件爲歎甚至則學堂必需用之鍋爐及發動機等件一經借用即可省節鉅款並可資成學堂保守以免廢置生鏽公家不耗多財學堂得資實用爲此呈請主持致電湖南巡撫指撥南城外銅元局爲高等實業學堂工廠等因到部查湖南高等實業學堂實習工場本部前接湖南學司江電曾稱稻穀倉舊址未能適用支電又稱添入興業公司房屋足敷應用等語若果如該紳所指距水遠

且近火藥局種種窒礙亟爲可慮南城外停鑄之銅元局據稱既經度支部核准借用似應仍照原議布置以期地勢相宜而免重葺之煩費相應咨行貴撫查明辦理並希見覆可也等因到本撫院准此合就札行札到該司即便查照會商學司詳覆核咨並轉飭該堂知照此札等因奉此查此案原係學司詳准奉

憲台札飭將舊銅元局暫借高等實業學堂改設實習工場并飭清理財政局及官鑛處點交接收等因本司當以銅元局廠屋機件成本約四十餘萬兩而所存物料價值亦昂

度支部具奏造幣廠章程第五條內載所有各省舊設銀銅元廠機器廠房材料准總廠選擇提用等因是則該局所有廠機

應在聽候

大部選用範圍之內且該學司原詳該校購機購地建築等費原估銀三萬兩除已抵撥壹萬五千兩外所欠僅壹萬五千兩而詳內據監督曹典球所稟則建議因改直將全局機房通同規畫爲該校之用勢難故違

部章遵以數十萬金之基本爲該校一部分之所需然以該校學生嚮學方殷不能不悉心規畫是以有委員履勘另訂辦法之請也迨至本年正月十七日奉到

憲台批准另商辦法當經移明提學司一面委員會同曹監督勘明該局機件林立什物山積一經挪移斷難修復即有餘地亦難敷該校實習之用並經飭據勘明城內稻穀倉地方舊製

造局一所地面四百六十方丈大小房屋六十七間價值壹萬壹千餘兩相度形勢堪資應用本司當以學司原議志在借地借房舊製造局地面既寬房亦不少足敷該校設場之用學堂當無異詞是以復有改借舊製造局之請也嗣於三月初五日奉到

憲台批示據詳已悉該司以南城外銅元局各廠機器林立什物山積一經挪移卽難修復擬將城內稻穀倉舊製造局改借高等實業學堂作爲實習工場自係爲遵照

度支部奏定章程保存機器材料以待選擇提用起見然仍別擇相當局廠撥借應用具見於慎重公產之中仍寓顧全公益之意苦心調劑洵爲兩得其宜自應照准定議惟前據提學司

稟稱高等實業學堂學生進習本科已歷五學期之久而學部注重實習考察綦嚴此項工場須臾不容再緩又據教育總會函稱該校實習工場所購各種機器所聘各門洋教習均早到湘苦於無地安置難施教授情形尤爲急迫查舊製造局不無破壞改作工場不能不量加修葺且現有工藝學堂借設其中遷讓亦非易事以此周折理料必尙需時實業學堂實已迫不及待未便遷延本撫院再三審度應如來詳以舊製造局改撥高等實業學堂由提學司督同該校監督迅卽詳加勘驗擇其必不可已之工程酌量修改但期合用不求美觀以爲經久之計目前姑將城外銅元局暫借開辦以應急需局內房屋無庸改動各廠之應機器材料由提學司會同官鑛處派員前

往逐件檢點造具清冊就廠內劃出空間房屋概行封固保存
不得絲毫挪借損壞以備

大部提用一俟製造局修理竣工再將銅元局遷讓不得久踞
用符定案至舊製造局估工修理應如何確定期限銅元局空
餘廠屋應如何劃清界限保存之機器物料如有遺失損壞應
如何擔任責成並飭提學司督同該校監督妥議條款先行移
明藩司會詳立案以昭慎重本撫院以該校學生株守待課廢
時失學不免虛擲光陰至爲可惜爰出此兩全辦法揆諸該司
實事求是之本意度必深表同情也除行提學司官鑛處外仰
卽分移遵照辦理此繳等因奉此本司遵卽遴派財政公所科
長卞守斌孫並由學司委派學務公所科長陳直牧繼良與該

堂監督曹典球前往該局劃借地址封存機件一面派員點交稻穀倉製造局房屋以便該堂從速修葺將原借之銅元局房屋遵照原案遷讓以重公產茲查該學堂教務長黎尙雯原呈謂稻穀倉局址房屋既已頽敗地域不過二十丈查稻穀倉地方面積前據委員勘明確有四百六十方丈內有機器廠一所鍋爐烟窗畧加修葺即可就用其餘大廳房屋及織布染布廠均皆寬廣足敷支配合之全局磚瓦材料地基等項一併估算約值銀一萬一千餘兩是該教務長之所呈與該製造局之房屋地址實在情形俱不相符其爲捏詞聳聽者一原呈又謂無自來水又近軍裝火葯局極爲危險查製造局有塘一面雖非自來水亦足供該校學生實習之用至湘省火藥局實係在北

門城外軍裝局又僅係貯積軍裝並無火葯所謂危險亦屬假說以圖巧卸之意其爲捏詞聳聽者二原呈又謂南門外銅元局久經停鑄原有機器多已提賣現除銅元印花等機尙可選擇提運外其中什物及黑鉛廠新添之件閒廢不用必至生鏽若行折卸又卽破壞等情查銅元局開辦之始卽預計餘利以供興學及浚浦練兵之用廠屋建築之費計十餘萬兩機器亦二十餘萬兩查該局光緒三十一年八月開鑄三十二年十二月停撤共計餘利百餘萬兩以之抵支尙不敷銀四十餘萬兩奉

前考察財政大臣陳查明奏令由本省自行籌款歸墊並改作他項之用以期收回成本各在案光緒三十三年河南銅元局

雖將鍋鑪購用一座而三十四年銅元復鑄復經添配應用上年並遵奉

部示將各機件開列清冊妥爲保存是該教務長所呈與銅元局虧失鉅款儲存機件之實在情形亦不相符自係以一面之辭爲圖久據之計其爲捏詞聳聽者三原呈又謂造幣廠監督及幣制局司員皆言湖南斷不至再行開鑄銅元既不開鑄則不可拆卸之機器及零星物件概撥爲學堂實習之用尤爲便利而不耗費等情查本年三月十三日准清理財政局移准監理官函開銅元局機器物件所值甚鉅本監理官既經點驗於前未便放任於後致干部詰昨電請部示旋奉部庚電內開歌電悉銅元局機器等項經湘撫電請撥借實業學堂實習之用

業由本部電准暫借將來總廠需用仍應選撥等語茲據電稱各節除關係鑄造銅元機器物料仍應妥爲封存聽候選擇外餘准該學堂借用並飭將借用廠房機器等項詳細開單報部可也等因奉此查部電所指鑄造銅元機器物料自應以上年報部清單爲根據卽祈由局移請藩司衙門查照前次報部清單逐件封存原所派員典守俾昭慎重至允借之空間房屋與其他機件並乞飭承詳細開單見示以便呈報等因是該教務長之所呈與機件物料應由司派員典守實在情形實不相合以局中籌度之人故爲局外不諳事實之言其爲捏辭聳聽者四總之此案既奉

憲台批准暫借定案於前自應仰懇

憲台主持於後本司爲保持大宗公產起見實有未敢安於緘默者謹將關於此案文牘另錄成冊並繪具詳圖理合具文詳請

憲台俯賜察核准予仍照原案辦理並乞

批示祇遵宣統三年五月

會擬變通征收牌照捐辦法詳文附簡章

爲會議具詳事竊查湘省牌照捐原係於零售土膏時按照部定捐額取自吸戶由土膏店代收代繳上年十二月復經本司職道等按照蘇粵章程籌辦推廣牌照捐每吸戶吸膏一兩征捐洋三角詳奉

憲台批准在案數月以來各屬亦逐漸推廣開辦於煙禁不無

徵效本年四月恭奉電傳洋土藥一律增重稅額

諭旨遵卽將已辦牌照捐處全行停止嗣奉

度支部四月寒電開本部原定牌照捐章程於零售土膏時取之吸戶尙與

外部原奏不相違悖現正與

民政部商訂章程商定後再咨等因湘省亦仍遵照停捐待章嗣蒙

憲台以湘省於此項牌照捐開辦以來對於烟民取締至爲嚴厲現捐務旣停人民已有烟禁已弛之謠倘再事久停實於禁烟前途大有妨礙等情電達

度支部請於此項牌照捐仍接續暫行開辦俟接奉部定章程

再行遵照辦理旋奉

憲台札准

度支部電准由

憲台斟酌情形督飭續辦等因本司職道等遵卽通飭各牌照捐處按照牌照捐原額續行抽收據各屬稽核處委員稟稱各該處土商店舖以牌照捐既已弛令於前飾詞謂吸戶不肯復行遵用牌照紛紛請示辦法前來本司職道等以牌照爲取締烟民最關緊要之証據從前捐款由土商店舖代收代繳辦法已恐未能十分周密爲屬於

大部奏定之案自未敢任意率更茲該土商等既稱吸戶不肯復行遵用牌照而各該土商於賣膏時亦竟不索驗吸戶牌照

自非另籌妥善辦法不足以重禁令而杜刁狡經本司職道等再三籌議擬請將此項牌照捐以後均自行遴委委員分途設處查驗吸戶購膏牌照隨時將牌照捐收訖填給收捐繳驗後始准赴膏店購膏無繳驗及無牌照者均不准購買一面輪派妥實司巡赴各土商店舖門首查收繳驗以杜巧偷隱抗之弊而收寓禁於征之效先從省城辦起徐圖及於各屬並經會同擬定變通辦法簡章十二條正擬具詳適奉

憲台發示

外務部箇電內開牌照捐既係取自吸戶應仍於吸戶領牌照時按其所報每月吸烟若干卽令捐若干方是取締零售辦法若令土膏店代收代繳便是捐及大宗貿易等因恭釋

部電是本司職道等此次所擬變通查驗吸戶牌照隨收捐款章程尙與

大部所示便於稽察吸戶及取締零售辦法之旨兩相符合除俟奉到

部定章程再行另案遵照辦理外謹將會同酌擬變通征收牌照捐辦法繕具清摺詳請

憲台俯賜察核是否有當伏乞

批示祇遵再此案係本藩司主稿合併聲明宣統三年五月

續訂變通征收牌照捐簡章

一 本章程專爲稽察吸戶取締零售以遵照

外務部此次續訂禁烟條件第七條末節爲宗旨以參

酌湖北現行章程爲輔助凡從前頒示章程未經本章程援用者應卽取銷俾免歧出而便遵守

一牌照捐款原章由土膏店代收代繳現查各該店於收捐後填發煮膏執照時往往不據實填寫以多報少舞弄漁利應卽改歸總分各稽核處自行設處收捐以昭覈實

一省城收捐處城內分設東西南北中五處西南城外繁盛地方酌設一處共六處均借用公屋或寬廠廟宇每處派委員一員收捐司事二人填發繳捐憑單司事二人巡勇二名公丁一名火夫一名

一省外府廳州縣應設收捐處有稽核處者由稽核委員

酌量設立未設稽核處之州縣與原設稽核處現歸併地方官辦理者均由地方官酌量設立除常德湘潭及繁盛之府直隸州城准設一處至二三處外其餘廳州縣惟地方官兼辦者准於城內設立一處現設稽核處之廳州縣祇可分設四鄉城內外應歸稽核處兼辦每處酌用司事一二人巡勇一名視事之繁簡規定之務求撙節毋得稍涉虛糜

一設收捐處後凡吸戶購土購膏均應持牌照先赴收捐處驗明按牌照上所载癮量購買若干日之烟土烟膏將捐繳清由收捐處於牌照內本日及預購若干日之下填明土膏數目蓋一圖章另填繳捐憑單及廻照二

聯給該吸戶向各店購買

一收捐額數查照鄂章分土膏二項凡吸戶購土一兩征收銅元錢壹百陸拾文購膏一兩征收銅元錢貳百肆拾文仍按鄂省遞加期限參酌本省情形逐次加重

一繳捐憑單分購土購膏二種應用四聯第一聯存根歸收捐處截存備查第二聯繳驗省城每半月由收捐處隨同捐款彙解省外每一月由稽核處隨同捐款彙解第三聯憑單歸吸戶收執第四聯廻照由土膏店截留每半月省城彙送總稽核處查對省外卽彙送該廳州縣之稽核處查對

一各土膏店遇吸戶來購土購膏必先查詢有無繳捐憑

單無憑單者不許售給有憑單者須驗明單上所填數目售給不許逾格多售並應分別係何項憑單購土者不准購膏購膏者不得購土將該單截留廻照時應加蓋該店牌名戳記以爲識別屆期彙呈仍分別土膏二種各結售銷總單俾免混淆而便稽考

一各店售賣土膏應責成稽查委員司事及巡警隨時稽查如有私售與無憑單之人及逾憑單上數目多售情弊即查照鄂省章程第十七條立予調銷憑照將店封閉店存土膏全數充公銷燬

一各店存土存膏以及新到洋土藥均應仍照舊章隨時報請稽核處查驗粘貼驗花零售若干卽以截留廻照

上所填數目爲憑每半月由稽查員司赴該店核對出入賬簿點驗存貨是否相符如有數目參差卽係隱匿私售應照前條辦理

一各土膏店應一律換給新式營業憑照並取具遵照此次章程貿易違卽甘受封閉切結仍遵照

部定原章估核成本分上中下三則惟查省外廳州縣之城鄉市鎮各土膏店多費本微末之家散漫難稽亟應切實整頓茲定須有二千元費本者方准領下則憑照不及此數者卽將從前憑照調銷准數家歸併一家公立牌名另領新照合作一處售賣以便稽查

一各土膏店換領憑照繳納照費原章上則六元中則四

元下則二元茲查鄂省照原章增加兩倍湘省應卽仿照加收如下則原止二元此次卽加作六元餘以類推

一未領憑照之店及資富吸戶囤藏土膏准自次出示之日起限半月內一律報處查驗轉售與領有憑照之店吸戶准照懸量酌留至三個月之土膏爲止照章繳捐其餘仍轉售與有憑照店舖逾限不報准無論何人指名帶查查獲土膏全數變價充賞但具報之人須照原章覓保人擔保如有挾嫌妄報卽送縣懲辦據報查私須委員親帶報口前往或派誠實司事前去不得任聽巡勇搜查致滋流弊

一吸戶不領牌照及有照不赴收捐處繳清捐款請領憑

單而向店舖強買或憑單數少買數率多者責成巡警
隨時查拏交稽核處並准店舖自行扭送稽核處轉送
地方官從嚴重辦

一此項牌照捐性質原與統稅性質不同統稅係抽之煙
土牌照捐係取自吸戶本屬截然兩事現由稽核處自
行設處收捐不由各商店代收代繳益覺界限嚴明以
符

部章其有未盡事宜應隨時酌量加改

請將革職留任調署零陵縣准補沅陵縣知縣郭中廣
奏叅革職永不叙用詳文

爲詳請

奏叅以肅吏治事竊照本年三月內據零陵縣附生姜軼羣等聯名具控調署零陵縣郭令中廣庸懦貪污一案當經本司遴委卽用知縣黃慶翰馳往密查嗣據覆稱查得郭令於拏獲搶犯唐泰山不訛不辦初到任時鄉民送盜每一起多則索規費二十餘串少亦須錢十餘串至本年四月初一日起忽將此項規費核減每送一盜仍收錢六百文並有冷水市夏光裕典當因取息過重團紳控請查封郭令得賄五百串准其改爲取息三分展辦三年而後改爲二分五釐且以門丁周雨樵之言是聽其餘各家丁亦明目張膽不恤人言每遇下鄉相驗必帶親兵三四十人書役二三十人除由造福堂備送夫馬之外家丁復向屍親勒索夫馬費一百數十串不等具復到司正詳請撤

叅外間又據該縣職員王治安等以民不聊生
本司誠恐黃令所查或有未盡復委直隸州州
確查茲據查復該縣丁役遇案詐索寔有其事
其所查郭令下鄉檢驗索費與黃令所查相同
人書差尤多勒索各等情稟復前來伏查時事
是在地方官加意拊循以期休養生息乃調署
沅陵縣知縣郭中廣平日既不知振作復收受
串並且縱容丁役勒索擾民查郭令前在署善化
年三月省城匪亂曾奉

憲台奏叅將其革職留任以觀後效乃該令不惟
至如此貪庸寔屬不堪造就應請

憲台將革職留任調署零陵縣准補沅陵縣知縣郭中廣
奏叅革職永不叙用以肅官方除飭接署縣任令嚴拿該門丁
周雨樵到案澈究并將各項規費及命盜各案分別禁革嚴拿
外是否有當理合詳請

憲台俯賜察核批示祇遵

宣統三年五月

會議擬將長沙日報館歸併官紙印刷局辦理詳文

爲會議具詳事案查湘省籌辦官紙印刷局一案前經本
詳奉

憲台批示如詳辦理等因仰見

憲台提倡文物之至意莫名欽佩查該局應委經理各員業經
本
查照原案分別遴委並呈報在案至原詳內於配置機

件一項請將長沙日報館歸併官局以期統一一面酌訂辦法
另案具詳一節現在官紙印刷局正在趕籌開辦事宜長沙報
館亦應先行籌擬歸併誠以該報館爲官紙局內之一部分兼
籌通顧自不能不併類規畫茲經本司等再三商酌擬請將該
報館從五月初一日起歸入官紙印刷局範圍官紙局未開辦
以前暫隸於財政公所管轄以便通盤籌算報務改良事宜亦
卽由本司督同經理以一事權至各屬報費解款屬於五月
初一日以後者由本司通飭各屬逕解財政公所其在五月
初一日以前各屬蒂欠學務公所之報費由本司查明數目
開單移由本司代爲催繳轉解學務公所應用該報館機件
器具數目俟歸併時另由本司備文繕摺專案移交再行呈

報至該報館歸併後應支之款應彙歸官紙局通同豫計惟官紙局未開辦以前該報館月應額支若干應由本署司飭令該局經理委員擬摺呈核酌發用昭覈實所有會同籌擬歸併辦法是否有當理合具又詳請

憲台俯賜察核批示祇遵再此件係本署司主稿合併聲明宣

統三年六月

撫院批如詳辦理仰卽轉飭遵照此繳

請飭抄發各項公牘交日報館編輯詳文

爲詳請事案查本司會同提學司詳明長沙日報館改歸財政公所管理一案當奉

憲台批准照辦在案查日報之設原以開通心志增益見聞舉

凡關於政治實業學務交涉以及各項交通現時情形均須旁徵博引從前辦法未甚妥善采錄時形簡畧茲經本司飭令承辦委員改定章程分爲十類首

諭旨恭錄次瀛寰電語日下要政三湘奏牘再次江漢彙誌那國僉載會垣紀事貨殖瑣錄青陽雜俎藝苑偶存按類調查循序編紀並增加紙幅每日出正副報二大張庶幾聞見既宏觀摩有益惟是三湘奏牘欄內須彙載本省公署文牘然往往窮於採訪頗形缺點茲擬將各衙門一切文牘無論何項事件但使已經發佈者悉行鈔送該報館登載俾資衆覽伏查

憲轅爲全省行政總匯之區文件既屬繁多其有關於政治風俗者尤爲衆情所專注擬懇

憲台飭承查核如遇發佈之件隨時鈔發該報館以憑編輯除分別移行外理合具文詳請

憲台俯賜察核示遵 宣統三年六月

委員查勘各屬煙苗情形並請將奉禁不力各地方官擇尤懲處詳文

爲詳請事竊照湘省禁種罌粟前經通行限至宣統元年一律淨絕並委員馳赴各屬查禁已由各該地方官取具各都團永不再種切結上年本司到任後當經擬就禁種白活告示印發各屬剴切曉諭認真嚴禁誠恐各廳州縣奉禁不力奸民貪利私種復於去秋今春兩次委派委員分途查勘均經呈報

憲鑒各在案查湘省所屬除郴州南洲湘潭瀏陽衡陽清泉零

陵安仁東安江華桂東興甯華容安鄉通道等州廳縣向不栽種罌粟外其餘各屬均種有煙苗而以桂陽州晃州廳永順龍山桑植鄯縣永定安化等州廳縣爲最多自奉

飭禁以來各該地方官實力奉行者固不乏人而因循粉飾者究所不免茲據委員會同各該地方官陸續稟報從前種煙地畝業經改種雜糧者共五十六州廳縣雖有愚民間於高山僻地潛行私種尙屬無多惟桂陽州鄯縣永順永定桑植安化等六州縣現復查出煙苗不少安望尅期淨絕各該州縣身任地方禁煙是其專責似此毒卉復萌查禁不力應請擇尤懲處以重要政查本任桂陽直隸州知州溫錫純上年十二月卸事在任已逾三年於煙苗下種竟無覺察且據委員稟稱該州西北

鄉煙多之故係上年春間該州境內打石坳地方種煙被拔適有客商販土路過鄉民聚衆將土扣留該直牧誑許秋後准其私種一年始將原土退出以故鄉民信以爲真幾致煙苗遍地實屬辦理紕繆咎無可辭又署鄱縣知縣唐應瑩該縣境內上年曾拔除煙苗二千餘畝本年委員查拔多至三千九百餘畝與上年幾增一倍已將該令先記大過二次又永順縣知縣邢驥該縣煙苗據該令具稟派人查過二次親查一次境內實無煙苗迨經委員在於該縣境內查出煙苗拔除後該令遂捏詞粉飾並據該管府金守蓉鏡密稟該令辦事疲軟玩忽寬縱縣境煙苗甚多嗜利之紳拚命播種等情已將該令先行撤任以上三員應如何量加懲儆之處伏候

鈞裁合將委員查勘各屬煙苗情形並請將奉禁不力之地方官擇尤懲處緣由具文詳請

憲台俯賜察核批示祇遵

宣統三年六月

督院批據詳已悉該州縣等禁烟不力咎無可辭仰卽照章嚴議詳候

撫院核辦示遵繳

撫院批據詳已悉禁煙以禁種爲入手辦法

功令森嚴各地方官應如何切實奉行乃本任桂陽直隸州溫錫純署鄞縣知縣唐應瑩永順縣知縣邢驥於轄境烟苗均未認真查拔毒卉蔓延勢將伊於胡底邢驥意存欺飾尤屬不應溫錫純唐應瑩均著停委二年邢驥著停委三年以示懲儆

仰卽遵照註冊并通飭各廳州縣勿再玩延干咎此繳

委查署永綏廳同知董鴻勳劣跡大概情形并將大挑知縣謝啓發記大過三次詳文

爲詳明事竊查前署永綏直隸廳事准補株州廳同知董鴻勳前在永綏任內曾據廳民石昌榮龍天德等以董丞玩視災賑於苗兵聽差之外新設堂總十二名每隊復設總役三名共十二隊散役增至千百餘人結黨訛索聚賭逞兇并有開燈吸煙逼斃人命情事先後控奉

憲台批司委員查辦并據該民等具控到司當經本司札委羅令良經馳往確查去後旋據羅令稟稱沿途詢諸居民聲稱該廳上年四月間天降冰雹所管六里地方蕎麥牲畜房屋損壞

不少經董丞飭紳會同被災各里團備查明情形并飭令補種
擬加撫卹等語原議每家借穀一斗照市折價仍須按月取息
至原控董丞重用門丁胥役訪之輿論不爲無因並據抄錄董
丞所批飢民公呈批語及借穀示諭前來本司查地方遇有災
荒自應量加賑撫乃董丞於被災之後既擬發穀以資賑卹輒
又折價取息辦理殊屬紕繆且所控丁役訛索各節既稱不爲
無因是其縱容丁役亦可概見就所查情形而言詳叅亦不爲
枉第恐所查未盡確切擬覆查再行嚴叅正委員覆查間適董
丞交卸回省謁見詢以被控情事該丞則數其在任政蹟辯白
不休本司飭令開摺呈核旋據開具清摺前來本司詳加查核
如所稱裁革陋規修葺城垣清理馬廠籌修廳志推廣學堂清

理義穀倡辦水會增廣孤貧等事均有事實可憑而證之士民原控其差名賍數及受害之人又皆歷歷可據且查董丞所辦各事如修理工程等項其費皆如何籌集是否該丞捐廉抑係由廳勒派卽如修輯志書一項據稱共用錢一千串在於勸學所及育嬰項下提錢五百串以勸學育嬰之款乃提作不急之需據稱出於該紳等所請亦未指出姓名究竟出自何人有無抑勒且其餘五百串是否實係該丞捐廉均未能詳細指明又如裁革陋規究竟所裁是何名目傳詞堂費已否盡除至該廳義穀從前究有若干經董丞清理之後有無加增其備荒平糶穀董丞接交錢四百串現在此款尙存錢穀若干又增廣老幼孤貧一項查該廳老幼丁額定一百九十九名歷在屯防項下

開支口糧穀四百七十七石零六斗訪聞該丞係折價發給又不按照市價此次廣額是否卽就屯防項下之穀開支抑由該丞另行籌款均未分款叙明其爲有意粉飾可知查董丞前署古丈坪廳同知聲名本屬平常及調署永綏徒騫虛名於丁差則漫無約束卽操守亦難盡信第因羅令所查未確未便含糊請叅當卽密委大挑知縣謝啓發馳往覆查詎謝令奉札半月之久忽生畏避之心因聞本司交卸在卽遂詭稱中途患病難於前進遽行繳札請另委往查前來以特札委查之件竟如此取巧規避實屬荒謬已極本司雖行將去任然在任一日究有一日應盡之責未便因其繳委遂竟置之不問應請將大挑知縣謝啓發記大過三次以爲臨事巧滑者戒除將原案移交外

并請

憲台批飭接署司遴委妥員馳往確查分別核辦所有委查董丞劣蹟大概情形并委員謝令臨事巧滑請予記過各緣由理合詳請

憲台查核示遵

宣統三年六月

呈文一

申報札委各員馳赴各州廳縣查禁種煙呈文

爲呈報札委事竊查禁種罌粟上年疊經出示曉諭並委員嚴查已據各屬取具各都團永不再種切結在案本司到任當卽刊刻白話告示通飭各屬嚴行查禁又在案現屆栽種罌粟收漿之際誠恐陽奉陰違奸民復乘間私種自應委員分途密查

以冀永除烟害茲查有就職直州判張文森堪以委赴長沙善化甯鄉益陽龍陽湘鄉安化一帶又就職直州判徐炳仁堪以委赴湘潭株州攸縣茶陵安仁常甯一帶又就職直州判何天衢委赴武岡新甯城步通道新化一帶又就職直州判譚毓萃委赴邵陽祁陽零陵東安一帶又就職直州判鄧英奇委赴平江巴陵湘陰臨湘瀏陽醴陵一帶又就職直州判朱肇端委赴武陵桃源沅江沅陵華容溆浦一帶又就職直州判段自慎委赴辰谿鳳凰瀘溪乾州保靖古丈坪一帶又就職直州判郭德謙委赴芷江黔陽麻陽會同永綏靖州綏甯一帶又就職直州判黎子哲委赴永順永定晃州桑植龍山一帶又就職直州判周魁士委赴澧州石門慈利南洲安福安鄉一帶又就職直州

判馮培棟委赴耒陽衡陽清泉衡山鄧縣一帶又就職直州判
王鼎彝委赴道州甯遠江華永明新田一帶又就職直州判金
麟昌委赴郴州永興宜章興甯桂東桂陽一帶又就職直州判
李之暘委赴桂陽州藍山嘉禾臨武一帶查禁烟苗務卽會同
地方官督飭拔除淨盡並將某日經過某處逐日編寫日記倘
遇有私種情事應卽查明若干畝以及何鄉何團種戶是何姓
名明查暗訪分別詳細另開清摺分起稟報查核除分咨札委
外理合將派赴各屬查禁煙苗委員銜名具文呈報

憲台察核

宣統二年九月

申報據常德府譚承元等冬電稟查封劉隆慶財產呈文
爲呈報事案奉

憲台札據常德府譚守承元冬電稟劉隆慶一案查封財產請飭常德商會點收及通緝劉子修卽克篤各情形飭卽遵照辦理復奉

憲台密札內開本年十二月初二日據武陵縣廖令世英稟奉札辦理劉德沛倒欠官商民各欸查封產業分別抵償開具密摺稟乞察核密示祇遵等情到本部院據此合將原稟並摺密封札發札到該司卽便查照妥速核議密飭遵辦具覆勿延此札計札發武陵縣原稟一紙清摺一扣仍繳各等因奉此查此案前據該府縣電稟卽經本司飭查隆慶所出之票有無票根以憑核辦旋據譚守等先後電復並前情到司又經本司電覆暨冬兩電悉常德花票縱無票根必有號簿隆慶未收回之票

約五萬串內外如查有的數亦應照數攤付以昭公允惟破產查封各件應交商會收存經理既係由官發交無所慮其誣害卽移商會遵照至劉子修卽克篤已飭長善兩縣及益陽縣密拏並詳咨通緝矣惟其在漢口益陽等處與何人合買是何牌名並速查覆等語譯發並詳請

憲台暨

督部堂飭知夏口廳一體嚴緝劉子修各在案嗣據武陵縣廖令具稟到日當經本司批稟及清摺均悉據稱劉隆慶應還欠款三十餘萬兩未兌花票五萬串而查封房產衣物僅值銀二十餘萬兩察核情形此外必有隱匿寄頓該令務當切實調查盡發其覆總期足抵欠款爲度該店借常德官錢局款係以田

房各契抵押應照破產律第三十四條估計價值抵還本息如有餘款再攤還各債主第估價必須核實不實惟原估董事是問至花票應否先兌應以該店東財產除兌票外是否足償欠款爲準劉恒慶倒閉後所有財產變兌花票償還官款尙屬有餘爲常郡官紳商民所公認故不妨先兌花票後還欠款隆慶現象似與恒慶不同花票究應先兌與否與夫房產衣物之若何估售商款若何抵償應由該令就近稟商譚守會同蘇令鄧令邀集商會各紳並各債主妥商辦法稟請核示仰卽遵照並候

憲台批示此繳摺存除印發外爰奉前因理合將電復及批示情形報明

憲台俯賜查核 宣統二年十二月

申報札委各員前赴各州縣復查烟苗呈文

爲詳報事竊照栽種煙苗限至宣統元年一律淨絕通行有案
上年九月值煙苗播種之時又經本司委員分途查禁在案迭
據各印委稟復前來所有向不栽種及早經改種地方核之歷
年成案均尙符合毋庸再查其查見煙苗各州縣或在深山僻
地或夾雜於菜麥之中並有紳董私種包庇情事雖據稟稱拔
除淨絕未足爲憑甚有州縣因循未據報拔紳民刁悍抗不遵
拔等情業經本司察核情形分別辦理於官則記過撤任候參
於紳民則罰辦提訊懲究仍飭將未拔煙苗一律拔除淨絕惟
是委員耳目未必能周牧令空文殊難盡信現在時屆春初煙

苗漸次滋長果能周歷查勘不難一望而知應再委員復查以昭核實茲查有州判冉嗣昌堪以委赴鄧縣道州甯遠新田一帶補用知縣張令培遠堪以委赴武陵桃源澧州石門安福一帶州判丁鳳章堪以委赴沅陵瀘溪辰谿一帶拔貢知縣鄒令佩龍堪以委赴淑浦芷江麻陽永順一帶復行查禁此次各該州縣境內如再查有未拔烟苗卽係上年承查牧令宕延粉飾本司惟有欽遵上年十二月十二日

諭旨從嚴參處以重煙禁除分別移行札委外理合具文詳報

憲台俯賜鑒核查考實爲公便再

長沙 善化 湘鄉 桂陽州 臨武 藍山 嘉禾 永定 保靖 龍山 桑植 永綏

等廳州縣查禁煙苗印委尙未稟復到司容俟復到察酌情形

再行委員復查合併聲明

宣統三年正月

申報土膏牌照捐報私查罰及店舖漏報捐款條規呈文

附條規

爲申報事案據推廣牌照捐總稽查處稟稱前奉詳定湖南各埠經收牌照捐公所辦事細則第四條內開緝私辦法現在各府廳州縣稽查處次第成立稽查委員自應遵章辦理惟利弊相隨比比皆是竊恐行之既久或有挾嫌妄報或有假冒招搖轉使各土膏店舖及各囤戶人等有所藉口致令稽查委員前往調查轉生阻力貽誤事機現經知府等酌擬報私查罰及店舖漏報捐款各項條規以冀先杜弊端圖便稽查而免隱匿是否當理合開具清摺資請察核示遵等情據此除批所擬辦法甚爲周密准卽照辦並分別移行出示曉諭外理合申報

憲台俯賜察核爲此申乞

照驗施行 宣統三年二月

報私查罰及店舖漏報捐款各項條規

計開

一無論何人知有私土私膏概應赴稽核處報請委員前往調查具報之人卽稱爲報口既報之後卽應先覓實在保人赴處擔保或與保人同至既有報口又有保人委員始帶報口前往所報藏私之處眼同搜查如報口挾嫌妄報委員查係捏飾卽將報口帶回送縣嚴辦報口逃逸卽惟保人是問

一報口所報一經委員查實卽將所查私土私膏折價照

章全數充賞決不留難並不准巡勇借詞需索如有留難需索情事准報口隨時喊稟查究

一查獲私土私膏轉交發賣應收捐款仍有買主承認嗣後罰款應除去本位捐數飭令照繳如應捐大洋三角即係本位再加三倍議則應繳大洋一元二角除去本位則祇須繳大洋九角本位捐款由以後買主照繳免致重收易滋弊混

一稽核處所收三倍罰款應照前定釐金罰款章程以五成留本處充獎以五成批解本司衙門彈收

一稽核處委員出外查私雖據報口來報委員必親帶報口與本處巡勇同往搜查決不僅令巡勇與報口同往

如無委員祇有報口巡勇顯係假冒或竟有人冒充委員巡勇騷擾詐索准各土商人等隨時捆送到處以憑發縣懲辦

一查獲私土私膏充賞議罰之後稽核處隨時將土膏數目與罰款數目牌示曉諭完案如三日後稽核處並無牌示許承繳罰款店舖赴稽核處具稟以憑查究

一土膏店舖藏有私土私膏當委員搜查時敢於傳遞藏匿凡當場目擊之人即非報巡勇皆得立時指出不准於事後稟報

一各店舖簿據出貨入貨數目均應相符如先漏報捐欸後復查有私土私膏而簿據又不相符合種種弊混應

於照章議罰外仍將該店主發縣究辦

申報撤銷經收公所呈文

爲呈報事案據總稽核處委員稟稱據經收公所商董呈稱承准照會辦理湖南推廣牌照捐事宜刊發戳記設立公所於宣統二年十二月初一日開辦所有經收捐款節經批解印發週照在案其常德湘潭衡州醴陵株州岳州各府縣已經遴舉商董報由鈞處核准發給戳記先後馳往開辦所有經收捐款亦經批解各分稽核處在案至澧州益陽臨湘平江各州縣均經報舉商董於正月中旬先後馳赴各處佈置一切尙未承准鈞處核覆自上年臘月家沛等馳往各處開辦設法聯絡勞怨不辭現在捐款雖未十分暢旺而開辦各處均一律遵辦尙無隕

越惟是此項經收事宜事繁任重如筠等自慚庸拙深恐貽誤
要公各郡縣現已開辦多處一切粗有頭緒自應一律辭退以
一事權所有經收事務卽截至本年正月三十日止俟收結卽
行扣解一面造具清冊並原發戳記繳送鈞處接辦以劃界限
而清經手惟各處有已經收捐者爲日甚淺不足敷開辦經費
有收數寥寥者有並未收捐者合併聲明除電知各分公所將
經收事務一律截至月底收清批解將各項單照土膏存銷數
目分別造冊牒交各分稽核處查存並攜帶戳記回省繳呈外
相應牒呈鈞處查照轉稟藩憲批准交卸實爲公便等情據此
知府等查開辦推廣土膏牌照捐設立經收公所先奉憲台詳
明

撫督 憲核准咨

部章程嚴密由稽核處照會該董承辦又極慎重原因經收事宜責任匪輕並曾接據該董來函擔任承辦而後照送戳記在案茲忽呈請交卸並不將已設分所之處收捐數目確切指明僅稱有已經收捐有收數寥寥有並未收捐而又含混聲叙截至月底收清批解殊堪詫異知府等伏思該董縱使自慚庸拙深恐貽誤要公亦應將已經經手之處詳細清理不能如此率忽從事應令該董將總公所截至二月半止如澧州益陽平江各州縣尙未核復之處自毋庸議所有常德湘潭衡州醴陵株州岳州已經發給戳記開辦之處均當截至二月半造具冊報將欸解清方爲正辦以前之分所商董概由該董舉報一旦稟

請交卸則令各分所向稽核處接洽該董便置身事外殊覺無此情理除飭復該公所外理合稟請俯賜察核等情據此查該公所之設原係仿照粵章辦理惟粵中專爲商辦捐款多係商人承包故公所在所必設湘省局面較小一切情形究與粵中不同現經改訂章程由稽核處自行派員收捐該公所自應撤銷既據具稟前來當經飭令遵限於二月十五日一律撤去除分別移行外應否咨

部查銷之處理合呈請

憲台俯賜察核

宣統三年二月

湘藩案牘鈔存

稟牘一

議覆委員胡令國昌查覆哪噉教會購地轉轄稟摺互異一案委長沙府傳訊情形照錄供摺稟

呈覆諮議局覆議宣統三年地方行政經費預算一案稟呈覆派員蒞諮議局公同討論並非誤會局章不合法理

稟

請將撫標長沙協練軍改編巡防隊並酌定薪餉稟附清摺
呈請電達 度支部請示長沙關補抽土稅辦法稟
因病請假就醫並懇委員接署稟

書牘一

擬覆諮議局呈請將諮議局議覆宣統三年預算交會議
廳審查案意見書

擬請飭覆諮議局整頓田房稅契一案暫照舊章毋庸議
更意見書

代撫院擬復督院湘鄂加徵米捐辦法書

擬稽查禁米局全案總說明書

核議諮議局航業議案說明書

致鹽道論育嬰堂事書

諮議局整頓田房稅契議案擬請仍遵前次飭覆辦理意
見書

議復諮議局代人民陳請湘設官紙印刷局以爲不可行

事件擬請核駁意見書

致關道請查明長沙關補抽恒足豐土稅書

致關道請將長沙關補抽恒足豐土稅稅款如數提解書

復關道士藥新稅仍由本省自行派員徵抽書

移文一

覆長沙關移奉撫批安化縣會稟查王正永等將漲水灣

山地出賣瑞臧國教會一案移文

據安化縣文生王允猷等稟控王正板等混賣領土一案

移文

札文一

通飭各屬查明辦公書役改設名目籌給辛工認真整頓

札文

通飭嚴禁道喜門包等費札文

通飭各屬將所帶幕友家丁及薦主姓名開摺稟報札文

密飭武陵縣管押奸商劉隆慶等追繳虧欠官商各欸札

文

通飭各屬嚴禁荒民糾搶札文

委員密查訪聞湘鄉縣監犯脫逃隱匿不報並賄和人命

札文

通飭各屬嚴緝各匪禁革各規費札文

飭湘鄉縣迅將訪聞匪盜各案詳細查明飛速稟報札文

飭查各錢店行用錢票限年遞減札文

飭常德府嚴追劉隆慶倒欠官商各欸札文

飭長沙府查明育嬰堂從嚴整頓札文

通飭各屬確切考察文武生員及各團紳有無煙癖分別
調驗並取具各切結札文

批牘一

湘鄉縣查覆職貢李篤悌等聯名上控稟批

候補知府劉桐封查辦湘鄉縣諮議局收受民人陳請書
稟批

實業學堂監督曹紳典球稟批

常德府會稟議結劉德沛田業抵還官錢局欸項並勻攤
商欸花票各情形批

湘鄉縣會覆查訊諮議局收受民人陳請書稟批

湘鄉縣呈覆連出盜案三起稟批

委員彭守汝疇澈查永順府縣前領省穀情形並陳補救
辦法稟批

示諭一

關防詐偽告示

曉諭各房書吏並定各項紙筆費若干及永遠禁革門房
費告示

飭各房清理事案卷諭附章程

嚴禁飢民橫行爬搶告示

禁革規費牌示

嚴禁郵呈電稟牌示

上控之人務各取其各店保狀牌示

電稿一

代撫院擬覆政務處

致常德府譚守等 六件

致醴陵湘潭岳州常德等局

致岳州等局

致湘陰等局

致湘潭局

致湘潭縣余令

致湘陰等局


致常德府

代撫院擬致督院

上督院

湘藩案牘鈔存第四册勘誤表

頁數	行數	字數	誤字	改正
四	三	三四	司本	本司
四	十一	二十	後	復
二十三	十九	十八	將	時
六十一	五	三	續	續
六十一	十	三	形	刑
六十七	十一	十八	蔴	麻
六十八	三	四 <small>雙字下多一</small>	肆 <small>字</small>	
六十九	二	二	捏	控
七十一	一	十	迴	迴



湘藩案牘鈔存

稟牘一

議覆委員胡令國昌查覆哪噉教會購地轉轄稟摺互異一案委長沙府傳訊情形照錄供摺稟

敬稟者竊於宣統二年十二月十四日奉

憲台札開照得哪噉教會購地轉轄一案經前署藩司譚道長沙關吳道會委胡令國昌前往查辦查閱英領事照會該道文內所錄該令稟復該道等清摺核與稟復本部院原稟互異致貽外人口實殊屬異常荒謬應行司先將該令記大過二次註册飭知仍由該司會同該道查明該令所呈清摺因何與原稟不符此項清摺何以抄送教士有無情弊稟候核奪除行長沙

關道外札司遵照等因奉此本司檢查胡令國昌呈司清摺未
准前署司譚道移交卽經移請吳道抄送過司並將該令遵記
大過二次註冊行知因查此案事關交涉該令稟摺互異殊非
尋常錯誤可比究竟此項清摺因何抄送教士有無情弊非嚴
詰該令不能得實當經會同吳道札飭長沙臧守迅傳該令從
嚴澈訊稟候核辦去後並經會同呈報在案茲據臧守稟以遵
卽傳訊去後茲據胡令國昌來府遞投親供知府復加面詰各
情據胡令國昌面稱奉委查辦此案因教會未肯通融卽將辦
理大概情形會稟並於回省銷差時另具清摺叙明與該處士
紳商允劉教士玉堂從中調處俾就範圍會稟與清摺雖詳畧
微有不同無非欲仰體憲意妥速了結然所述各情皆以繳價

退業爲詞未嘗以稅契管業爲請至於清摺僅具三分教士如何得知無從懸揣卑職亦無抄送教士情弊現奉喚訊不敢捏飾等語知府再三詳詢據稱並無捏飾之處似尙可信等情竇同原遞親供稟覆並另呈該令照抄原遞清摺前來本司覆查此案教會堅不退地無非以前署司譚道與長沙關吳道公函內有原牧師並無不合應飭縣稅交管業等語爲藉口而兩道致函係據該令清摺妄指董昭喜等所呈白契爲老契並非官荒並據稱胡前令鑑瑩允爲幫忙並無攔阻等情以致授人以柄本司調核該令會稟於董昭喜等呈契則云究係白契年湮代遠無從查究於胡前令則云查閱契內界址寬闊恐有別項情弊將契扣留囑勿兌價顯與摺稱董昭喜確有老契胡令已

允照辦等語寔有互異情形該令尙稱詳畧微有不同抑何欺
朦乃爾至清摺如何抄送教士事無佐證該令工於脫卸不難
巧飾其詞然現在該教會堅以兩道公函爲據是兩道以公函
致誤此案該令以清摺致誤兩道卽無抄送教士一節而清摺
謬誤情形已爲外人口實追原禍始該令咎何可辭若不先將
該令從嚴懲儆將來交涉人員視爲無足輕重貽害何堪設想
至胡令國昌應如何參處之處出自

憲裁除稟批示並移會關道外所有飭據訛明胡令國昌查辦
哪喊教會購地膠轕一案緣由理合照繕供摺稟祈

大人俯賜鑒核批示祇遵再此案公函牽涉吳道礙難會稟合

併聲明
宣統三年正月

呈覆諮議局覆議宣統三年地方行政經費預算一案稟
敬稟者昨晚奉

憲台函諭並發諮議局函一緘當卽酌派財政局科長費令於
今晨前往以備詢問一面稟覆

憲台在案頃據費令前赴言旋面稱晤議長陳君炳煥言及此
次覆議本年預算遵章僅議地方行政經費確守上年交議範
圍其中移緩就急酌盈劑虛亦主和平商辦凡巡警教育實業
鑛務各項經費已蒙各主管行政長官先後蒞局商妥現統經
常臨時兩門合計爲二百二十八萬五千餘兩較上年議案又
減去六萬九千餘兩實超過交議原案十六萬五千餘兩照章
應另籌欸該局業於上年議籌口捐房捐營業捐米穀捐等在

案爲數大有多餘此案該局開會即可通過各主管行政長官亦已均無議異惟交議數目係以出爲入猶恐管理財政衙門仍以國家地方通籌出入尙屬不敷未能允洽是以函請

憲台派筭握財政大員蒞局協商允許以免再有周折並無質問等情竊思諮議局覆議預算於審查之時先邀主管行政長官協商苦心亦良可鑒惟交議議案既有變更應由該局先行通過行政長官呈送

憲台交會議廳審查以定可否未經該局通過之前行政長官即使蒞局斷無卽行許可之理若第空言商榷一番亦何須多此一舉上年交議預算地方行政經費之數係就辦事方面計畫並非欸皆有着後雖加籌各項入欸至今尙屬多半懸虛且

該局以出爲入係本年初次試辦預算未經劃分稅項時權宜辦法本司豈能卽認此爲地方經費固有之數但就本年預算而論司本仍應通籌出入惟當盡力維持既不能將國家經費置諸後圖亦不能使地方經費概主消極也諮議局此次覆議預算本司此時毋庸過問該局照章開會決議呈送

憲台交會議廳審查如無爲難可否自有公議伏乞

憲台函知諮議局查照

宣統三年四月

呈覆派員蒞諮議局公同討論並非誤會局章不合法理

稟

昨奉

憲台發示諮議局以本司前上憲稟陳述諮議局後議預算請

函知該局照章開會決議呈送

憲台交會議廳審查各節指爲誤會一函是以本司前稟所陳爲不諳法理本司竊有愚蒙之見不能不爲

憲台一傾吐者恭讀光緒三十四年八月二十三日

諭旨有原以君主立憲吾國政體所最宜溥海臣民咸當確切辨明免涉誤會等語是我國國體確爲立憲自上之國本司惟有根於

欽定諮議局章程爲本司遵守之權限查諮議局章程第二十二二十三二十四二十六二十七等條所載其爲只許督撫與諮議局直接之義司道以下並無與諮議局徑行直接之權彰彰明矣又查第三十七條所載凡會議時督撫得就親臨會所

或派員到會陳述意見但不列議決之數案語謂諮議局議案既多由督撫提出則開會之時自當到局陳述意見所謂會議所謂開會自係就正式會議時言之並未另指爲審查時亦如此也所謂陳述意見但不列議決之數又案語所謂督撫及其委員本在議事者之外是決議必有定人權限至爲嚴明惟細

釋

憲台發示諮議局四月二十八呈請

憲台派員原函云請遴派筭握財政大員有增減移削之全權者到寄宿舍蒞同審查以便卽開正式會宣布所謂增減移削之全權自係確指爲有決議之能力本司自揣無此能力按之諮議局定章亦不敢僭越權限均遵照

憲諭派令費令前往諮議局議員寄宿舍與各議員共同討論旋據費令面稱該局副議長陳炳煥言及此次函請

憲台派筭握財政大員蒞局協商允許以免再有周折並無質問等情所謂案由委員與議允許所謂並無質問不惟非局章所許且亦自行放棄議事有決議者之天職前諮議局續呈

憲函博舉西國成法以爲責詞不知國於憲法各有要素我國統法根本既在

朝廷自不能與他立憲國之議會相提並論卽各國委員會有政府得於審查時辯明提案之理由亦屬互相討論之性質並無徑由委員決議之實事至英國雖有議會議決後政府只照行之事然係英國單獨之習慣亦非君主立憲國通有之成文

法也豈能援以爲比例耶至日本之委員會對於政府提出案必先質問政府委員而後討論是質問委員案之理由非由委員決議可知茲諮議局前次之函則謂派有刪減移削之全權者於派往委員費令後謂期派大員允許並無質問今第二次函所詰者又係屬於討論之事其持論甯得謂爲先後同轍耶

總之本司此次遵照

憲諭酌派一員前往公同討論誠以局章第三十七條所載派員到會所謂員者並未規定爲何項官階衡以預算關係之重並無輕視憲政之心嗣以費令回稱該局副議長言及期派大員允許並無質問本司按之諮議局定章既無委員可以決議之條本司又無增減移削之全權是以呈請

憲台函知諮議局照章開會決議呈送

憲台交會議廳審查如出入均無爲難可否自有公議亦期望
預算早日成立之心本司並無誤會局章不合法理之事愚昧
之辭亦由情不能已而發如不以爲謬卽乞

憲台俯採理論照章答復實深紉感

宣統三年五月

請將撫標長沙協練軍改編巡防隊並酌定薪餉稟附清摺
敬稟者前奉

憲台批司詳裁撤綠營應酌留撫標練軍及乾州永綏兩協鎮
溪河溪保靖古丈坪四營緩裁當經本司將其中應行參酌事
宜具詳請示復奉

憲台批示撫標練軍應挑留精壯三百名酌照防營體制編爲

三哨合爲一營其官弁額缺仍全行裁撤改設營哨各員用資約束飭卽查照批飭現裁弁兵造具應發恩俸廉餉數目暨裁後節存俸廉餉數並改編撫標練軍酌照防隊薪餉比較該營原餉有無溢出通盤計算造賚清冊三分以憑分咨立案等因奉此查撫標練軍原派督帶官一員營務官一員承操官三員協操官三員而撫標與長沙協三營官弁副參都守千把外額多至三十六員現照防營體制改編但能用管帶一員哨官哨長各三員是否卽在現裁各員弁內挑選抑另行委用管帶用參將抑用副將其餘哨官自於都守千把內擇用擬留者卽無須發給恩俸恩廉擬裁官弁兵丁卽當照發恩廉俸餉其銀數均須俟

憲台批示改定後方能核算確數造冊詳請咨達 本司再四躊躇祇得將

憲標及長沙協三營原有年額廉俸餉乾暨練軍加給薪糧分別查明並查照巡防隊營制餉章酌擬改編應用員弁及書記什長兵丁火夫人數並應發薪糧互相比較先行彙開清摺稟請

大人察閱酌定批行下司以便遵照核算應發恩俸廉餉及裁節銀數分別造冊再行詳請咨

部立案 宣統三年五月

酌擬撫標暨長沙協原營年額廉俸餉乾並練軍加給薪糧及現在改編巡防隊應支薪糧分別查明互相比較

清摺

撫標暨長沙協原營年額廉俸餉乾銀數

副將一員每年俸薪養廉銀一千一百七十七兩四錢五分八釐

叅將一員每年俸薪養廉銀七百四十三兩三錢三分六釐

都司一員每年俸薪養廉銀四百零壹兩三錢九分四釐
守備二員每員每年俸薪養廉銀二百九十兩零七錢零八釐

千總六員每員每年俸薪養廉銀一百六十八兩
把總十員每員每年俸薪養廉銀一百二十六兩

外委十一員每員每年餉米養廉銀四十四兩三錢七分二釐

額外四員每員每年餉米銀二十六兩三錢七分二釐

馬兵四十二名每名每年餉米銀二十六兩三錢七分二釐

戰兵七十八名每名每年餉米銀二十兩零三錢七分二釐

守兵二百一十二名每名每年餉米銀壹拾四兩三錢七分二釐

馬一百二十一匹每匹每年乾銀壹拾兩零二錢

全年共銀壹萬二千七百四十二兩八錢八分八釐

練軍加餉銀數

督帶官一員每年銀二百八十八兩

營務官一員每年銀一百四十四兩

承操官三員每員每年銀七十二兩

協操官三員每員每年銀四十三兩二錢

公費每年銀壹百玖拾貳兩

兵丁三百名每名每年銀壹拾四兩四錢

全年共支銀五千二百八十九兩六錢

現遵批改編巡防隊查照各營隊弁勇餉章酌擬應用營員書識暨年支薪糧銀數

管帶官一員每年薪水銀六百兩

公費銀八百四十兩

哨官三員每員每年薪水銀壹百八十兩

哨長三員每員每年薪水銀壹百零八兩

書記長一員每年薪水銀七十二兩

司書生五名每名每年薪水銀五十兩零四錢

什長二十七名每名每年餉銀四十六兩八錢

正兵二百一十六名計二十七棚
每棚八名每名每年餉銀三十九兩

六錢

鼓號兵六名每名哨
二名每名每年餉銀三十九兩六錢

護兵二十四名管帶用六名哨官各
四名哨長各二名每名每年餉銀三十六

兩

伙夫二十七名每名每年餉銀二十八兩八錢

全年共支銀壹萬四千三百二十四兩四錢與原有廉俸餉乾暨練軍加餉互相比較每年可節省銀三千七

百零八兩零八分八釐

撫院批據稟已悉撫標練軍營應卽以中軍叅將充督帶官其哨官哨長當於都守千把內飭由督帶官遴選保充候札行中軍叅將按照防營編制將現有練軍遵章改編規定營制再行飭知仰卽遵照此繳

呈請電達 度支部請示長沙關補抽土稅辦法稟

敬稟者昨據日清輪船公司緘稱有恒足豐土商由輪運雲土五件來湘經長沙關補抽稅款已出稅單爲証等情本司查

部定土藥統稅章程頒行之後凡各新關向係征有土稅者均照光緒三十年各關報運之額數撥還稅銀額外溢收卽由關道將稅款一併提解總局業經各新關通行已久是此項稅款在新關祇能取諸額有至定額外溢收之款自屬非新關所得而有又原章內載新開商埠及向無土稅報部各關此後如有土藥報關一律照新章抽收儘數提解總局等因是此項土藥稅款如新關向無此種收數自部章頒行後始發生之稅款均應儘數解局亦屬非新關所得而有者又光緒三十二年七月二十九日烈稅務司致長沙關道緘開所謂土藥一歛並未征稅分毫亦無到關呈報之事等因是長沙新關於土稅一項確爲向無征數此次各商由輪載運來湘土藥應補之稅款確非

新關所得而有且土藥由長沙入口者係
裁由上下游起運之第一關情形不同現
部示土藥統稅改歸各省自辦湘省部局
補納新稅之土自應仍由湘省自行派人
定章昨准偉稅務司來談謂此次補收土
總稅務司並接復電飭將此項土稅暫由
等因除由司根據定章緘致長沙關道知
派員補征外惟恐該稅務司仍不免妄行
關均非淺鮮擬請

憲台電達

度支部請示辦法是否有當伏乞

憲台俯賜核奪示遵

宣統三年五月

因病請假就醫並懇委員接署稟

敬稟者竊於宣統三年五月二十三日恭奉電傳

上諭趙濱彥着開缺來京另候簡用欽此等因

本司渥荷

恩命自應卽日交卸趨赴

闕廷恭候

詔旨惟是

本司

數年以來感受寒濕喘嗽多痰日甚一日上午

由粵來湘道經蘇滬曾經請假醫調旋以湘事緊要不敢逗留
醫未決旬力疾到任長沙素稱卑濕至此感受愈深現在時值
黃梅濕重痰深更難支柱乘此交卸之際擬往蘇滬就醫可否

上邀

憲恩俯賜

奏請給假兩個月一面委員接替俾得早日就途一俟假滿病痊卽當星夜起程赴都銷假斷不敢稍事遷延致負

聖恩而干咎戾所有本司請假就醫並懇委員接署緣由理合

肅泐

稟懇仰祈

鑒核批准實爲公便

宣統三年五月

督院批現准

撫院來電已委黃學司以霖接署藩篆所請給假就醫并候

撫院主政會

奏暨候批示可也仰卽知照此繳

撫院批覽牘均悉該司自上年蒞任以來整頓吏治樽節財用
不辭勞怨獨任其難方幸同舟遽聞

內召失茲臂助惋惜滋深茲以夙恙未盡痊平擬請赴蘇滬就
醫暫釋仔肩用資調攝強身乃可以報

國養力斯足以宣勞面請再三自未便強事挽留重違本志候
卽據情奏請

賞假兩個月俾可從容調理並另行委員接署以便交卸希即
知照仍候

督院批示此復

書牘一

擬覆諮議局呈請將諮議局議覆宣統三年預算交會議

廳審查案意見書

案據諮議局呈稱上年清理財政局詳呈簽覆諮議局議覆預算全案同覆定預算報部總冊請筭交諮議局查照各節多與定章相背礙難查照按各省會議廳規則第十條第一項本省諮議局議決議案呈請督撫施行者應交本科審查第十二條第一項諮議局議決案件經審查科審定應行公布或更正施行者呈請督撫照章辦理其尙待詳議者呈請交局覆議如該局所不應議決者卽具理由書呈請行局聲明不交覆議等語細釋規則至爲明顯預算全案關係重大應照章交會議廳審查後再行筭交諮議局臨時會覆議除另文呈請召集臨時會外所有協議宣統三年預算案應交會議廳審查各緣由理合

備文呈請

撫院察核施行等因查會議廳規則係指諮議局議決議案而言與諮議局章程第二十二條諮議局議定可行事件呈候督撫公布施行若督撫不以爲然應說明原委事由令諮議局覆議第二十三條諮議局議定不可行事件得呈請督撫更正施行若督撫不以爲然照前條第二項辦理等語同一意旨預算案應否照此辦理章程規則均無明文查預算案性質似與議案性質不同其歲入及國家行政經費照章送諮議局以供參考惟地方行政經費照資政院電諮議局得以移緩就急酌盈劑虛然仍當以督撫交議範圍爲準可知諮議局對於預算一案與議案之得以完全可否決議者不能一例而言且此項預

算審查實爲清理財政局職任所在是以上年諮議局呈送議覆預算全案當奉

憲台發交清理財政局由司道等會同

監理官籌議並移會各主管衙門局所往復磋商以期斟酌至當是與議案之交會議廳審查同爲一般手續要不得爲違背定章觀乎十二月二十八日

諭旨會議政務處具奏資政院議決預算全案朕詳加披覽尙屬核實如確係浮濫之款卽應極力削減若實有窒礙難行之處准京外各衙門將實用不敷各款繕呈詳細表冊叙明確當理由逕行具奏候旨辦理等語則是

資政院議決預算案仍准督撫得就事實權衡修改以重執行而免滯礙毋庸再交

資政院覆議誠以就案損益所請更正施行自可照章辦理非若全案更張尙待詳議必須復交覆議者也再查上年諮議局呈送議覆預算全案到院在該局臨時會開會後時已十一月二十日外經發交清理財政局移商各主管衙門局所覆定已屆年終今年正月卽入預算年度一切收入支出便與預算有關臨時會未可預期常會必至九月若使懸案以待又將何所適從是以上年預算覆定惟有一面詳請

憲台

奏咨度支部並轉資政院察核一面飭交諮議局查照至十二

月二十八日欽奉

諭旨以後自當懷遵

諭旨辦理惟查本年收支各項與覆定預算尙不能無出入將來惟有隨時據情入奏以昭核實所有諮議局議覆預算案自可毋庸再交會議廳審查並劄交諮議局覆議意見是否有當伏乞

憲台察核交會議廳公決施行

宣統 年 月

擬請劄覆諮議局整頓田房稅契一案暫照舊章毋庸議
更意見書

查諮議局上年議決整頓田房稅契一案前經本司將其中流弊甚多未便刊刻公佈緣由詳奉

憲台發交該局覆議頃見刊佈該局呈覆議案於由紳經收一層仍請查照原案辦理查現奉

憲台轉行准

憲政編查館咨送第八次解釋彙抄內載咨覆

江蘇巡撫部院文有蘇屬交議整頓稅契方法一案尾開自治費經徵一節稅契係屬國家正稅將來應歸何種機關徵收俟國家頒定劃一徵收章程一體辦理此時暫遵舊章毋庸議更等語司中前次詳覆時尙未奉到是以未經引及既奉

憲台於轉行司詳筭內徵引行知誠如

憲諭湘省事同一律自當遵照辦理該局乃復援引湘陰新化因籌學務經費稟奉批准單行案件仍執前議呈覆請行查湘

省稅契改章頒發司印三聯契紙原飭各屬發交團紳分領轉發業主填用本翼各團紳幫同勸稅便於民間領填起見詎行之數年流弊百出有將原領契紙積攔遺失者有藉口未有夫馬津貼任意浮收藉端漁利者並有侵吞鄉民稅銀不爲赴縣請印者據各州廳縣紛紛稟揭故於光緒三十四年增收六分時由釐金總局詳定章程將契紙收回任存官署以清弊竇鐵案可憑本年永定縣自治所紳董侯昌銘等因籌自治經費請將稅契改由紳士代辦行據該縣查令查復指陳種種窒礙情形頗爲透澈並有桑植縣歲貢谷滿言等京控該縣高等小學堂堂長朱渠成與收支何國楨侵蝕稅契款項多至一千二百餘串提省發府審辦案尙未結考之舊日情形證以近時案據

現象已露流弊難防原呈謂自治公所及董事會皆爲各地方之團體機關非一二士紳包攬經收者可比雖自治紳內賢者居多然謂各屬所舉皆係篤實可靠之人不獨本司不敢附從其說卽諮議局各議員亦未必皆能深信無疑萬一經理不得其人稅收短絀或別滋流弊官紳因責無專屬互相推諉而應解新案賠償兵費及練兵經費各項的款漸歸無著誰任其咎本司躊躇至再實不敢因該局拘執一二縣單行案件更動全省徵收向章率爾認可照行應請仍遵憲政編查館通行蘇省稅契議案覆示暫照舊章毋庸議更是否有當伏候

鈞裁
宣統二年十月

代撫院擬復督院湘鄂加徵米捐辦法書

敬啓者昨奉卅電以湘鄂加徵米捐一案飭令按照正月咨文迅速議覆等因恭諭

憲台兼籌并顧之心至深崇佩惟此案之原始與議擬之變更有不能不爲

憲台陳之者查此案原擬改設五口係以洞庭以西港汊紛歧運米商船恒於公安石首湘鄂交界之地偷漏繞越以南米混充北米希圖取巧且時值米禁綦嚴湘中士紳紛紛以違禁偷運有妨食政宜予設法堵截爲請經司道一再磅議僉謂非改設五口總卡湘鄂合辦不足以杜繞越而嚴禁令當卽飭令擬具條陳并特派袁道面請

教示亦期權衡至當推行於無阻此議改設五口原始之情形也湘省夙號貧瘠上年三月之亂積虧尤鉅因議加徵出口米捐二百文爲抵還賠款之用嗣以諮議局於此項捐章意見未能相合而鄂中司道復以此項捐款由鄂民間接擔任議爲鄂四湘六之分籌爲歸還賑糶之用時袁道以全案未定羈鄂未歸又鄂中議分捐款之案亦未咨湘湘諮議局并以未窺全案爲憾上年十一月湘中紳民紛請開禁而改設五口又非旦夕所能遽及當飭司局酌限出口石數由敝處印發護照議增捐款亦卽於是時附舊有米捐局卡代爲徵收及接准鄂咨內列四六分用之案而湘局議員遂有力持拒絕之議司道具詳意以五口改設雖局卡多隸湘境而

憲台一視同仁湘省積虧獨鉅故爲二八劃分之請湘諮議局則尙未承認也本年正月中旬接准

大咨以鄂局議列平分捐款廢置荊卡各節是又與湘鄂官廳所議分欸辦法大相逕庭現正飭令司道妥速議詳此擬議變更之始末情形也且此案鄂局雖已決議而湘局時當閉會未能正式解決常駐議員昨又函致司局領閱米捐全卷似於此案確有不能已於爭者是分欸辦法似須俟諮議局覆到官廳方可決議至未設五口以前新加捐欸現已經收三萬餘串惟此欸係就舊有米捐局卡代抽湘省預算案歲入欄內已將此項捐款全數開列似亦未能與改設五口後增加之捐款一併置議伏冀

察核施行除一面催令司局遵照

鈞電核議詳咨并飭諮議局議決呈復再行咨達外謹此奉復

宣統 年 月

擬稽查禁米局全案總說明書

查此案與兩湖實行合辦米捐加收捐款本屬兩案此案重在稽查出口穀米爲慎重民食起見改併六口加收捐款案爲體恤商艱籌濟要需之計兩案性質各各不同今來呈雖以目列別爲兩案究其內容實以設局收捐爲主體以稽查運米爲客位界限似分而不能分辦法似二而實非二現在五口之說既未與北省商訂妥洽而暮歲嚴寒農人所收之穀不能易急需之布飢寒啼凍之民奔走呼泣於南華道途之間前據南洲華

容兩廳縣丞令印委電陳苦困急迫情形已將原電發交司局轉付查閱一夫失所咎有所歸穀賤病農尤爲政蠹是現在米禁之宜速弛已如援拯赴湯蹈火之不可須臾緩矣來呈以前令覆議案此次交議案混而爲一其中窒礙情形已於各條內詳晰指明至議設專局各派人役抽收捐款各節本部院尤有不能已於言者誠以稽查運米局與稽徵米捐局名義不同性質不同稽查者稽其出口之數以防奸商販運無節於內地民食有妨礙也湖南昔號農國盛產米穀輸出之數歲恒數百萬米禁之事亦數歲不一見此次議派紳董稽查米數實因上年歲收歉薄本年秋成告稔穀米之禁亟宜議弛而重恐販運出口者漫無限制故特設紳董以稽查之以爲慎重民食之意今

擬以派人稽查禁運之事爲用人收捐之地不惟與原議不符卽揆之行政辦法似亦不能有所區異又第七條內載紳董權限與各局委員敵體平行不受節制庶可親身切實確查是官局收捐紳局亦收捐官局不能節制紳局紳局可以稽查官局無論干涉行政權限爲法律所不許卽按之監督行政之意義如此籌措詎得謂事理之平前者

度支部通飭各省酌量將各局釐捐以及其他各局卡可裁者裁可併者併用人開支力求節減原案議於省城設局并於各外局添派董事巡丁用欸省城則歲爲三千串外局則各定爲二千串現當財政困難萬分之時似此大宗鉅欸以言另籌實非易易卽令有欸可資撥付而設局用人開支欸項驟增至一

萬五千串之多恐亦非現時

大部主持節用之宗旨所許此本部院總總過慮所以不能已於言者也

一文內叙賠款捐業經默認一節

謹按諮議局章程并無諮議局議決案呈請

督撫代奏督撫不飭覆卽指爲默認一條

至此案原委仍應請院署稽考聲明積

久不復之理由

一文內叙此項米穀捐本純係地方稅性質一節

查兩湖米捐合辦款項現爲籌辦粵漢鐵路兩省路款之用係國家補助地方行政經費性質來文籠統指歸地方稅性質不合

一第一條本商新加捐額一節

查原文內載每米一石除舊有賑糶捐釐捐等項外凡用民船販運者加抽地方行政經費二百文等語此項捐款原案性質已於前條辨明此次議加米捐案應正名爲歸還賑糶墊款捐因歷年賑糶湘省積虧甚鉅非自行設法歸還也來文議改爲加抽湖南地方行政經費一說應卽取銷

一第二條洋商新加捐額一節

查原文內載每米一石除舊有賑糶捐釐捐等項外凡用輪船販運者加抽湖南地方行政捐二百文再加湖南公益捐二百文專備本省公辦實業之用等語無論現在惠商睦鄰不宜有華洋之別且捐款歧異亦易啓洋商以虐待之口實

現准英領事照會萬難承認矧洋商販運此項米穀豈不能僱用民船駁至北省再行轉口以施其趨輕避重之技又查地方自治章程自治經費分附捐特捐兩種征收之數均不能過原數十分之一來文謂加抽地方公益捐二百文爲地方辦公實業之用公益實業均隸於地方自治範圍之事茲議抽捐款乃與原數相埒亦殊未合應照民船購運米每石附抽十文穀每石附抽五文捐款辦法征收以歸一律

一第三條販運口岸條例一節

查原文內以本商民船販運至漢口爲止境漢口以內之口均可隨意發售惟不得轉口洋商用輪船裝運則准其指口轉口等語自係爲杜洋商在漢購運米穀轉口之意惟禁米

出口係指沿江海各關通行禁運而言禁米出境係湖南因歲收歉薄米穀不敷自食按照條約單行禁運辦法若限制洋商在漢一律不准購運轉口不惟與約章不符且地屬北省應由北省主持湘省卽以此爲請揆之事勢稽之條約北省恐亦不能照辦也

一第四條護照憑單辦法一節

查護照憑單均爲稽查限制運米而設擬改由本部院刊印護照發由兩湖米捐總局存記其數無論華洋商人購運米穀均須一律填領護照惟省河輪船局則由商會領取遴派妥人至該省河局分別民船輪船按照運米出口數目填發護照以資稽考至其他各運米出口所經之地均由米捐總

局先將護照發由各米捐分局隨時填給原文謂令洋商專領用護照概至稽查運米局請領及將前此派司關單概行不用各節均非約章所許外人亦不能就我範圍矣憑單一節應即取銷以免歧異

一第五條收捐處所一節

查前條所議新加洋商捐額既屬窒礙難行此項護照又改由本部院刊發原文所謂洋商新加湖南兩項捐款於請領護照時概行照數繳納各節自應毋庸置議惟新加二百文之墊款捐應仍按照舊案米捐稽征之法於輪船局隨時核實抽收護照則由商會派人至輪船局隨時按數填給并帶收農會十文或五文之捐款

一第六條不收補水錢文一節

查湘省各釐米局卡所徵錢文均係抽收足錢并以足錢解繳總局歷年以來均如此辦理此次加收墊款捐應仍查照前案辦理以歸一律

一第七條解款規例一節

查商會附設稽查運米局一節窒碍難行已於擬改穀米稽查局案內說明又捐款均由各米捐及省河輪船局代收是商會既無款可收自亦無款可解此條應毋庸置議

一第九條分別華商洋商裝運數目一節

查此案限制華洋購運米穀區分多少爲約章所無且北省既不能禁止洋商轉口而南省運往北省之米又不能禁止

轉售洋商此案所謂洋商只准購運一百萬石之說亦屬衍文應取銷

一第十條咨行鄂督及通知各關一節

查原案所載各節窒礙情形已於本案第二第三第四等條內聲明矣至咨商鄂督及通行各關應如何辦理俟全案更正決議後再行分別咨行

第一條

查派紳稽查運米重在稽查運米出口石數爲慎重民食起見原案擬就商會設局並置總董徵收捐款是與原議稽查運米本旨不合就令派人至各處稽查米石省城不可無一總滙之所而應辦之事無幾就商會內設一辦事處亦無不

可且此案本係爲上年歲收歉薄本年秋成告稔穀米之禁
亟宜議弛而重恐購運出口者漫無限制民食又受影響各
節提議自係爲一時權宜之計原案議設專局勢將爲永久
之稽查以籌備食政計固宜以實稽運數爲限制以體恤商
情論似又以節次稽徵爲主腦且米捐釐金各局委員未必
盡爲不能實心任事之人稽徵米石亦未必皆屬不能據以
爲實之數是派紳稽查運米事項應由本年開禁日起截至
三百萬石運完之日爲止應否廢續辦去屆將再行酌定至
稽查運米總董以商會總董兼充應辦事項除抽收捐款已
於兩湖米捐實行合辦覆議案內議覆不能照行外餘如稽
查冊報運米出數并領本部院護照派人赴省河輪船局於

購運商人出口之米穀按照石數分別填發事項均由總董經理月支夫馬費五十串文

第二條

查稽查運米既不設局又無捐收會計一員似可不用其司事僅掛號核冊跟丁雜役厨丁附於商會薪糧人數亦可略減

第三條

查稽查運米辦事處用費已詳見第一第二條內原案所定額支三千串此係暫設不能釐定常年經費應核減爲總董一人月支夫馬錢五十串司事二人各月支薪水十六串文跟丁雜役各一名月給工食錢四串紙張筆墨燈油雜用等

項月支錢三十串文共每月額支錢一百二十串文此項均於原有米捐項內作正開支

第四條

稽查運米既不設局應毋庸刊發鈐記

第五條

六口稽查處所內有藕池調弦太平三處並非湘局區域究竟以上三局鄂省能否照允撥歸湘管此時尙不可必即使允准而歸併一切手續繁重移交部署動需時日兼日併營亦決非今年所能竣事茲開禁在即擬仍就原有米捐局卡暫行稽徵並帶徵此次加二百文之賑糶墊款捐并附收農會補助捐以維農業而濟要需

第六條

查投票選舉應如原議惟正副稽查名目應同定爲稽查董
事不得正副區分等級又區分六口一時既未議定稽查運
米自應以蘆林潭岳州雷灣澧安四局爲該董事駐查之所
均照原案公同規定選舉事項每局選定二人由商會派充
附住於米捐各分局隨時調查經過米石登簿記數按旬具
報商會彙查亦毋庸由本部院札委該董事每月各支薪水
二十四串文火食各月支三千六百文燈油紙張筆墨錢每
處月支六串文每人各帶跟丁一名月各給工食錢四串文
省河輪運穀米應抽捐款向由省河輪船局代收商會并應
選派董事一人赴輪船局填發護照稽查石數選舉之法薪

水之數均如各局

第七條

紳董職任已於第六條內叙明至權限一節應實守調查米數宗旨一切局事該董事等均不得干預

第八條

紳董經費已詳載第六條內

第九條

稽查運米事項非永久之舉紳等用任之期既非長局自亦不能定以一年爲滿任如有不協即由該局委員稟由米捐總局知照商會撤換

第十條

已於兩湖米捐實行合辦議復案內第四條護照憑單辦法一節議覆矣此條應照前案辦理

第十一條

稽查運米既不設局所需經費亦屬無多至議裁米捐局卡經費每年一萬五千串文事屬全省預算案能否核減現尙未據呈送應難作爲確定減數惟稽查運米亦屬民食所關此項經費已於第三條內聲明歸米捐項下作正開銷原案指爲核減項下撥抵一節理應取銷

宣統 年 月

核議諮議局航業議案說明書

竊維航業保息爲各國之通例在政策上觀之足以振興實業挽回利權請求極爲正當詎不樂於贊成然其中容有財力不

足及窒礙難行之處倘非先事籌度必至臨事竭蹶不獨無益而反有損是則所不能不辯者請就當日原案分晰言之保息金定六萬元爲數有限且未必動用似無難於承認第既曰保息自必籌有專款非虛擬其數始克堅股東之信任湘省財政困難已達極點卽如諮議局應需各項常年經費不過四萬金上下其數與保息適相等其事較保息爲尤重常期會已舉辦兩屆而該局經費尙待周章迄無專款可指公帑支絀此其明證乃航業於保息而外凡特官款相維持者如實虧之數目既須補給外商之競爭更須補助而發行債票息借銀行官款入股三者雖推類至盡之辭非急切必需之款凡此皆不能不預爲籌備以待臨時之請求爲炊無米巧婦未能若謂宣統三年

預算案該局所籌入款比較出款尙屬有盈無絀信如斯言豈不甚善無如公家財政困難猶昔細核出入兩款不惟不見贏餘並且尙有短絀然後知數爲虛擬固未可以作准也其財力之不足已如是外人內港行輪約章已載新闢埠頭專利未有明文限制路線不惟外人不能允許卽內地商人亦難遵行所謂窒礙者一護險章程經部酌定各船重量視該船之容積何如載重過水線保險行卽不與保險所以重人命也通飭有案自應遵行今議改良必與部章相違悖所謂窒礙者二理船廳稅關原爲查驗商輪而設或慮丈量之各異或慮煩擾之不堪自可由監督飭令整頓無難將積弊掃除若考驗稽查改歸公會擔任理船廳不能過問各稅關徒擁虛名揆諸事理恐無如

此辦法所謂窒礙者三凡茲三端似於理均有未順其窒礙難行又如是卽或破釜沈舟勉力將事冀爲孤注之一擲幸而不敗固如天之福也設有損失則羅掘旣盡更無以善其後勢不至公私交困而不止總之事當謀始卽須圖終尤貴酌劑盈虛與時消息使果有裕餘毫無窒礙方且鼓舞提倡之不暇又何必故爲異說反復辯難第事機所在優劣顯分以不易得之金錢求不可必得之利益與其掣肘將來曷若留俟後日擬請筭復該局將此項航業公司暫緩組織且俟國家地方稅一一釐定確有把握確有款項再行提議以免支絀所有核議諮議局航業議案緣由是否有當理合繕具說帖呈請

憲台訓示祇遵

宣統三年二月

撫院批查此案保息金一項暨發行債票息借銀行官款入股各節均係財政問題准

院咨應於預算案內協商湘省財政支絀異常斷無餘款足爲航業公司之補助稽之廳議詢謀僉同已筭覆諮議局均從緩議矣仰卽知照抄由批發

致鹽道論育嬰堂事書

前承交閱蔣令所查育嬰堂事當經札飭長沙府臧守督同委員認真整頓以全嬰命而維善舉查該堂於去年冬臘兩月之內共殤女嬰一百二十餘口之多言者傷心聞之酸鼻該委員胡榮在堂三年之久毫無整頓於堂中乳婦之健壯小孩身體之羸弱亦不過問昨據胡令摺稱一婦養二嬰至三嬰者乳不

接濟佐以糖水漿糊致病殤事逐月不免并謂來堂時中途冒暑侵寒經堂收入類多奄奄一息以故嚴寒酷暑之月爲數尤多是天殤多命我輩之所謂慘事者該令直視作常事也且既知乳不接濟何以不另換健壯婦人而聽其以糖水漿糊致殤嬰命果知爲侵寒冒暑又何以不早醫調至按時驗視原以考察孩提之壯弱該委員眼光一線老態龍鐘詢以平時如何考驗則稱係由堂婦查視以無數嬰命僅付之堂婦稽察又焉用此委員爲哉及詢其如何整頓其意則重在勸養照貼養給資然必俟今夏堤垵穩固勉得儲備萬金始有基礎惟是天災流行豈能預必使今秋大有或能如該令所云萬一堤垵不虞豈堂養嬰命將聽其自生自滅乎措置乖方顛預已極若不卽時

撤換該堂嬰孩天札正無已時執事念切痼瘼慈祥愷惻應請
卽將胡令撤差另委明幹之員尅日接辦一面由府督飭查明
妥定章程以垂久遠而杜流弊

大君子誠求保赤諒亦云然

宣統三年二月

諮議局整頓田房稅契議案擬請仍遵前次筭覆辦理意
見書

諮議局原議整頓田房稅契一案業經司中將改歸紳士經收
恐滋流弊詳請駁覆嗣據該局抄粘湘陰新化原案凡業戶投
稅係山紳董請領官紙照原契填寫粘附蓋用鈐記連同稅銀
送署核明蓋印發還轉交業戶紳董並無完全之責任官府實
有徵解之主權呈請裁奪施行復奉

憲台發交會議廳審查僉謂承辦稅契改定舊章應俟各地方自治機關成立

國家劃一徵收章程頒行屆時再遵照辦理現在惟應飭知各廳州縣每五日將稅契收數榜示杜弊應照

館咨仍遵舊章辦理毋庸議更分別飭行司局在案茲據該局仍執原議呈請公布查該局原呈謂每五日將稅契收入數目揭榜宣示祇能防官浮收短解不能防書吏百凡諸弊溯省各廳州縣徵收稅契每分折收若干均經稟定有案書吏何能恣意多索其弊竇不過在攔壓挑剔一經揭榜宣示則衆目昭彰書吏如果有弊無論何人皆可舉發若謂由紳董經管卽無流弊現據安鄉縣生員郭光青等具控該縣自治所長畢萬鍾等

委任子姪畢承庚等串通張彝等提辦稅契藉名革弊擅加錢文正在批州嚴查可見改歸紳收亦斷不能保其必無弊竇弊在丁書官既可隨時查究花戶士紳亦可隨時舉發若一入權紳之手勢燄所攝不惟被害之花戶受其箝制卽地方官亦稽查爲難且諮議局建議改歸紳收業經司中議駁尙未刊刻公布而宜章永定兩縣自治所紳卽張貼告白通知稅契各業戶自某月日起至本所投稅並聲明自治經費由公所代收等語據各該縣先後通稟

憲台暨本司均謂其有越權限嚴行批飭嗣據接署宜章縣吳令申報該縣因自治所紳張貼告白不准縣署再收稅契銀兩以致上年十二月二十一日以後毫無收數復經本司以該縣

征收稅契前據周令稟報自治所紳張貼告白妄行干與當經
本司並奉

撫院嚴批飭州查復該令何得放棄責任竟聽該紳等肆行把
持實屬庸懦無能痛加批斥飭仍恪遵前次整頓條欵曉諭各
業戶趕緊投稅毋得觀望此等現象

院司兩署均有案據班班可考並非空言在諮議局所呈無非
重在剔除民累而不肖紳董即將藉此爭攬利權萌芽甫發外
屬情形已至於此一經公布流弊伊於胡底事關

國稅入款大宗本司職司財政不得不統籌全局抉其利害並
非好爲偏執前次

館咨以稅契徵收仍遵舊章辦理雖因江蘇議案而起既經通

行各省自應一律遵守應請仍遵

憲台前次劄覆辦理毋庸再議更張是否有當伏候

鈞裁
宣統三年三月

議復諮議局代人民陳請湘設官紙印刷局以爲不可行
事件擬請核駁意見書

查諮議局原案內載造紙印刷等官局廠若從新建設按之
部章驗諸商情證以江蘇往事皆屬不可行事件等因謹按湘
省此次籌設者僅官紙印刷局一區並無造紙局廠官紙印刷
局之設資本僅限萬金內列石印鉛印兩部凡官用所需者除
官照文憑契尾糧串鹽茶引牙帖聯單以及各項官用證券可
以先時酌定程式及數目者均仍遵照

部示前赴領用外餘如各官署局隨時需用之單簡紙品及活動印刷品類則由湘局自爲印刷誠以印刷事業

大部既不惜巨資特設專廠其爲全國謀防杜奸詐表示齊一之意至重且摯湘局之設適承部局之流所以補中央印刷之力之所不及於進行上有敷助而無違碍於政權上有附從而無侵犯若以來呈所議於行政初無必要之辭擴而論之是儼以有一中央印刷廠而各省官局皆屬無用也不知此項官局湖北議開辦於前天津則踵行於後現在

部廠既設不聞有令津局鄂局概予廢置或付合併之議亦徵大部深知各省官用品類之繁之重非省支局不能盡防杜詐僞表示齊一之用之微意矣豈果爲非行政上所必要耶又來

呈謂與中央政權有碍是儼以官局之設爲侵礙政權也卽如所云在官則爲侵礙政權豈商民之所辦者遂不謂爲侵碍政權耶今諮議局明知爲侵碍政權而此案又允予人民以建議其矛盾又詎可解耶又來呈謂爲徒與小民爭錐刀之利是儼以湘局之設爲與民爭利也不知印刷官業非他項官有營業所得比擬若以他項官業強謂爲與民爭利尙有理論之執持至以印刷官業亦謂爲與民爭利微恐言之不能成理矣查世界中心世紀之末歐洲所發明之大事有三一曰火藥二曰印刷三曰羅盤三者惟印刷變社會之精神促文化之進行之力爲最大歐美各國於印刷類設官廠日本國家印刷廠則歸內閣總理大臣專轄是印刷一事在立憲各國均視爲重無與匹之

官業亦以與憲政民智有雙方並進之力也近則中央官紙印刷廳復厚投資本以期躋抗然則謂爲與民爭利矣乎若以大者不爲爭利而爭利則在小者查湖北天津之官紙印刷局其開辦基本各不過三數萬金今已經營兩載且奏咨立案矣歲無所虧効力漸著然則謂爲與民爭利矣乎且湘設官局性質係取官原所需者還之官并非舉商用民用之品概包納而歸付官之版權也且非一設官局舉凡商民所營之業得強之使廢罷或別圖也事固有取其易而棄其難者亦有宜務及大而拂及細者來呈所謂爭利所謂非立憲政體所宜是猶僅知此案之狹義而未及推勘此案之廣義僅就湘省一隅之情形言之而未卽世界進化之大勢衡之也又來呈謂南洋印刷官廠

去年經蘇諮議局提議以爲官民交困是儼以湘局爲蘇轍之覆車也查南洋印刷官局聞係官志局之改體其辦法雖無從詳悉而上年商民之紛紛呈請究以甯局印刷併官用商用民用各品而盡納諸範圍之內爲苦不惟甯局卽如鄂局津局籌辦之始均係規畫商民用品爲官有印刷權亦經商民先後陳請均予變通刪去此次湘省籌設官局鑒於津鄂已事故司中原詳所列皆係屬之官用品類於商用民用專品均已預爲概行汰除亦軫念商情之難而官局又非專事牟利也且費本僅及萬金體輕用重祇取爲輔助中央印刷整齊滄導之力所不能及之機能豈蘇車覆轍所可例耶又司中原詳文尾聲叙此次

大部所議印發契尾糧串牙帖以及其他官用證券湘省現當
財政困難此次籌辦官紙印刷屬於簡易自應遵照

部示前赴領用惟查上列各項均關於官用證券最重之品若
陸續請領則程途悠阻緩急無期若彙總領購而物價程費又
種種不貲擬請俟款項充裕再行體察情形度量能力如確有
窒礙難行者卽由司剴切陳明妥爲設法另案詳請通融辦理
等語司詳之意且係以

大部設廠專賣官用紙品現當庶政進行需用日多湘省財用
支絀萬分實難更以大宗鉅資歲爲購備

部印此項紙品之用故於文尾推叙隱及亦欲保持湖中公款
仍歸諸湖中公有之意又豈蘇案之官民交困所得而比擬耶

總之湘省此次籌設官紙印刷局上按

部章下準商情遠證蘇案近揆財用置之於理施之於政均爲
確可施行之事擬請

憲台主議核駁仍照司中原詳辦理是否有當伏候

鈞裁

宣統三年四月

致關道請查明長沙關補抽恒足豐土稅書

敬啓者案查土藥由輪載運來湘向係由

度支部長沙統稅分局查驗起運現在土藥統稅改歸各省自
辦部局既已裁撤如係由輪載運來湘之土藥自應由本省自
行派人前往照章查驗以免漏稅頃據日清輪船公司緘稱昨
有恒足豐土莊裝武陵輪一百八十二次進口計雲土五件現

長沙關業經抽補稅紋已出稅單爲證等情未審

貴關此次補抽此項土藥稅款曾否奉有

稅務處或

度支部明文請卽

迅賜查復以便酌定劃一辦法至緞公誼盼亟盼亟

致關道請將長沙關補抽恒足豐土稅稅款如數提解書
敬啓者查恒足豐土莊有雲土五件昨由武陵輪載運來湘經
貴關抽補稅紋一案業經具緘請

賜查復在案頃者

稅務司偉君來談謂此次補抽土稅係電詢

總稅務司并接復電飭將此項土稅暫由關收補容有詳章寄

查等因查

部定土藥統稅章程頒行之後凡各新關向係徵有土稅者均照光緒三十年各關報運之額數撥還稅銀額外溢收即由關道將稅款一併提解總局業經各新關通行已久是此項稅款在新關祇能取諸額有至定額外溢收之款自屬非新關所應有者又原章內載新開商埠及向無土稅報部各關此後如有土藥報關一律照新章抽收儘數提解總局等因是此項土藥稅款如各新關向無此種收數自

部章頒行後始發生之稅款均應儘數解局亦屬非新關所得而有者查光緒三十二年七月二十九日

貴道衙門准

烈稅務司緘開所謂土藥一欸并未徵稅分毫亦無到關呈報之事等因是長沙新關於土稅一項確爲向無徵數此次各商由輪載運來湘土藥應補之稅欸確非新關所得而有現奉部示土藥統稅改歸各省自辦湘省部局現既裁撤照章應行補納新稅之土應仍湘省自行派人查驗分別補徵以符定章前次恒足豐雲土五件補稅稅欸應請如數解交 署希卽一併緘知

稅務司查照辦理並乞

示復至級公誼

宣統三年五月

復關道土藥新稅仍由本省自行派員徵抽書

敬復者頃奉

台緘敬悉

台端於恒足豐土稅一案深持徵存稅款嚴定界限之義曷勝
崇緘惟啟原緘所列並非專爲稅款引伸辯論實則由本省
派員自行徵抽之義亦寓其中良以部章所載由稅務司代徵
之文係就由上下游起運之第一關言之長沙屏居湖內凡土
藥由長沙入口者係屬落地誠與部章所載應由稅務司代徵
之第一關卡情形不同又部局開辦時

貴道曾以印花箱單等件照送

前稅司稅司未經承受並以送去各件全數交還是則前稅司
亦深知長沙新關不能同之於上下游起運之第一關也此次
由輪載運各項入口土藥應請仍緘囑

稅司按照定章仍由 敝處 行派員查驗補徵用便換給印花
填發稅單及指銷單以歸劃一至印花各件現正趕製容咨送
一份備查瑣瀆無任悚惶 宣統三年五月

移文一

覆長沙關移奉撫批安化縣會稟查王正永等將漲水灣
山地出賣瑣瀆國教會一案移文

爲移會事八月十一日准

貴道移奉

撫院楊批安化縣知縣張令謨會同委員胡令國昌稟查辦縣
民王正永等將漲水灣山地出賣福音會一案會同提訊情形
乞核示遵由奉批據稟各情均悉仰長沙關道會同布政司查

照約章安定辦法查湘省因鑛爭執弊端最烈案關外人購產尤多窒礙務當通盤籌畫預杜流弊轉飭遵照辦理至王正永等染患時症既經該印委提驗屬實應准暫行交保醫調病愈仍備傳訊一並飭遵並候

督部堂批示繳等因奉此查此案前據該縣委巡稟到道當經批示卷查此案前據胡署令稟稱飭據該縣士紳羅華等查明該處山場綿亘十餘里饒有礦產未便售歸教會管業復據該令查稱漆樹冲等處概係官荒被王正永等盜賣各情是以前撫憲岑暨前關道朱均飭令該縣追價退契茲據會同查訊明確據稱漆樹冲等處訊係董昭喜等祖遺之業因契未印稅到案時不敢呈驗並據該委員另呈清摺聲明該山場周圍只

四里許並無十餘里之多有無礦產不能臆斷漆樹冲等處確非官荒核與王正永等賣契內所載周圍約四里許情節相符是該山場內並無官荒尙屬可信至礦產一節曾奉

外務部電據瑞臧總領事節略內稱契內載明該地內蓄有礦產不歸買主字樣將來如探有礦產無論官辦商辦均可在該山場附近地方開採該教會並無權阻止是於民間開礦毫無干礙該縣自可據約辦理何至一籌莫展乃竟依違其詞以爲誘過地步實屬不合仰長沙府卽飭該縣查明該契內曾否載明賣作本處教堂公產及該地內蓄有礦產不歸買主等字樣分別妥籌辦理具報二面開導士紳不得藉端阻撓如有劣紳煽惑鄉愚構衅生事卽爲原告羅準等是問該令有地方之責

慎勿優柔釀禍同干未便並移該委員知照仍候

撫督憲暨各衙門批示繳等語行府轉飭遵辦在案茲奉前因錄批移請會商妥辦等因准此本司查此案昨據安化縣紳民王允猷等以王正永等混賣領土等情來司具呈當經批行該縣遵照

朱前道批示勒令速行繳價將契退還並移會

貴道查照在案茲准前因查約章內載租地建堂必須由地方官會同領事等官體察民情擇定地址不許強租硬佔務須各出情願以昭公允等語此次教士購地無論傳道建堂與否但購地之先並未通知地方官會同體察已與約章不符迨經胡前令飭據紳士查明該處山場綿亘十餘里既有鑛產未便售

歸教會管業是王正永等所賣之山足見非衆情所願既非所願必有爭端牧師耗費銀錢以購此轆轤山地違約章而拂衆論是亦非計之得也且璫喊國總領事所呈

外務部節畧有契內載明該地內蓄有礦產不歸買主字樣而該縣張令與委員胡令會稟則稱王正永出筆之契亦實未註有此項字樣是節畧與契據不符已可概見委員所呈清摺該山場周圍只四里許並無十餘里之多而細核張令前稟以原牧師另書契內有添註周圍約四里字樣爲前契所無如果委員胡令勘明僅四里許何以會稟內不與張令詳細辨明而獨於摺內聲敘此情節之種種不符皆難據以爲定也今案情未定轆轤未清買地者既難相安籌辦者卽須周妥若遽援礦產

不歸買主之語飭令探有鑛產准商民在該山境附近地方開探姑無論事涉含糊不足以昭折服萬一愚民因所購之地含混不清藉開鑛而別啓衅端誰執其咎且查張令前稟漆樹冲山地確係官荒被董昭喜等私行盜賣雖此次會稟訛據董昭喜供係祖業有白契可據然該印委卽以年湮代遠無從查究爲詞官旣無可清查則地方愈有所藉口上司有督飭保護之責必期民教彼此相安奸民盜賣官荒已爲衆人所切齒若辦理稍有遷就卽將來釀禍之階現在該縣士民上控不休是不可不預爲防範也湘省因鑛爭執衅端最烈已在

撫憲燭照之中且查本處之民購買本處之地偶有爭持界限往往禍結訟連矧以外人購地與該地士民相持若不秉公查

明據約定斷竊恐暫時敷衍必致轉輾愈深轉失調和民教之初意亦不可不長慮卻顧也案由

貴道主政本司原毋庸越俎而言惟既奉

撫憲批飭會同照約妥辦既有所見不得不縷晰直陳應如何通盤籌畫預杜流弊之處理合具文移會

貴道請煩查照辦理望切施行

宣統二年八月

據安化縣文生王允猷等稟控王正板等混賣領土一案

移文

爲移會事案據安化縣文生王允猷等稟稱混賣領土委勘贖延人心惶疑懇防暴動事竊生等縣境北路奸民王正板等盜賣安化天潭坪漲水灣等處山嶺絲亘十餘里與哪喊國益陽

信義會原牧師陳教士建堂避暑一案業於去年蒙前撫憲岑及關道憲朱批飭安化縣將原契取銷作廢並嚴禁痞徒造謠生事在案生等仰體憲意極力開導鄉愚告以委員查復後事卽了結羣情漸釋逮前月蒙委員胡令國昌到縣履勘不知胡令乃受何運動並不登山詳勘穩坐縣署但會縣傳鄉團取結敷衍距賣地尙百餘里遷延多日卽行回省一味以含糊影響之言朦朧各憲風聲所播愚氓無知謠言四起並言上官已變方針行將飭縣印契又謂莊等與委員牧師表裏相通別有授受媚外欺愚官紳一氣市虎杯蛇一呼千百生等竊維民教相仇久成積習此次漢奸之入教者利誘奸民王正板等盜賣領土連峰接嶺至於十有餘里混界涎鑿斷樵牧啓仇嫌種種膠

轄已具前稟今胡令既負履勘之委任並不將此地之荒涼險
遠民風之强悍盜賊公行難於保護實在情形告知牧師稟知
上憲展轉延牒本足啓人心之不平况安化自三月以來打教
堂焚公所毀學堂圍官署排食富紳毆傷差勇搶劫累累尤有
不可收拾之勢誠恐愚頑一唱百和不知國勢之強弱不審案
件之重輕悻悻然攘臂振呼遂因此而復有暴動之事生等身
家性命縱不足惜而地方糜爛釀成國際交涉如大局何中夜
涕零罔知所措又查道光二十七年與瑞典哪噠國約章第一
款云無論在何地方均應互相友愛真誠和好共保萬萬年太
平無事地方官紳若不苦口忠告銷患未然既失約章真誠和
好之本旨又何以爲將來對付之地步今委員既如此朦混生

等更何能緘默爲此迫懇大公祖俯垂矜察一面飭縣提王正板等及一千中證依限繳價一面照會領事嚴飭牧師領價廢契其應否先頒示諭以靖民心而防巨患之處出自鴻慈覆幘不勝迫切屏營待命之至等情到司據此除批查核抄粘王正板等將漲水灣等處山場賣與信義會教士傳道避暑經地方紳民查明該山場綿亘十餘里形勝攸關且含有鑛質稟經前關道批飭追價退契嗣經哪噠國領事函請撫憲飭將該地契據蓋印又奉

撫憲詳細函復並委員馳往查覆在案查租地建堂必須由地方官會同領事等官體察民情擇定地址務須各出情願不許強租硬佔原以教士傳教必須與地方相安若租地一有齟齬

卽恐爲人所愚不足以昭公允今所賣之地約十餘里既有鑛質又有官荒在地方以公益所關不安於緘默惟教士受人朦蔽其心亦豈能甘推厥所由皆因王正板等自欺欺人狡詐貪忍地方旣爲所賣教士亦爲所朦此等奸徒豈容寬恕王正永前在縣因病交保此時計已病痊仰安化縣迅卽勒交王正王永王正板等到案查照

關道前批勒令速行繳價將契退還旣免教士受欺亦免地方藉口該生等仍當恪守約章不得稍行滋衅併由縣隨時督同團族開導慎勿枝節橫生倘或別滋事端定惟該縣是問仍將辦理情形稟覆查考副稟併發等因印發外相應移會爲此合移

貴關請煩查照轉飭辦理施行
宣統二年八月

札文一

通飭各屬查明辦公書役改設名目籌給辛工認真整頓

札文

爲通飭事照得衙蠹之弊欺朦官府剝啄小民其情類似虎狼其害甚於盜賊疊奉

明詔通飭將書差次第裁革各省均已欽遵分別辦理而湖南尙安之若素不禁駭然訪查近年來書吏描摹印信藉事訛詐以及差役釀命庇匪殃民之案不一而足乃竟聽其自然毫無整頓豈積習難回竟至無從裁革耶抑因循省事希圖見好若輩耶言念民艱難安寢饋本司現正籌設度支公所將書吏分

別去留改設書記寫生公丁等項一切規費亦已明定限制當
革者革當裁者裁冀以弊絕風清一新耳目第恐各屬因仍苟
且狃於故常社鼠城狐不思速去其何以望治臻上理剔猾除
奸應卽欽遵

諭旨專札通飭爲此札仰該府廳州縣卽便遵照迅速查明在
署辦公書役實有若干人應如何將書吏改設稿生寫生應如
何將差役裁汰改設壯勇分別事之繁簡就原有之役食等欸
改給辛工卽有不敷亦應設法籌給所加無幾所益實多務卽
勉力以圖慎勿畏難貽害倘不認真整頓陽奉陰違本司耳目
易周查出定干未便仍將遵辦情形具覆查考切切此札

宣統

二年八月

通飭嚴禁道喜門包等費札文

爲通飭事照得居官之要權自己操去弊之源法從近始本司
謬膺

簡命責重旬宣撫祖澤之猶存考遺規其未遠夙夜祇懼深虞
不克負荷致隕越而爲先人羞况湘省近年以來水災屢告民
情困苦方休養生息之不遑治理勤求此又本司願與賢牧令
共勉之也顧有爲必先有守正己乃能正人本司下車之初卽
以痛除積弊爲首務且性情耿直馭下素嚴所用家丁向均優
給辛工不惟不准詐索屬下分文抑亦不能干預公事該丁等
相隨已久尙知謹慎奉公非分固不敢妄干卽與者亦不肯收
受惟訪聞各條屬每於挂牌之後有致送本衙門家丁道喜一

欸又有所謂門包雖非暮夜苞苴究屬公行賄賂若不嚴行禁革何能整飭官方誠恐各屬未盡周知合行專札通飭札到該府廳州縣即便遵照嗣後務將挂牌道喜門包及此外另有他項名目均一律永遠革除君子愛人以德當官首重廉隅慎勿存見好之心而自蹈不韙本司不諳世法不徇人情言出必行非同一紙具文也其各凜遵毋違切切此札

宣統二年八月

通飭各屬將所帶幕友家丁及薦主姓名開摺稟報札文爲通飭事照得勒薦幕友長隨久經例禁願幕友處賓師之位其敦品勵行者固不乏人而長隨供奔走之需其潔已奉公者實難數覩本司歷官各處攷察情形大抵相同及承乏此邦訪查亦復相似而勒薦之弊均在所難免一官到任伺應需人彼

此營求互相汲引其門如市不論賢愚在各牧令歷練已深或
尙不爲挾制若初登仕版鮮不爲其所欺甚或以上司所薦之
人不得不量爲位置幕友則不分優劣徒探虛聲長隨則妄肆
爪牙大張威勢官固不敢過問民則暗受其殃及至事發嚴叅
然已無可救藥旣違

功令復累官民亟應申明舊章凡州縣到任應將所帶幕友家
丁及薦主姓名開摺稟報以憑查核蓋端方之士取友必端自
好之人用人必慎斷不能祇圖見好於若輩而不自愛其聲名
也合行專札通飭爲此札仰該府廳州縣即便遵照將現在所
延幕友所用長隨是何姓名籍貫派管何事以及薦主何人均
分別註明開摺稟資交卸時併移交後任查照具報察考該府

廳州縣亦當嚴加約束勿得稍事縱容使衙門多一奉公守法之人則小民免遭冤累卽吏治日見肅清本司有厚望焉其各凜遵毋違此札

宣統二年九月

密飭武陵縣管押奸商劉

隆慶

等追繳虧欠官商各款札

文

爲密飭押追事照得該縣奸商劉隆慶劉恒慶等於上年倒閉虧欠官商各款爲數甚鉅迭經飭追延未繳清前據劉隆慶卽劉德沛等來司具呈曾經批飭該縣將劉德沛等帶案管押嚴限追繳嗣又據該商等控奉

撫憲楊批由本司委員會同查追各在案茲訪聞該商等現仍逍遙事外竟置欠款於不理實屬有意拖騙殊堪痛恨合行專

札密飭札到該縣即便遵照尅日差帶劉德沛劉雲章劉壽章到案嚴行管押一面會同委員確查分別如數追繳倘一味瞻徇以致劉德沛等脫逃定惟該縣是問切切毋違此札

宣統二年十月

通飭各屬嚴禁荒民糾搶札文

爲札飭事照得湘省地方人心浮動近來民氣日益囂張一值青黃不接之時糧價較昂輒聚衆橫行糾搶生事甚至并無災患亦藉口飢荒上年省城卽有奸民暴動乃本年四月內瀏陽縣復有貧民要求減價打毀局署強搶米商業經先後獲犯訊明當場懲辦在此等不法匪徒固無足惜然良民已爲殃及事後之補救已遲况官紳果能防範於事前小民俱有身家亦何敢輕身嘗試是欲保衛治安非預爲籌備不可本司前經通飭

各屬各就境內查明共存穀米若干除留存自食之外其餘之穀概令因時出糶以免奸商抬價居奇邇來陰雨連綿麥收歉甚而秋收尙遠爲日方長桑土綢繆尤不可緩合再專札通飭札到該廳州縣卽便遵照迅速確查所轄境內現存實穀若干一面出示曉諭除留食穀之外餘穀卽令各就本省本境糶賣如其情願出借亦准將穀數及借戶姓名報縣存案秋後如不歸繳并准呈縣嚴追倘境內穀米缺乏民食維艱務卽諭飭紳商集資前往鄰境有餘之區源源採買總期民食得以接濟地方無匱乏之虞利己卽以濟人安貧正以保富倘有劣紳梗阻卽據實稟請究懲如痞徒藉端搶掠擾民并准立予拿辦該牧令亦不得因循將事致誤地方仍將遵辦情形稟報查考切切

毋違此札 宣統二年十一月

委員密查訪聞湘鄉縣監犯脫逃隱匿不報并賄和人命

札文

爲會委密查事照得本司等訪聞湘鄉縣申令性極疎慵辦事廢弛該縣有要犯十餘名越獄脫逃內有李朝賓李臨恩等於逃出之後糾集黨羽在江華與廣西交界處所開堂放飄以匪僧爲僞帥該犯等爲大將少將該縣因要犯在逃竟至隱匿不報又有寺僧以斧砍死其徒賄縣重金了案不究并有一毆傷庶祖母之案該縣亦得賄寢息雖以上各節出自傳聞而人言嘖嘖必非無因際此時局艱難地方不靖各牧令應如何講求治理潔已奉公若如所聞實屬有忝厥職合亟密札飭查札到

該員卽便遵照尅日束裝起程馳赴湘鄉縣地方改裝易服按照所聞各節確切訪查務得真實情形詳細稟覆以憑核辦此係特札委查之件該員務當確切查明慎勿稍涉徇隱代人受過切切此札

宣統二年十一月

通飭各屬嚴緝各匪禁革各規費札文

爲通飭事照得居官以除弊爲先圖治以安良是務况州縣官名父母宜以胞與爲懷團紳關切鄉邦應以保衛爲念豈可相沿陋習藉報搶爲索費之媒近聞各屬匪類甚多搶案疊出鄉民赴團投報必索報費數十千否則不爲報官而到官之費尙不止此代書有費進紙有費掛號草鞋又有費民旣被盜累已難堪乃旣不見諒於團紳復受苛求於官吏吞聲飲泣忍恨埋

冤故甯被盜而不報官轉可省無窮花費於是匪膽愈壯匪勢益張士民以官團爲養癰官團又以不報爲得計訪查新化縣自六七等月以來所出搶案不下二十餘起其中有已報案者有未報案者大抵因團紳官吏既處處需費卽幸而差緝尙不知獲匪何時遂皆以報盜爲畏途其流弊乃至於此時方多事羣匪如毛剔弊詰奸不容稍緩今於搶劫重件任令丁役需索卽團紳受費亦罔聞知是豈設官爲民之初意除詳明兩院憲將張令駿基撤省察看外恐各屬似此情形亦正不少合行通飭嚴禁爲此札仰該廳州縣卽便遵照迅卽出示剴切曉諭嗣後民間被盜無論報團報官均不准再有報案掛號草鞋等項使費該地方官一聞具報卽一面馳往勘明一面懸賞

嚴緝不得因循縱盜姑息養奸倘經此次飭禁之後尙有前項情弊一經本司訪聞定即從嚴叅辦決不稍從寬貸也仍將示稿稟資查考毋違切切此札

宣統二年十二月

飭泐鄉縣迅將訪聞匪盜各案詳細查明飛速稟報札文爲訪聞飭緝事訪聞該縣盜風甚熾近來十日之間境內十一都二十都界嶺等處連出盜案三起致斃事主男女三命又十八都喻坊區自十一月二十四日起至二十九日止六日之間一里之內放火燒屋者三處此外傷人放火之案不一而足雖屬出自傳聞然既有失事地名當非盡屬子虛夫盜匪之敢於猖獗大抵因地方官平日之意存姑息既免疎防之咎亦省審解之煩遇有呈報盜案非諱強爲竊卽視若漠然以故匪膽益

張而人言嘖嘖似此一味玩愒本應撤叅姑以案係訪聞從寬
先行札飭爲此札仰該縣即便遵照限文到五日內迅將訪聞
各案詳細查明已勘驗者卽行通報未報者亦卽分別詣勘飛
速稟報並勒限一月內懸賞購線會營督團將各案首從各犯
按名弋獲訊明擬辦該令務卽振刷精神講求緝捕如逾限不
獲是始終不能振作雖加以策勵仍於捕務無裨卽不能再事
寬假也仍將奉札遵辦情形先行具報毋違切切此札

宣統二年

十二月

飭查各錢店行用錢票限年遞減札文

爲嚴札飭查事照得各錢店行用錢票

部章應查明資本及所出票數限年遞減二成上年因常德劉

恒慶錢店倒閉查無票根當經本司札飭該縣等將各店出票數目有無票根可查分別查明稟覆在案乃數月之久迄未據該縣等查覆訪查近來出票之店愈多不問資本之有無不計存錢之多寡一紙飛揚便能獲利甚有註明撥用外票不兌現錢以致錢價愈低銀根日緊且聞刷印舖刷印錢票日不暇給該店等之出票加增可爲明證該縣等身爲民牧於飭查之件既一味泄延而於市面之艱商務之壞亦竟置之不問似此不顧大局豈其見好好商本應立予詳叅姑先嚴札申飭爲此札仰該縣等即便遵照迅將各店出票實數以及有無票根並所存本金實有若干所行之票已否遵照

部章逐年遞減分別確查列表稟覆以憑查核如其資本無多

濫出紙票既壞市面復紊商規務即破除情面將該店嚴行封
禁以肅屢政並飭將以後錢價務與官錢局錢價相等不得稍
有高低倘經此次嚴飭該縣等仍一味瞻徇並不認真查禁一
經本司查明除將濫用紙幣之奸商嚴拏究治外仍將該縣等
立予詳叅決不能以寬容了事也切切毋違此札宣統三年正月

飭

常德府
武陵縣

嚴追劉隆慶倒欠官商各款札文

爲札飭嚴追事照得劉隆慶錢店倒欠官商各款一案迭奉
撫憲

奏叅查抄并經本司電檄催追冀得速行清結以重官款而恤
商情前因該府縣督追疲緩復經委員蘇令馳往會同查追現
在雖經該府督同縣委將該商家產查封備抵而訪聞該府等

類皆不能破除情而任其欺隱并不切實根查以致腴田美物
隱匿寄頓者尙復不少似此瞻徇敷衍爲劉隆慶計則得矣其
如官商鉅款何昨據該府來省而稟廖令以地方太熟欲求量
移夫熟悉情形易於爲治本司則嘗聞之矣未聞因太熟而不
敢放手辦事也查該令調武陵時原以平日辦事切實不辭勞
怨是以特予調署俾將劉隆慶欠款趕緊追繳不意款尙未清
該守且爲之求去不惟有負本司之初望抑該令之巧滑已見
一斑矣查蘇令現委署靖州已飭速赴署任所有劉隆慶欠款
卽責成該府縣從嚴究追合再專札嚴飭札到該府縣卽便遵
照限一月內將劉德沛寄頓財產分別查明提存發交商會備
抵倘該商一味隱匿以致欠款不能速清卽將劉德沛從嚴監

追以做奸狡該府縣如不肯認真查追逾限仍不能速結甚或
希圖諉卸卽亦不能寬容定卽詳請撤任留於該處守催以爲
取巧者戒毋謂言之不先也凜切凜切毋違此札宣統三年二月

飭長沙府查明育嬰堂從嚴整頓札文

爲札飭事照得育嬰堂之設原以撫育女嬰員紳責有專司宜
如何保赤誠求悉心經理乃訪查省城育嬰堂弊竇叢生事多
敷衍上年十一十二兩月先後共殤女嬰一百二十餘口之多
天札相尋傷心愴目考求其故皆由堂中女嬰較多乳婦甚少
員紳又苟且遷就每乳婦一名養女嬰二三口不等乳婦但圖
工價嬰孩非其所生不但乳哺不敷置之不顧卽飢寒飽暖亦
照料難周遂致百病叢生相顧束手委員但按期點驗發給錢

文於嬰孩之壯弱並不深求縱日有天亡亦復不圖補救此外
尙有貼養勸養留養三項具報人數甚多漫無稽考並有以一
女嬰而輪轉數家報名領費員紳則毫無考究聽其欺朦以有
限之金錢而任奸徒之冒濫本爲保全生命適以殘賊嬰孩揆
諸仁人之心殊失設堂之本意且查堂中經費大半出自田
租如沅江之明朗垸從前屢被水災所耗不少近則淤洲日闢
而該垸租穀未加且常年設局收租火食薪資亦多糜費尙有
別縣境內所置田業每年收租僅三千餘石聞原置之田甚廣
而所定租數頗輕若不認真清釐殊非所以重公款而全嬰命
該守宅心仁厚辦事嚴明亟應專札委查以維善舉合行札飭
札到該府即便遵照迅將現在經管省城育嬰堂員紳詳加考

察如果平日辦事得力准予仍留原差若其一味詭隨務卽秉公撤換一面將堂中嬰孩現有若干乳婦共有若干乳水是否充足能否足敷哺養倘嬰多乳少應卽酌量擴充至貼養勸養留養之冒領欺朦並應從嚴整頓一面將各田業租穀查明實數按照近日情形分別增加妥定章程通稟立案總期經費益裕乳婦之工價有資一人乳哺一嬰俾可專心撫育事關慈幼慎勿視爲具文是所厚望切切此札

宣統三年二月

通飭各屬確切考察文武生員及各團紳有無煙癖分別調驗並取具各切結札文

爲通飭事照得禁烟一事爲今日自強要政迭奉嚴旨飭令實行復奉准

禁烟王大臣續定章程各省府廳州縣勸學所諮議局自治會以及各學堂董事或已仕告歸或尙未分發餘亦多有職銜且與地方官時有交涉卽禁煙戒烟亦俱負責任是官之沾染嗜好固應切實戒除而身列紳衿亦何能任其沉迷不返瀟省自開辦禁煙以來於省會設立公所凡文武官員之有煙癖者均經調所查驗其平民之有煙疾者亦已由各州廳縣設立局所勒限戒淨惟士子團紳尙未逐一調驗士紳望重一鄉形端乃能表正況士子在家教學團紳分局辦公雖無官守之可言究爲一鄉所仰望訪聞各屬文武生員以及各都團總多因官查所不及竟至公然吸食沉湎煙霞若不認真飭查將煙禁成爲具文鳩毒何能淨絕合行專札通飭札到該府廳州縣卽便轉

移遵照會同學官速將該學文武生員及各團總確切考察如有沾染嗜好務即分別調驗勒限戒除併遵定章凡有吸食鴉片之人無論何項公事不准與聞其有業已戒斷及確無嗜好者均照章按三個月取結生員由各學官加結團總由州廳縣加結各彙報一次倘戒斷之後復行翻癮或抗不遵戒卽照禁烟條例分別辦理事關禁烟要政該府廳州縣務當實力奉行切勿玩泄瞻徇致干叅處仍將奉文日期遵辦緣由先行查報切切毋違此札

宣統三年五月

批牘一

湘鄉縣查覆職貢李篤悱等聯名上控稟批

據稟及另單均悉王慎威等既充清鄉局紳自應力避嫌怨乃

擅作威福坐堂問案責押自由甚至着落戶族交人先索票據恣意勒罰本屬異常謬妄周舜琴因其舉動乖謬原不難控請查究乃竟聽其弟姪周寶臣等毀局抄據並將王慎威等捉拏關禁雖據供稱并未在場而從中主使恐所不免現已委員馳往查訊仰卽會同秉公查明據實稟辦毋稍偏徇至地方士紳雖賢否不同然遇事一秉至公自可立於不敗之地本司用人行政向惟詢事考言是非不容混淆考察胥歸至當該令惟當認真辦事亦毋庸慮其掣肘也李朝賓劉鴻恩二犯已奉撫憲訪聞勒卽飭拏但押犯脫逃至十餘名之多該縣苟立時稟報何慮人張大其詞乃一味泄沓以致予人口實辦理殊屬不合併速依限緝務獲毋再玩延干咎切切仍候

撫院暨 臬司 鹽道 清鄉局批示繳

宣統二年十二月

候補知府劉桐封查辦潮鄉縣諮議局收受民人陳請書

稟批

據稟已悉查此案前據申令稟稱委員王令在鄉送縣拘留者共二十八人迨九月二十九日王令由鄉回縣並未言其尙有拘留在鄉之人亦未言及尙有查辦未了之事等語是在鄉拘留各犯均經王令送縣收押自無別項拘留之人今該守查明王令回省時公所尙羈有十二人王宅亦收有四人不惟與縣稟不符且王令在縣清鄉時尙知將所獲之人送縣豈有事竣回省之日轉將所押之人交與賀紳等押放之理況王謨係屬民房並非押人之所王令縱任意拘繫王謨何不於其未起程

以前催令將所押各人送縣直至王令去後始將所押四人送歸公所揆度情形難保非王謨等舞弊私押自肇衅端因被扭辱飭查遂欲諉之王令希圖卸過如果所查屬實則是王令辦事糊塗倘係王謨等飾詞亦何能概從寬恕應候飭知王令明白稟覆再行核辦至辦理清鄉乃查辦歷年積匪若藉荒搶穀之案自應呈由地方官訊辦賀惺等輒藉清鄉之時任意勒罰以致衆論不服陳請查究該守遽聽其一面之詞謂其所罰無多不加究詰辦理亦屬模稜周保臣等聚衆毀所情亦難寬仍應究明王謨等有無私押曾否藉端訛索以定罪名之輕重不能僅將罰穀退還遂可敷衍了事該守奉委澈查均未確切根究殊欠核實除錄批呈報

撫院暨移 清鄉局並飭湘鄉縣查照分別辦理外仰卽知照
仍候

撫院暨 各司道局批示繳清摺存 宣統三年二月

實業學堂監督曹紳典球稟批

據稟該堂亟須工場實習請借銅元局布置機件等情查實校
借地一案上年十二月二十二日准提學司抄詳移會錄奉

撫憲批示本司察核原詳以爲該校工場重在演習不過購用
輕便機器以作模型銅元局房屋既寬機件尤鉅以之借用未
免用違其材而該監督原稟情形幾於全局廠機皆在該校範
圍之內且提學司原議僅需借用廠房而該監督稟辭則謂房
屋器具全行點交本司在粵在申在鄂曾歷當製造鐵政槍炮

諸差機器內容亦嘗稍窺一二銅元局舊存機件不合該校之用可以一言決之該監督爲躬親實業教務之人何以見解反出本司之下是明知不適於用一味借詞朦混本司素重辦學人員未肯嚴辭駁斥是以前次具詳惟以造幣廠選用爲辭以外不加一語本司之寬厚含容該監督豈竟不能默喻本司仍恐憑虛懸揣容與事實未符又經派員會同該監督實地履勘并勘明稻穀倉地方舊製造局有地四百餘方有房六十餘間與該校同在城中頗合該校之用較之銅元局隔闕城外聯絡尤覺便宜該監督從前開校不擇地於寬廓處所預留工場地基轉擇地於落星田逼仄之區致今日毫無展布該監督業已自誤於先此時得此城內就近地方自應樂從於後詎意所謀

不遂堅執如初本司辦理此案既絕該監督圖佔機廠之狡謀勢不能再拂提學司借地設場之原議是以本年二次具詳仍以舊製造局借給爲請總之該校工場苦於無地本司借地業有四百餘方苦於無房本司借房業有六十餘棟乃該校學生不候

撫憲批示如何率於本月初一日徧發傳單要約停課一若銅元局一日不借該學生等卽一日不休以致初二日諮議局有敦促點交之函初三日教育會有數月未交之詰所最異者謂該監督無法理處惟有辭職今核來稟自述數年經歷意在矜功兼求借銅元局地方依然要挾無已本司於初五日始奉撫憲批示准以舊製造局改撥該校作爲實習工場目前姑將

城外銅元局暫借開辦一俟製造局修理竣工再將銅元局遷讓不得久踞等因本司現奉

憲批自應遵照會同提學司妥爲籌辦惟查學生聚衆要求停課罷學久干嚴禁該監督所司何事何以不阻一辭卽非煽惑於臨時亦係縱容於平日勿謂年久有勞遂可置身事外也凜之切切此批

宣統三年三月

常德府會稟議結劉德沛田業抵還官錢局欸項並勻攤商欸花票各情形批

據稟已悉劉隆慶倒欠官商各欸爲數甚鉅茲經該府縣等將其家產逐一查封估價備抵擬將許子鑫田價益萃和還欸以及毛汶障等處腴田抵還官錢分局本利并將獨獅街等處房

屋提歸各票商管業其餘所欠本地紳商各欸則以流花口等處房屋及大連障田產均勻攤派至未兌花票卽將官錢局退出田畝及朱貴堂田業并查封各貨物先行變價發兌辦理尙屬妥洽惟所抵官錢局各欸雖有田產作抵而一時承買無人則欸尙虛懸應責成許子鑫迅速變賣歸款不准藉詞推延且查劉隆慶共欠官商各欸銀三十餘萬兩現在查獲家產約略估計尙未及欠數之半以劉隆慶素有富商之名其家產必不止此顯有寄頓情弊况各票商旣稱劉隆慶寄匿大宗以劉子信一人爲最應准由司詳咨通緝務獲歸案嚴追至所欠王紳以愆一欸查核簿據旣祇一萬四百餘兩卽詢諸管事唐吟舫亦稱祇有此數是劉德沛所稱六萬餘兩自不足信應卽照簿

載之數分別攤派以杜朦混他如大連障田三千六百餘畝既已捐入學堂自應仍歸學堂經營其餘不論何項田房應卽一律提交商會攤派不得任其朦捐希圖肥己至劉德沛此次倒欠鉅款與因虧負累者不同照商律有心倒騙之案除將財產貨物備抵外酌量情節分別限年監禁一面確查寄頓財產從嚴追繳再由各商分別勻攤仰卽遵照辦理仍候

撫院暨 學司 臬司 官錢局批示繳

宣統三年四月

滿鄉縣會覆查訛謔議局收受民人陳請書稟批

據稟及另單均悉王慎威賀惺等奉委清鄉該縣未奉行知鄉聞又疑爲假冒究竟王慎威等之奉委有無其事該印委竟未查及殊屬疏忽應仍由縣查明稟覆至委紳清鄉以及各鄉設

立團總僅有幫同查緝之責並無處罰懲治之權乃王慎威等於着交人犯則勒書錢票甚至勒書沉溺字約縱云並未實行究屬擅作威福即各都團亦有藉案苛罰之案多起雖據稟已飭如數提還而王慎威及各團紳之荒謬專擅已可概見本應照例懲儆姑以事屬既往該印委業已分別議結從寬免其深究仰長沙府飭仍由縣剴切示禁嗣後各都團如有不法痞匪務卽隨時送縣究懲不准各團紳在鄉私行懲罰以肅政體倘再藉公妄爲一經查明定予嚴究不貸決不能再爲之寬也仍候

撫院暨 各司道局批示並移委員知照繳

宣統三年四月

湘鄉縣呈覆連出盜案三起稟批

據稟已悉州縣爲親民之官必須時與民親乃能得其情僞凡事不可無定見然亦不可有成見倘膠執成見於胸中則無往而不懷疑慮况官之所謂小事卽民間之所謂大事以竊賊拒殺事主在官以爲蚌起於竊與糾夥強劫不同不思民間旣失財物又傷性命其切膚之痛孰有甚於此者使能認真嚴拿有犯必辦宵小自能斂迹地方卽無間言所謂爲治不在多言顧力行何如耳正不可因係竊賊遂視爲小事而玩忽也至匪徒放火雖與江家坪之案無涉然燒至四次之多究不能目爲非匪該令仍應趕緊勘明迅速查緝眞匪及各兇賊務獲究報勿稍因循勿存迎合卽可自立於不敗之地本司用人行政均無成見惟察言審事以視其人之自取而已該令勉之仍候

撫部院批示繳宣統三年四月

委員彭守汝疇澈查永順府縣前領省穀情形並陳補救

辦法稟批

據稟已悉此案據前任永順府金守原稟稱汪升令文溥在永順縣任內請領省倉穀一萬石截留一半交紳領運分放迄今顆粒無存應還省穀亦蒂欠不清等情奉

撫憲批司檄委該守往查自應將原領留儲郡倉穀五千石現存若干實虧若干解省穀五千石已解若干未解若干分別詳晰查明追繳歸倉批解方爲不負委任乃披閱來稟開載虧數諸多含混駁不勝駁姑摘其顯而易見者言之如省倉發穀運抵辰州楊文治等赴辰迎運如果量失穀六十二石卽應由押

運之人賠交何肯輕於收受迨由保靖縣就地撥去穀一千五百石後餘換小船裝運赴郡灘河險阻沉沒容或不免遠道運脚需費及沽水微變均尙在情理惟各欸俱當出於息穀及糶價羨餘之內不得在原領穀石內扣除稟稱由楊文治等報經府縣核銷維時並未據稟報有案豈能據以爲實况卽就原稟而論汪升令任內存穀僅四千七百九十三石二斗存錢止三千二百四十六串一百九十二文與原領穀數不符該府縣何以稟請以五千石還省以五千石留郡備荒先後參差猶謂汪升令無所短交楊文治尙無浮冒殊屬自相矛盾嗣接辦平糶仍由該前府徐革守委唐昌麻等起運辰州王村兩處存穀四千七百九十餘石如原存之數不虛楊文治等又無侵蝕卽令

稍有耗費何至連前現款欠欸僅存錢八千九百二十餘串存穀四十五石五斗此中情節疑竇滋多若以爲月份有先後府縣有去留遂可藉此卸責未免強分界限且三十三年該前署府許守任內據永順縣鍾令申請每穀一石折錢一千二百文合共折繳價錢四千二百串文陸續解由前善後局援照成案以錢合銀每兩作穀一石作收穀二千四百零五石九斗核計前存現款欠欸錢八千九百二十餘串存穀四十五石五斗除解繳外尙應存本錢四千七百餘串存穀四十五石五斗何以該紳等摺報連本息僅存錢四千二百四十餘串究竟歷年息錢若干彭楚杰等餘欠若干均未據縷晰聲明其中顯有弊混尤難解者三十四年許守提存款三千串委唐昌庠等並加委

楊文治分赴常德長沙採辦米石既免釐稅猶虧折錢一千五百餘串之多以數千串採辦平糶要款所失竟已過半殊駭聽聞厥後金守到任督同前署永順縣俞令辦理宣統元年二年平糶連自捐穀並京官捐款暨新收彭楚杰等欠數一並歸入省穀彌補舊虧於平糶事竣後經俞令及接任邢令陸續買穀填倉並收齊周翰尾欠永順一縣截至宣統二年臘月底止統共存現穀一千八百八十餘石存各紳未繳穀一百七十石有奇並錢五百四十餘串又保靖一縣截至三年二月底止存本息錢二千二百一十餘串通盤計算原領省倉穀一萬石除已收二千四百零五石九斗外僅存穀二千零五十七石七斗二升二合六勺錢二千七百六十七串二百六十九文加以金守

任內捐穀捐款虧蝕穀數當在四千石以外是經理之不力尙復何辭強爲解免總之倉儲爲備荒要政卽民生性命攸關現在迭奉

諭旨飭除積弊責成地方官切實整頓處分綦嚴無論起運平糶其間折耗沉沒徵變運費均有息穀及糶價羨餘可資彌補若任其將原領穀石隨意扣除則處處皆可虧失儲備雖豐不數年必消耗罄盡萬一年逢荒歉民食匱乏一時無以接濟勢必釀成事故咎將誰歸此案經金守稟報

度支部暨

兩院察核該守奉委前往澈查當必能認真查考不圖稟叙含糊若隱若見反謂無形虧損爲理勢所必然而又欲以區區存

數發交將近倒閉之質當生息彌補豈獨已虧之穀虛懸無著
卽僅存之穀恐亦立致消亡識解更屬悖謬非由接署府李守
調查全案卷據將短收短交耗費折損拖欠各項及歷年息穀
節次糶價並實存實虧已解未解各若干逐年逐欸切實勾稽
開列清單呈核仍分別從嚴追繳歸倉批解何以備緩急而重
公儲除錄批呈報

兩院憲並移財政局外仰該守趕緊查照批飭事理逐一遵辦
據實開摺通稟核奪事關備荒要政務宜破除情面防患未然
毋得稍涉瞻徇代人受過是爲至要並移委員彭守知照仍候

兩院憲暨 財政局批示繳 宣統三年五月

示諭一

關防詐僞告示

爲關防詐僞事照得本司世受

國恩至優極渥道光年間

先大父開府此邦迄今正一周甲子白頭父老猶有能道及當年政績者否咸豐之季江浙淪陷

先忠節公獨守孤城糧盡援絕爲

國捐軀情形慘烈本司未屆就傅之年卽避亂來湘及歲引見奉

旨錄用始而供職京曹嗣則分巡鄂北正筭淮南之權旋提嶺表之形茲復仰荷

恩綸開藩南楚重來舊地依然嶽峻湘清念昔

先人更覺民胞物與惟有權無旁落事必躬親陋規切實全除
僕隸嚴加約束鬪防詐僞參劾貪污勉盡職分所當爲宣布
朝廷之德合亟出示曉諭爲此示仰通省官紳軍學商工各界
諸色人等一體知悉本司求賢若渴疾惡如仇在湘宗親例應
迴避者悉令出省其餘族戚誼飭引嫌自愛倘或不循禮法則
大義滅親一律科罪決不寬恕如有不法棍徒以及本署書役
人等在外招搖捏稱謀缺謀差希圖撞騙得錢雖小過必重懲
卽微賍亦同坐本司前在兩淮曾有實職人員甘罹法網事發
從嚴處治以致身敗名裂可爲前車之鑒嗣後由司暗訪明查
以期有犯必獲其能來轅舉發者給以犒賞扭送申訴者定加
優待片言可折三尺無情其各懷遵毋違特示

宣統二年七月

曉諭各房書吏並定各項紙筆費若干及永遠禁革門房費告示

爲曉諭事照得察吏首在安民而安民必先除弊本司下車之始夙夜兢兢深虞偶被欺朦有妨吏治故時以痛除積弊嚴駁僕從爲首務業將各屬掛牌道喜門包等款以及另有他項名目一律永遠禁革並明定詞費分別牌示通飭在案尙有各房書吏平日承辦事件或就事取資或因時索費除戶糧漕南兵一兵二驛站倉工各房俟設立公所後歸併裁免外現查吏房所得規費最著凡遇正佐人員補署到省驗看註冊丁憂起復等事無一不有筆資多則四五串少則一二串至二三串不等其中有由書吏致送門房等費此外刑房承辦請領囚糧

亦有內費等項名目雖屬率由舊章聞之實堪駭異既非其應得之款又何能聽其肆意取求現正籌設度支公所分科辦事所有舊日書吏擬擇其明白熟悉分別派爲書記員繕寫生在書記爲出身之始將來卽屬職官自宜潔己奉公以圖上進若繕寫生終年謄寫辛工無多倘並此筆資而無之似不足以示鼓勵本司業經詳定仿照湖北辦法仍留補署到省驗看註冊丁憂起復等項紙筆費明定限制通飭各屬查照辦理所有平日吏刑各科致送本署門丁一切規費均一律永遠革除不得再有需索除詳明

兩院憲暨通飭外合將核定各款先行示諭爲此示仰各房書吏知悉自經此次核定之後該書等務各凜遵其業經指出之

欸固不准格外增多其未經指出之欸亦應一體遵辦如有巧立名目陽奉陰違甚至分外要求肆行無忌一經覺察定即從嚴究懲決不稍事輕貸其各恪遵毋違特示

宣統二年七月

酌定紙筆費及裁免規費開列於後

一正班補缺優缺定洋十八元中缺十二元瘠缺六元

一佐雜不分優瘠定錢四串文

一正班到省繳憑定錢四串文

一佐班到省繳憑定錢四串文

一教佐考驗領憑定錢四串文

一教佐考驗註冊定錢四串文

一教佐俸滿驗看定錢四串文

- 一木籍人員請咨赴引赴部赴選定錢四串文
- 一候補人員請咨赴引改省回籍定錢四串文
- 一正班委署定錢四串文
- 一佐班委署定錢四串文
- 一教職委署定錢四串文
- 一正佐告假措資修墓年滿甄別定錢四串文
- 一酌委超委實授試俸定錢四串文
- 一核准開復人員定錢四串文
- 一候補丁憂請咨定錢四串文
- 一本籍丁憂起復定錢四串文
- 一繳照繳咨到省註冊定錢二串文

一識認印結定錢二串文

一報充典吏定錢四串文

一典吏考職定錢四串文

以上二十款除原註二串不減外其餘承辦一事只准取錢四千文如敢多取定予懲辦著爲定章

一每年三節禮錢十五千六百文每節送五千二百文交門房

一每逢到任禮錢五千二百文交門房

一每年二門假費錢一百串零零八百文每月送八千四百文交門房

一教佐驗看送牌費錢二千二百文交門房

一正佐請給咨文錢一千文交門房

一正班補缺部文行知費錢二千文交門房

一佐班補缺部文行知費錢一千文交門房

一吏員給照費錢四百四十文交門房

一吏員考職行知費錢一千二百文交門房

凡列送門房九款永遠禁革

一刑房每年發囚糧藥餌約計每年共發銀三千數百餘兩每

銀一百兩內費三錢大約每年共費銀十餘兩三節扣算送門房

一假費每年年終送錢二串文交門房

一每年小費錢一千二百文送門役

以上內費此後不准扣送所有門房費均永遠禁革

飭各房清理案卷諭附章程

爲諭飭事照得本司衙門爲財政總匯近年來新政調查文牘

雜沓至繁至鉅亦至纖至悉歷久塵封卷如山積鼠耗蠹蝕往往棄置不顧前司雖定有粘卷功過章程各房之整卷者固多而散漫難稽者實亦不少本司蒞任之始正議改設公所分科辦事之時所有各項案卷尤應逐件清理庶不致顛倒錯亂遺失緊要卷宗茲經本司酌定章程勒限清理除委員專司督察外合行諭飭諭到該房即便遵照所定章程自七月初六日起每日輪派書吏六人挨次赴各房清理限一月內竣事將所清各卷編號登簿以憑查核倘有任意延誤定卽照章嚴懲不貸其各凜遵毋違切切特諭

宣統二年七月

酌定清理本署各房案卷章程六條

一司署及各局現議歸併各房文卷散佚亟應逐件清釐

粘連成卷逐案編號詳細登簿彙存一處分別歸檔以
免遺失

一粘卷應以歷年欽奉

諭旨暨通行

部章

兩院單行章程爲入手辦法次及本司衙門銓補收支

錢穀漕糧

奏銷交代各案據并各道府廳州縣各營一切案件均須
分年分起逐一清釐散者整之闕者補之務期全案具
在俾隨時檢查有所依據至各屬詞訟月報及無關緊
要例件均另歸一束不必粘連以省繁曠而清眉目

一清理卷宗現經本司派定委員二人專司督察各房應聽指揮每卷清齊後由委員閱看再行粘連以免遺漏錯亂每日自上午八點鐘起至下午四點鐘止共計清卷若干并摘叙事由登記印簿以憑隨時調查

一各房自奉諭日起逐日輪派書吏六人在各房挨次清理由本司按名發給火食不令其枵腹從公如派定後有怠惰不到者每日記過一次積至三過卽行革卯不准復充并且開其底缺至各房所管卷宗如有散漫遺失卽責成該房趕緊清理

一各處經書多有將緊要案卷携歸私室視爲不傳之秘實屬陋習湘省恐亦難免現旣逐一清理必須核實但

令全案具存本司亦不予深究經此次清釐之後如有仍蹈故轍私將卷宗携出或所粘卷宗未能完全定卽權衡輕重分別懲辦

一各房卷宗均限一月內一律清理完竣倘所派書吏不敷准其呈明加派各該房如能踴躍從公不誤限期卽由委員稟請存記俟度支公所成立分別派充書記長及書記寫生之任以示獎勵如敢因循草率定卽立予革卯不稍寬貸委員若督察不力併卽記過示懲

嚴禁飢民橫行爬搶告示

爲會銜出示嚴禁事照得頻年以來湖北疊遭水患窮民失所餬口維艱雖經賑撫兼施而其間遷徙流離不免越境求食此

固一時迫於飢寒情非得已然堤垸均已修竣下游水亦涸復
本年收成豐稔鄂省均獲有秋凡出外逃荒災民誰無田廬誰
無家室自應及早歸農各謀生業乃昨據衡山縣稟報該縣外
來災民猶復紛至沓來索討不遂強搶橫行似此藉災爲由恃
衆滋事既干

國法卽無可矜查飢民爬搶例有明條輕則徒流重則斬絞罪
名綦重豈容嘗試而擾害治安第念愚民昧於例章或致誤罹
法網本司等性嚴嫉惡然不忍不教而誅除分飭長善湘潭各
縣暨水師各營隨時截留押回外合亟出示申禁爲此示仰各
逃荒災民人等一體知悉須知爾等各有身家豈可在外流蕩
際此時和歲稔尤宜早自還鄉故園雞黍桑麻終勝蓬飄萍泛

若仍以逃荒爲得計藉搶奪爲生涯漂泊自甘資遣不返成羣作惡理喻不遵既非安分之良民卽爲法律所不宥准由各鄉團保及受害之人隨時報明地方官及水師防營一體嚴拿分別解究凡爾災民同屬

朝廷赤子各宜速歸故里慎勿在外飄流倘仍逞其冥頑不遵誥誡則是自貽伊戚甘犯刑章三尺無情本司等決不能稍從寬假也其各懍遵毋違特示

宣統二年十月

禁革規費牌示

爲牌示事照得民間詞訟壽張爲幻者固多然果有不得已之情自不能不立爲伸理訪查從前積弊凡赴司遞呈者每詞一紙各房書必索費錢貳串餘至三四串不等由來已久變成習

慣此等需索實屬病民亟應明定章程以杜肆行訛詐合行牌示爲此示仰諸色人等知悉嗣後民間來司控懇每一詞祇准給筆資錢肆四百文如係貧寒仍不准取除所定筆資之外絲毫不得加多倘有吏胥巧立名目藉端需索准遞呈之人隨時喊稟卽當立提重究如赴懇者甘受愚弄甚至以財行求一經發覺定卽與受同科本司言出法隨決不稍從輕貸其各凜遵毋違特示

宣統二年七月

嚴禁郵呈電稟牌示

爲出示曉諭事照得士民許控本有一定例章無論爲公爲私自應備具正稟或由本人親遞或遣抱告具呈方足以杜假託而免欺飾乃自交通便利匿名控告相習成風一紙郵書任情

作偽數言電稟不具真名甚或詭託公呈行其私計及至官爲查辦大都任意譁張實據毫無空中結撰縱有影響亦非真情不惟委員費用虛糜抑且無辜被其牽累株連者已爲拖害挾詐者轉行得意本司歷官各省久已習聞今雖初莅此邦訪聞郵遞控告之風亦所難免在民間疾苦固宜加意勤求而官吏貪污亦應隨時參辦若陰謀狡譎惟存陷害之心既損治安卽干法紀用特先行示禁爲此示仰合省諸色人等知悉嗣後各士民如有實在冤抑准其補具正稟親赴本署具呈以憑委員訊明立予分別伸理卽關係地方公事如道途遙遠亦應呈由地方官轉詳倘有郵遞呈詞以及無名電稟無論情之真僞事之公私卽予立案不行以免淆惑觀聽本司實事求是期於嚴

杜欺朦慎勿視爲具文希圖嘗試其各凜遵毋違特示

宣統二年七月

上捏之人務各取具各店保狀牌示

爲牌示事照得審判廳未經成立以前民間之來司上控者自不得不量予准理惟情僞百出其逞刁圖累譁張爲幻者恒所不免迨經批飭押發非抱告潛逃卽係托人代遞問之號房而號役不知詢之歇家而歇保無有及至批行下縣而州縣往往飭傳原告不到遂將案證久拖若不亟籌整頓之方殊不足以懲刁告而杜拖累合行牌示爲此示仰諸色人等知悉嗣後凡來司上控之人務各取具各店保狀一紙隨呈投遞該遞之人卽在歇店聽候批示無歇店保狀原詞不收倘歇店旣已結保遇有押發而其人已逃匿者卽將該保人發縣着交決不能任

其推諉以免拖延切切毋違特示 宣統三年正月

電稿一

代撫院擬覆政務處

政務處鈞鑒湘省試辦三年預算本已核實祇以近年增加用
款多未籌有的款故不敷達壹百六十萬而明年應辦之事尙
不在內奉度支部核增入款八十餘萬核減出款八十餘萬當
飭清理財政局切實籌議茲據覆稱入款勉從增加三十餘萬
出款設法裁減六十餘萬惟追加賠款公債等項又增大宗出
款雖經籌增入款百餘萬以入抵出尙不敷貳十八萬三千數
百兩實已入無可增出無可減容再隨時撙節相機加籌以期
收支適合擬即分別奏咨懇照此次增減預算作爲定案聞資

政院以全國預算不敷達五千餘萬大加裁減淵本瘠區浮糜
素少若專以消極爲主義則辦事必至無所措手而舊政尙難
整頓新政曷克進行財用爲行政命脈情形非親歷不知資政
院但求削足適屨必多窒礙難行且現在粵蜀有警湘省邊防
尤爲吃緊預算已裁之欸尙恐未能盡遵預算已列之欸斷難
再爲刪減務乞

鈞處竭力維持湘省幸甚

宣統二年 月

致常德府譚守等

常德譚守廖令章倅長密劉隆慶店倒欠官商各欸
撫憲已電奏請將店東山東試用道劉德沛同知銜劉藻芹卽
劉德馨一併暫行革職並提同劉子鴛從嚴押追奉

旨著照所請該部知道欽此等因恭錄行司查劉德沛等所欠官商各欸尙三十萬現已奏革嚴追該府及縣委即將其所有家產共若干迅速查封交商會備抵萬不准聽其隱瞞寄頓將磽瘠田產破爛衣服充數務期欠欸有著如再狡延卽提劉德沛等監追如再瞻徇定惟該府縣是問仍先將查封情形電覆藩署寒

宣統二年十一月

又

常德譚守韋倅廖令漾電悉查出劉隆慶田產器具輪船等項應令商會先行點收封存一面查明隆慶花票益智藥局已收回若干曾否塗銷未兌者尙有若干有無根據可考該店已印之票未經行用者尙有若干均先查明確處速復一面密查如

有寄頓卽行查封藩署迴

宣統二年十一月

又

常德譚守蘇令韋倅廖令豔冬兩電悉常德花票縱無票根必有號簿隆慶未收回之票約五萬串內外如查有的數亦應照數攤付以昭公允惟破產查封各件應交商會收存經理既係由官發交無所慮其誣害卽移商會遵照至劉子修及克篤已飭長善兩縣及益陽縣密拏並詳咨通緝矣惟其在漢口益陽等處與何人合買是何牌名並速查覆藩署江

宣統二年十二月

又

常德譚守廖令蘇令恒慶欠官錢局除還下短本息銀四萬七千餘兩由胡紳樹榮擔代變產歸欵現在已否繳清隆慶欠官

商各欸前於廖令稟明白批示已否切實遵辦仰卽據實電復
藩署效

宣統二年十二月

又

常德譚守沁電諒悉頃又據常德商會電稱有宋仁粹到常收
捐未敢深信並稱宋商欲加壓力將貨充公等語查宋商係隨
汪倅朝宗到常商同地方官辦理何以抹煞委員專言宋商且
充公之說非委員不能實行如土店並未違抗該委員斷不如
是顛預如果違抗事關禁煙要政該會亦斷難保護何必曉曉
力爭揣其用心保非該處土店弊端較多不願外人經手該守
督同廖令與汪倅尤須從嚴稽查無任弊混再據長沙沈令面
稟汪倅已給調查單各店尙未遵繳仰該守迅飭填繳不准稍

延並傳該商會知照藩署儉

宣統二年十二月

又

常德譚守兩電未得復正擬電詰適接豔電又據該會勘電稱宋商資格不合擬由會舉商經收其二成津貼除局用外儘數報効城工等語查宋商係照章由官選派並未公舉殷實與否關係官欵與該會無干二成津貼因恐收捐較少之處不敷開支姑從寬計若收數較多本省公虧鉅萬自應酌提充公何待商等報効至城工係該守等稟定紳商認有的欵何得於此中希圖暗抵該會牽混取巧尤爲可惡仰卽會督汪倅廖令妥爲辦理如該商會等再肆妄干定惟該地方官是問藩署豔

宣統二

年十二月

致醴陵湘潭岳州常德等局

現奉

撫憲札開已電奏准禁運穀米出境除輪運按約二十一日計算應於五月初三日實行禁運外如係商民船隻販運穀米出境應以奉此電之日爲禁運之期凡出口米穀均不准報收釐捐惟在出示前已經載運米穀之船隻自四月十二日起寬限三五日內前赴該局完納釐捐趕緊出境過此限後卽嚴行阻禁毋稍通融至內地穀米仍照常流通完釐卽遵照辦理並先由該局趕緊錄電出示曉諭商民札已飛行此電藩署印真

宣統三年四月

致岳州等局

岳州專送雷灣盤米兩局米穀阻禁已詳前電惟該局兼收出口盤捐凡商民在出示前已經裝穀米之船隻應以四月十二日起算准予酌量寬限三日五日完納盤捐飭令於限內一律出口以示體恤過三日五日之後均嚴行阻禁毋稍通融至內地穀米仍照常流通完盤仰併前電出示曉諭藩署印真

宣統

三年四月

致湘陰等局

湘陰專送蘆林潭米捐局文電悉頃奉

撫札已委彭守家驥前往岳州等處各要口會商袁楊兩統領梭巡查察妥籌布置矣仰卽知照藩署元印

宣統三年四月

致湘潭局

湘潭余令轉彭守已奉

撫札委該守前往岳州會同袁楊兩統領辦理阻禁事宜仰卽
迅速回省遵往潭事仍責成余令蕭令會同辦理併卽轉飭遵
照藩署印元

宣統三年四月

致湘潭縣余令

湘潭縣余令據易俗河士紳電稟前彭委封存倉米各行戶裝
運罄空等情如果屬實殊爲不法仰卽確查電稟聽候派員復

查核辦藩署印嘯

宣統三年四月

致湘陰等局

湘陰專送蘆林潭米捐局刪電悉十五到之米船據稱確爲風
雨阻誤情尙可原卽完捐放行後不爲例並由該令將此電專

送岳釐米局遵辦至平江採辦米船辦法甚是扣押四船完捐後仍照放行嗣後該縣運米辦法應仍以司照爲憑放行不令繳捐已另札飭遵矣鄂工賑局運米應查驗護照放行惟未完捐者仍按數徵捐已完者切實驗數俟由省總局查明總數再行飭知藩署總局印銑

宣統三年四月

致常德府

常德劉守譚守迴電已轉縣令頃據孫令東電稱沅江以下購米緩不濟急除各處採運外仍懇電飭通融准購六百石等情爲數無多當與常德民食無礙望卽允許仍電復藩署江

宣統三

年五月

代撫院擬致督院

武昌瑞督憲鈞鑒馮電祇悉洪江局關繫重要文 亦所深知
惟川滇土葯封禁來源既已有限而局費營餉歲需不貲入不
敷出有可斷言又現在土稅改歸自辦請部協助恐亦無效頃
與南藩司籌議擬將省內自產土葯均實行禁運出省凡自產
土葯無論在省內何處銷售統由產土地方局處每百斤收統
稅及經費銀二百三十兩專注重於分查內銷嚴稽出口兩方
面如係外來持有運照之土藥屬於落地者由內地各局處嚴
密設法稽查徵收半稅屬於過境者由緊接湘鄂湘贛之第一
堵卡查緝兼施倘外來土藥並未持領運照及稅單者查出均
照本省自產之土完納全稅仍不准出省銷售誠以湘省外來
之土以川滇居最多數川滇既已封禁是應行報完起運半稅

之士誠如

鈞電所示起運省分先無收稅之理如有出境卽係私運湘省卽照本省自產土葯一律辦理亦不爲苛尤足杜私販妄希取巧圖利之望如此措辦雖非注意入口第一局而稽徵並重要與鄂議過境土葯辦法原意無稍出入至保商營一節查川滇現旣封禁來湘之士自係零售私運決無大宗土販入境與從前須置營保商情形不同擬請毋庸接續募辦押送一層現湘省旣不注重入口首局擬由出口首局查驗土葯票花符則蓋章准其出口不符則按數罰辦亦與鄂章大旨相合由輪載運之士藥劑中亦間有由宜漢報關之川雲各土來湘銷售者應得半稅擬請自改收新稅之日起飭於另欸儲存項下分列指

銷湘省應得之欸俟

憲台電部商定辦法後再行照撥當否統乞

垂示再副將斌生現經派充 路統領合併陳復

宣統三年五月

上督院

武昌督憲鈞鑒奉

撫憲札准

憲台咨開土藥統稅改歸自辦現已酌定辦法並票花式樣等
因飭卽遵辦

蓋畫周詳至深崇佩查湘省自產土藥經本司竭力禁拔現已
畧具成效以後凡湘省自產土藥擬概行禁運出省銷售以絕
種戶之望而清私種之源至過境土藥自應遵照

憲示准其照常出入湘任稽查惟湘省土藥入口第一局以洪江爲首要土販往往聚衆千人荷担橫行堵則甚難查亦不易前部局於西路一帶設卡養勇開支甚鉅現按照稽而不徵辦法是否卡與勇俱不可少而此項支款如何撥用應請

核示者一本司前詳注意分查內銷亦深以入口之難籌妥善辦法也至押送過境憑單入鄰境時卽將憑單繳銷自應由鄰境派勇陸續押送湘省爲黔土過境孔道如需派勇逐一押送開支亦復不少惟旣在稽而不徵之範圍亦不能與起運落地多數省分以取諸固有還諸固有者相提並論此項支款如何撥用應請

核示者二本司重負烟禁財政兩端專責不能不通籌並顧以

期進行無阻仰副

憲台力除痼疾之盛心伏乞

鑒核示遵再部局原章海關起運第一口應完統稅均由稅務司代徵此次奉示改爲起運落地各收半稅如在海關報運之土稅應如何辦理未經規入是否另有專章并乞

垂示除呈報

撫憲核示外 本司 謹 彙 彙 叩 啓 宣統三年五月